

Leb-Thur



Thur: Leb-Thur (New Testament+) for Uganda

Leb-Thur Thur: Leb-Thur (New Testament+) for Uganda

copyright © 2024 Wycliffe Bible Translators, Inc.

Language: (Thur)

Translation by: SIL Uganda

Contributor: Wycliffe Bible Translators, Inc.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-10

PDF generated using Haiola and XeLaTeX on 10 May 2025 from source files dated 10 May 2025

61e7f4da-dc0f-50a1-9dae-64ee1b392d80

Contents

Matayo	1
Marako	62
Tic k'Ekwëna . . .	101
1 Korinti	162
2 Korinti	188
Jö Galatia	205
Jö Epeco	214
1 Jö Tecalonika .	223
2 Jö Tecalonika .	229
1 Timoteo	232
2 Timoteo	240
Yakobo	245

Emuth na Bér i kom Yecu kite na Matayo öcöö

Köp na tye i buk ka Matayo

Emuth na Bér na Matayo
Öcöö kobo emuth na bér i kom
Yecu ni en obedo alar n'écikö,
ené ngat n'Obanga ocobo
cikérë mérë na en öcikérë ki
jögë i buk më Cik na Cön.
Emuth na Bér ni ba obedo pi
Eyuda kékén, kanya énywölö
Yecu éka obedo ie, éntö pi lobo
thükü.

Buk ka Matayo écanö körë
ki körë. Buk ka Matayo
cakérë ki köp më nywölö
Yecu, köp i kom batica mérë
éka atématëma, cë dong cakö
tic mérë më titö köp, pwony,
éka cangö jii i Galilaya. Kinge
man buk ka Matayo nyutho
woth ka Yecu ki i Galilaya yo
Jerucalem ki gin n'ötümérë i
cabit ka Yecu më ajiki, makö
en, guro éka ki cer mérë.

Emuth na Bér ni nyutho
Yecu na calö apwony na pирë
tëk, na tye ki twëro më gonyö
tyën köp më cik k'Obanga éka
na pwonyo pi ker k'Obanga.
Pwony mérë na pol ocung i
kom köp na papath abic: (1)
Pwony n'epwonyo i wi kidi,
na makö kite ka dhanö, tic
ka dhanö, twëro ka dhanö,
éka cwodo ka jö më ker më
polo (Cura 5-7); (2) Cik n'ëmiö
both élübör Yecu apar wie
ariö pi ticgi (Cura 10); (3) Car-
olok i kom ker më polo (Cura
13); (4) Pwony i kom tyën köp
më lübü kör Yecu (Cura 18);

ëka (5) Pwony i kom karë më
ajiki i karë ni éka bino më ker
k'Obanga (Cura 24-25).

Kwere ka Yecu
(Luka 3:23-28)

¹ Man ené kwere ka Yecu
Kiricito, akwar Daudi, akwar
Abraam:

² Abraam önywölö Icaka,
Icaka önywölö Jakob,
Jakob önywölö Yuda éka
omego mérë,

³ Yuda ki dhakö mérë
Tamar önywölö gini
Perej éka Jera,

Perej önywölö Kejeron,
Kejeron önywölö Ram,

⁴ Ram önywölö Aminadab,
Aminadab önywölö Nacon,

Nacon önywölö Calamon,
⁵ Calamon ki dhakö mérë
Raab önywölö gini Boaj,

Boaj ki dhakö mérë Ruth
önywölö gini Obed,

Obed önywölö Jece,

⁶ éka Jece önywölö rwoth
Daudi.

Daudi önywölö Colomon,
n'onwongo aya mérë
obedo dhakö ka Uria

⁷ Colomon önywölö
Rekoboam,
Rekoboam önywölö

Abija,

Abija önywölö Aca,

⁸ Aca önywölö Yekocapat,
Yekocapat önywölö Jo-
ram,

Joram önywölö Ujia,

⁹ Ujia önywölö Yotam,
Yotam önywölö Akaj,

Akaj önywölö Kejekia,
¹⁰ Kejekia önywölö Man-
ace,

Manace önywölö Amon,
Amon önywölö Yocia,
11 éka Yocia önywölö Yekonia
éka omego mérë ï
karë n'etero jö Icarael ï
lobo Babilon.

12 Kinge na dong etero jö
Icarael ï lobo Babilon:
Yekonia önywölö Celatiel,
Celatiel önywölö Jerubabel,
13 Jerubabel önywölö
Abiud,
Abiud önywölö Eliakim,
Eliakim önywölö Ajor,
14 Ajor önywölö Jadok,
Jadok önywölö Akim,
Akim önywölö Eliud,
15 Eliud önywölö Eleajar,
Eleajar önywölö Mathan,
Mathan önywölö Jakob,
16 éka Jakob önywölö
Yocepu cwör Maria,
n'onywölö Yecu
n'ecwodo nü Kiricito.

17 Man énë wang rok apar
wie angwën n'ënywölögï kibëc
cakërë kï ï kom Abraam
naka othuno ködë ï kom
Daudi, apar wie angwën
kï kom Daudi naka othuno
ï karë n'eterogï ï Babilon,
éka apar wie angwën kï ï
karë n'eterogï ï Babilon naka
othuno ï kom Meciya.*

Nywölö Yecu Kiricito (Luka 2:1-7)

18 Man énë kite n'ënywölö
kï Yecu Kiricito: Í karë na
Maria onwongo öcikërë më
nyömërë kï Yocepu, na gïn

* **1:17 Meciya** gönyö nü Kiricito ï lëb Girik, gönyö nü, *Ngat n'ewiro.* **1:23** Icaya
7:14

bara örwatërë kanya acël, enwongo nü Maria öyac kï tükö ka Tipo Naleng.

19 Yocepu onwongo obedo dhanö na kite atir éka ba ömítö nü eketh lewig i kom Maria, éntö onwongo mítö nü ékwër Maria ï müng.

20 Í karë na Yocepu pod tye ka thamö köp nön kï i cwinye, malaika ka Rwoth onen bothe ï wang lek éka okobo nü, "Yocepu akwar Daudi, kür ibed kï lworo më tero Maria më bedo dhaköni, piën ic na én tye ködë ögamö kï tükö ka Tipo Naleng.

21 Ën bino nywölö athin awobi, éka in ibino cakö nyïngë Yecu, piën én bino larö jögë kï i kom balgi."

22 Man kibëc ötimëreë ek köp ka Rwoth ocobere na én okobo kï i dhö adwarpiny nü:

23 "Nyakö na bara ongere k'ëcwö bino yac éka bino nywölö athin awobi; ebino cakö nyïngë Emmanuel"—na tyën köp mérë nü, "Obanga tye ködwa."

24 Í karë na Yocepu ocoo kï i wang nïnö, én ötimö kite na malaika ka Rwoth öcikö én ködë éka otero Maria obedo dhakö mérë.

25 Éntö Yocepu ba obedo ködë naka énywölö athin awobi éka Yocepu öcakö nyïngë Yecu.

2

Ëryëkö ölümö Yecu

1 Kinge na dong énywölö Yecu ï Bethelem na tye ï

Yudea, i karë n'Erode obedo rwoth, éryékö öya kí kukidé obino gini yo Jerucalem

² éka openyo gini ni, "Athiñ n'enywölö më bedo rwoth k'Eyuda tye kwene? Wan enenö cér mérë kí kukidé cë wan ebino më wörö athiñ."

³ I karë na rwoth Erode owinyo köp ni, cwinye opodho rwök, éka jö më Jerucalem kibec cwinygi opodho kanya acel ködë.

⁴ Erode ocwodo élamdhök na dito kibec éka epwony cik cë openyogi ka kwene n'onwongo ebino nywölö Meciya ië.

⁵ Gin ogamö ni, "I Bethelem më Yudea, pién man ene ngö n'adwarpiny onwongo öcöö:

⁶ "Entö in, Bethelem na tye i lobo më Yuda,
in ba itidii rwök kí i kin kaka më Yuda;
pién aloc bino yaa kí bothi na en bino kwaö jöga më Icarael."

⁷ Cé Erode ocwodo éryékö i müng éka öniang kí bothgi karë na cér onen ië.

⁸ Cé en oorogï yo Bethelem nakun kobo nügi ni, "Cidh ipeny unu köp i kom athiñ ni na bér. Ka inwongo unu, cé ikel unu köp non botha, ek an thon acidh awör en."

⁹ Kinge na dong gin owinyo köp ka rwoth, gin öcakö cidhö kí yorgi, éka cér na gin onwongo önenö kí kukidé ötelö nyimgi naka ocung i wi kanya athiñ onwongo tye ië.

¹⁰ I karë na gin önenö cér, cwinygi obedo na yom rwök.

¹¹ Gin ödönyö i öt éka önenö gini athiñ éka aya mérë Maria, cé orumo cöng-gi piny éka ewörö athiñ. Gin ögonyö yecgi éka ömiö gini miç më gol, odok na ngwece kur éka müra.

¹² Kinge Obanga öcikögï i wang lek ni kür ödök gini cen yo both Erode, gin ödök i lobogï nakun ewok kí i yoo nökënë.

Enyodo ka Yecu ölüü yo Ejip

¹³ Kinge na dong éryékö ödök gini ökö, malaika ka Rwoth onen both Yocepu i wang lek cë okobo ni, "Yaa malö iter athiñ gin k'aya mérë ek ilüüunu yo Ejip. Bed unu kunön naka ka an akobo nini më dwogo, pién Erode bino rangö athiñ ek enek ökö."

¹⁴ Cé Yocepu öya, ökwanyö athiñ gin k'aya mérë i kiwor éka öcidhö yo Ejip,

¹⁵ kanya en obedo ië naka Erode öthöö. Man ötimëre ek köp ka Rwoth na en okobo i dhö adwarpiny ocobere kakarë ni, "An acwodo woda kí i Ejip."

Erode oneko éthinö

¹⁶ I karë n'Erode öniang ni éryékö öbwölë, öngöö rwök éka ömiö twerö më neko éthinö awope kibec kí i Bethelem éka i kabedo kibec na cwök ködë cakere kí i mwaka ariö dök ködë piny, na luberë kí karë na en öniang ködë kí both éryékö.

¹⁷ Cé ngö na yam adwarpiny Jeremia okobo ocobere:

18 "Dwön mörö tye ka
winyere kii Rama
na kok éka kumo rwök,
Racel tye ka koko pi ethiné,
éka ba mütö ni ekwe
cwinye,
pien ethiné öthöö gini ökö."

*Dwogo ka Yocepu kii Maria
kii Ejip*

19 Kinge na dong Erode
öthöö, malaika ka Rwoth
onen both Yocepu i wang lek
kii Ejip

20 éka okobo ni, "Yaa malö,
iter athin gin k'aya mérë éka
idök unu i lobo më Icarael,
pien jö n'onwongo mütö
kwanyö kwö k'athin dong
öthöö gini ökö."

21 Cé Yocepu öya, ökwanyö
athin gin k'aya mérë éka
öcidhö gini i lobo më Icarael.

22 Entö i karë na Yocepu
owinyo ni Arkelau ené dong
löö Yudea nakaka apap mérë
Erode, Yocepu obedo ki
lworo më cihö yo kunön. Cé
kinge n'Obanga okobo niné i
wang lek, en öya öcidhö i lobo
Galilaya.

23 En öcidhö obedo i taun
n'ecwodo ni Najaret. Cé köp
n'edwarpiny ötwakö ocobere:
"Yecu ebino cwodo ni dhanö
më Najaret."

3

*Köp na Jon Abatica ötitö
(Marako 1:1-8; Luka 3:1-
18; Jon 1:19-28)*

1 Í karë nonu Jon Abatica
obino nakun titö köp
k'Obanga i thim më Yudea

2 éka kobo ni, "Ngut unu,
pien ker më polo onyingo na
cwök."

3 Man ené ngat n'adwarpiny
Icaya ötwakö pirë:

"Dwön dhanö mörö tye ka
redo i thim ni,
'Yüb unu yoo pi Rwoth,
mii unu yoo ocung atir
niné.'

4 Jon onwongo ruko böng
n'eyübö kii kom yer kinaga, éka
onwongo twoo wang pyerë
ki del. Cem mérë onwongo
obedo bonyo éka möö kic më
thim.

5 Jii onwongo yaa ki i Jeru-
calem, kii i lobo Yudea kibec
éka kii i lobo kibec na tye i get
kulo Jordan më cihö bothe.

6 Gin onwongo tuco balgi
éka Jon baticagi i kulo Jordan.

7 Entö ka en önenö Epar-
icayo éka Ecadukayo tye ka
bino kanya en onwongo tye
ka batica jii ie, en okobo
bothgi ni: "Un ethin ororo!
Nga n'okobo niwu ni iring
unu ki i akemö k'Obanga na
tye ka bino?

8 Tii unu dong gin na
nyutho ni ingut unu.

9 Kür dök itham unu më
kobo ni, 'Wan etye k'Abraam
na calö apapwa.' An akobo
niwu ni ki kom kite ni
Obanga twero müö ékwaë
k'Abraam donyo ki ie.

10 Kobedini dong etyeko
ketho atong i tyen orii yen,
éka yath mörö na ba nyakö
nyige na ber ebino tongo ökö
piny cé ebolo i mac.

11 "An abaticawu ki pii më
nyutho ni ingut unu ökö ki

kom balwu, éntö ngat na bino kï köra ték na lõa ökö, an ba apora më ködö wörë. Ën bino baticawu kï Tipo Naleng éka kï mac.

¹² Odheru mérë tye i cingë, éka én bino yübü larü moo mérë, cë cökö kal mérë ketho i dëro éka wangö cüngë kï mac na ba thöö."

*Batica ka Yecu
(Marako 1:9-11; Luka 3:21-22)*

¹³ Cë Yecu öya kï i Galilaya öcidhö yo kulo Jordan, ék Jon obatica én.

¹⁴ Éntö Jon ötämö kwërö ökö nakun kobo ni, "An amítö ni in énë ibatica an, éntö in dökü ibino ni an abatica in?"

¹⁵ Yecu ögamö ni, "Wék ötimérë ni kömanön kobedini; piien pore ni ön më cobo gin na kibëc më kite atir." Cë Jon oyeo.

¹⁶ Kinge na dong Yecu ebatica, cë én odonyo malö kï i pii. Cucüth i caa nõn polo öyabéreë, éka én önenö Tipo k'Obanga ka bino calö amam, cë opye i kome.

¹⁷ Cë dwön mörö owinyere kï i polo na kobo ni, "Man énë Woda na an amarö; na iya yom i kome."

4

Catan ötämö Yecu

¹ Cë Tipo k'Obanga otero Yecu i thim ék Catan ötäm én.

² Cë Yecu orio kec pi nïnö pyer angwën kiceng éka kiwor, kinge kec oneko én.

³ Cë Catan obino both Yecu më témö én nakun kobo ni,

"Ka in ibedo Wod k'Obanga, kob ni kite ni ék olökérë ödök cem."

⁴ Yecu ögamö nïnë ni, "Écöö i Cöc na Leng ni: 'Dhanö ba kwö kï cem kékën éntö kwö kï köp kibëc na donyo kï i dhö Obanga.'"

⁵ Cë Catan otero Yecu yo Jerucalem i pacö na leng éka ömio én ocung malö i wi birübürü më öt k'Obanga.

⁶ Én okobo ni, "Ka in ibedo Wod k'Obanga, podh yo piny. Pién ecöö ni:

"Obanga bino cikö emalaika mérë më gwököni,
éka gïn bino gamöni kï cing-gü,

ék kür itwom tyeni i kom kidi."

⁷ Yecu ögamö nïnë ni, "Écöö thon ni: 'Kür itém Rwoth Obangani.'"

⁸ Catan dökü otero Yecu yo wi kidi na bor malö rwök cë onyutho ninë ker kibëc më wi lobo éka kï dheogü.

⁹ Catan okobo ni, "Man kibëc an abino miöni, ka in ibino rumo congi piny éka iwöra."

¹⁰ Yecu okobo nïnë ni, "Catan, nyik ökö kï botha! Pién ecöö ni: 'Wör Rwoth Obangani éka itii nïnë kékën.'"

¹¹ Cë Catan öwëkö Yecu, éka emalaika obino gïnë cë ökönyö én.

Yecu öcakö tic mérë i Galilaya

(Marako 1:14-15; Luka 4:14-15)

¹² İ karë na Yecu owinyo ni
Jon etweo i buc, en ödök yo
Galilaya.

¹³ Yecu ba obedo i Najaret,
entö en öcidhö obedo i Kaper-
anaum, pacö na tye i nget
nam Galilaya, na tye i lobo
Jabulon éka Naputali—

¹⁴ më cobo köp n'adwarpiny
Icaya okobo:

¹⁵ “Lobo më Jabulon éka Na-
putali,
yoo na cihö yo nam, na
tye yo löka kulo Jordan,
Galilaya n'obedo lobo
n'Erok bedo gini iie—

¹⁶ jö na bedo gini i piny na col,
önénö gini dong tar na
dit;

jö na bedo i tipo lobo më thöö,
tar dong öryeny i komgi.”

¹⁷ Cakëre i karë non cihö
ködë anyim, Yecu öcakö
titö köp nakun kobo ni,
“Ngut unu, piën ker më polo
onyingo na cwök.”

Yecu ocwodo élübkörë më acel

¹⁸ İ nünö mörö acel, na
Yecu onwongo tye ka wok
i nget Nam më Galilaya, en
önénö utmego ariö, Cimon
n'ecwodo ni Petero éka ömin
mérë Anderiya. Gin onwongo
tye ka bolo böö i nam, piën gìn
onwongo obedo écik rëc.

¹⁹ Yecu okobo bothgi ni,
“Bin, ilüb unu köra éka an
abino müöwu idökö emak jii
nakaka rëc.”

²⁰ Cucüth gìn öwëkö böögü
éka ölübü gini kör Yecu.

²¹ En öcidhö ki kany non éka
önénö utmego ariö nökënë,

Yakobo gìn k'omin mérë Jon,
awope ka Jebedayo. Gin on-
wongo tye i yeya kanya acel
k'apapgü Jebedayo, yübü gini
böögü. Cë Yecu ocwodogü,

²² éka cucüth gìn öya öwëkö
yea éka apapgü cë ölübü gini
kör Yecu.

Yecu öcangö etwoe

²³ Yecu owothro orimo
i Galilaya kibec, nakun
pwonyo i Cinagogagü kibec,
titö Emuth na Bër më ker
k'Obanga, éka cangö koth
twoe kibec ki kom jii.

²⁴ Emuth i kom Yecu
ökëth örömö lobo Ciria kibec.
Jii okelo bothe jö kibec
n'onwongo komgi liih ki twoe
na papath, jö na tye k'arem
na rac, jö na cen ömakögü,
jö na two araka ömakögü,
éka jö na komgi okwe, cë en
öcangögü.

²⁵ Lwak na pol n'öya ki
i Galilaya, Dekapoli,* Jeru-
calem, Yudea éka lobo na tye
yo löka kulo Jordan ölübü gini
kör Yecu.

5

Köp na Yecu ötitö i wi kidi

¹ İ karë na Yecu önenö lwak,
en öcidhö i wi kidi cë obedo
piny. Elübkörë obino bothe,

² éka en öcakö pwonyogi
nakun kobo ni:

³ “Komgi gum jö na ngeo ni
gìn ebedo écan i cwiny,
piën ker më polo bino
bedo mögi.

⁴ Komgi gum jö na kumo,
piën ebino kweo cwinyigü.

⁵ Komgi gum jö na mwol,

^{4:16} Icaya 9:1-2 * ^{4:25} Dekapoli manön Peci apar.

piiën gïn bino leo lobo
bedo mëgi.

⁶ Komgï gum jö na kec éka
öriö nekogï pï bedo jö
na kitegi atir,

piiën ebino müögï yeng.

⁷ Komgï gum jö n'obedo ékica,
piiën ebino tïmö käca nügi.

⁸ Komgï gum jö na cwinygi
leng,

piiën gïn bino nënö
Obanga.

⁹ Komgï gum jö na kelo kuc,
piiën ebino cwodogï nï
éthïnö k'Obanga.

¹⁰ Komgï gum jö n'eyelogï pï
bedo jö na kitegi atir,
piiën ker më polo bino
bedo mëgi."

¹¹ "Komwu gum ka jïi
yanyöwu, eyelowu, éka ekobo
kwa köp na reco kibëc më
twodo i komwu pira.

¹² Bed unu kï yom cwiny,
piiën cül na mewu tye na dit
i polo. Man énë kite na
gïn oyelo k'edwarpiny n'öcakö
bedo niwu."

Köp i kom kadö éka tar

(Marako 9:50; Luka 14:34-
³⁵)

¹³ "Un ibedo kadö më lobo.
Entö ka kadö orwenyo mit
mëré ökö, étwërô mü dökö na
mit nïngö dökï? Köny mëré
nwongo dong ope, myero
ëony ökö jïi önyön.

¹⁴ "Un ibedo tar më lobo.
Pacö n'égérö i wi kidi ba
twërô kanërë.

¹⁵ Ngat mörö ope na cwinyü
tara éka ketho i thë agulu.
Entö eketho kanya oten malö
éka mënyö jö kibëc na tye i öt.

¹⁶ Ì yoo acël nön, miï unu
tar na mewu öryëny i nyim
jïi, ék gïn önëñ ticwu na bëcö,
éka öpak gïni Apapwu na tye i
polo."

Pwony i kom Cik

¹⁷ "Kür iitham unu nï an
abino më jükö Cik onyo köp
k'edwarpiny; an ba abino më
jükögï entö më cobogi.

¹⁸ An akobo niwu köp adyer
nï wang na polo éka lobo oth-
uno i ajiki, nyukuta mörö acël
na tidi onyo tön mörö acël më
Cik ba bino rwenyo, naka ka
köp kibëc ocobere.

¹⁹ Dong ka ngat mörö ötürö
cik mörö acël kï i kom cik
ni gïni, nakun pwonyo kï jö
nökënë më tïmö nï kömanöñ,
ebino cwodo én nï dhanö na
tidi i ker më polo. Entö ngat
na ketho i tic éka pwonyo cik
ni ebino cwodo nï dhanö na
dit i ker më polo.

²⁰ Entö an akobo niwu nï
ka kite atirwu ba ölöö më
k'Eparicayo éka më k'epwony
cik, un ba ibino dönyö i ker
më polo."

Pwony i kom akëmö

²¹ "Un iwinyo köp na yam
ekobo both jö na cön nï,
'Kür ineki, éka ka ngat mörö
na bino neko dhanö, ebino
ngölö-köp nïnë.'

²² Entö an akobo niwu nï
ngat mörö n'akëmö makö i
kom ömin mëré ebino ngölö-
köp nïnë. Ngat mörö na bino
yanyö ömin mëré nï, 'In iban-
giri,' ebino tero i nyim athuko
më öd okiko k'edong. Entö
ngat mörö na kobo nï, 'In

amingo' ebino bolo i mac më kapiny.

²³ "Pï manön, ka ikelo mïcni i keno tyér më miö both Obanga éka ipo nü omeru tye kï köp mörö i komi,

²⁴ wék mïcni i nyim keno tyér. Cïdh kono both omeru ek iyüb unu wat na bér i kinwu; cë dong idwogi éka imii mïcni.

²⁵ "Tyek köp piiöpiö kï ngat n'odothi na pod itye unu i yoo më cïdhö i pido, ek ngat n'odothi kür oteri i nyim angöl-köp, cë angöl-köp bino miöni both acikari, éka ebino tweoni i buc.

²⁶ An akobo niwu köp adyer nü ba ibino donyo kï i buc naka ka icülo cül kibëc, na wi ciläng mörö ba orem."

Pwony i kom elomi

²⁷ "Un iwinyo köp na yam ekobo nü, 'Kür idöny i elomi.'

²⁸ Entö an akobo niwu nü ka ngat mörö önönö dhakö cë öthamö kï i cwinye më bedo ködë nwongo ödönyö i elomi.

²⁹ Ka wang i më kucem énë mii ipodho i bal, kól iyuu ökö. Bér nini më rwenyo dul komi acël nü löönö bolo komi kibëc i mac më kapiny.

³⁰ Ka cingi më kucem énë mii ipodho i bal, ngun iyuu ökö. Bér nini më rwenyo dul komi acël nü löönö bolo komi kibëc i mac më kapiny."

Pwony i kom këthö nyom

³¹ "Un iwinyo cik na kobo nü, 'Ngat mörö na kwëro dhakö mérë myero ömii waraga më këthö nyom.'

³² Entö an akobo bothwu nü ka ngat mörö ökwëro dhakö mérë, na path kï köp më tar wang, nwongo ömii dhakö nön ödökö jö elomi, éka ngat mörö na nyömö dhakö n'ëkwëro ökö nwongo ödönyö i elomi."

Köp i kom kwongo kwong

³³ "Dökü, un iwinyo köp na yam ekobo both jö na cön nü, 'Kür ikwong kwong nono, entö cob kwong na in ikwongo both Rwoth.'

³⁴ Entö an akobo niwu, kür ikwong unu kwong mörö na twal, kadi kï polo piiën manön obedo then ker k'Obanga;

³⁵ onyo kï nyïng lobo, piiën manön obedo then më theno tyené; onyo kï nyïng Jerucalem, piiën manön obedo pacö k'Obanga, Rwoth na Dit.

³⁶ Kür ikwong kwong kï wii, piiën in ba itwëro miö yer mörö acël më bedo na tar onyo na col.

³⁷ Mii unu köpwu obed nü, 'Eyo' obed 'eyo,' onyo 'Pe' obed 'pe.' Köp mörö na kadhö manön nwongo öya kï both ngat na rac."

Köp i kom cülo kwor (Luka 6:29-30)

³⁸ "Un iwinyo köp na yam ekobo nü, 'Wang ecülo kï wang, éka lak ecülo kï lak.'

³⁹ Entö an akobo niwu nü kür icülu unu kwor i kom ngat mörö n'ötümö gin na rac i komi. Ka ngat mörö odhongo lemi kucem, lök nïnë lemi nökënë thon.

⁴⁰ Ka ngat mörö mütö pidoni
nii ëk eter catini, mii en thon
kotini.

⁴¹ Ka ngat mörö odii më
yëo yëc mérë pï kilomita acël,
woth ködë pï kilomita ariö.

⁴² Ka dhanö mörö ökwaö gin
mörö kï bothi, mii gin nön
bothe. Ka ngat mörö mütö
deno gin mörö kï bothi, mii en
oden."

*Pwony i kom marö lang
onu*
(Luka 6:27-28,32-36)

⁴³ "Un iwinyo köp na yam
n'onwongo ekobo nii, 'Mar
awodhi éka idag langöni.'

⁴⁴ Entö an akobo niwu: Mar
unu langwu éka ilég unu pï jö
na yelowu,

⁴⁵ ék ibed unu calö éthiñö
k'Apapwu adyer na tye i polo.
Piën en miö ceng mérë ryëny
both jö na reco éka kï jö na
bëcö. En miö köth both jö na
kitegi atir éka both jö na kitegi
ba tye atir.

⁴⁶ Ka imarö unu jö na
maröwu, cül ngö n'Obanga
bino cülöwu ködë? Naka
thon écök ocoro tímö gini ni
kömanön.

⁴⁷ Ka imotho unu ut-
megowu kékén, apokapoka
ngö na tye i kinwu kï jö
nökënë? Naka thon jö na
ba ngeo Obanga tímö ni
kömanön.

⁴⁸ Myero ibed unu jö na bal
mörö ope i komgi, na calö
Apapwu na tye i polo na bal
mörö ope i kome."

6

Pwony i kom könyö ècan

¹ "Gwökérë unu ëk kür itii
unu 'ticwu më kite atir'i nyim
jii ëk gün önën. Ka itimö
unu, ba ibino unu nwongo
cül mörö kï both Apapwu na
tye i polo.

² "Ka ikönyö acan, kür iküdh
pelu kite n'etwodo tímö i Cin-
agoga gini éka i yodhi, ék jii
öwörgi. An akobo niwu köp
adyer ni gün dong onwongo
cülgï ökö.

³ Entö ka ikönyö acan, kür
imii cingi më kucam onge gin
na cingi më kucem tye ka
tímö,

⁴ ék köny na in imiö both
acan obed i müng. Cë Apa-
pwu, na nënö gin n'ëtímö i
müng, bino cüloni.

Pwony i kom lëga
(Luka 11:2-4)

⁵ "Ka in ilégö, kür ilég calö
etwodo, piën gin marö lëga
nakun nwongo ocung gini i
cinagoga gini éka i nget yodhi
ék jii önën-gi. An akobo niwu
köp adyer ni gün dong otyeko
nwongo cülgï ökö.

⁶ Entö ka in ilégö, döny i
odi, lor dholokek éka ilég both
Apapni na kome ba nen. Cë
Apapwu, na nënö gin n'ëtímö
i müng, bino cüloni.

⁷ Ka in ilégö, kür idhur köp
na pol calö jö na ba ngeo
Obanga, piën gin thamö ni
ebino winyo lëgagï pï köpgï na
pol.

⁸ Kür ilég unu kamë gïn,
piën Apapwu ngeo gin na
mítérë bothwu na bara
ipenyo en.

9 "Man énë kite na myero
ilég unu kódë:
"Apapwa na tye i polo,
nyingi myero éwör,
10 kerni obin,
mitini étim
 i lobo kite n'étimö kódë i
 polo.
11 Miiwa tin cemwa më nünö kü
 nünö.
12 Tím kíca i kom balwa,
 kite na wan thon étimö
 kíca i kom jö na balö
 bothwa.
13 Kür iwék ébwólwa,
éntö larwa kí both ngat na
 rac.
14 Ka un itimö kíca both jö
nökénë ka gín öbalö i komwu,
Apapwu na tye i polo thon
bino tímö kíca i kom balwu.
15 Éntö ka in ba itimö kíca both
jö nökénë pí bal na gín öbalö,
Apapwu thon ba bino tímö
kíca pí bal na in ibalö.

Pwony i kom rio kec

16 "Ka in irio kec, kür imii
wangi onen calö wang et-
wodo, piën gín balö wang-
gí ökö ek jii önën ní gín etye
ka rio kec. An akobo niwu
köp adyer, gín dong otyeko
nwongo cülgí ökö.

17 Éntö ka in irio kec, kur
wii, éka ilwök wangí,

18 ek kür jö nökénë önën ní
in itye ka rio kec, éntö both
Apapwu kékén na ba nen; cë
Apapwu na nénö gin n'étimö i
müng bino cüloni."

Lönyö na tye i polo

19 "Kür ikan lönyöwu i wi
lolo, kanya nyényë éka nyali
balö, éka kanya ekwoe türö cë
kwalö gín ökö.

20 Éntö kan unu lönyöwu i
polo, kanya nyényë éka nyali
ba balö, éka kanya ekwoe ba
türö cë kwalö gín ökö.

21 Piën kanya lönyöni tye ië
énë cwinyi thon tye ië.

22 "Wangi énë obedo tara
më komi. Ka wangí tye na
bér, komi kibéc nwongo tye kí
tar n'örömö.

23 Éntö ka wangí ba tye
na bér, komi kibéc nwongo
opong kí cöl píny. Ka tar
na tye bothi cöl, cöl píny nön
nwongo röm kwene!

24 "Ngat mörö ope na römö
tic pí rwodhi ariö; piën én
bino dagö ngat acél éka bino
marö nökénë ca; onyo én bino
moko i kom ngat acél éka
kwérö nökénë ca. In ba irömö
tic pí Obanga éka pí ciläng
thon.

Kür ibed kí par na pol

25 "Pí manön an akobo
niwu ní, kür ibed unu kí par
pí kwöwu, ní ngö na un ibino
camö onyo madhö; onyo pí
komwu, ní ngö na un ibino
ruko. Kwöwu píre ba tek löö
cem, éka kom píre ba tek löö
böng?

26 Nén unu wíny na ngwécö
kí malö; gín ba cwöö kodhi,
ba kaö gín kac, ba cökö gín
cem i dërö, éntö Apapwu na
tye i polo pídhögí. Un pírwu ba
tek löögi?

27 Nga kí i kinwu pí bedo kí
par na twérö mëdö caa acél i
kom kwö mérë?

28 "Píngö ibedo unu kí par
na pol pí böng? Nén unu kite
n'athure më thim döngö gín
kódë. Gín ba tio tic mörö onyo
wíö wicu.

²⁹ ŋéntö akobo niwu nü kadi bed Colomon onwongo orukere kii dheo mérë kibec, én ba orukere na bér na cal kii mörö acél i kin-gi.

³⁰ Ka Obanga ruko lum më thim, na bedo pi nünö na tin kékén éka diki ebolo ökö i mac, én ba bino rukowu na lloo, un jö na yeewu nönök?

³¹ Dong kür ibed unu kii par më kobo nü, ‘Ngö na wan ebino camö?’ onyo ‘Ngö na wan ebino madhö?’ onyo ‘Ngö na wan ebino ruko?’

³² Piën jami nonu kibec, jö na ba ngeo gini Obanga énë yényögi, éntö Apapwu na tye i polo ngeo gin na kibec na mitérë bothwu.

³³ Éntö cak unu kono më rangö ker mérë éka kite atir mérë, cë én bino miöwu jami kibec na un imitö.

³⁴ Piën manön, kür ibed unu kii par na pol pi diki, piën diki bino bedo kii par mérë. Nünö acélacél tye kii can mérë.

7

Kür ñgööl köp i kom jö nökënë

¹ “Kür ñgööl köp i kom jö nökënë, cë in thon ba ebino ngöölö köp i komi.

² Piën kite na in ñgöölö kii köp i kom jö nökënë, énë in thon ebino ngöölö kii köp i komi, éka gin na un ipimo ködë, énë thon ebino pimo niwu ködë.

³ “Pïngö inënö cüng kal kii i wang omeru éka ba inënö dul yath na tye i wang?

⁴ In iñwérö kobo n'omeru nïngö nü, ‘Wék akwany cüng kal ökö kii i wang,’ nakun

nwongo caa kibec dul yath ut i wang?

⁵ In atwodo, cak kono kwanyö dul yath na tye i wang ökö, éka dong inën piny na bér më kwanyö cüng kal na tye i wang omeru.

⁶ “Kür imii gwongi jami n'ëmio both Obanga, kür iyuu jami na bëcö na wel mérë tek both pün. Ka iyuo, gïn bino nyonyönö ökö kii tyengi, cë lòkérë gini më lwëny i komi.

*Peny, Rang, Dwöng
(Luka 11:9-13)*

⁷ “Peny cë ebino miöni; rang cë ibino nwongo; dwöng cë ebino yabö nini dholokek.

⁸ Piën ngat acélacél na penyo ebino miö; ngat na rangö bino nwongo; éka ngat na dwöngö ebino yabö nünë dholokek.

⁹ “Nga kii i kinwu, ka athin mérë openyo ogati, én miö kidi?

¹⁰ Onyo ka openyo rëc, én miö thwol?

¹¹ Ka un, dong, na kitewu reco, ingeo unu më miö éthiñöwu mïc na bëcö, cë dong apapwu na tye i polo bino miö mïc na bëcö na röm kwene both jö na penyo én!

¹² Gin na kibec na in itümö, tïm both jö nökënë kite na in imitö nü étüm ködë bothi, piën man énë tyen köp më cik kibec éka pwony k'edwarpiny.

Dhö Wangcac na dïng

¹³ “Döny kii i dhö wangcac na dïng. Piën dhö wangcac më kapiny lac éka yoo më cïdhö yo ië lübö yot, éka jö na pol wok kii ië.

¹⁴ Ḗntö dhö wangkac më kwö na bedo naka dïng ēka yoo më cïdhö yo ië lübö ték, jö na nönök ènë wok kï ië.

Yath ngere kï nyige

¹⁵ “Gwökérëunu k'edwarpïny na twot. Gin bino bothwu n'orukere gïni calö rom kï yökö èntö kï iğı nwongo ger gïni kamë orudi.

¹⁶ Un ibino ngeogï kï nyigï. Jii römö püdö nyig ölök kï kom öküdhö, onyo nyig ölam kï kom öcöcök?

¹⁷ Kömanön thon yath na bër nyakö nyige na bër, èntö yath na rac nyakö nyige na rac.

¹⁸ Yath na bër ba römö nyakö nyige na rac, éka yath na rac ba römö nyakö nyige na bër.

¹⁹ Koth yath kibëc na ba nyakö nyige na bër ebino tongo ökö pïny éka ebolo i mac.

²⁰ Manön ènë kite na un ibino ngeogï ködë kï nyig-gï.

²¹ “Pathü ngat acélacël na cwoda ni, ‘Rwoth, Rwoth,’ ènë bino dönyö i ker më polo, èntö ngat na tïmö gin n'Apapna na tye i polo mütö.

²² I nünö nön, jö na pol bino kobo nüna ni, ‘Rwoth, Rwoth, wan yam etitö köp kï nyingi, éka kï nyingi wan éryémö cene éka etio tango na pol.’

²³ Cë an abino kobo nügi ni, ‘Anaka yam ba angeou. Cïdhunu ökö kï botha, un étüm tïm na reco!’

Egedo arïö

(Luka 6:47-49)

²⁴ “Pi manön ngat acélacël na winyo köpna éka ketho i tic bino bedo calö dhanö na ryék n'ögérö ödë i kom lëla.

²⁵ Ka köth ocwe, kïlélë ömöl, éka yamö okudho obuko öt kï ték, èntö ba opodho piën nwongo ègérö i kom lëla.

²⁶ Èntö ngat na winyo köpna ni cë ba ketho i tic cal k'amingo n'ögérö ödë i kom kwo.

²⁷ Ka köth ocwe, kïlélë ömöl, éka yamö okudho obuko öt kï ték, cë öt bino rëdhërë na rac.”

²⁸ I karë na Yecu dong otyeko twakö köp nonu kibëc, lwak ouro pwony mëré rwök,

²⁹ piën èn opwonyo calö ngat na ut kï twër, pathü calö epwonyegi më cik.

8

Yecu öcangö adhöbü

(Marako 1:40-45; Luka 5:12-16)

¹ I karë na Yecu oidho yo pïny kï i wi kidi, lwak na pol ölübü körë.

² Ècwö mörö na tye kï two dhöbü obino bothe éka orumo cöngë pïny i nyime nakun kobo ni, “Rwoth, ka in imitö, irömö müöna dökö na leng.”

³ Yecu öryëö cïngë cë ogudo èn nakun kobo ni, “An amitö, komi dong obed na leng!” Cë cüçüth two dhöbü öcang ökö kï i kome.

⁴ Cë Yecu okobo nünë ni, “Kür ikob both ngat mörö. Èntö cïdhü inyuthiri both alamdhök éka imii tyer na

Muca yam öcikö, më bedo na calö caden bothgii."

*Yecu öcangö atic k'adit wi acikari
(Luka 7:1-10)*

⁵ Ì karë na Yecu ödönyö ï Kaperanaum, adit wi acikari më Roma mörö obino cë öbakö dhögë bothe ni,

⁶ "Rwoth, aticna obuto pïny i öt, two akwea ömakö éka ödiö en rwök."

⁷ Yecu okobo nïnë ni, "An abino cïdhö éka acangö én."

⁸ Adit wi acikari ögamö ni, "Rwoth, an ba apora ni in idöny ï öda. Ëntö kob köp acël kékëن cë aticna bino cang.

⁹ Piën an kikoma thon abedo dhanö n'ëlöö alöa, éka atye k'acikari na an alöögi. An akobo both ngat acël ni, 'Cidhi,' cë cïdhö; éka both ngat acël ni, 'Bin,' cë bino. Ka an akobo both aticna ni, 'Titicni,' cë tïmö."

¹⁰ Ì karë na Yecu owinyo köp ni, en obedo ki ur rwök nakun kobo both jö na tye ka lübö körë ni, "An akobo niwu köp adyer, an bara anwongo dhanö mörö ï lobo Icarael na tye ki yee na tek calö man.

¹¹ An akobo niwu ni jö na pol bino bino gïni ki kukidë éka kuthö, cë bino bedo gïni pïny kanya acël k'Abraam, Icaka, éka Jakob më camö karama i ker më polo.

¹² Ëntö jö n'onwongo myero obed gïni i ker më polo ebino bologï yokö ï cöl pïny, kunön bino bedo ië koko éka kaö lak."

¹³ Cë Yecu okobo both adit wi acikari ni, "Cidhi! Ebino

tïmö kite na in iyee ködë." Atic mérë öcakö cang ökö i caa nön kikokome.

*Yecu öcangö jö na pol
(Marako 1:29-34; Luka 4:38-41)*

¹⁴ Ì karë na Yecu ödönyö ï öt ka Petero, en önënö marö ka Petero obuto pïny na two lyetho ömakö.

¹⁵ En ömakö cïngë éka two lyetho öya ökö ki i kome, cë marö ka Petero öya malö éka öcakö yübü cem nïnë.

¹⁶ Ì kothyeno më nïnö nön, jö na pol n'onwongo tye gïni ki tipo na reco i komgi ekelo both Yecu, cë en öryëmö tipo na reco ökö ki köp na en ötwakö éka etwoe kibec öcang.

¹⁷ Man ötimérë ek köp na yam adwarpïny Icaya ötwakö ocobere kakarë ni:
"En ökwanyö görüwa
éka öyëö twowa."

*Jö n'onwongo mütö lübö kör Yecu
(Luka 9:57-62)*

¹⁸ Ì karë na Yecu önënö lwak na pol n'ögürö en dyere, en ömiö twëro më cïdhö yo löka nam tung ca.

¹⁹ Cë apwony cïk obino bothe éka okobo ni, "Apwony, an abino lübö kori kanya kibec na in ibino cïdhö ië."

²⁰ Yecu ögamö ni, "Kwee tye ki öd rwo gïni éka wïny na ngwëcö ki malö tye ki udi, Ëntö Wod ka Dhanö ope ki kany mörö na en pyelo wie ië."

²¹ Alübörë nökënë dökü okobo nïnë ni, "Rwoth, wëk an kono acidh aik apapna."

²² Ŋtö Yecu okobo nünë nü, “Lüb köra, éka wék jö n'öthöö oik jöögii n'öthöö.”

*Yecu öjükö yamö kii nam
(Marako 4:35-41; Luka 8:22-25)*

²³ Cé Yecu ödönyö i yeya éka élübkörë öcïdhö ködë.

²⁴ Cucuth yamö na ger öcakö kudho i nam, éka pii na tingere malö onwongo dong cwök miö yeya më lüny ökö i nam. Ŋtö Yecu onwongo öniñö ökö.

²⁵ Elübkörë öcïdhö éka ocoo gini en nakun kobo gini ni, “Rwoth, larwa! Wan écwök thöö!”

²⁶ En ögamö ni, “Un jö na yeewu nönök, pängö ilwor unu?” Cé en öya malö ocoko yamö éka pii na tingere malö, cë piny okwe moth.

²⁷ Elübkörë ouro gini nakun kobo gini ni, “Koth écwö mënë ene? Naka thon yamö éka pii na tingere malö winyo en!”

*Yecu öcangö cwö ariö na tye
ki cene
(Marako 5:1-20; Luka 8:26-39)*

²⁸ I karë na Yecu othuno i löka ca i lobo ka jö Gadara, cwö ariö na tye ki cene n'öya gini ki i bur lyene oromo ködë. Gin onwongo ger rwök na ngat mörö ope na römö wok i yoo nön.

²⁹ Gin öcakö redo ni, “Wod k'Obanga, ngö na in imitö ki bothwa? In ibino më pwodowa na karë bara örömö?”

³⁰ Onwongo öthipan pün na pol tye ka cem na bobor ködgii.

³¹ Cene ökwaö Yecu ni, “Ka in iryämöwa ökö, ryämwa i kom öthipan pün.”

³² En okobo nügi ni, “Cidh unu!” Cé gin odonyo yokö ki i kom cwö nön éka ödönyö gini i kom pün, öthipan pün kibec öngwecö ki i nget kidi yo i nam éka öthöö gini ökö i pii.

³³ Ekwath n'onwongo kwaö pün öngwecö gini ökö i taun éka okobo gini gin n'ötümérë kibec éka gin n'ötümérë i kom cwö na cene ömakögi.

³⁴ Cé jö na tye i taun kibec öcïdhö gini yokö më romo ki Yecu. I karë na gin önenö en, gin odweko gini Yecu më yaa ökö ki i lobogi.

9

*Yecu öcangö dhanö na
kome okwe
(Marako 2:1-12; Luka 5:17-26)*

¹ Yecu ödönyö i yeya éka öngölö nam yo lökatung ca, cë obino yo pacö thurgi.*

² Jö mökö okelo bothe dhanö na kome okwe n'obuto i ökëka. I caa na Yecu önenö yeegi, en okobo both dhanö na kome okwe ni, “Dii cwinyi, woda; balni gini etümö kicä ökö.”

³ Ŋtö epwony cik mökö okobo i kin-gi kën-gi ni, “Dhanö ni tye ka yanyö Obanga!”

⁴ I karë na Yecu ongeo thamagi, cë openyogii ni,

* **9:1 Pacö thurgi** Kaperanaum kanya Yecu ökwö ië.

“Pïngö ibedo unu kï thama na rac i cwinywu?

⁵ Mënë na yot: më kobo nï, ‘Balni gïnï dong ëtïmö kïca ökö,’ onyo më kobo nï, ‘Yaa malö icak woth?’

⁶ Ëntö an abino miöwu in-geo nï Wod ka Dhanö tye kï twër i wi lobo më tïmö kïca i kom bal gïnï.’ Cë en okobo both dhanö na kome okwe nï, “Ya malö, kwany ökëkani éka icidh yo pacö.”

⁷ Cë dhanö na kome okwe öya malö éka öcïdhö yo pacö.

⁸ I karë na lwak önenö ngö n'ötïmërë, lworo ömakögï rwök; éka öpakö gïnï Obanga, n'omio koth twërö nön both jii.

*Yecu ocwodo Matayo
(Marako 2:13-17; Luka 5:27-32)*

⁹ I karë na Yecu öya ökö kï kunön, en önenö écwö mörö n'obedo acök ocoro na nyïngë Matayo obedo kanya onwongo écökö ocoro iie. Yecu okobo nïnë nï, “Lüb kïra,” cë Matayo öya malö éka ölübü körë.

¹⁰ Na Yecu éka élubkörë tye gïnï ka cem i öt ka Matayo, écök ocoro na pol éka ébal obino cë ocemo gïnï ködë.

¹¹ I karë n'Eparicayo önenö gin na tye ka tïmërë, gïn openyo élubkörë nï, “Pïngö apwonywu cemo kanya acël k'écök ocoro éka ébal?”

¹² I karë na Yecu owinyo köp ni, en okobo nï, “Pathï jö na komgï yot enë mütö daktar, éntö jö na two.

¹³ Ëntö cïdh ipwonyere unu i tyen köp ni: ‘An amitö kïca, pathï gin më aryëda.’ Piëñ an ba abino më cwodo jö na kitegi atür, éntö ébal.’

*Peny i kom rio kec
(Marako 2:18-22; Luka 5:33-39)*

¹⁴ I nïnö mörö acël élubkör Jon obino both Yecu éka openyo gïnï en nï, “Pïngö wan éka Eparicayo erio kec, éntö élubkori ba rio gïnï kec?”

¹⁵ Yecu ögamö nï, “Wele k'anyom twërø kumo nïngö ka anyom tye ködgï? Ba twërë! Karë tye ka bino n'ebino kwanyö anyom ökö kï bothgï; cë gïn dong bino rio kec.

¹⁶ “Ngat mörö ope na dapö böngü na nyen i kom böngü n'otii, piëñ böngü n'edapö bino tëlö böngü nökënen ca éka yëc ökö na rac.

¹⁷ Dhanö mörö ope na pikö köngö ölöök na nyen i ocwe na cön gïnï. Piëñ ka gïn opikö, ocwe bino mwoc ökö, köngö ölöök thon bino öny ökö cë ocwe bino bal gïnï ökö. Pe, köngö ölöök na nyen épikö i ocwe na nyen gïnï, éka gïn kibëc ba bino bal.”

*Nyaka alöc éka dhakö n'ogudo lak böngü ka Yecu
(Marako 5:21-43; Luka 8:40-56)*

¹⁸ I karë na Yecu tye ka kobo köp ni, alöc mörö obino bothe cë orumo cöngë pïny i nyime éka okobo nïnë nï, “Nyara pod öthöö athöa, éntö

bin èk iketh cingi ï kome, cë bino kwö.”

¹⁹ Yecu èka èlübörë öya èka öcidhö ködë.

²⁰ Cë dhakö mörö n'onwongo remo obedo ka cwer ki ï kome pi mwaka apar wie ariö obino ki kungee cë ogudo lak böngü ka Yecu.

²¹ Èn okobo kii cwinye kënë ni, “Ka agudo böngü mérë kékén, abino cang ökö.”

²² Yecu ölokérë cë önenö èn, èka okobo nineni, “Dii cwinyi, nyara, yeeni ocangi.” Cë dhakö nön öcang ökö i caa nön cüçüth.

²³ I karë na Yecu ödönyö i dyekal k'alöc cë önenö ewer na wer wer më kumo èka lwak na wöö gini ki koko,

²⁴ èn okobo ni, “Döny unu yokö. Anyaka ni ba öthöö èntö önnö anña.” Èntö gïn önyerö gini èn.

²⁵ Kinge na lwak dong odonyo ökö yokö, èn öcidhö i öt kanya epyelo nyakö ie èka ömakö cing anyaka nön cë öya malö.

²⁶ Köp më emuth ni ökëth örömö lobo nön kibec.

Yecu öcangö èthöö wang ariö

²⁷ Kinge na Yecu dong öya ökö ki kany nön, èthöö wang ariö ölübü gini körë nakun redo gini ni, “Kica omaki i komwa, Wod ka Daudi!”

²⁸ I karë na èn dong ödönyö i öt, èthöö wang ariö obino gini bothe èka Yecu openyogii ni, “Un iyee unu ni an atwero miöwu inenö piny?”

Gin ögamö ni, “Eyo, Rwoth.”

²⁹ Cë èn ogudo wang-gi èka okobo ni, “Èk ötimëre bothwu kite na yeewu tye ködë.”

³⁰ Cë wang-gi oyabëre. Yecu öcikögï na tek ni, “Kür ikob unu köp ni both ngat mörö.”

³¹ Èntö gïn öcidhö èka örweö gini köp i kom Yecu örömö lobo nön kibec.

³² Na gïn dong tye ka yaa më cihöö, jii okelo dhanö mörö both Yecu n'onwongo cen ömakö èka na ba twak.

³³ Kinge na dong Yecu öryemö cen ökö, dhanö nön n'onwongo ba twak öcakö twak. Lwak ouro nakun kobo gini ni, “Anaka yam gin mörö n'obedo köman bara onen i Icarael.”

³⁴ Èntö Eparicayo okobo gini ni, “Èn ryemö cene ki twër k'adwong më cene.”

Etic tye na nönök

³⁵ Yecu öcidhö orimo kin peci kibec na papath nakun pwonyo i cinagogagi gini, titö Emuth na Bër më ker k'Obanga èka cangö koth twoe kibec na papath.

³⁶ I karë na èn önenö lwak, kica ömakö i komgi rwök, piën onwongo tye gini ki par èka ewekögï ata calö rom n'akwathgi ope.

³⁷ Cë okobo both èlübörë ni, “Kac dwong èntö etic tye na nönök.”

³⁸ Pi manön, peny unu won pwodho ek oor etic i kac i pwodho mire.”

10

*Yecu ooro èkwëna apar wie ariö
(Marako 3:13-19; Luka*

6:12-16)

¹ Yecu ocwodo élübkörë apar wie ariö bothe éka öniögï twérö më ryémö tipo na reco éka më cangö twoe na papath kibëc.

² Man énë nyäng ékwëna apar wie ariö: më acél, Cimon (n'ecwodo nü Petero) éka ömín méré Anderiya; Yakobo wod ka Jebedayo, éka ömín méré Jon;

³ Pilipo éka Batulumayo; Tomaci éka Matayo n'obedo acök ocoro; Yakobo wod k'Alipayo, éka Tadeo;

⁴ Cimon na mítö löckën éka Yuda Ikariot, n'oketho örörö i kom Yecu.

⁵ Yecu ooro ékwëna apar wie ariö kí cik ni: "Kür içidh unu both Erok onyo idöny unu i pacö ka jö Camaria mörö.

⁶ Éntö cídë unu both jö Icarael, na cal gini kí rom n'orwenyo.

⁷ Ka içidhö unu, tüt unu köp ni: 'Ker më polo dong cwök.'

⁸ Cang unu etwoe, cer unu jö n'othöö, löny unu jö na tye kí two dhöbü, éka íryém unu cene. Ëmiöwu nono, éka un thon mii unu nono.

⁹ Kür iwoth unu kí gol onyo ryal onyo mola mörö i jébawu;

¹⁰ kür iwoth unu k'ocwe i wothwu, onyo böngü më alöka, onyo wör, onyo lüth më woth; piën atic myero émii cem méré.

¹¹ "Pacö mörö kékëna un ibino dönyö ié, rang unu dhanö na kite méré bér éka ibed unu i ödë naka ka ibino unu yaa.

¹² Ka idönyö unu i öt, moth unu jö më öt nön kí moth më kuc.

¹³ Ka jö më öt nön öjölöwu, wék unu kucwu odong ié; éntö ka ba öjölöwu gini, cë imii kucwu odwog bothwu.

¹⁴ Ka ngat mörö ba bino jölöwu onyo winyo köpwu, teng unu apua më tyénwu* ka iya unu kí i öt nön onyo pacö nön.

¹⁵ An akobo niwu köp adyer, i nínö më ngölö-köp, Obanga bino tümö kíca na thwönë rwök both jö më Codom éka Gomora na löö jö më pacö nön.

¹⁶ An aorowu kamë rom i kin orudi. Pi manön bed unu na ryék calö thwol éka na mwol calö amam.

¹⁷ "Éntö gwökëré unu ködgï; piën gìn bino miöwu i cing elöc éka ebino pwodowu kí del i cinagogag i gini.

¹⁸ Ebino terowu i nyim elöc éka i nyim rwodhi pira na calö ecaden bothgi éka both Erok.

¹⁹ Éntö ka gìn ömaköwu, kür ibed unu kí par i kom ngö na un ibino kobo onyo kite na un ibino kobo ködë. I caa nön ebino miöwu ngö na myero ikob unu,

²⁰ piën pathi un énë ibino twak, éntö Típo k'Apapwu énë bino twak kí bothwu.

²¹ "Omego bino miö ömín méré më aneka, éka apap bino miö athin méré më aneka; éthinö bino jém i kom enyodog i éka bino gini miö enekogi.

* **10:14 Teng unu apua më tyénwu** nyutho nü Obanga ökwérö jö më pacö nön, piën gìn ökwérö winyo köp k'ekwëna.

²² Jö kibëc bino dagöwu püra, entö ngat na bino cung na ték naka i ajiki bino larë.

²³ Ka eyelowu kii i kabedo mörö acël, lüü unu i kabedo nökënë. An akobo niwu köp adyer, ba ibino unu tyeko woth i peci më Icarael kibëc na bara Wod ka Dhanö obino.

²⁴ "Athin kwan ba dit löö apwony mérë, onyo atic ba dit löö adwong mérë.

²⁵ Pore both athin kwan më bedo calö apwony mérë, éka atic më bedo calö adwong mérë. Ka adit na löö öt ecwodo ni Belijebul, ebino cwodo jö më ödë kii nyïng na rac röm kwene!

²⁶ "Kür ibed unu kii lworo pürgi. Gin mörö ope n'eumo na ba ebino yabö, onyo gin mörö ope n'opono na ba bino ngere.

²⁷ Köp na an akobo niwu i cöl piny, twak unu ökö na piny lër; éka köp n'ëmwöngö amwöngö i ithwu, red unu ködë i wi bie.

²⁸ Kür ilwor unu jö na neko kom entö ba neko tipo. Entö lwor unu Obanga na twëro neko tipo éka kom kanya acël i mac kapiny.

²⁹ Winy na thiithinö ariö ba écadhogi pii cileng na nyïng? Entö mörö ope na twëro podho piny n'Apapwu ba ngeo.

³⁰ Naka thon yer wiwu kibëc ékwanö ökö.

³¹ Dong kür ibed unu kii lworo; pírwu ték löö winy na pol ca ökö.

³² "Ngat mörö na bino tuco nyïnga i nyim jii, an thon

abino tuco nyïngë i nyim Apapna na tye i polo.

³³ Entö ngat na bino kwërona i nyim jii, an thon abino kwëro en ökö i nyim Apapna na tye i polo.

³⁴ "Kür itham unu ni an abino më kelo kuc i lobo. An ba abino më kelo kuc, entö pala abadë.

³⁵ An abino më kelo apokapoka i kin
"wod éka apap mérë,
nyakö éka aya mérë,
cii wod éka adha mérë.

³⁶ Langö ka dhanö bino bedo dhanö më ödë kikokome.'

³⁷ "Ngat mörö na marö apap mérë onyo aya mérë na lös ökö ba opore më bedo mëga; ngat mörö na marö wode onyo nyarë na lös ökö ba opore më bedo mëga;

³⁸ éka ngat mörö na ba tingo yath aria mérë cé lübö kii köra ba opore më bedo mëga.

³⁹ Ngat mörö na mütö gwökö kwö mérë bino rwenyo ökö, éka ngat na rwenyo kwö mérë püra bino larö kwö mérë.

⁴⁰ "Ngat na bino jölöwu, nwongo öjöla, éka ngat n'öjöla nwongo öjölo ngat n'oora.

⁴¹ Ngat mörö na bino jölö adwarpiny piien en obedo adwarpiny bino nwongo cül n'ëcülö k'adwarpiny, éka ngat mörö na bino jölö dhanö na kite atir piien en obedo dhanö na kite atir bino nwongo cül n'ëcülö kii dhanö na kite atir.

⁴² Éka ka ngat mörö ömio pii na ngic më amodha both ngat mörö acël kii i kin jö na thiinö

ni piën en obedo alübköra, an akobo niwu köp adyer, en bino nwongo cül mëre.”

11

*Jö na Jon Abatica ooro both
Yecu (Luka 7:18-35)*

¹ Ì karë na Yecu otyeko cikö elübörë apar wie ariö, en öya ki kunön më pwony éka më titö köp i peci më Galilaya.

² Ì karë na Jon owinyo ki i buc ngö na Kiricito onwongo tye ka tïmö, en ooro elübörë

³ më penyo en ni, “In ene ngat n'onwongo myero obin, onyo wan myero ékür ngat nökënö?”

⁴ Cë Yecu ögamö nïgi ni, “Dök unu cen icidh ikob unu both Jon gin na un iwinyo éka gin na un inenö:

⁵ Ëthöö wang wang-gi öyabérë, engwalo owothro, jö n'onwongo tye ki two dhöbü elönyögï, éthöö ith owinyo pïny, jö n'othöö ecerogï ökö, éka Emuth na Bér etitö both écan.

⁶ Tye ki gum dhanö na ba lökérë ökö ki kom yee mëre pïra.”

⁷ Ì karë n'elübör Jon tye ka donyo gïni yokö, Yecu öcakö twak ki lwak köp i kom Jon ni: “Ngö na un icidhö më nënö ki i thim? Icidhö unu më nënö agada na yamö yengo?

⁸ Cë ka pe, ngö na un icidhö më nënö? Un icidhö më nënö dhanö n'oruko böng na bëcö? Pe, jö na ruko böng na bëcö bedo gïni i peci ka rwodhi.

⁹ Cë ngö na un icidhö më nënö? Adwarpïny? Eyo, an akobo bothwu ni un inenö ngat na löö adwarpïny ökö.

¹⁰ Man ene ngat n'ëcöö köp i kome:

“An abino oro aorna i nyimi, na ene bino yübö yoo nini.”

¹¹ An akobo niwu köp adyer: Dhanö mörö ope ki kin jö na mon önywölögï na pïrë tek na löö Jon Abatica, entö ngat na tüdi rwök i ker më polo ene dit löö en.

¹² Cakérë i karë ka Jon Abatica më thuno ködë naka tin ker më polo ölimö can rwök, éka jö na ger temö gïni më maö ki tek.

¹³ Piën edwarpïny kibec éka Cik ka Muca odwaro gïni naka othuno ködë i karë ka Jon;

¹⁴ éka ka imitö unu yeo köpgi, Jon ene Eliya n'onwongo myero obin.

¹⁵ Ngat na ithe tye, myero enowiny.

¹⁶ “An abino poro rok më karë ni ki ngö? Cal k'ëthïnö na bedo i kabedo më cuk gïni éka cwodo ewodhgï:

¹⁷ “Wan eküdhö pelu pïrwu, éka un ba imyél; wan ewero wer lyél, entö un ba ikumo.”

¹⁸ Piën Jon obino na ba cemo onyo madhö gin mörö, éka gïn kobo ni, ‘En tye ki cen.’

¹⁹ Wod ka Dhanö obino na cemo éka medho, éka gïn kobo ni, ‘En obedo ngat n'owor éka amérö, obedo okone k'ëcök ocoro éka ébal.’ Entö ryékö ene moko tic mëre na en tio.”

*Can na bino podho i kom
peci na ba ongut
(Luka 10:13-15)*

²⁰ Cë kinge Yecu öcakö twak k'akëmö ki jö më peci nön kanya ën onwongo obedo ka tio tango mërë ië, piën jö na tye ië ökwérö gïni ngut ökö.

²¹ “Ibino nënö can in, Korajin! Ibino nënö can in, Bethecaida! Ka tango n'onwongo étimögï bothwu onwongo étimö i Turo éka Cidon, kono onwongo ongut gïni cön, nakun ruko gïni böngü cöla éka juko gïni wigü ki buru.

²² Èntö an akobo niwu ni Obanga bino tïmö kïca na thwönë rwök i nïnö më ngölököp both jö më Turo éka Cidon na lööwu.

²³ Éka in, Kaperanaum, ebino tingoni yo malö i polo? Pathi kömanön, ebino dwököni pïny i kabedo ka jö n'öthöö. Ka onwongo tango n'onwongo etio bothi onwongo etio i Codom, onwongo twëro bedo naka i karë ni.

²⁴ Èntö an akobo niwu ni Obanga bino tïmö kïca na thwönë rwök i nïnö më ngölököp both jö më Codom na lööwu.”

*Bin unu botha èk iywe unu
(Luka 10:21-22)*

²⁵ I karë nön Yecu okobo ni, “An apaki Apap, Rwoth më polo éka lobo, piën ikanö jami ni ökö ki both jö na ryék éka ki both jö na ngeo pïny, éka inyutho both éthïnö na pod thïnö.

²⁶ Eyo, Apap, man énë kite n'onwongo in imitö ni ötimëre ködë na yomo cwinyi.”

²⁷ “Apapna otyeko miö jamí kibëc ökö botha. Ngat mörö ope na ngeo Wod kono Apap kékén, éka ngat mörö ope na ngeo Apap kono Wod kékén éka both jö na Wod öyérö më nyutho ën.”

²⁸ Cë Yecu okobo ni, “Bin unu botha, jö kibëc n'odhero éka ki jö na yéc önüögï, cë an abino miöwu yweo.

²⁹ Ting unu ayokothna éka inwong unu pwony ki botha, piën an awör éka amwol i cwinya, éka ibino unu nwongo yweo pi tipowu.

³⁰ Piën ayokothna yëö yot, éka yëcna ba pëk.”

12

*Yecu obedo Rwoth më Cabit
(Marako 2:23-28; Luka 6:1-5)*

¹ I karë nön Yecu owok i pwothi n'epuro bël ië k'elüböré i ceng Cabit k'Eyuda. Këc onwongo oneko elüböré, cë gïn öcakö ridhö with bël éka omwodo gïni.

² Èntö i karë n'Eparicayo önënö, cë okobo gïni both Yecu ni, “Nën, elüborki tye gïni ka tïmö gin na cik ökwérö ni kür étim i ceng Cabit k'Eyuda.”

³ Yecu okobo bothgi ni, “Un ba ikwanö gin na Daudi ötimö i karë na kec oneko ën kanya acél k'ewodhe?”

⁴ Èn öddonyö i öt k'Obanga, cë Daudi éka ewodhe öcamö ogati n'eketho i nyim

Obanga—n'onwongo cik
ökwérö nü gin kür öcam, éntö
pi élamdhök kékén.

⁵ Onyo un ba ikwanö kí i
cik nü élamdhök na tye i öt
k'Obanga twérö gini tic i ceng
Cabít k'Eyuda éka nwongo ba
öbalö gini?

⁶ An akobo niwu nü tye gin
mörö kany na dit na lös öt
k'Obanga.

⁷ Ka cë onwongo ingeo unu
tyen köp ni, 'An amitö Kica,
pathi lee më atyéra,' onwongo
myero kür dök inglel unu köp i
wi jö n'ope kí bal.

⁸ Piën Wod ka Dhanö énë
obedo Rwoth më Cabít."

Ecwo na cingë ötal

(Marako 3:1-6; Luka 6:6-11)

⁹ Cë Yecu öya ökö kí kunön
éka öcidhö ödonyö i cina-
gogagii,

¹⁰ kanya onwongo ecwo
mörö na cingë ötal tye ie.
Eparicayo onwongo tye ka
rangö gini kite mörö më
dotho Yecu, cë openyo gini én
ni, "Cik yeo nü écang dhanö i
ceng Cabít?"

¹¹ Yecu okobo bothgi nü, "Ka
ngat mörö kí kinwu tye ki
römö acél cë opodho i bur i
ceng Cabít, in ba imakö éka
iywaö yökö?"

¹² Dhanö pire ték rwök lös
römö ökö! Pi manön cik yeo nü
etim gin na bér i ceng Cabít."

¹³ Cë én okobo both ecwo
nön nü, "Ryé badi." Cë ecwo
nön öryeo badé, éka badé
öcang ökö na bér ödökö calö
nökénë ca.

¹⁴ Éntö Eparicayo odonyo
yökö cë öyübö gini köp kite na
myero enek gini kí Yecu.

Atic n'Obanga öyerö

¹⁵ I karë na Yecu ongeo
yüb më nekonë, öya ökö kí
kunön. Lwak na pol ölübü
gini én, cë Yecu öcangö jö kibec
n'onwongo two.

¹⁶ En öcikögï nü kür okob
gini both jö nökénë köp i
kome.

¹⁷ Man ötimérë ek köp
n'onwongo adwarpiny Icaya
ötwakö pire ocobere:

¹⁸ "Man énë aticna na an
ayérö,

ngat na an amarö, na
cwinya yom i kome.

An abino ketho Tipona i
kome,

éka én bino kobo ngölö-
köp atir both erok.

¹⁹ En ba bino dhaa onyo ba
bino redo rwök,
ngat mörö ope na bino
winyo dwönë i yodhi.

²⁰ En ba bino türö agada
n'ogom,

éka ba bino neko wicu
tara na tye ka dung,

naka ka én okelo ngölö-köp
atir i lös.

²¹ Lobo kibec bino bedo
ki gen pi nyängë."

Yecu éka Belijebul

(Marako 3:20-30; Luka
11:14-23)

²² Cë ekelo both Yecu ecwo
mörö na cen tye i kome
n'onwongo wangë öthöö éka
ba twak. Yecu öcangö ecwo
nön ek ötwaki éka önën piny.

²³ Jö kibec obedo gini ki ur rwök i kom gin na Yecu ötimö éka okobo gini ni, "Man twero bedo Wod ka Daudi?"

²⁴ Entö i karë n'Eparicayo owinyo gini köp ni, okobo gini ni, "Dhanö ni ryemö cen ki twero ka Belijebul, na ene obedo adit ka cene."

²⁵ Yecu ongeo ngö n'onwongo gin tye ka thamö, cë okobo bothgi ni, "Ker kibec ka opokere ié ariö bino bal ökö, éka pacö onyo öt ka opokere ié ariö ba twero cung."

²⁶ Ka Catan ryemö Catan, nwongo en opokere i dul ariö i kome kënë. Cë dong ker mérë twero cung ningö?

²⁷ Ka an aryemö cen ki twero ka Belijebul, jowu dong ryemö gini cen ki twero ka nga? Pi manön, gin ene dong bino bedo gini engöl köpwu.

²⁸ Entö ka an aryemö cen ki twero ka Tipo k'Obanga, cë ker k'Obanga obino dong ökö bothwu.

²⁹ "Dhanö mörö ope na twero dönyö i öt ka ngat na tek me yakö jami mérë, thwara ka en öcakö tweno dhanö na tek ni ökö éka dong cakö yakö jami ki i öde.

³⁰ "Ngat n'ope kukura nwongo en ba müta, éka ngat mörö na ba könya me cökö kanya acel köda kethö aketha.

³¹ Pi manön akobo niwu, bal kibec éka ayeny etwero tömö kica ié, entö bal me yanyö Tipo Naleng ba ebino tömö kica ié.

³² Ngat mörö na twakö köp na rac i kom Wod ka Dhanö ebino tömö kica ninen, entö

ngat na twakö köp na rac i kom Tipo Naleng ba ebino tömö kica ninen, kadï i karë ni onyo i karë na tye ka bino anyim.

³³ "Yath na bér nyakö nyige na bëcö, éka yath na rac nyakö nyige na reco, pién yath engeo ki nyige.

³⁴ Un éthinö ororo, itwero unu twakö köp na bér ningö, nakun un jö na reco? Pién köp na tye i cwiny dhanö ene dhö dhanö twakö.

³⁵ Dhanö na bér kwanyö gin na bér ki kin jami mérë na bëcö na en ökanö i cwinye, éka dhanö na rac kwanyö gin na rac ki kin jami na reco na en ökanö i cwinye.

³⁶ An akobo niwu ni köp kibec me carocarö na dhanö twakö na ba gwökere gini ié ebino pido pire i ninö me ngölö-köp.

³⁷ Pién ki köp na in itwakö ene bino müoni ilöö köp, éka ki köp na in itwakö ene bino müi engölö köp loi."

Anyuth ka Yona

(Marako 8:11-12; Luka 11:29-32)

³⁸ Cë jö mökö n'obedo Eparicayo éka epwony cik okobo gini both Yecu ni, "Apwony, wan emitö nénö anyuth me tango na yaa ki bothi."

³⁹ Entö Yecu ögamö ni, "Rok na reco éka jö na yeegi ope i kom Obanga penyo gini pi anyuth me tango! Entö mörö ope n'ebino müi na path k'anyuth k'adwarpiny Yona.

⁴⁰ Pién kite na calö Yona onwongo obedo ii rëc na thwönë ninö adek, kiceng éka kiwor,

kömanön Wod ka Dhanö bino bedo nänö adek, kiceng éka kiwor, i ngöm.

⁴¹ Jö më Ninebi bino cung gini kï rok më karë ni éka bino ngölö gini köp i kome; piën ongut gini i karë më titö köp na Yona onwongo ötitö, éka kobedini ngat na dit na löö Yona tye kany.

⁴² Alöc na dhakö na tye yo kukwap lobo bino cung kanya acël kï rok më karë ni éka ngölö-köp i kome; piën én öya kï i ajiki lobo më winyo ryékö ka Colomon, éka ngat na dit na löö Colomon tye kany.

⁴³ “Ka tipo na rac öya ökö kï i kom dhanö mörö, én cïdhö rimo kabedo na pii ope iie cë rangö ka yweo éka ba nwongo kabedo mörö.

⁴⁴ Cë én kobo ni, ‘An abino dök i öt na an aya kï iie.’ Ka othuno, cë nwongo öt tye nono, éywëö na leng éka eyübö ökö na bér.

⁴⁵ Cë dong cïdhö kelo tipo na reco abirö nökënë gini na löö én ökö, cë dönyö gini iie éka bedo kany nön. Kinge dhanö nön bino bedo na rac na löö kite n'onwongo obedo ködë cön. Manön kite na bino bedo ködë i kom rok na rac më karë ni.”

Aya ka Yecu éka utmego mérë
(Marako 3:31-35; Luka 8:19-21)

⁴⁶ I karë na Yecu onwongo pod tye ka twak kï lwak, aya mérë éka utmego mérë

onwongo ocung gini yökö nakun mítö gini twak ködë.

⁴⁷ Cë dhanö mörö okobo both Yecu ni, “Ayani éka utmegoni ocung gini yökö mítö twak kodi.”

⁴⁸ Yecu ögamö ni, “Ayana énë nga éka utmegona énë ngagii?”

⁴⁹ Cë Yecu öcimö élübkörë, cë okobo ni, “Man énë ayana éka utmegona.

⁵⁰ Piën dhanö na tio gin n'Apapna na tye i polo mítö, manön énë öméra, améra, éka ayana.”

13

Carolok i kom acwö kodhi
(Marako 4:1-9; Luka 8:4-8)

¹ I nänö acël nön Yecu öya ökö kï i öt, cë öcïdhö obedo i dhö nam.

² Lwak na pol rwök öcökëre gini bothe, ömiö én ödönyö i yeya cë obedo iie, nakun jö kibëc ocung gini i dhö nam.

³ Cë okobo bothgi köp na pol i carolok, nakun kobo ni: “Apur öcïdhö më cwönö kodhi.

⁴ I karë na én tye ka cwöc, kodhi mökö ökir i nget yoo, éka winy obino cë öcamö gini ökö.

⁵ Kodhi nökënë ökir kanya obedo kitekite, na ngöm nönök iie. Kodhi ni otuu piöpiö piën ngöm onwongo rép.

⁶ Entö i karë na ceng öryëny öwangögi rwök, oner gini ökö piën oriigë ba ödönyö na thuth.

7 Kodhi nökënë ökir i kin okudhi, cë okudhi ödöngö éka ödiögö ökö.

8 Kodhi nökënë ökir i kom ngöm na bér, cë önyakö nyiggi, mökö mia acél, nökënë pyer abicél, éka mökö pyer adek na kadhö man onwongo écwo.

9 Ngat na tye kí ith më winyo myero owinyo."

10 Cë élübkör Yecu obino bothe éka openyo gini nii, "Píngö in itwak kí carolok both jii?"

11 Yecu ögamö nii, "Ngec më müng më ker më polo émiö ökö bothwu, éntö ba émiö bothgii.

12 Pién ngat na tye kí gin mörö, ebino mëdö bothe, éka bino bedo ködë na büp. Ngat n'ope kí gin mörö, naka gin na én tye ködë ebino kwanyö ökö kí bothe.

13 Man énë ngö n'omiö an atwak kí carolok both jii:

"Kadí bed nënö gini piny, ba neno gini;

 kadí bed winyo gini, ba winyo onyo niang gini.

14 Köp k'Obanga na yam adwarpiny Icaya odwaro ocoberé kakaré i komgi nii:

"Un ibino winyo, éntö ba ibino niang iie;

 un ibino nénö, éntö ba ibino unu niang iie.

15 Pién jö ni cwinygi dong ödökö na nwang;

 ithgii ba winyo köp,
 éka oumo wang-gi ökö.

Cë wang-gi ba twérö nénö piny,

éka ithgii ba twérö winyo köp,
cwinygi ba twérö niang,

éka ba twérö gini lökérë botha,
ék an acang-gi."

16 Éntö wangwu tye kí gum, pién nénö gini piny, éka ithwu pién winyo gini köp.

17 An akobo niwu köp adyer ni edwarpiny na pol éka kí jö na kitegi atir öparö gini më nénö ngö na un itye ka nénö, éntö ba önénö gini, éka më winyo ngö na un itye ka winyo éntö ba owinyo gini.

18 "Winyunu dong ngö na carolok i kom acwö kodhi gönyö:

19 Ka dhanö mörö owinyo köp më ker k'Obanga cë ba önlang iie, ngat na rac na nyängé Catan bino éka kwanyö kodhi n'onwongo écwo i cwinye ökö. Man énë kodhi n'ökir i yoo.

20 Kodhi n'ökir kanya obedo kitekite, cung pi jö na gamö köp k'Obanga piöpiö kí yom cwiny ka gin owinyo.

21 Éntö kite n'ope k'orii, bedo pi karë mörö na nönök. Ka can onyo ayela mörö obino pi köp k'Obanga, én podho ökö piöpiö.

22 Kodhi n'ökir i kin okudhi, cung pi jö na winyo köp, éntö parö köp më kwö më lobo ni éka miti më lönyö diö köp ökö, cë miö ba nyak gini.

23 Éntö kodhi n'écwo ökir i ngöm na bér, cung pi jö na winyo köp éka niang gini iie. Gin nyakö nyig-gi, nökënë

mia acël, nökënë pyer abicël, éka nökënë pyer adek.”

Carolok më döö

²⁴ Yecu dökï okobo bothgï carolok nökënë ni: “Ker më polo cal kï dhanö mörö n'öcwö kodhi na bëcö i pwodho mëre.

²⁵ Ëntö i karë na jö kibëc önnö gïni ökö, langö mëre obino cë öcwö nyig döö i kin kal, éka öcidhö ökö.

²⁶ I karë na kal n'ëpidhö otuu ödöngö, kal öngök, cë döö thon öcakö nen.

²⁷ “Etic ka won pwodho öcidhö gïni bothe cë openyo gïni en ni, ‘Adwong, in on-wongo ba icwö kodhi na bëcö i pwodhoni? Kara döö dökï öya kï kwene?’

²⁸ “Won pwodho ögamö ni, ‘Langö ene ötimö kömanön.’

“Cë etic openyo en ni, ‘In imitö ni wan ecidh epudh döö nön gïni ökö?’

²⁹ “Ëntö won pwodho ögamö ni, ‘Pe, piën ka itye unu ka pudho döö, un itwérö pudho kal ökö kanya acël kï döö.

³⁰ Wëk unu döö kï kal ödöng gïni kanya acël naka i karë më kac. I karë nön an abino kobo both ékac: Cak unu pudho döö ökö éka itwe unu i dul na papath më awanga; cë icök unu kal éka iketh unu i dërona.”

Carolok i kom kodhi karadali éka thöbi

³¹ En dökï okobo bothgï carolok nökënë: “Ker më polo cal kï nyig kodhi karadali,

na dhanö otero cë öpidhö i pwodho mëre.

³² Kodhi karadali obedo kodhi na tiði rwök kï kin kodhi kibëc, éntö ka ödöngö dökö na thwönë kï kin jami na tye i pwodho éka bedo yath, na wïny na ngwëcö kï malö bino gérö udigi i jangë gïni.”

³³ En dökï okobo bothgï carolok nökënë: “Ker më polo cal kï thöbi na dhakö mörö ökwanyö cë orubo kï mökö ogati na thwönë, naka ka mökö kibëc oyenyo okwot.”

³⁴ Yecu ötwakö köp ni kibëc kï carolok both lwak; en ba okobo gin mörö bothgï na ba otio kï carolok.

³⁵ Man ötimëre ék köp na yam adwarpiny ötwakö ocbere:
“An abino twak kodwu kï carolok gïni,
an abino kobo jami n'ökanëre cakëre anaka i acaki cweno lobo.”

Yecu ögonyö tyen köp më carolok më döö

³⁶ Cë Yecu öwëkö lwak éka öcidhö ödönyö i öt. Èlübörë obino bothe cë okobo gïni ni, “Gony niwa carolok i kom döö na tye i pwodho.”

³⁷ Yecu ögamö ni, “Ngat n'öcwö kodhi na bëcö ene Wod ka Dhanö.”

³⁸ Pwodho ene lobo, éka kodhi na bëcö cung pi jo më ker k'Obanga. Döö ene èthinö ka ngat na rac,

³⁹ éka langö n'öcwö kodhi nön gïni ene Catan. Kac ene ajiki piny, éka ékac ene emalaika.

⁴⁰ “Kite na calö epudho kï döö gïnï kïdë ëka ëwangö ökö i mac, bino bedo nï kömanön thon i ajiki pïny.

⁴¹ Wod ka Dhanö bino oro emalaika mérë, ëka bino cökö gïnï kï i ker mérë gin na kibëc na kelo bal ëka kï jö kibëc na tümö gin na rac.

⁴² Gin bino bologï i mac na lyeth, kanya koko ëka kaö lak tye ië.

⁴³ Cë jö na kitegi atür bino ryëny gïnï calö ceng i ker k'Apapgi. Ngat na ithe tye, myero èn owiny.

Carolok i kom lönyö n'ëkanö

⁴⁴ “Ker më polo cal kï lönyö n'ëkanö i pwodho. Ka dhanö onwongo, cë iko döki, ëka pï yom cwinye miö èn cïdhö cadhö jami kibëc n'onwongo èn tye kïdë, cë wïlö pwodho nön ökö.

⁴⁵ “Ker më polo cal döki k'acath na rangö jami na bëcö na wel mérë ték.

⁴⁶ Ka onwongo mörö acël na bër rwök, èn cïdhö cë cadhö jami kibëc n'onwongo èn tye kïdë ëka wïlö gin nön ökö.

Carolok i kom böö

⁴⁷ “Ker më polo cal döki kï böö n'onwongo écikö i nam n'ömakö koth rëc kibëc na pa-path.

⁴⁸ Ì karë na böö opong, écik rëc öywaö gïnï böö yokö i lak kulo. Cë obedo gïnï pïny ëka öyerö gïnï rëc na bëcö eketho i adïta, èntö eyuo man onwongo tye gïnï na rac ökö.

⁴⁹ Man ènë kite na bino bedo kïdë i karë më ajiki pïny.

Emalaika bino bino gïnï ëka poko jö na reco ökö kï kom jö na kitegi atür,

⁵⁰ Ëka bologï i mac na lyeth, kanya koko ëka kaö lak tye ië.”

⁵¹ Yecu openyogï nï, “Un ïniang i kom köp ni kibëc?”

Gin ögamö nï, “Eyo, wan ïniang ië.”

⁵² Cë Yecu okobo nïgï nï, “Pï manön apwony cïk mörö këkën n'epwonyo kï köp i kom ker më polo cal kï won öt, na kwanyö jami na nyen ëka jami na cön kï kanya èn kanö lönyö mérë ië.”

Ëkwërö Yecu kï i Nájaret

⁵³ Ì karë na Yecu otyeko twakö carolok ni gïnï, èn öya ökö kï kunön.

⁵⁴ Cë èn odwogo i lobo thurgi ëka öcakö pwonyo jii i cinagogagi. Jii obedo kï ur rwök cë okobo gïnï nï, “Dhanö ni onwongo ryëkö ëka tékö më tango ni gïnï kï kwene?”

⁵⁵ Man ba obedo wod k'apaa bao? Aya mérë pathi Maria, ëka utmego mérë ba gin ènë Yakobo, Yocepu, Cimon ëka Yuda?

⁵⁶ Amege mérë kibëc ba tye gïnï kod onu kany? Cë dhanö ni onwongo köp ni kibëc kï kwene?

⁵⁷ Cë gin ökwërö èn ökö.

Èntö Yecu okobo bothgi nï, “Adwarpiny èwörö i kabedo kibëc na path kï i lobo thurgi ëka kï i pacögï.”

⁵⁸ Yecu ba otio tango na pol kunön, piën yeegi onwongo ope.

14

*Thöö ka Jon Abatica
(Marako 6:14-29; Luka 9:7-9)*

¹ Ì karë nön Erode n'obedo alöc më Galilaya owinyo köp na pol i kom Yecu,

² éka én okobo both etic méré ni, "Man éné Jon Abatica, n'ocer ökö kí i kin jö n'öthöö! Manön éné ömiö én tye ka tio koth tango na calö man."

³ Erode onwongo ömakö Jon éka otweo én i buc pi Kerodia dhakö k'omín méré Pilipo,

⁴ pién Jon Abatica onwongo obedo ka kobo both Erode ni, "Cik ba oyeo ni ilök dhakö k'omeru obed megí."

⁵ Erode onwongo mítö neko Jon ökö, éntö onwongo lworo jíi, pién gin onwongo yeo ni Jon obed adwarpiny.

⁶ Éntö i karë më po pi nywölö Erode, nyaka Kerodia ömyél i nyim wele cë oyomo cwiny Erode rwök,

⁷ n'ömiö én öcikérë nakun kwongere both nyakö nön më miö gin na kibec na én bino penyo píre.

⁸ Aya mérë okobo nínë köp na én myero okobi, cë nyakö nön öcöhö okobo ni, "Mia wi Jon Abatica i cania kany."

⁹ Cë rwoth Erode okumo rwök, éntö pi kwong na én okwongo éka pi wele mérë, ömiö én öcikö ni myero émii.

¹⁰ Cë Erode ooro acikari mérë më cihö nguno ngut Jon ökö kí i buc,

¹¹ éka oketho gini wie i cania cë émii both nyakö nön n'otero both aya mérë.

¹² Kinge élübkör Jon obino gini otingo kome éka oiko gini. Cë gìn öcöhö okobo both Yecu.

*Yecu öpödhö jö elip abic
(Marako 6:30-44; Luka 9:10-17; Jon 6:1-14)*

¹³ Ì caa na Yecu owinyo gin n'ötimérë i kom Jon, én öya ökö kí kunön kí yeya cë öcöhö yo kanyalik më bedo kënë. Ì karë na jíi owinyo gini köp nön, cë ölübü gini körë nakun wotho kí tyen-gi kí i peci na papath.

¹⁴ Ì karë na Yecu idho kí i yeya, én önenö lwak na pol, éka kíca ömakö én i komgi, cë öcangö jö n'onwongo two gini.

¹⁵ Ka othuno kothyeno, élübköré obino bothe cë okobo gini ni, "Piny ocido dong ökö éka kany obedo kanyalik. Mií jíi öcöh gini i kin peci ek öcöh öwil gini cem më acamagi."

¹⁶ Yecu ögamö ni, "Gin myero kür öcöhö ökö, miwugi gin mörö më acama."

¹⁷ Gin ögamö ni, "Wan etye kany k'ogati abic éka kí rëc ariö kékén."

¹⁸ Yecu okobo ni, "Kel unugü botha kany."

¹⁹ Cë én okobo both lwak më bedo piny i kom lum. Yecu ökwanyö ogati abic éka rëc ariö cë önenö malö i polo, én ölegö gum éka opoko i ogati gini. Cë ömiögü both élübköré, éka élübköré ömiögü both jíi.

²⁰ Gin kibec ocemo oyeng gini. Elübköré öcökö gini nginy cem n'odong pong aditi apar wie ariö.

²¹ Jö n'öcamö gini cem nön onwongo römö gini cwö elip abic, na ba ekwanö mon éka éthiñö.

*Yecu owothro i wi pii
(Marako 6:45-52; Jon 6:15-21)*

²² Cüçüth Yecu ömiö élübörë ödönyö i yeya më cüdhö anyim nïnë yo löka nam tung ca, nakun én pod odong më miö lwak cüdhö ökö.

²³ Kinge na dong Yecu ömiö lwak öcidhö ökö, én öcidhö i wi kidi kënë më läga. Í karë na dong pïny oyutho, én onwongo tye kënë kunön,

²⁴ éntö yeya onwongo dong öcidhö ökö na bor ki i lak nam, pii na tingere malö onwongo yelo yeya, piën yamö onwongo tye ka kudho bino i komgi.

²⁵ Í kin caa abungwën éka caa apar wie ariö më ruu ka pïny, Yecu obino both élübörë na wotho i wi pii.

²⁶ Í karë n'élübörë önenö én wotho i wi pii, cë tipo komgi öthöö ökö. Gin oredo rwök pii lworo, nakun kobo gini ni, "Man obedo jwök!"

²⁷ Éntö cüçüth Yecu okobo nïgi ni, "Dii unu cwinywu, an énon. Kür ilwor unu."

²⁸ Cë Petero ögamö dhögë ni, "Rwoth, ka in énon, mia abin bothi nakun awotho i wi pii."

²⁹ Yecu okobo nïnë ni, "Bin."

Cë Petero oidho ökö ki i yeya, owothro i wi pii më bino both Yecu.

³⁰ Éntö ka Petero önenö yamö tye ka kudho rwök, én

öcakö bedo na lwor éka öcakö lüny i pii. Cë okok ni, "Rwoth, lara!"

³¹ Cüçüth Yecu olyao cïngë cë ömakö én éka okobo ni, "In itye ki yee na titidì. Pïngö in ibedo ka kalakala?"

³² Í karë na gïn dong ödönyö i yeya, cë yamö ocung ökö.

³³ Cë élübörë Yecu n'onwongo tye gini i yeya öcakö gini wörö én nakun kobo gini ni, "Adyer, in ibedo Wod k'Obanga."

³⁴ Kinge na dong gïn öngölö nam, othuno gini i lobo Genecaret.

³⁵ Í karë na jö na tye i kabedo nön ongeo Yecu, cë ooro gini köp i kabedo kibëc n'ögürö lobo nön. Jii okelo etwoe kibëc both Yecu.

³⁶ Gïn ökwaö én ek etwoe ogud gini lak böngü mëre kékén, éka jö kibëc n'ogudo écangögï ökö.

15

*Pwony më thëkwarö k'edong
(Marako 7:1-13)*

¹ Kinge karë mörö, Eparicayo mökö éka epwony cik öya gini ki i Jerucalem obino both Yecu cë openyo gini ni,

² "Pïngö élüborki türö gini cik më thëkwarö k'edong? Gin cemo na ba ölwökö gini cïngë."

³ Yecu ögamö ni, "Éka pïngö un ba ilübö unu cik k'Obanga pii lübö cik më thëkwaröwu?

⁴ Piën Obanga okobo ni, 'Wör apapni éka ayani' éka 'Ngat na bino yanyö apap

mërë onyo aya mërë myero enek ökö.’

⁵ Èntö ikobo unu nü ka dhanö mörö okobo both apap mërë onyo aya mërë nü, ‘Gin n'onwongo myero akonyi ködë amiö dong ökö both Obanga,’

⁶ èn myero kür ‘owör k'apap mërë’ ködë. Ì yoo nön un ikwérö köp n'Obanga okobo piü lübö cik më thékwaröwu.

⁷ Un etwodo! Icaya yam ötwakö köp n'atir i karë na èn odwaro köp i komwu:

⁸ “ ‘Rok ni wöra gini ki del dhögï,
 èntö cwinygi bor köda.

⁹ Gìn wöra nono;
 pwonygi obedo cik na makö kite ka dhanö.’

¹⁰ Yecu ocwodo lwak bothe, cë okobo niigï nü, “Winy èka iniang unu.

¹¹ Pathi gin na dönyö ki i dhö dhanö ènë balö dhanö èntö gin na donyo ki i dhö dhanö ènë balö dhanö.”

¹² Cë élübkör Yecu obino bothe èka openyo gini nü, “In ingeo nü Eparicayo cwinygi öwang rwök i karë na gìn owinyo köp na in ikobo?”

¹³ Yecu ögamö nü, “Gin apidha kibec n'Apapna na tye i polo ba öpidhö ebino pudho ökö k'orii mërë gini.

¹⁴ Wék unu obed gini; gìn obed èthöö wang na pëö èthöö wang ewodhgï. Ka athöö wang pëö athöö wang awodhe, gìn kibec bino podho i bur.”

¹⁵ Cë Petero okobo nü, “Göny niwa carolok ni.”

¹⁶ Yecu openyogi ni, “Un kara thon bara iniang unu?

¹⁷ Un ba iniang unu nü gin na kibec na dönyö i dhö dhanö dönyö i ic èka donyo yokö ki ikomi?

¹⁸ Èntö jami na donyo yokö ki i dhö dhanö yaa ki i cwiny dhanö, èka jami ni ènë balö dhanö.

¹⁹ Pién gin na yaa ki i cwiny dhanö ènë thama na reco, nek, elomi, tím më ölyang, kwalö kwo, caden më twodo, èka ayeny.

²⁰ Man ènë jami na balö dhanö; èntö pathi cem ki cing na ba élwökö ènë balö dhanö.”

*Yee ka dhakö më Kanaan
(Marako 7:24-30)*

²¹ Kinge na Yecu öya ökö ki kunön èn öcidhö i lobo nögürö Turo èka Cidon.

²² Cë dhakö mörö më Kanaan n'öya ki i lobo nön obino bothe nakun kok nü, “Rwoth, Wod ka Daudi, kïca omaki i koma! Cen ömakö nyara na rac rwök!”

²³ Èntö Yecu ba ögamö dhögë. Cë élübköré obino bothe èka ökwaö gini èn nü, “Ryém dhakö ni öcidh ökö, pién tye ka mëderë ki koko i körwa.”

²⁴ Cë Yecu ögamö nü, “An onwongo eora both jö Icarael kékén, pién gìn tye na calö rom n'orwenyo.”

²⁵ Èntö dhakö ni obino èka orumo cöngë i nyim Yecu nakun kobo nü, “Rwoth, könya!”

²⁶ Yecu ögamö nü, “Ba bër më yuo cem k'ëthiñö yo both gwongi.”

²⁷ Dhakö nön ögamö ni, "Eyo, Rwoth, éntö naka thon gwongi camö gini nginy cem na podho ki i méja k'editegi."

²⁸ Cé Yecu ögamö ni, "Dhakö, in itye ki yee na thwönë! Ék gin na in imitö ötimérë kite na in imitö." Cé nyaré öcang ökö i caa nön kikokome.

Yecu öcangö jö na pol

²⁹ Yecu öya ökö ki kunön éka oroko nget Nam më Galilaya. Èn öcidhö yo wi kidi cé obedo piny.

³⁰ Lwak na pol obino both Yecu nakun ekelo engwalo, éthöö wang, jö na mulo amula, jö na thë lëbgi otwere, éka etwoe nökënë na pol, cé gïn opyelo i nyime; éka Yecu öcangögi.

³¹ Jii obedo ki ur rwök i karë na gïn önenö jö na thë lëbgi otwere ka twak, jö na mulo amula öryérë, jö n'ongwal ka wotho éka éthöö wang nënö piny. Cé lwak öpakö gïni Obanga ka jö Icarael.

Yecu öpidhö jö elip angwën (Marako 8:1-10)

³² Cé Yecu ocwodo élubkörë bothe éka okobo ni, "Kica Ömaka i kom jö ni; pién obedo gïni dong botha kany pi nünö adek éka ope gïni ki gin mörö më acama. An ba amitö ni öcidh gïni na kec onekogï, pién gïn twëro wilere gïni ki i yoo."

³³ Èlubkörë ögamö ni, "Onu étwëro nwongo cem ki kany n'obedo thim nüngö më pïdhö lwak ni?"

³⁴ Yecu openyogï ni, "Ogati adi na un itye ködë?"

Gïn ögamö ni, "Ogati abirö éka rëc mörö na nönök."

³⁵ Cé Yecu okobo both lwak ek obed gïni piny i ngöm.

³⁶ Cé èn ökwanyö ogati abirö ki rëc, éka kinge na dong ömiö pwöc both Obanga, èn opokogï éka ömiögï both élubkörë, cé ömiö gïni both lwak.

³⁷ Gïn kibëc öcamö éka oyeng gïni. Kinge cem, élubkör Yecu öcökö gïni nginyë n'odong aditi abirö n'opong.

³⁸ Wel jö n'ocemo gïni on-wongo tye elip angwën, na ba ekwanö mon éka éthiñö.

³⁹ Kinge na dong Yecu ömiö lwak öcidhö ökö, èn ödonyö i yeya éka öngölö nam öcidhö i lobo më Magadan.

16

Eparicayo ökwaö gïni pi anyuth

(Marako 8:11-13; Luka 12:54-56)

¹ Eparicayo éka Ecadukayo obino gïni both Yecu cé ötämö gïni èn ni onyuth bothgi anyuth n'oya ki i polo.

² Yecu ögamö ni, "Ka piny oyutho, un ikobo ni, 'Piny bino bedo na bér, pién polo nen na kwar,'

³ éka i kodiko cön un ikobo ni, 'Tin yamö bino kudho rwök, pién polo nen na kwar éka ocido na col.' Un ingeo pokokin gin na nen i pöl, éntö ba itwërounu pokon anyuth më karë gïni.

⁴ Rok na reco éka jö na yeegi ope i kom Obanga penyo gïni

pï anyuth më tango, ëntö mörö ope n'ebino miö na path k'anyuth k'adwarpïny Yona." Cë Yecu öya ökö ki bothgï éka öcïdhö ökö.

Thöbi k'Eparicayo éka më k'Ecadukayo

(Marako 8:14-21)

⁵ ï karë n'ëlükör Yecu öngölö gïnï nam yo löka tung ca, wigï owl ökö më makö ogati.

⁶ Yecu okobo bothgï ni, "Gwökérë unu ki i kom thöbi k'Eparicayo éka më k'Ecadukayo."

⁷ Gin ölarö köp ni i kin-gï kën-gï cë okobo gïnï ni, "Ën tye ka kobo piën onu ba émakö ogati mörö."

⁸ ï karë na Yecu ongeo ngö na gin tye ka larö, ën openyo ni, "Un jö na yeewu nök, pïngö itye unu ka twak i kinwu kenwu ni ba imakö unu ogati mörö?

⁹ Un pod bara iniang unu? Un ba ipo i ogati abic pi jö elip abic, éka aditi adi na un icökö?

¹⁰ Onyo ogati abirö pi jö elip angwën éka aditi adi na un icökö?

¹¹ Pïngö ba iniang unu ni an onwongo ba atye ka twakö köp i kom ogati bothwu? Ëntö bed ni gwökérë unu ki kom thöbi k'Eparicayo éka më k'Ecadukayo."

¹² Cë kinge gin öniang ni Yecu onwongo ba tye ka kobo bothgï më gwökérë ki kom thöbi n'etio kädë i ogati, ëntö më gwökérë ki kom

pwony k'Eparicayo éka më k'Ecadukayo.

Petero otuco köp i kom Yecu

(Marako 8:27-30; Luka 9:18-21)

¹³ ï karë na Yecu othuno i lobo na cwök ki Cecaria Pilipi, cë ën openyoëlükörë ni, "Nga na jii kobo ni Wod ka Dhanö obedo?"

¹⁴ Gin ögamö ni, "Jö mökö kobo ni in ibedo Jon Abatica; jö nökënë kobo ni in ibedo Eliya; éka jö nökënë pod kobo ni in ibedo Jeremia onyo ngat mörö acél i kin edwarpïny."

¹⁵ Yecu openyogï ni, "Un kono ikobo unu ni an abedo nga?"

¹⁶ Cimon Petero ögamö ni, "In ibedo Meciya, Wod k'Obanga na kwö."

¹⁷ Yecu ögamö ni, "In itye ki gum, Cimon wod ka Yona, piën ngat mörö ba onyutho nini köp ni ëntö Apapna na tye i polo ënë onyutho nini.

¹⁸ Kobedini an akobo nini ni in ibedo Petero,* éka i wi kidi ni an abino gérö jö n'oye an ié, éka tékö më thööt ba bino löönö.

¹⁹ An abino miöni agöny më ker më polo; gin na kibec na in itweo i wi lobo ebino thon tweo i polo, éka gin mörö na in igönyö i wi lobo ebino thon gönyö i polo."

²⁰ Cë Yecu öciköëlükörë rwök ek kür okob gïnï both ngat mörö ni ën ebedo Meciya.

* **16:18 Petero** gönyö ni kidi. † **16:18 Thööt** onyo kapïny.

*Yecu ötwakö köp i kom thöö
mérë*
(Marako 8:31-9:1; Luka 9:22-27)

²¹ Cakérë i karë nön, Yecu Öcakö nyutho both élübkörë nii myero en écidih yo Jerucalem éka élüm can na pol rwök i cing edong, élamdhök na dito éka epwony cik. Ebino nekonë, éntö i nünö më adek ebino cero en ökö.

²² Cé Petero otero Yecu kii cecen éka Öcakö coko nakun kobo nii, "Obanga kür oye, Rwoth! Man myero kür ötimérë i komi!"

²³ Yecu ölokérë both Petero cé okobo nii, "Yaa ökö kii botha, Catan! In ibedo orii ökö botha, pién thamani ba obedo më k'Obanga, éntö më ka dhanö."

²⁴ Cé Yecu okobo both élübkörë nii, "Ka ngat mörö mitö lübö köra, myero kono ökwérë kënë, éka öcak tingo yath aria mérë cé ölüb köra.

²⁵ Pién dhanö na mitö larö kwö mérë bino rwenyo kwö mérë arwenya, éntö dhanö mörö na bino rwenyo kwö mérë pira bino nwongo kwö mérë.

²⁶ Ngö na in ibino nwongo ka itye kii jami më lobo ni kibec cé irwenyo kwöni? Onyo ngö na dhanö twérö miö më lökö kii kwö mérë?

²⁷ Pién Wod ka Dhanö bino dwogo kii dheo k'Apap mérë kanya acél k'emalaika mérë, éka bino cülö ngat acélacél na lübérë kii tic na en otio.

²⁸ An akobo niwu köp adyer, jö mökö n'ocung kany ba bino bilö thöö na bara önenö gini Wod ka Dhanö ka tye ka bino i ker mérë."

17

Kom Yecu ölokérë na path
(Marako 9:2-13; Luka 9:28-36)

¹ Kinge nünö abicél, Yecu otero Petero, Yakobo éka Jon ömín Yakobo, cé öödhö ködgí i wi kidi malö kanya gìn on-wongo tye ié kén-gí.

² Ki kunön kome ölokérë na path i nyimgi. Terinyim Yecu öryeny calö ceng, éka böng mérë ödökö na tar na calö tara ceng.

³ Cé athura Muca éka Eliya onen bothgi, nakun tye ka twak gini kii Yecu.

⁴ Petero okobo both Yecu nii, "Rwoth, bér më bedo kany. Ka in imitö, an abino yübü othogo adek-acél na megí, acél pí Muca éka acél pí Eliya."

⁵ I karë na en pod tye ka twak, pöl na tar oumogi ökö éka dwön mörö ötwak ki i pöl nakun kobo nii, "Man enë Woda na an amarö; na ia yom i kome. Winy unu en!"

⁶ I karë n'elübkör Yecu owinyo köp ni, lworo ömakögí rwök éka oryebere gini piny.

⁷ Éntö Yecu obino bothgi cé ogudogí nakun kobo nii, "Yaa unu malö, kür ibed unu kii lworo."

⁸ I karë na gìn otingo wanggi malö, ba önenö gini ngat mörö éntö Yecu kënë.

⁹ I karë na gìn tye ka idho yo piny kii i wi kidi, Yecu öcikögí nii, "Kür ikob unu both ngat mörö gin na un inenö, naka ka Wod ka Dhanö ecero ökö kii kin jö n'öthöö."

¹⁰ Cé elübkör openyo gini Yecu nii, "Píngö epwony cik

kobo nü Eliya änë myero öcak bino?"

¹¹ Yecu ögamö nü, "Eliya änë myero öcak bino adyer, éka bino dwökö jami kibec kakaré.

¹² Ëntö an akobo niwu, Eliya otyeko dong bino ökö, éka gin ba ongeo en, ëntö gin ötimö jami kibec na gin mitö i kome. I yoo acel non, Wod ka Dhanö bino limö can i cing-gi nü kömanön."

¹³ Cë elübör Yecu öniang ginii nü en onwongo tye ka twakö köp bothgi i kom Jon Abatica.

Yecu öcangö awobi na tye ki cen

(Marako 9:14-29; Luka 9:7-43)

¹⁴ I karë na gin obino both lwak, écwö mörö obino both Yecu cë orumo cöngë i nyime,

¹⁵ nakun kobo nü, "Rwoth, kïca ömaki i kom woda piën two araka ömakö éka tye ka limö can rwök. Pol karë two rëdhö en i mac onyo i pii.

¹⁶ An akelo en both elübör, ëntö cangö ölöögö ökö."

¹⁷ Yecu ögamö nü, "Un rok më karë ni yeewu ope, kitewu thon öbal ökö, an abino bedo kodwu pi karë na rom kwene? An abino kwö kodwu pi karë na rom kwene? Kel unu awobi non botha kany."

¹⁸ Yecu ocoko cen, cë odonyo yokö ki i kom awobi non, éka i caa non cüctüth awobi öcang ökö.

¹⁹ Cë elübör Yecu obino bothe i müng éka openyo ginii

nü, "Pïngö wan ba eryämö cen?"

²⁰ Yecu ögamö nü, "Pïen yeewu onwongo tüdii mörö. An akobo niwu köp adyer, ka un itye ki yee na tüdii na calö nyig kodhi karadali, un itwérö kobo nü kidi ni, 'Mukiri ki kany yo kuca' éka bino mukere. Gin mörö ope na bino löönöwu."

²¹ (Koth gin na calö man ba twérö donyo yokö, kono ka ki läga éka rio kec kékén.)*

Yecu dökii ötwakö pii thöö mëre

(Marako 9:30-32; Luka 9:43b-45)

²² I karë na gin öcökëre kanya acel i Galilaya, Yecu okobo bothgi nü, "Wod ka Dhanö ebino ketho örörö i kome.

²³ Gin bino neko en ökö, éka i nünö më adek ebino cero en." Cë elübör Yecu obedo ginii ki cwer cwiny rwök.

Ocoro më Öt k'Obanga

²⁴ Kinge na Yecu éka elübörë othuno ginii i Kaperanaum, écök ocoro më Öt k'Obanga obino both Petero cë okobo ginii nü, "Apwonywu ba cülo ocoro më Öt k'Obanga?"

²⁵ Petero okobo nü, "Cülo."

I karë na Petero odwogo i öt, Yecu änë öcakö twak ködë nakun penyo nü, "Ngö na in ithamö Cimon, rwodhi më lobo ni cökö ginii ocoro ki both éthihögö onyo ki both jö nökënë?"

* **17:21** Baibul nökënë ba ketho tyeng ni.

²⁶ Cë Petero ögamö nü, “Ki both jö nökënë.”

Cë Yecu okobo both Petero nü, “Ka tye nü kömanön cë éthiñögï ba myero öçül.

²⁷ Èntö kadi bed nü kömanön, ek kür onu ébal bothgi, cïdh i dhö nam éka ibol göl i pii. Kwany rëc n'öcakö moko; yab dhögë éka ibino nwongo cëkël ië. Kwany cëkël nön ek imiigï pï ocorona éka megí.”

18

Ngat na löö ki dit i ker më polo

(Marako 9:33-37; Luka 9:46-48)

¹ Ì karë nön élübör Yecu obino bothe cë openyo gïnï nü, “Nga ènë löö ki dit ki i ker më polo?”

² Yecu ocwodo athïn na tüdi cë ömiö ocung i kin-gï,

³ éka okobo nü, “An akobo niwu köp adyer nü ka ba ilökérë idökö unu calö éthiñö, un ba ibino dönyö i ker më polo.

⁴ Pi manön, dhanö na mwolere kënë calö athïn ni ènë dit i ker më polo.

⁵ “Dhanö mörö na jölö athïn na calö man i nyïnga, nwongo öjöla.

⁶ Èntö ka dhanö mörö ömiö ngat acël ki kin éthiñö na thïnö ni n'oye gïnï i koma më podho i bal, onwongo bedo na bér ka etweo pong rego na thwönë i ngute cë ebolo ködë i nam na thuth.

Gin na miö dhanö podho i bal
(Marako 9:42-48; Luka 17:1-2)

⁷ “Lobo bino nënö can pï gin na miö jïi podho i bal. Piëن gin na miö dhanö podho i bal myero obin, èntö dhanö na kelo gin na miö dhanö podho i bal bino nënö can!

⁸ Ka cingi onyo tyeni ènë mii ipodho i bal, ngun ibol ökö. Bér nini më dönyö i kwö na cingi kucël ope onyo nü ngwal, bér na löö bedo ki cingi ariö onyo tyeni kibëc cë eboli ködë i mac na ba thöö.

⁹ Ka wangï ènë mii ipodho i bal, kol éka iyuu ökö. Bér nini më dönyö i kwö ki wangï acël ni löönö më boloni ki wangï ariö i mac Kapïny.

Carolok i kom römö n'orwenyo

(Luka 15:3-7)

¹⁰ “Myero ïnën nü ba ïcaö unu ngat mörö acël ki i kin jö na thïnö ni. Piëن an akobo niwu nü emalaikagï na tye i polo tye gïnï i nyim Apapna i karë kibëc.

¹¹ (Piëن Wod ka Dhanö obino më larö jö n'orwenyo.)*

¹² “Un iithamö nïngö ka dhanö mörö tye ki rom mia acël, éka acël ki kin-gï orwenyo ökö? Èn ba bino wëkö pyer abungwën wie abungwën i wi kidi cë cïdhö rangö man orwenyo?

¹³ An akobo niwu köp adyer nü ka onwongo, cwinye bedo na yom i kom römö n'orwenyo na löö pyer

* **18:11** Baibul nökënë ba ketho tyeng ni.

abungwën wie abungwën na ba orwenyo gini.

14 Ì yoo acël nön, Apapwu na tye i polo thon ba mítö nüjö na thïnö ni kür mörö orweny.

Omeru n'öbalö bothi

15 "Ka omeru öbalö bothi, cïdh bothe ek inyuth nïnë bal mérë, i kin in kï ën. Ka ën owinyo köpni, cë nwongo id-wongo omeru cen.

16 Ëntö ka ën ba owinyo köpni, kwany dhanö acël onyo jö ariö nökënë owoth kodi, ek 'köp kibëc n'ecaden ariö onyo adek ötwakö omok köp kibëc.'

17 Ka ën ökwëro winyo köpgi, kob both jö n'oye Kiricito; éka ka ökwëro winyo köp ka jö n'oye Kiricito, ter ën na calö ngat na ba ngeo Obanga onyo acök ocoro.

18 "An akobo niwu köp adyer nü gin mörö na un itweo i wi lobo ebino thon tweo i polo, éka gin mörö na un ibino gönyö i wi lobo ebino thon gönyö i polo.

19 "An akobo niwu döki nü ka jö ariö kï kinwu oyere gini i kom gin mörö kékën na gïn openyo pïrë, Apapna na tye i polo bino tïmö nügi.

20 Piën kanya jö ariö onyo adek öcökëre gini ië i nyïnga, an thon nwongo atye ködgi kany nön."

Carolok i kom atic na ba obedo nyakïca

21 Cë Petero obino both Yecu éka openyo nü, "Rwoth, wang adi na an myero atim

kïca both öméra ka öbalö botha? Wang abirö?"

22 Yecu ögamö nü, "An ba akobo nini nü wang abirö, éntö wang pyer abirö tyen abirö.

23 "Pi manön, ker më polo cal kï rwoth n'onwongo mítö yübö köp më benyi k'etic mérë.

24 Ì karë na ën dong öcakö kwanö wel, ekelo ècwö mörö bothe n'onwongo tye kï banya më cilëng na thwönë rwök.

25 Na calö onwongo dong ba römö cülö banya nön, cë adwong mérë öcikö nü myero ècadh atic nön i opii, kï dhakö mérë, éthïnö mérë éka gin na kibëc n'onwongo ën tye ködë më cülö banya.

26 "Cüçüth atic nön orumo cöngë i nyim adwong mérë nakun kwaö nü, 'Adwong, dii cwinyi i koma, cë an abino cülöni jami kibëc.'

27 Cë adwong kïca ömakö i kom atic mérë, éka ötimö kïca cë ögonyö öwëkö öcïdhö.

28 "Ëntö i karë n'atic nön ödönyö yokö, ën onwongo atic awodhe n'onwongo tye kï banya mérë na römö denario[†] mia acël. Ën ömakö awodhe na tye kï banya mérë cë ödëö nakun kobo nü, 'Cül banyana!'

29 "Ëntö atic awodhe ni oryebere pïny nakun kwaö nü, 'Dii cwinyi i koma, an abino cülö banyani.'

30 "Ëntö ën ökwëro ökö cë ömio etweo won banya mérë

18:16 Nwönö Cik 19:15 **† 18:28 Denario** obedo cilëng ka jö Roma i karë ka Yecu. Denario onwongo röm kï wel cül më tic më nünö acël.

i buc naka ka wang öcülö banya.

³¹ İ karë n'etic nökënë ca önënö ngö n'ötimëré, cë cwinygii öwang rwökëka öcïdhö okobo gïni both adwong-gï gin na kibëc n'ötimëré.

³² “Cë adwong ocwodo atic n'onwongo én ötimö kïca nïnë éka okobo nï, ‘In ibedo atic na rac, an awëkô banyani kibëc pïen in ikwaö nï atim nini kïca.

³³ In onwongo myero kïca omaki i kom atic awodhi, kite na an thon kïca ömaka i komi.’

³⁴ Akëmö ömakö adwong rwök ömïö eketho atic nön i buc ek onwong pwod naka ka wang öcülö banya mérë kibëc.

³⁵ “Man énë kite n'Apapna na tye i polo bino tïmö ködë i komwu, ka ngat acëlacël i kinwu ba ötimö kïca kï i cwinye both utmego mérë.”

19

Köp na Yecu opwonyo i kom këthö nyom

(Marako 10:1-12)

¹ İ karë na Yecu otyeko twakö köp ni kibëc, én öya ökö kï i Galilaya cë öcïdhö i lobo më Yudea yo löka kulo Jordan.

² Lwak na pol ölübö körë, éka öcangögï kunön.

³ Eparicayo mökö obino bothe, cë öcakö gïni témö Yecu. Gin openyo nï, “Cik yeo nï écwö twëro kwëro dhakö mérë pi tyen köp mörö kékën?”

⁴ Yecu ögamö nï, “Un ba ikwanö nï i acaki Acwec ‘ocweo écwö éka dhakö,’

⁵ éka okobo nï, ‘Pi tyen köp ni écwö bino wëkô apap mérë éka aya mérë cë rïbërë kï dhakö mérë, éka jö ariö dökö kom acël?’

⁶ Kömanön gin ba dökï tye kom ariö, éntö kom acël. Pi manön gin n'Obanga öribö, dhanö mörö kür opok kin-gï.”

⁷ Cë Eparicayo openyo Yecu nï, “Pïngö Muca ömiö cik nï écwö twëro miö waraga më këthö nyom both dhakö mérë cë ryemö ökö?”

⁸ Yecu ögamö nï, “Muca oyeo niwu më ryemö monwu pïen cwinywu onwongo nwang. Éntö onwongo ba obedo nï kömanön kï i acaki.

⁹ An akobo niwu nï ngat mörö na kwëro dhakö mérë na path kï dönyö i elomi, cë önyömö dhakö nökënë nwongo ödönyö i elomi.”

¹⁰ Èlübör Yecu okobo gïni bothe nï, “Ka köp i kom écwö kï dhakö tye nï köman, cë thwara kür enyom.”

¹¹ Yecu ögamö nï, “Jö kibëc ba twëro yeo gïni köp ni, éntö both jö n'Obanga ömiögï kékën.

¹² Jö mökö ba nywöl pïen nwongo énywölögï nï kömanön; jö mökö tye kite na jö nökënë ötimö ködë i komgi; éka jö mökö öyérö më bedo abonge nyom pi ker më polo. Ngat na twëro yeo pwony ni myero oye.”

*Yecu ömio gum i kom éthinö
(Marako 10:13-16; Luka
18:15-17)*

¹³ Kinge ekelo éthinö both Yecu nü ék oketh cingë i komgii éka olég pürgi. Éntö élüböré ocoko jö n'okelo éthinö both Yecu.

¹⁴ Éntö Yecu okobo bothgii ni, "Wék unu éthinö obin botha, kür ijukugi, pién ker më polo tye pi jö na cal k'éthinö ni."

¹⁵ Í karë na dong otyeko ketho cingë i komgii, en öya ökö ki kany nön.

*Awobi n'ölöny
(Marako 10:17-31; Luka
18:18-30)*

¹⁶ Í karë mörö, dhanö mörö obino both Yecu cë openyo ni, "Apwony, atüm ngö na bér ék anwong kwö na ba thum?"

¹⁷ Yecu ögamö ni, "Pingö in itye ka penyona pi gin na bér? Dhanö na bér tye acél kékén. Ka in imitö dönyö i kwö na ba thum, cë ilüb cik."

¹⁸ En openyo Yecu ni, "Cik mënë?"

Yecu ögamö nünë ni, "Kür ineki, kür idöny i elomi, kür ikwal, kür ibed acaden më twodo,

¹⁹ wör apapni éka ayani, 'éka imar awodhi na calö imarö komi keni."

²⁰ Awobi ni ögamö ni, "Man kibéc an agwökö, ngö na pod odong na an myero atüm?"

²¹ Yecu ögamö nünë ni, "Ka in imitö bedo dhanö na bér abonge bal, cihd icadh jami na in itye ködë ek imii lüm mëre both écan, éka ibino bedo ki

lonyö na thwönë i polo. Cë dong ibin ilüb köra."

²² Í karë n'awobi ni owinyo köp ni, öya öcidhö ökö na cwinye cwer rwök, pién en onwongo ölöny rwök.

²³ Cë Yecu okobo both élüböré ni, "An akobo niwu köp adyer, tek rwök pi alonyö më dönyö i ker më polo.

²⁴ Anwö dökü akobo bothwu ni yot pi kinaga më dönyö ki i wang libira ni löönö pi alonyö më dönyö i ker k'Obanga."

²⁵ Í karë n'elübör Yecu owinyo köp ni, obedo gini ki thwön ur rwök éka openyo gini Yecu ni, "Cë nga na dong twérö larë?"

²⁶ Éntö Yecu örüpögü cë okobo ni, "Ki both dhanö man ba twérö, éntö ki both Obanga jami kibéc twérö."

²⁷ Petero ögamö dhö Yecu nakun kobo ni, "Wan ewékö jami kibéc më lübö kori! Ngö na wan ebino nwongo?"

²⁸ Yecu okobo bothgi ni, "An akobo niwu köp adyer, i karë n'ebino ketho ki jami na nyen, ka Wod ka Dhanö bino bedo i then ker më dheo mëre, un jö na dong ilüb unu köra thon ibino bedo unu i then ker apar wie ariö, nakun ingölö unu köp i kom kaka apar wie ariö më Icarael.

²⁹ Dhanö acélacél n'onwongo öwékö gini udi onyo utmegogü onyo apap onyo aya onyo éthinö onyo pwothi pi nyänga, bino nwongo na kadhö tyen mia acél éka en bino nwongo kwö na ba thum.

30 Ḳontö jö na pol n'ötölö anyim bino dong gini ki cen, ēka jö na pol n'odong ki cen bino tölö gini anyim."

20

Carolok i kom etic i pwodho ölöök

1 "Ker më polo cal ki won pwodho ölöök n'oya kodiko cön më pango etic më cihö tic i pwodho ölöök mérë.

2 Ḳen oyere ködgi më cülogi denario më tic pi ninö acel eka oorogi më cihö tic i pwodho ölöök mérë.

3 "En döki öcihö i kin caa adek ce önenö jö mökö n'ocung i kabedo më cuk na ba timö gini gin mörö.

4 Ḳen okobo nügi ni, 'Un thon cih itii i pwodho ölöökna, ce an abino cülowu cül n'opore.'

5 Ce gin thon öcihö.

"En döki öcihö i kin caa abicel më kiceng eka caa abungwén yökö ce ötimö kömanön thon.

6 I kin caa apar wie acel më kothyeno en döki öcihö yökö ce onwongo jö nökënë pod ocung gini kany non. En openyogi ni, 'Pïngö icung unu acunga kany anaka kodiko naka kothyeno na ba itimö unu gin mörö?'

7 "Gin ogamö ni, 'Pi'en ngat mörö ope n'opangowa,'

"Ce en okobo nügi ni, 'Un thon cih itii unu i pwodho ölöökna.'

8 "I karë na dong othuno kothyeno, won pwodho ölöök okobo both atic mérë na löö etic ni, 'Cwod etic eka imiigi cülgii, cakere ki both ngat

n'epango ki cen naka both ngat n'ecakö pango.'

9 "Etic n'epangogii i kin caa apar wie acel më kothyeno obino eka ogamö gini denario pi tic më ninö acel.

10 Jö n'ecakö pangogii i pwodho më acel öthamö ni ebino cülogi na büp na löö më ka jö n'epangogii ki cen, entö gini thon emiogi denario më tic pi ninö acel.

11 I karë na gini dong ogamö cülgii, öcakö gini ngüngüta i kom won pwodho ölöök nakun kobo gini ni,

12 Jö n'epangogii i pwodho ki cen otio gini pi caa acel kékén, eka in icülogi na röm aröma ködwa nakun wan eyelere ki tic rwök i ceng na lyeth.'

13 "Entö en ogamö ni ngat acel ki i kin-gi ni, 'Okona, an ba ateri na rac. In ba iyeo ni ibino gamö denario më tic pi ninö acel?

14 Gam cülni ek icidhi. An amitö cülo dhanö n'epango ki cen cül na röm ki megi.

15 An ba atye ki twero më tic ki jamina kite na an amitö? Onyo wangi ocido pi gin na bér na an atimö më mü köny?"

16 Ce Yecu ojiko köp mérë nakun kobo ni, "Jö n'odong cen bino tölö anyim eka jö n'ötölö anyim bino dong cen."

Yecu döki ötwakö pi thöö mérë

(Marako 10:32-34; Luka 18:31-34)

17 I karë na Yecu onwongo tye ka cihö yo Jerucalem, en ökwanyö elüböré apar wie

ariö thenge kën-giï ëka okobo nügi ni,

¹⁸ “Onu ëcïdhö yo Jerucalem, ëka Wod ka Dhanö ebino miö ökö both élamdhök na dito ëka both epwony cik. Gin bino ngölö nünë köp më thöö”

¹⁹ ëka ebino miö ën both erok ëk engal, epwod ki del ëka egur i kor yath aria. Ëntö i nünö më adek ebino cero ën ökö!”

*Kwac pi Yakobo ëka Jon
(Marako 10:35-45)*

²⁰ Cë dhakö ka Jebedayo obino both Yecu k'awope mérë ariö, orumo cöngé piny i nyime cë ökwaö ën pi gin mörö.

²¹ Yecu openyo ën ni, “Ngö enön na in imitö?”

En ögamö ni, “Cikiri ni ibino miö awopena ariö ni ek ngat acel obed i nget cingi kucem ëka acel i nget cingi kucam i kerni.”

²² Yecu ögamö nügi ni, “Ba ingeo unu gin na un itye ka penyo. Un itwérö madhö ekopo më can na an abino madhö?”

Gin ögamö ni, “Wan etwérö.”

²³ Cë Yecu okobo nügi ni, “Adyer un ibino modho k'ekopo më can na an abino modho ködë, ëntö më bedo i nget cinga kucem onyo kucam pathi an ene ayérö. Kabedo nön bino bedo më jö n'Apapna öyübö pürgi.”

²⁴ I karë na jö apar nökene ca owinyo gini köp ni, gin öngöö i komomego ariö rwök.

²⁵ Cë Yecu ocwodogï kanya acel ëka okobo nügi ni, “Un ingeo ni élöc k'erok löögi ki

ték ëka editegi ut ki twëro i komgi.

²⁶ Man myero kür obed ni kömanön i kinwu. Ka ngat na mitö bedo na dit ki i kinwu, myero obed aticwu,

²⁷ ëka ngat na mitö bedo dhanö më acel myero obed opiiwu—

²⁸ kite na Wod ka Dhanö ba obino ni ek etii nünë, ëntö më tic pi jii, ëka më miö kwö mérë më kökö jö na pol.”

Yecu öcangö ethöö wang arïö

(Marako 10:46-52; Luka 18:35-43)

²⁹ I karë na Yecu k'elübörë onwongo tye ka yaa gini ki i Jeriko, lwak na pol ölübü körë.

³⁰ Ethöö wang arïö onwongo obedo gini i nget yoo, ëka i karë na gìn owinyo ni Yecu onwongo tye ka wok kany nön, gìn oredu ni, “Rwoth, Wod ka Daudi, kïca omaki i komwa!”

³¹ Lwak ocokogï nakun kobo gini ni ek öling gini ökö, ëntö gìn ömëdérë ki redo rwök ni, “Rwoth, Wod ka Daudi, kïca omaki i komwa!”

³² Yecu ocung ëka ocwodogï, cë openyogi ni, “Ngö na un imitö ni an atim niwu?”

³³ Gin ögamö ni, “Rwoth, wan emitö ni wangwa öyabérë.”

³⁴ Kïca ömakö Yecu i komgi ëka ën ogudo wang-gi. Cë cüçüth wang-gi öyabérë ëka öcakö gini lübö körë.

21

*Yecu ödönyö ï Jerucalem
calö Rwoth
(Marako 11:1-11; Luka
19:28-40; Jon 12:12-19)*

¹ İ karë na Yecu k'ëlüböré dong cwök thuno ï Jerucalem, gïn obino ï Betepage ï kor Kidi më Jeituni. Cë Yecu ooro elüböré ariö,

² nakun kobo nïgï nï, "Cïdh unu ï pacö na tye ï nyimwu, cë cüçüth ibino unu nwongo kana n'etweo kanya acël k'athin mérë ï ngete. Göny unu éka ikel unugi botha.

³ Ka dhanö mörö okobo niwu köp mörö, kob unu nïnë nï Rwoth énë mütögï, éka dhanö nön bino miöwu ikelo piiöö."

⁴ Man ötümërë më cobo köp na yam adwarpïny ötwakö nï:

⁵ "Kob nï jö më Cion nï,
'Nën, rwothwu tye ka
bino bothwu,
en mwol éka obedo ï wi kana
ï wi athin kana.' "

⁶ Elüböré öcïdhö éka ötümö gïnï kite na Yecu öcikögï ködë.

⁷ Gin okelo kana éka athin mérë, cë öpëdhö gïnï böng-gï ï ngeegï éka Yecu obedo ï wie.

⁸ Lwak na pol öpëdhö böng-gï ï dye yoo, nakun jö nökënen tongo jang yen cë pëdhö gïnï ï dye yoo.

⁹ Lwak n'ötëlö anyim éka kï jö n'ölübö köré onwongo tye ka wöö gïnï nï,

"Ocana,* Wod ka Daudi!"

"Gum obed ï kom ngat na tye ka bino kï nyïng Rwoth!"

"Ocana na tye malö rwök!"

¹⁰ İ karë na Yecu ödönyö ï Jerucalem, jö kïbëc kï ï pacö obedo gïnï k'ethime nakun penyo gïnï nï, "Man énë nga?"

¹¹ Lwak ögamö nï, "Man énë Yecu, adwarpïny n'öya kï ï Najaret na tye ï Galilaya."

*Yecu öcïdhö ï Öt k'Obanga
(Marako 11:15-19; Luka
19:45-48; Jon 2:13-22)*

¹² Yecu ödönyö ï dyekal öt k'Obanga éka öryëmö jö kïbëc n'onwongo cadhö éka wilö gïnï wil kunön. Èn ölökö mëja ka jö na lökö cilïng atarö éka thene ka jö na cadhö amame.

¹³ Èn okobo nïgï nï, "Ècöö nï, 'Öda ebino cwodo nï öt më lëga,' éntö un ilökö ödökö 'ka pono k'ekwoe.' "

¹⁴ Èthöö wang éka engwalo obino gïnï bothe ï dyekal öt k'Obanga éka èn öcangögï.

¹⁵ Èntö élamdhök na dito éka epwony cïk öngöö gïnï rwök ï karë n'önënö gïnï tic më aura na èn onwongo tye ka tïmö éka éthinö na wöö ï dyekal Öt k'Obanga nakun kobo gïnï nï, "Ocana Wod ka Daudi."

¹⁶ Gin openyo èn nï, "In itye ka winyo ngö n'éthinö ni tye ka kobo?"

Yecu ögamö nï, "Eyo, un anaka bara ikwanö unu nï,
"Ki ï dhö éthinö éka éthinö na döth

* **21:9 Ocana** ï lëb Iburu gönyö nï Lar n'ölökëre ödökö më pak. **21:9** Jabuli 118:26 **21:13** Icaya 56:7 **21:13** Jeremia 7:11 **21:16** Jabuli 8:2

in ipwonyo ēthiñö më
mïöni pak?"

¹⁷ Cë ën öya öwëkögï ëka
öcidhö yo Betania cë obuto
kunön.

*Yecu ölamö yath ölam
(Marako 11:12-14,20-24)*

¹⁸ Kodiko cön na Yecu on-
wongo tye ka dök cen yo pacö,
kec onwongo oneko ën.

¹⁹ Yecu önenö yath ölam i
nget yoo, ën öngël ië entö ba
onwongo ölam mörö na path
k'oboke kékën. Ën okobo ni
yath ölam ni, "Ba döki ibino
nyakö nyigi!" Cë cüçüth yath
ölam öthwö ökö.

²⁰ I karë n'élübörë önenö,
ouro gini ëka openyo gini ni,
"Yath ölam öcakö thwö nüngö
piöpiö?"

²¹ Yecu ögamö ni, "An akobo
niwu köp adyer ni ka iut
unu ki yee na ba itye unu
ka kalakala, ba ibino unu
tümö gin na an atimö i kom
yath ölam kékën, entö irömö
unu thon kobo ni kidi ni ni,
'Mukiri ëka icidh icibiri i nam,'
cë bino tümerë.

²² Ka in itye ki yee, gin mörö
kékën na in ibino kwaö ki lëga
ibino nwongo."

*Epenyo Yecu i kom twér
mérë*

*(Marako 11:27-33; Luka
20:1-8)*

²³ I karë na Yecu odwogo
i dyekal öt k'Obanga, na ën
tye ka pwony, élamdhök na
dito ëka edong ka lwak obino
gini bothe cë openyo gini ën
ni, "Twérö ménë na in itye ka
tümö ki gin ni gini? Ëka nga ën
omii twérö ni?"

²⁴ Yecu ögamö ni, "An thon
abino penyowu peny acël. Ka
igamö unu nina, cë an abino
kobo niwu twérö ménë na an
atyé ka tümö ki gin ni gini.

²⁵ Batica ka Jon öya ki
kwene? Öya ki i polo onyo ki
both dhanö?"

Gin öcakö larö köp nön i kin-
gï kën-gï ëka okobo gini ni, "Ka
onu ekobo ni öya ki i polo, ën
bino penyo ni, 'Pingö ba iyee
unu i kom Jon?'

²⁶ Entö ka onu ekobo ni,
'Öya ki both jii'-cë onu el-
woro lwak, piën jö kibec yee
ni Jon onwongo obedo ad-
warpiny."

²⁷ Cë gin ögamö ni Yecu ni,
"Wan ba engeo."

Ëka Yecu okobo nügi ni, "An
thon ba abino kobo niwu
twérö ménë na an atye ka
tümö ki gin ni gini."

Carolok i kom awope ariö

²⁸ "Ngö na un ithamö? Yam
ëcwö mörö tye n'onwongo ut
k'awope ariö. Ën öcidhö both
awobi më acël ëka okobo nünë
ni, 'Woda, cidh itii i pwotho
ölökna tin.'

²⁹ "Ën ögamö ni, 'Ba abino
cidhö,' entö kinge ën olökö
thama mérë ëka öcidhö.

³⁰ "Cë apap mérë thon
öcidhö both awobi nökënë ca
ëka okobo kömanön. Awobi
ni ögamö ni, 'Eyo, apap, an
abino cidhö,' entö ën ba obino
öcidhö.

³¹ "Nga ki kin jö ariö ni ën
ötümö gin n'apap mérë mitö?"

Gin ögamö ni, "Awobi më
acël!"

Cë Yecu okobo nügi ni, "An
akobo niwu köp adyer ni écök

ocoro ëka oleye bino cakö dönyö niwu i ker k'Obanga.

³² Piën Jon obino më nyutho niwu yoo më kite atir, ëka un ba iyee unu i kome, entö écök ocoro ëka oleye oyee i kome. Ëka thon kinge na dong inënö unu gin ni, ba ibino ingut ëka iyee unu i kome.

Carolok i kom epang pwodho

(Marako 12:1-12; Luka 20:9-19)

³³ "Winy unu carolok nökënë: Yam onwongo tye won pwodho mörö n'öpïdhö ölöök. Ën oketho cël ögürö, ökünyö bur iie më biö ölöök ëka öyübö pem më kür iie. Cë ën ömiö pwodho ölöök both epang pwodho mörö ëka ën öcïdhö ökö i lobo nökënë.

³⁴ Na karë më kac onyingo na cwök, ën ooro etic mérë both epang pwodho më gamö nyig ölöök na mëgë.

³⁵ "Epang pwodho ömakö etic mérë, epwodo, eneko nökënë, ëka ecelo nökënë ki kite.

³⁶ Cë ën döki ooro etic nökënë bothgï, na pol na löö më acël ökö ëka epang pwodho oterogï na rac calö më acël ca.

³⁷ Më ajiki mérë ën ooro wode bothgï nakun kobo ni, 'Gin bino wörö woda.'

³⁸ "Entö i karë n'epang pwodho önënö wod ka won pwodho, cë ötwak i kin-gï këngï ni, 'Man ënë ngat na bino leeno jami. Bin unu, eru enek

en ökö ëka eter jami më alea mérë.'

³⁹ Cë gïn ömakö ën, oyuo gïni yökö ki i pwodho ölöök ëka eneko ökö.

⁴⁰ "Pï manön, ka won pwodho ölöök obino, ën bino tïmö ngö i kom epang pwodho?"

⁴¹ Gïn ögamö nïnë ni, "Ën bino neko jö nön na kitegi reco ökö ëka bino miö pwodho ölöök më apanga both epang pwodho nökënë, na bino miö ën nyig ölöök na mëgë i karë më kac."

⁴² Cë Yecu okobo nïgï ni, "Un bara ikwanö unu Cöc na Leng:

"Kidi n'egedo ökwëro
ëne ödökö kidi më gwic
öt.

Man ënë tic ka Rwoth,
ëka obedo gin më aura
both onu."

⁴³ "Pï manön an akobo niwu ni ker k'Obanga ebino kwanyö ökö ki bothwu ëka émiö both jö nökënë na bino nyakö nyige n'opore.

⁴⁴ Ngat na bino podho i kom kidi ni bino tüitura ngïdhëré na thüthïnö, entö ka kidi nön örëdhëré i kom ngat mörö, bino ngïngïnyö ökö."†

⁴⁵ I karë n'ëlamdhök na dito ëka Eparicayo owinyo gïni carolok ka Yecu gïni, gïn öniang ni ën onwongo tye ka twak i komgi.

⁴⁶ Cë gïn öcakö rangö yoo më makö ën, entö gïn onwongo lworo lwak piën lwak onwongo ngeo ni Yecu obedo adwarpiny.

22

Carolok i kom karama më nyom

(*Luka 14:15-24*)

¹ Yecu ötwak ködgï döki ki carolok gïnï nakun kobo ni:

² “Ker më polo eporo ki rwoth n'øyübö karama më nyom pi wode.

³ Ën ooro etic mërë më cïdhö cwodo jö n'onwongo ecwodogï i karama më bino, éntö gïn ökwérö bino ökö.

⁴ “Cë ën döki ooro etic nökënë nakun kobo ni, ‘Kob both jö n'onwongo ecwodogï ni an dong ayübö cemna ökö: Thwonina éka dhok n'öcwë enekogï dong ökö, jami kibëc dong tye kakarë. Bin unu i karama më nyom.’

⁵ “Éntö jö n'ecwodogï i nyom ökwérö gïnï winyo köp nön, cë öcidhö gïnï ökö—ngat acël öcidhö i pwotho mërë éka ngat nökënë öcidhö i cath mërë.

⁶ Jö nökënë ömakö etic mërë cë opwodogï rwök éka onekogï ökö.

⁷ Akëmö ömakö rwoth cë ooro acikari mërë më neko enek nonu éka wangö pacögï ökö.

⁸ “Cë ën okobo both etic mërë ni, ‘Karama më nyom éyübö dong ökö, éntö jö n'onwongo an acwodogï ba opore gïnï më bino.

⁹ Cïdh unu i yodhi ek icwod ngat mörö kékën na un ibino nwongo ek obin i karama më nyom.’

¹⁰ Cë etic öcidhö éka ocwodo gïnï jö kibëc na gin onwongo i yodhi, jö na bëcö éka jö na

reco cë öt më nyom opong ki wele.

¹¹ “Éntö i karë na rwoth obino më nénö wele, ën önenö dhanö mörö na ba oruko böngü na bér më nyom kunön.

¹² Cë openyo ën ni, ‘Okona, idonyo kany ningö na ba iruko böngü na bér më nyom?’ Éntö ën ölüng alinga.

¹³ “Cë rwoth okobo both etic mërë ni, ‘Twe unu cingë éka tyenë ek ibol unu ën yökö, i pïny na cöl, kanya koko éka kaö lak bino bedo ië.’

¹⁴ “Piën jö n'ecwodogï pol éntö jö n'eyerögï nönök.”

Cülö ocoro both Cija

(*Marako 12:13-17; Luka 20:20-26*)

¹⁵ Cë Eparicayo öcidhö öyübö gïnï köp kite na myero emak gïnï ki Yecu ki köp mörö na yaa ki i dhögë.

¹⁶ Gin ooro elübkögï éka jö na cwakö Erode më penyo Yecu ni, “Apwony, wan engéo ni in ikobo köp adyer éka ipwonyo köp k'Obanga na lübërë ki köp adyer. In ba iparö dhanö mörö, piën ba inenö dhanö ki yökö.

¹⁷ Kob niwa thamani: Pore më cülö ocoro both Cija onyo pe?”

¹⁸ Éntö Yecu ongeo thamagi ökö cë openyogi ni, “Un etwodo, pïngö un itye ka temöna?

¹⁹ Nyuth unu nïna cilëng mörö na nyïng n'ecülo pi ocoro.” Cë gin okelo nïnë denario acël,

²⁰ éka ën openyogi ni, “Cal éka cöc n'ecöö ië obedo më ka nga?”

21 Gïn ögamö nï, "Më ka Cija."

Cë ën okobo nïgï nï, "Mïï unu jami ka Cija both Cija éka jami k'Obanga both Obanga."

22 ï karë na gïn owinyo köp ni, obedo gïnï kï ur rwök. Cë öwëkö gïnï ën éka öcïdhö gïnï ökõ.

*Peny i kom cer kï i thöö
(Marako 12:18-27; Luka 20:27-40)*

23 ï nünö nön kikokome, Ecadukayo na kobo gïnï nï cer ka jö n'öthöö ope obino gïnï both Yecu éka openyo gïnï ën nï,

24 "Apwony, Muca yam okobo nïwa nï ka écwö mörö öthöö na ba önywölö éthïnö, ömïn mérë myero öläk dhakö mérë ek önywölö éthïnö nakaka ömïn mérë n'öthöö.

25 Yam onwongo tye ut-mego abïrõ i kinwa kany. Dhanö më acël obino önyömö dhakö éka öthöö ökõ na ba önywölö éthïnö, cë ën öwëkö dhakö mérë both ömïn mérë.

26 Ömïn mérë më ariö nön thon obino öthöö éka më adek naka otyeko jö abïrõ nonu kibëc.

27 ï ajiki mérë, dhakö thon obino öthöö.

28 Cë dong i karë më cer, dhakö nön bino bedo më ka nga kï kin jö abïrõ nonu, nakun dhakö nön onwongo obedo mögï kibëc?"

29 Yecu ögamö nï, "Un irwenyo ökõ piën ba ingeo unu Cöc na Leng onyo tékö k'Obanga.

30 ï karë më cer, jü ba bino nyom onyo ényömögü; éntö gïn bino bedo calö emalaika na tye i polo.

31 Éntö köp i kom cer ka jö n'öthöö—un ikwanö ngö n'Obanga okobo niwu nï,

32 'An abedo Obanga k'Abraam, Obanga ka Icaka éka Obanga ka Jakob' Ën ba obedo Obanga ka jö n'öthöö éntö Obanga ka jö na kwö."

33 ï karë na lwak owinyo köp ni, obedo gïnï kï ur rwök i kom pwony mérë.

*Cik na dit na lõö kibëc
(Marako 12:28-34; Luka 10:25-28)*

34 ï karë n'Eparicayo owinyo nï Yecu otweo dhö Ecadukayo ökõ, gïn öcakö cökérë kanya acël.

35 Ngat acël kï i kin-gï na ngeo cik rwök ötämö ën kï peny ni:

36 "Apwony, cik mënë ënë dit na lõö kï i cik?"

37 Yecu ögamö nï: " 'Mar Rwoth Obangani kï cwinyi kibëc, éka kï tiponi kibëc, éka kï thamani kibëc.'

38 Man ënë cik më acël éka cik na dit na lõö kibëc.

39 Éka cik më ariö cal ködë: 'Mar awodhi na calö imarö komi keni.'

40 Cik kibëc éka pwony k'Edwarpïny ocung gïnï i kom cik ariö ni."

*Peny i kom Meciya
(Marako 12:35-37; Luka 20:41-44)*

41 Ì karë n'Eparicayo öcökérë gini kanya acël, Yecu openyogi ni,

42 "Ngö na un ithamö i kom Meciya? Èn obedo wod ka nga?"

Gin ögamö ni, "Wod ka Daudi."

43 Èn okobo niги ni, "Pïngö Tipo Naleng ömio Daudi oc-wodo èn ni 'Rwoth'? Piën okobo ni,

44 " 'Rwoth okobo both Rwodha ni,

"Bed i ngét cïnga më kucem naka ka an aketho langni i thë tyeni."

45 Ka Daudi cwodo èn ni 'Rwoth,' èn twërò bedo wode ningö?"

46 Ngat mörö ope n'onwongo twërò gamö köp mërë, éka cakérë i nünö nön ngat mörö ope döki n'othamö më penyo èn peny mörö gini.

23

*Epwony cik éka Eparicayo
(Marako 12:38-39; Luka 11:43-46; 20:45-46)*

1 Cé Yecu okobo both lwak éka élübkörë ni:

2 "Epwony cik éka Eparicayo ènë émiögï twërò më gonyö cik ka Muca.

3 Cé myero iwör unugï éka itim unu gin na kibec na gin kobo niwu. Èntö kür itim unu ngö na gin tïmö, piën gin ba tïmö ngö na gin pwonyo.

4 Gin tweo yec na pëk éka ketho i wi ba jii, èntö gin kikomgi ba twërò könö më cwarö ki nya cïng-gi.

5 "Gin na kibec na gin tïmö, etïmö èk jii önën: Gin ketho i ngut cïng-gi éka i terinyimgi tyeng më Cöc na Leng, éka thöl tacel na boco i böng-gi; 6 gin marö bedo i kabedo më wörö i karäma më cem éka i thene na pïrgi ték i cinagoga gini;

7 gin marö ni èk emothgï ki i kabedo më cuk gini éka mitö ni èk ecwodgï ni, 'Apwony.'

8 "Èntö un myero kür ecwodwu ni, 'apwony,' piën itye unu k'Apwony acël kékén éka un kibec ibedo unu utmego.

9 Éka kür icwod unu ngat mörö ki i wi lobo kany ni, 'apap,' piën itye unu k'Apap acël kékén na tye i polo.

10 Onyo kür ecwodwu ni, 'apwony,' piën itye unu k'Apwony acël kékén na ènë Meciya.

11 Ngat na dit na löö ki kinwu bino bedo aticwu.

12 Piën ngat na tingere malö kënë ebino dwökö pïny, éka ngat na mwolere kënë ebino tingo malö.

13 "Ibino nënö unu can, un epwony cik éka Eparicayo, un etwodo! Un icego dholokek më ker më polo ökö ni jii. Un kikomwu ba idönyö unu, éka dök thon ijükö unu jii na mitö dönyö ië ökö.

14 (Ibino nënö unu can un epwony cik éka Eparicayo, un etwodo! Piën imaö unu udi ka mon na cwögi öthöö, éka ilégö unu lëga na boco më nyuthere both Obanga. Pi manön köp n'ebino ngölö i

wiwu bino bedo na thwönë rwök.)*

15 “Ibino nënö unu can, un epwony cik éka Eparicayo, un etwodo! Piën iwothro unu ï wi lobo éka ï wi nam pi lökö dhanö acél më dwongo bothwu, éntö ka dong ölökérë, ïmio unu én dökö dhanö na rac rwök, na cihö yo kapïny na bal mérë lõö mewu wang kiriö.

16 “Ibino nënö unu can, un jö na pëö éthöö wang! Un ikobo ni, ‘Ka ngat mörö okwongo kwong ki öt k'Obanga, kwong mérë ba makö én; éntö ka ngat mörö okwongo kwong ki gol më öt k'Obanga, kwong mérë makö én.’

17 Un éthöö wang na müng! Ménë énë dit na lõö: gol onyo Öt k'Obanga na miö gol dökö na leng?

18 Un thon ikobo ni, ‘Ka ngat mörö okwongo kwong ki keno tyér, kwong mérë ba makö én; éntö ka ngat mörö okwongo kwong ki müc na tye ï wi keno tyér, kwong mérë makö én.’

19 Un éthöö wang! Ménë énë dit na lõö: müc, onyo keno tyér na müö müc dökö na leng?

20 Pi manön, ngat na kwongo kwong ki keno tyér, kwongo ki keno tyér éka ki jami kibec na tye ié.

21 Éka ngat na kwongo kwong ki öt k'Obanga, kwongo ki öt k'Obanga éka ki ngat na bedo ié.

22 Ngat na kwongo kwong ki polo kwongo ki then ker k'Obanga éka ki ngat na bedo ié.

23 “Ibino nënö unu can, un epwony cik éka Eparicayo, un etwodo! Un imio acél më apar më gin na miö cem bedo na mit, éntö köp na pürgi tek rwök më cik iwëkö unu ökö–ngölököp atir, tümö käca, éka bedo ki gen. Onwongo myero itim unu jami ni kibec nakun ba iwëkö unu nökënë ca.

24 Un jö na pëö éthöö wang! Illo unu lwangi ökö ki gin na un imadhö éntö imwönyö unu kinaga.

25 “Ibino nënö unu can, un epwony cik éka Eparicayo, un etwodo! Ilwökö unu nge ekopo éka nge bakuli më bedo na leng éntö igi opong ki tím më woro éka ki miti mökö na ba twero jükëre.

26 In Aparicayo na wangi öthöö! Kono ilwök ii ekopo éka ii bakuli obed na leng, cë nge thon bino bedo na leng.

27 “Ibino nënö unu can, un epwony cik éka Eparicayo, un etwodo! Un ical ki bur lyene n'epuo na tar, na nen na leng ki yokö éntö ié opong ki cogo ka jö n'othöö gini éka ki gin na kibec na ba leng.

28 Un thon itye ni kömanön, inen unu ki yokö both jii na calö jö na kitegi atir éntö iwu opong ki twodo éka ki tím na reco.

29 “Ibino nënö unu can, un epwony cik éka Eparicayo, un etwodo! Iyubö unu bur lyene k'edwarpiñy éka idheo unu lyene ka jö na kitegi atir.

30 Éka ikobo unu ni, ‘Ka onwongo yam wan etye i karë ka kwerewa, kono wan

24

ba äribérë ködgï i önyö remo k'edwarpïny.

³¹ Cë un ïmïö caden i komwu kenwu ni un ibedo ëkwaë ka jö na yam oneko edwarpïny.

³² Mëdérëunu anyim ek icobunu bal na yam kwerewu öcakö!

³³ “Un thwone! Un éthïn ororo! Un ibino bwöth ningö ki ngölö-köp më mac kapïny?

³⁴ Pi manön an atye ka oro niwu edwarpïny, jö na ryékëka epwony cik. Jö mökö ki kin-gï un ibino neko éka iguro unu; jö nökënë un ibino pwodo ki del i cinagogawu gïni éka íryémö unugï ökö ki i pacö mörö kékën.

³⁵ Pi manön, remo kibéc n'ope ki bal n'ööny i wi lobo obed i wiwu, cakérë ki i remo k'Abel na bal mérë ope thuno ködë naka i remo ka Jakaria wod ka Barakia, na un ineko i kin öt k'Obanga éka keno tyér.

³⁶ An akobo niwu köp adyer, köp ni kibéc bino bino i kom rok më karë ni.

³⁷ “Jerucalem, Jerucalem, un ineko edwarpïny éka icelo unu jö n'eoro bothwu ki kite, wang adi na an abedo ka mütö cökö éthïnöni kanya acël calö miñ gwënö na gürö éthïnë i thë bwome, éntö in ikwérö ökö.

³⁸ Nën, odi dong ewékö nini, odong nono.

³⁹ Pién an akobo niwu ni ba döki ibino nénöna unu, naka ka ibino unu kobo ni, ‘Gum obed i kom ngat na bino ki nyïng Rwoth.’

Anyuth më karë më ajiki

¹ Yecu öya kï i öt k'Obanga. Na en tye ka woth, élübörë obino bothe cë gïn onyutho ninë gedo më öt k'Obanga.

² Én openyogü ni, “Inënö unu jami ni kibéc? An akobo niwu köp adyer ni ba ebino wékö kidi mörö acël dong n'ododere i wi awodhe na ba ebino thwaro ökö pïny.”

³ I karë na Yecu obedo pïny i wi Kidi më Jeituni, élübörë obino bothe i müng cë okobo gïni ni, “Kob niwa, man bino tümërë awene, éka ngö na bino nyutho dwogoni éka ajiki pïny?”

⁴ Yecu ögamö ni: “Gwökëre unu ek ngat mörö kür öbwölwu.

⁵ Pién jö na pol bino bino gïni ki nyïnga na bino gïni kobo ni, ‘An énë Meciya,’ éka bino bwölö jö na pol.

⁶ Un ibino winyo köp i kom lwëny éka anii më lwëny, éntö kür ibed unu ki lworo. Pién manön myero ötimërë, éntö ajiki nwongo podi.

⁷ Rok bino lwëny i kom rok nökënë, éka ker bino lwëny i kom ker nökënë. Kec éka oyeyeng bino bedo i kabedo na papath.

⁸ Man kibéc nwongo pod obedo calö acaki rem më nywöl.

⁹ I karë nön ebino maköwu, eketho ayela i komwu éka ebino nekowu. Rok kibéc bino dagöwu pïra.

¹⁰ Cë i karë nön, jö na pol bino lökëre gïni ökö ki kom

yee, bino ketho gini örörö éka adagé i kin-gi kén-gi.

¹¹ Edwarpiny na twot bino bino na pol éka bino bwölö gini jö na pol.

¹² Tím na reco bino mëdérë, éka mar ka jö na pol bino kwe ökö,

¹³ éntö ngat na bino cung na ték naka i ajiki bino larë.

¹⁴ Éka Emuth na Bér më ker k'Obanga ebino titö i wi lobo kibec më bedo na calö caden both rok kibec, cë ajiki piny dong bino.

¹⁵ “Un ibino nénö ‘gin mörö më kwer na kelo lworo’ na yam adwarpiny Daniel okobo. Gin nön bino cung i kabedo na leng. (Ek ngat na kwanö öniang ië.)

¹⁶ Cë jö na tye i Yudea myero örинг gini ökö i wi kite.

¹⁷ Dhanö na tye i wi ödë kür oidhi piny më kwanyö gin mörö ki i öt.

¹⁸ Dhanö na tye i pwodho kür ödök cen më ömö böngü mérë.

¹⁹ Mon na yeco éka mon na dödhö éthiñö bino nénö can i karë nonu!

²⁰ Lég unu both Obanga ek ngwécwu kür ötmérë i karë më cwir onyo i ceng Cabit.

²¹ Piën karë nonu bino bedo karë më can na dwong na anaka yam bara onen i acaki më cweno lobo naka tin éka ba döki bino nen.

²² Ka nínö nonu onwongo ba ejükö na cek, ngat mörö onwongo ope na bwöth. Éntö pi jö n'eyérögi nínö nonu ebino jükö na cek.

²³ Í karë nön ka dhanö mörö okobo niwu ni, ‘Nén, Meciya ene,’ onyo ni, ‘En éca,’ kür iyee unu.

²⁴ Piën jö na kobo ni gïn ebedo Kiricito éka edwarpiny na twot bino bino éka bino tio gini anyuth éka tango na dito ek ka twërë ébwöl gini naka jö n'eyérögi.

²⁵ Winy unu, an atyeko dong kobo ökö niwu na karë bara örömö.

²⁶ “Dong ka ngat mörö okobo niwu ni, ‘En éca tye i thim,’ kür icidh unu, onyo ni, ‘En tye kany, i öt i thë tyëlö,’ kür iyee unu.

²⁷ Piën kite na lüth köth yaa ki kukidë wil dök yo kuthö, bino ka Wod ka Dhanö thon bino bedo ni kömanön.

²⁸ Kanya lyene tye ië, acuth bino cökérë gini kunön.

²⁹ “Cucüth kinge can na dwong më nínö nonu

“ceng bino cido,

éka dwe ba bino miö tara mérë;

cér bino podho ki i polo yo piny

éka twër kibec më polo bino yengere gini’

³⁰ “I karë nön anyuth ka Wod ka Dhanö bino nen i polo, éka rok kibec më wi lobo bino gini kumo. Gin bino nénö Wod ka Dhanö na tye ka bino k'edou më pöl ki tékó éka dheo na dit.

³¹ En bino oro emalaika mérë ki cwodo më buruji na longo, éka gïn bino cökö jögë n'eyérögi ki i wi lobo thükül,

kü i ajiki polo kucël naka yo ajiki polo tung ca.

32 "Nwong unu pwony ni kï i kom yath ölam: Ka jangë öcakö löth éka pote odonyo, un ingeo nï oro dong cwök.

33 Kömanön thon ka ïnënö unu jami ni kibëc, nge unu nï karë dong cwök, tye i dholokek.

34 An akobo niwu köp adyer, rok më karë ni ba bino poth naka ka jami ni kibëc ötümërë.

35 Polo éka lobo bino thum ökö, éntö köpna ba bino thum.

Ngat mörö ope na ngeo nïnö éka caa

36 "Ngat mörö ope na ngeo nïnö nön onyo caa, kadï thon emalaika na tye i polo, onyo Wod,* éntö Apap kékën énë ngeo.

37 Bino ka Wod ka Dhanö bino bedo calö karë ka Noa.

38 I karë nonu n'onwongo abwal pii bara openg i wi lobo, jii onwongo cemo éka medho gñi, awope nyomo éka anyira ényömögï, naka othuno i nïnö na Noa ödönyö i yeya.

39 Gin ba ongeo gin mörö na bino tïmërë naka abwal pii obino ömol ködgï ökö kibëc. Bino bedo nï kömanön ka Wod ka Dhanö bino dwogo.

40 I karë nön jö ariö bino bedo i pwodho; ebino kwanyö ngat acël ökö cë ngat acël bino dong.

41 Mon ariö bino bedo i rego kï pong rego; ebino kwanyö ngat acël ökö cë ngat acël bino dong.

* 24:36 Baibul nökënë ba oketho onyo Wod.

42 "Pï manön bed unu na wangwu thwolo, piën ba ingeo unu nïnö mënë na Rwothwu bino dwogo ködë.

43 Éntö myero ïnïang unu köp ni: Ka won öt onwongo ongeo caa na kwo bino bino ië, én onwongo bedo na wangë thwolo éka ba miö étürö ödë.

44 Pï manön, un thon myero iyübërë, piën Wod ka Dhanö bino bino i caa na un ba ingeo.

45 "Cë nga dong n'obedo atic na genere éka na ryëk, n'adwong mérë oketho én më lõönö etic na tye i ödë më miögi cemgï i caa n'opore?

46 Bino bedo na bër both atic nön ka adwong mérë odwogo cë onwongo én tye ka tïmö nï kömanön.

47 An akobo niwu köp adyer, én bino ketho én më lõönö jami mérë kibëc.

48 Éntö ka atic na rac nön okobo kï i cwinye kënë nï, 'Adwongna bino bedo yökö pï karë na lac,'

49 éka én cakö pwodo etic ewodhe, cemo éka medho kï jö na mér.

50 Adwong k'atic nön bino dwogo i nïnö éka i caa na én ba ngeo.

51 Cë én bino pwodo én rwök éka ketho én i kabedo kanya acël k'etwodo, kanya koko éka kaö lak bino bedo tye ië.

¹ “İ karë nön ker më polo bino bedo calö anyira apar n'obino öcïdhö gïnï kï taragï më romo k'anyom.

² Jö abic kï kin-gï onwongo mïng ëka jö abic onwongo ryëk.

³ Anyira abic na mïng otero taragï na ba ömakö gïnï mënökënen.

⁴ Ëntö anyira na ryëk otero gïnï mënökë i cupagï kanya acël kï taragï.

⁵ İ karë n'anyom pod ögalërë, gïn kibëc nïnö öcakö makö wang-gï, cë öniñö gïnï ökö.

⁶ “İ karë na dong othuno dingwor, wöö öcakö winyere rwök: ‘Winy unu, anyom othuno ökö! Donyi unu yökö më romo ködë!’

⁷ “Cë anyira apar kibëc ocoo gïnï cüçüth, ëka öyübö gïnï taragï.

⁸ Anyira na mïng okobo gïnï both anyira na ryëk ni, ‘Miiwa unu mööwu mörö, piën mac tarawa mitö thöö ökö.’

⁹ “Ëntö anyira na ryëk ögamö gïnï ni, ‘Möö ope na römö onu kibëc. Apë unu both jö na cadhö möö ek iwil unu mewu.’

¹⁰ “İ karë n'anyira na mïng öcïdhö gïnï më wïlö möö, cüçüth anyom othuno. Anyira n'onwongo öyübëre ödönyö gïnï kanya acël ködë i öt karama më nyom. Cë dholokek eloro ökö.

¹¹ “Kinge anyira nökënen ca obino gïnï nakun bakö dhögï ni, ‘Adwong, adwong, yab niwa dholokek!’

¹² “Ëntö anyom ögamö ni, ‘An akobo niwu köp adyer ni an ba angeowu.’”

¹³ Cë Yecu ojiko köp mëreë nakun kobo ni, “Bed unu na wangwu thwolo, piën ba in-geo unu nïnö onyo caa.”

Carolok i kom etic n'ëmiögi cïling

(Luka 19:11-27)

¹⁴ “Ker më polo thon cal kï dhanö mörö na tye ka cïdhö i woth kanya bor. Èn ocwodo etic mëreë kibëc, cë ömiö jami mëreë bothgï ek ögwök gïnï.

¹⁵ Èn ömiö both atic mëreë acël cïling elip abic na nyige, both dhanö nökënen ömiö cïling elip ariö na nyige, ëka both ngat nökënen ömiö cïling elip acël na nyige, ömiö both dhanö acélacël na lübëre kï kite na èn twëro tic ködë. Cë öya öcïdhö i woth mëreë.

¹⁶ Dhanö n'onwongo cïling elip abic na nyige öcakö tic ködë ökö piöpiö i cadhö wïl mëreë, ëka onwongo magoba më cïling elip abic na nyige nökënen.

¹⁷ Atic n'onwongo tye kï cïling elip ariö na nyige ötïmö ni kömanön thon, cë onwongo magoba më cïling elip ariö na nyige nökënen.

¹⁸ Ëntö dhanö n'obino ögamö cïling elip acël na nyige öcïdhö ökünyö bur i ngöm, cë ökanö cïling k'adwong mëreë ökö ië.

¹⁹ “Kinge karë na lac, adwong k'etic nonu odwogo, ëka öcakö kwanö lïm kanya acël ködgï.

²⁰ Dhanö n'obino ögamö cïling elip abic na nyige

obino okelo ciliing elip abic na nyige nökënë. Ën okobo ni, ‘Adwong, in ibino imia ciliing elip abic na nyige. An anwongo ciliing elip abic na nyige nökënë.’

²¹ “Adwong mérë ögamö ni, ‘In itümö na bér rwök, in ibedo atic na bér éka atic na genere! In ibedo kí gen i kom jami na nönök; an abino kethoni më löönö jami na pol. Bin dong ek inywak yom cwiny k'adwongni!’

²² “Cë atic n'onwongo ögamö ciliing elip ariö na nyige thon obino. Ën okobo ni, ‘Adwong, in onwongo imia ciliing elip ariö na nyige; nén, an anwongo ciliing elip ariö na nyige nökënë.’

²³ “Adwong mérë ögamö ni, ‘In itümö na bér rwök, in ibedo atic na bér éka atic na genere! In ibedo kí gen i kom jami na nönök; an abino kethoni më löönö jami na pol. Bin dong ek inywak yom cwiny k'adwongni!’

²⁴ “Cë atic n'onwongo ögamö ciliing elip acél na nyige thon obino. Ën okobo ni, ‘Adwong, an onwongo angeo ni in ibedo dhanö na kite mérë ték. Ikaö kí kanya ba icwö kodhi ié, éka icökö thon kí kanya ba ipuro.

²⁵ Cë ömio abedo kí lworo éka an acihö akanö ciliingni ökö piny i ngöm. Gam ciliingni ene.’

²⁶ “Adwong mérë ögamö ni, ‘In ibedo atic na rac éka atic na car! In onwongo ingeo ni an akaö kí kanya ba acwö

kodhi ié, éka acökö thon kí kanya ba apuro?’

²⁷ Cë onwongo myero iter ciliingna both jö më beng, ék ka an adwogo, an onwongo atwëro gamö ciliingna kí magoba ié.

²⁸ “Pí manön kwany unu ciliing elip acél na nyige ökö kí bothe, ék imii unu both dhanö na tye kí ciliing elip apar na nyige.

²⁹ Pién ngat na tye kí gin mörö, ebino mëdö bothe, éka bino bedo ködë na büp. Ngat n'ope kí gin mörö, naka gin na én tye ködë ebino kwanyö ökö kí bothe.

³⁰ Yuu unu atic na köny mérë ope i cöl piny, kanya koko éka kaö lak bino bedo ié.’

Ngölö-köp më ajiki

³¹ “I karë na Wod ka Dhanö bino dwogo kí dheo mérë, éka k'emalaika kibec ködë, cë én bino bedo i then ker mérë më dheo.

³² Rok kibec bino cökëré i nyime, éka én bino pokò jii i gurup ariö, kite n'akwath pokò kí rom kí i kom dyegi.

³³ Ën bino ketho rom i cingë kucem, éka dyegi i cingë ku-cam.

³⁴ “Cë Rwoth bino kobo both jö na tye i cingë kucem ni, ‘Bin unu, un jö n'Apapna ömiowu gum; lee unu ker n'eyübö pürwu anaka i acaki cweo lobo.

³⁵ Pién kec onwongo oneka éka imia unu cem, öriö onwongo oneka éka imia unu pii amodho, an onwongo abedo welo éka ijöla unu,

³⁶ an onwongo awotho kotula éka imia unu böngü

aruko, an onwongo atwo, cë ïgwöka unu, ëka i karë na an atye i buc, un ibino më lümöna.'

³⁷ "Cë jö na kitegi atir bino gamö nïnë nï, 'Rwoth, wan eneni awene na kec oneki cë wan emii cem, onyo n'örüö oneki cë wan emii pii?

³⁸ Wan eneni awene na in ibedo welo cë wan ejoli, onyo na in iwotho kotula cë wan emii böngü më aruka?

³⁹ Awene na wan eneni na in itwo onyo na in itye i buc cë wan elimi?"

⁴⁰ "Rwoth bino gamö nï, 'An akobo niwu köp adyer nï gin na un itimö both dhanö acel i kin utmegona ni, manön itimö unu botha.'

⁴¹ "Cë ën bino kobo both jö na tye gini i cingë kucam nï, 'Un jö n'écënö, yaa unu ökö ki nyima, idöny unu i mac na ba thöö n'eyübö pii Catan k'emalaika mérë.

⁴² Piën kec onwongo oneka éntö ba imia unu cem më acama, örïö pii oneka éntö ba imia unu pii më amodha,

⁴³ an onwongo abedo welo éntö ba ijöla unu, an onwongo awotho kotula éntö ba imia unu böngü më aruka, an onwongo atwo ëka atye i buc éntö un ba ibino më gwököna.'

⁴⁴ "Gin thon bino gamö nï, 'Rwoth, wan eneni awene na kec oneki, onyo n'örüö pii oneki, onyo na in ibedo welo, onyo na in iwotho kotula, onyo na in itwo, onyo na in itye i buc, cë wan ba ekonyi?"

⁴⁵ "Cë Rwoth bino gamö nïgï nï, 'An akobo niwu köp adyer nï gin mörö kékëñ

na un ba itimö both dhanö mörö acel na titidi i kin jö ni, nwongo ba itimö unu botha.'

⁴⁶ "Cë gin bino cïdhö i can na ba thum, éntö jö na kitegi atir bino cïdhö gini i kwö na ba thum."

26

*Yüb më neko Yecu
(Marako 14:1-2; Luka 22:1-2; Jon 11:45-53)*

¹ I karë na Yecu otyeko twakö köp ni gini kibec, ën okobo both élükörë nï,

² "Un ingeo nï odong nïnö arïö më thünö i nïnö më Poth, ëka Wod ka Dhanö ebino miö ökö më agura i kor yath aria."

³ Cë élamdhök na dito ëka edong ka lwak öökëreë gini kanya acel i pacö k'Alamdhök na Dit, na nyïngë Kayapa.

⁴ Gin öyübö më makö Yecu i müng ek enek ën ökö.

⁵ Éntö gin okobo nï, "Pathi i nïnö më karama, ek arubaruba kür obed i kin jii."

*Ewiro Yecu ki möö i Betania
(Marako 14:3; Jon 12:1-8)*

⁶ I karë na Yecu tye i Betania i öt ka Cimon na yam obedo adhöbü,

⁷ na Yecu onwongo tye ka cem, dhakö mörö obino bothe n'ömakö cupa më möö na ngwece kur na wel mérë tek, cë önyö i wie.

⁸ I karë n'élükörë önenö, gin öngöö ëka okobo nï, "Pïngö ébalö möö ni abala nï köman?"

⁹ Möö na kur ni onwongo myero ècadh acadha i wel na thwönë ek cilëng mérë emii both ècan."

¹⁰ Ņtö Yecu ongeo köp ni, cë okobo bothgï ni, “Iyelo unu dhakö ni pïngö? En ötimö gin na bér rwök i koma.

¹¹ Piën un itye kanya acël k'ëcan karë kibëc, öntö ba ibino unu bedo kanya acël köda karë kibëc.

¹² I karë na dhakö ni önyö möö i koma, en ötimö më yübü koma më aika.

¹³ An akobo niwu köp adyer ni kanya kibëc n'ebino titö Emuth na Bér ie i wi lobo thükü, gin na dhakö ni ötimö thon ebino kobo pïrë, ek obed më po pi en.”

*Yuda oketho örörö i kom
Yecu*

(Marako 14:10-11; Luka 22:3-6)

¹⁴ I karë nön Yuda Ikariot, na en dhanö acël i kin ëkwëna apar ariö, öcidhö both elamdhök na dito,

¹⁵ cë openyogï ni, “Un ibino miöna ngö ka an amiö en i cïngwu?” Cë gïn ökwanö ciliing pyer adek na nyige éka ömiö gïnï bothe.

¹⁶ Cakérë ie caa nön cïdhö ködë anyim Yuda öcakö rangö karë na bér na en erömö miö ki Yecu i cing-gi.

*Yecu ögamö cem më
Karama më Poth k'ëkwëna
mérë*

(Marako 14:12-21; Luka 22:7-14; 21-23; Jon 13:21-30)

¹⁷ I nünö më acël më Karama më Ogati na Thöbi ope ie, élubkör Yecu obino bothe cë openyo gïnï en ni, “In imitö ni wan éyüb nini kabedo kwene ek icam cem më Poth ie?”

¹⁸ Yecu ögamö ni, “Cïdh unu i pacö both dhanö mörö éka ikob unu nïnë ni, ‘Apwony okobo ni: Karëna dong cwök. An abino kwero nïnö më Poth i odi kanya acël k'élubkörä.’ ”

¹⁹ Cë élubkör Yecu ötimö kite na en öcikögï ködë, éka öyübö gïnï cem më Poth kunön.

²⁰ I karë na pïny dong oyutho, Yecu onwongo obedo pïny i dhö cem kanya acël k'élubkörë apar wie ariö.

²¹ I karë na gïn tye ka cem, Yecu okobo bothgï ni, “An akobo niwu köp adyer, ngat acël ki kinwu bino ketho örörö i koma.”

²² Cë élubkörë öcakö kumo, nakun penyere gïnï kën-gï ni, “Rwoth, an?”

²³ Yecu ögamö ni, “Dhanö na bino ketho örörö i koma ene ngat n'olutho ogati mérë i od bakuli köda.

²⁴ Wod ka Dhanö bino thöö kite na calö ecöö ki köp i kome. Öntö dhanö n'oketho örörö i kom Wod ka Dhanö bino nénö can! Onwongo twëro bedo na bér ka dhanö nön onwongo ba énywölö.”

²⁵ Cë Yuda, ngat n'oketho örörö i kom Yecu, okobo ni, “Apwony, adyer pathi an?”

Yecu ögamö ni, “Eyo, in enön.”

²⁶ I karë na gïn tye ka cem, Yecu ökwanyö ogati, cë olégö gum i kome, éka öbarö ie, cë ömiö both élubkörë, nakun kobo ni, “Gam éka icam unu; man ene koma.”

²⁷ Cë ökwanyö okopo, öpwöyö Obanga éka ömiö bothgï, nakun kobo ni, “Madh unu man, un kibëc.”

28 Man énë remona më cikérë, n'ëonyö pí jö na pol më tümö kïca i kom bal.

29 An akobo niwu nü cakérë tin, an ba abino madhö nyig pig ölök ni, naka i nñö nön ka an abino madhö kodwu i ker k'Apapna."

30 Í karë na gïn otyeko wero wer më lëga, öya öcidhö gïn i wi Kidi më Jeituni.

Yecu okobo nü Petero bino kwérö en ökö
(Marako 14:27-31; Luka 22:31-34; Jon 13:36-38)

31 Cë Yecu okobo nïgï nü, "Í kiwor na tin, un kibëc ibino unu wëkona, piën écö nü:

"An abino gönö akwath,
cë rom bino këth gïn ökö
ata."

32 Ëntö kinge ka an acer ökö, an abino cidhö anyim niwu yo Galilaya."

33 Petero ögamö nü, "Kadijö kibëc bino wëkoni, an ba abino wëkoni."

34 Yecu okobo nïnë nü, "An akobo nini köp adyer nü i kiwor na tin ni, na thwön gwënö bara okok, in ibino kwéröna wang adek."

35 Ëntö Petero ögamö nü, "Kadi bed nü myero athöö kanya acel kodi, an ba abino kwéröni." Cë élübörë nökëne kibëc okobo gïn nü kömanön.

Yecu ölögö i pwodho Gethcemane
(Marako 14:32-42; Luka 22:39-46)

36 Cë Yecu öcidhö k'élübörë i kabedo mörö na nyïngë Gethcemane. Í karë na gïn othuno kunön, en okobo both

élübörë nü, "Bed unu kany, ek an kono acidh i lëga yo kuca."

37 Cë en ökwanyö Petero k'awope ariö ka Jebedayo më woth ködë, éka cwinye öcakö podho rwök ki thwön kumo na dit.

38 Cë Yecu okobo bothgi nü, "Cwinya tye ka cwer rwök, mitö nekona ökö. Bed unu kany ek ibed unu na wangwu thwolo köda."

39 Yecu öcidhö anyim na nönök, cë opodho pïny, okulo wie éka ölögö nü, "Apapna, ka twëre, kwany okopo ni ökö ki koma, éntö kür obed kite na calö an amitö, éntö obed gin na in imitö nü myero ötimërë."

40 Cë en odwogo both élübörë éka onwongogï öniñö ökö. En okobo both Petero nü, "Un ba itwëro bedo na wangwu thwolo pi caa acel köda?

41 Bed na wangwu thwolo éka ilég unu, ek kür idöny unu i atemätëma. Cwiny mitö, éntö kom görü."

42 En doki ödök wang më ariö éka ölögö nü, "Apapna, ka okopo ni ba twëro kwanyerë ökö naka ka an amadhö, ek dong gin na in imitö ötimërë."

43 Í karë na en odwogo, en doki onwongo élübörë tye ka nïnö, piën nïnö onwongo ömakö wang-gi rwök.

44 Cë Yecu öwëkogï doki éka öcidhö ölögö wang më adek, nakun nwö köp acel nön.

45 Cë en odwogo both élübörë éka openyogï nü, "Un pod inïnö éka itye ka yweo unu? Nén unu, caa onyingo

na cwök, éka Wod ka Dhanö ebino miö ökö i cing ébal.

⁴⁶ Yaa unu malö! Eru ecidhu! Nën, dhanö na bino ketho örörö i koma dong cwök!"

Emakö Yecu

(Marako 14:43-50; Luka 22:47-53; Jon 18:2-11)

⁴⁷ I karë na Yecu pod tye ka twak, Yuda n'obedo ngat acël i kin ékwëna apar wie ariö othuno. Én obino kï lwak na pol n'ömakö gini pele abadë éka ludhi. Elamdhök na dito éka edong ka lwak énë oorogi.

⁴⁸ Won örörö onwongo otyeko dong yübü anyuth ködgï ni: "Ngat na an abino nödhö leme, én énön, mak unu én."

⁴⁹ Cüçüth Yuda obino both Yecu éka okobo ni, "Apwony, itye!" Cé önödhö leme.

⁵⁰ Yecu okobo both Yuda ni, "Okona, tím gin na in ibino më tímö." Cé gin obino opodho i kom Yecu, éka ömakö gini én ökö.

⁵¹ Entö ngat acël n'onwongo tye gini kï Yecu kanya acël öryëö cingë cë öwödhö pala abadë mérë, onguno kï ith atic k'Alamdhök na Dit.

⁵² Cé Yecu okobo bothe ni, "Dwök pala abadëni i kabedo mérë, piën jö kibec na makö gini pala abadë, bino thöö gini kï pala abadë.

⁵³ Un ithamö ni an ba atwérö légö Apapna ek oor nïna emalaika na lõö dul mwony apar wie ariö ökö i caa ni?

⁵⁴ Entö Cöc na Leng na kobo ni myero ötämérë ni köman bino cobere ningö?"

⁵⁵ I caa nön Yecu okobo both lwak ni, "Un ibino botha kï pala abadë éka ludhi më maköna, na calö ibino unu i kom ayak? Nïnö kibec an abedo i dyekal öt k'Obanga më pwony, éka un ba imaka unu.

⁵⁶ Entö man kibec ötämérë ek köp n'edwarpiny öcöö ocobere." Cé elübörë kibec örängö öwëkö gini én ökö.

Yecu i nyim athuko më öd okiko k'edong

(Marako 14:53-65; Luka 22:54-55,63-71; Jon 18:12-14,19-24)

⁵⁷ Jö n'onwongo ömakö gini Yecu otero ényo both Kayapa, Alamdhök na Dit, kanya onwongo epwony cik éka edong öcökérë gini ië.

⁵⁸ Entö Petero obedo ka lübö kör Yecu kï cecen, naka othuno i dyekal k'Alamdhök na Dit. Kinge na Petero ödönyö i dyekal, én obedo piny kanya acël k'ekürpiny më nénö gin na bino tímérë.

⁵⁹ Elamdhök na dito éka athuko më öd okiko k'edong kibec onwongo tye gini ka rangö caden më twodo i kom Yecu ek enek gini én ökö.

⁶⁰ Entö gin ba onwongo köp mörö, kadï bed ecaden më twodo na pol obino anyim. Më ajiki mérë jö ariö obino gini anyim,

⁶¹ éka okobo gini ni, "Dhanö ni okobo ni, 'An atwérö muko öt k'Obanga éka agérö ökö i nïnö adek.'

⁶² Cé Alamdhök na Dit öya malö éka okobo both Yecu ni, "In ba itwérö gamö köp mörö?

Kit caden mënë ene na jö ni okelo k'adoth ködë i komi?"

⁶³ Ëntö Yecu öling alinga.

Alamdhök na Dit okobo nïnë nï, "An amitö ikwong kwong ki nyïng Obanga na kwö: Kob nïwa ka in énë Meciya, Wod k'Obanga."

⁶⁴ Yecu ögamö nïnë nï, "Eyo, kite na in ikobo ködë. Ëntö an akobo niwu nï cakëré kobe-dini un ibino nénö Wod ka Dhanö n'obedo i nget cïng më kucem ka Won Twër éka na tye ka bino ki pöl gïnï më polo."

⁶⁵ Cë Alamdhök na Dit öyécö böng mérë éka okobo nï, "Ën ötwakö köp më yanyö Obanga! Pïngö onu döki émitö caden nökënë? Kobe-dini un iwinyo ayeny na én öyanyö k'Obanga.

⁶⁶ Ngö na un ithamö?"

Gïn ögamö nï, "Bal mérë römö nïnë thöö."

⁶⁷ Cë gïn öngülö laö dhögï i wangë éka égöö én. Jö mökö odhongo én

⁶⁸ nakun kobo gïnï nï, "In ibedo Kiricito. Tuc nïwa nga n'ogoi?"

Petero ökwérö Yecu

⁶⁹ Petero onwongo tye yokö, obedo pïny i dyekal. Cë atic na nyakö obino bothe éka okobo nïnë nï, "In thon onwongo itye kanya acël ki Yecu më Galilaya."

⁷⁰ Ëntö Petero ökwérö ökö i nyim jö kibëc. Ën okobo nï, "An ba angeo gin na in itye ka twakö."

⁷¹ Cë Petero öcïdhö yokö i dhö wangkac, atic na nyakö nökënë döki önënö én, cë

okobo both jö n'onwongo tye gïnï kunön nï, "Dhanö ni onwongo tye kanya acël ki Yecu më Najaret."

⁷² Petero döki ökwérö ökö, nakun kwongere nï: "An ba angeo écwö nön!"

⁷³ Kinge caa na nönök, jö n'onwongo ocung gïnï kany nön obino gïnï both Petero éka okobo nï, "Adyer, in ibedo ngat acël i kin-gï, piën kite na in itwak ködë nyutho ökö."

⁷⁴ Cë i caa nön, Petero öcakö kwongere nakun kobo nï, "Ba angeo écwö ni."

Cucüth thwön gwënö okok.

⁷⁵ Cë Petero opo i köp na Yecu ötwakö: "Na bara thwön gwënö okok, in ibino kwéröna wang adek." Cë öcïdhö yokö éka okok ki cwer cwiny rwök.

27

Etero Yecu i nyim Pilato

(Marako 15:1; Luka 23:1-2; Jon 18:28-32)

¹ Kodiko cön na pïny tye ka ruu, élamdhök na dito kibëc éka edong ka lwak öyübö gïnï köp më neko Yecu.

² Gïn otweo Yecu, otero gïnï éka émiö én both Pilato n'obedo alöc më Roma.

³ I karë na Yuda, n'oketho örörö i kom Yecu, önënö nï éngölö köp më thöö i wie, én ongut éka ödwökö ciliing pyer adek na nyige both élamdhök na dito éka edong,

⁴ nakun kobo nï, "An abalö më ketho örörö i kom dhanö n'ope ki bal."

GİN ÖGAMÖ NİNË NI, "MANÖN OBEDO KÖPWA? MANÖN OBEDO PËKÖNI."

5 CË YUDA OBOLo CİLING PİNY İ
ÖT K'OBANGA EKA ÖDÖNYÖ YÖKÖ.
CË ÖCİDHÖ ÖDËRË ÖKÖ.

6 ELAMDHÖK NA DITO ÖKWANYÖ
GİNİ CİLING EKA OKOBO GİNİ NI,
"CİK BA YEO NI MYERO EKETH
CİLING NI İ CANDUK LİM MË ÖT
K'OBANGA, PIEN OBEDO CİLING
MË REMO."

7 CË GİN ÖYÜBÖ KÖP KANYA
ACËL, EKA OTIO GİNİ Kİ CİLING MË
WİLÖ PWODHO K'ACWE AGULU,
EK OBED KANYA EIKO EROK İE.

8 MANÖN ENË ÖMIÖ ECWODO
PWODHO NÖN NI PWODHO MË
REMO THUNO KÖDË NAKA TIN.

9 CË KÖP N'ONWONGO AD-
WARPINY JEREMIA ÖTWAKÖ
OCOBERE: "GIN OTERO CİLING
PYER ADEK NA NYIGE, WEL NA JÖ
MË ICARAEI ONWONGO ÖNGÖLÖ İ
KOME,

10 CË GİN OTIO KÖDË MË WİLÖ
PWODHO K'ACWE AGULU KITE NA
RWOTH ÖÇİKA KÖDË."

YECU İ NYIM PILATO

11 YECU OCUNG İ NYIM ALÖC
MË ROMA N'OPENYO EN NI, "IN
ENË RWOTH K'EYUDA?"

YECU ÖGAMÖ NI, "EYO, KITE NA
IN IKOBO KÖDË."

12 ENTÖ İ KARË N'ELAMDHÖK NA
DITO EKA EDONG ODOOTH GİNİ
YECU, EN BA ÖGAMÖ GIN MÖRÖ.

13 CË PILATO OPENYO YECU NI,
"IN BA ITYE KA WINYO ADOTH NA
GIN ODOOTH KÖDË?"

14 ENTÖ YECU BA ÖGAMÖ KÖP
MÖRÖ, KADİ K'ADOTH MÖRÖ ACËL
—MAN ÖMIÖ ALÖC OURO RWÖK.

15 İ KARAMA KİBËC MË POTH,
ALÖC ONWONGO GÖNYÖ AMABUC

ACËL BOTH LWAK, NGAT MÖRÖ
KËKËN NA GİN MİTÖ.

16 İ KARË NÖN ONWONGO TYE
AMABUC MÖRÖ N'ENGEÖ RWÖK,
NA NYİNGË BARABA.

17 CË İ KARË NA LWAK
ÖCÖKËRË GİNİ KANYA ACËL, PILATO
OPENYOGİ NI, "NGA NA UN İMİTÖ
NI AGÖNY NIWU, BARABA ONYO
YECU N'ECWODO NI KIRICITO?"

18 PILATO ONWONGO ONGEO NI
GİN ÖMIÖ YECU BOTHE PI NYEKO.

19 İ KARË NA PILATO OBEDO İ
WI THEN MË NGÖLÖ-KÖP, DHAKÖ
MËRË OORO KÖP MÖRÖ BOTHE:
"KÜR İTİM GIN MÖRÖ İ KOM
DHANÖ NÖN N'ope Kİ BAL, PIEN
TIN İ WANG LEK ANËNÖ CAN NA
DIT RWÖK PİRË."

20 ENTÖ ELAMDHÖK NA DITO
EKA EDONG ÖCÜPÖ GİNİ LWAK
MË PENYO PI BARABA, EK ENEK
YECU ÖKÖ.

21 ALÖC DÖKİ OPENYOGİ NI,
"NGA Kİ KIN JÖ ARIÖ NI NA UN
İMİTÖ NI AN AGÖNY NIWU?"

GİN ÖGAMÖ NI, "BARABA."

22 CË PILATO OPENYOGİ NI,
"NGÖ NA AN MYERO DONG ATİM
Kİ YECU N'ECWODO NI KIRICITO?"

GİN KİBËC ÖGAMÖ NI, "GUR EN
İ KOR YATH ARIÄ!"

23 PILATO OPENYOGİ NI,
"PİNGÖ? BAL NGÖ NA EN ÖTİMÖ?"

ENTÖ LWAK ÖWÖÖ GİNİ RWÖK
NI, "GUR EN İ KOR YATH ARIÄ!"

24 İ KARË NA PILATO ÖNËNÖ
NI BA DÖKİ ERÖMÖ TİMÖ GIN
MÖRÖ, EKA WÖÖ ONWONGO TYE
KA MEDËRË AMEDA, CË ÖKWANYÖ
PII, ÖLWÖKÖ Kİ CİNGË İ NYIM
LWAK EKA OKOBO NI, "BAL MË
REMO KA DHANÖ NI BA BINO
BEDO İ WIA, MANÖN BINO BEDO
PËKÖWU!"

25 Lwak kibec ögamö ni, “Remo mérë obed i wiwa éka i wi éthinöwa!”

26 Cé Pilato ögonyö Baraba nügi. Éntö én ömiö epwodo Yecu kí del, éka ömiö én bothgï ek egur i kor yath aria.

*Acikari öngalö Yecu
(Marako 15:16-20; Jon 19:2-3)*

27 Cé acikari k'alöc otero gini Yecu i Praitorion,* éka Ögürö gini én dyere.

28 Gin ögonyö böngü mérë éka oketho gini böngü na kwar i kome.

29 Cé öyübü gini tok öküdhö, éka eketho i wie. Gin oketho lüth i cingë më kucem éka orumo cöng-gi piny i nyime, nakun éngalö én ni, “Öräm, rwoth k'Eyuda!”

30 Gin öngülü laö dhögü i kome éka ökwanyö gini lüth cé égöö kí wie.

31 Kinge na gin dong otyeko ngalö Yecu, cé gin ögonyö böngü na kwar ökö kí i kome, éka eketho böng mérë i kome. Cé gin otero én më guro i kor yath aria.

*Eguro Yecu i kor yath aria
(Marako 15:21-32; Luka 23:26-43; Jon 19:17-27)*

32 Ì karë n'onwongo gin tye ka donyo yökö, oromo gini k'écwö mörö më Cirene na nyängé Cimon, cé ödiö gini én têték më tingo yath aria ka Yecu.

33 Gin othuno i kabedo n'ecwodo ni Gölgötha (na gönyö ni Kabedo më Cogo Wic).

34 Acikari ömiö Yecu köngö ölök n'erubo kí yath na këc; éntö kinge na én öbilö, Yecu ökwérö madhö ökö.

35 Kinge na dong gin oguro Yecu i kor yath aria, obolo gini kwir më poko böng mérë.

36 Cé gin obedo piny kunön më kürö én.

37 Oguro gini köp më adoth na gin odotho én ködë malö i ka wie, n'écöö ni, “Man énë Yecu, Rwoth k'Eyuda.”

38 Ekwoe ario onwongo eguro kanya acél ködë, ngat acél yo cingë kucem, éka ngat acél yo cingë kucam.

39 Jö n'onwongo tye ka wok i ngete obedo gini ka yanyö én, yengo wigü,

40 éka kobo gini ni, “In ikobo ni ibino muko öt k'Obanga ökö, cé igérö i nänö adek, lari keni éka idhi piny kí kor yath aria, ka in ibedo Wod k'Obanga!”

41 Élamdhök na dito, epwony cik éka edong thon önywarö gini Yecu.

42 Gin okobo ni, “En ölarö jö nökënë, éntö én ba twëro larë kënë! En obedo rwoth më Icarael! Wëk én obin piny kí i kor yath aria, cé wan ebino yee én.

43 En geno Obanga éka kobo ni én obedo Wod k'Obanga. Wëk Obanga ölar én kobedini ka mütö.”

44 Ekwoe n'onwongo eguro kanya acél ködë thon öyanyö gini én.

Thöö ka Yecu

* 27:27 **Praitorion** obedo lai k'alöc.

45 Cakëreë caa abicël më kiceng më thuno ködë naka caa abungwën, pïny ocido ökö na cöl i wi lobo kibëc.

46 Ì kin caa abungwën më kothyeno Yecu okok ki dwön na longo ni, “Eloi, Eloi, lama cabaktani?”—na gönyö ni, “Obangana, Obangana, pïngö ïwëka ni köman?”

47 Ì karë na jö mökö n'ocung kunön owinyo, gïn okobo ni, “En tye ka cwodo Eliya.”

48 Cüçüth dhanö acël örïngö ökwanyö amor, cë olutho i köngö ölöök na wac, örwanök i wi lüth, éka ömio both Yecu ni ömadhi.

49 Èntö jö nökëne okobo ni, “Wék unu én kënél! Eru enenu ka Eliya twërō bino më larö én.”

50 Yecu okok dökü ki dwön na longo, cë öthöö ökö.

51 Ì caa nön, böngü katein na tye i öt k'Obanga öyec opokere ökö i dul ariö cakëre ki malö naka pïny. Pïny oyengere éka kite öbarë gïn ökö.

52 Lyene öyabëre ökö éka kom jö na leng na pol n'onwongo öthöö ocer gïn ökö.

53 Odonyo gïn ökö ki i lyene éka kinge cer ka Yecu öcïdhö gïn i Jerucalem cë onyuthere gïn both jö na pol.

54 Ì karë n'Adit na löö acikari ki jö n'onwongo tye ködë më kürö Yecu önenö gïn oyeyeng éka gin na kibëc n'ötimëre, obedo gïn ki lworo rwök, cë okobo gïn ni, “Adyer, én onwongo obedo Wod k'Obanga!”

55 Mon na pol onwongo tye gïn kunön na neno gïn ki cecen. Gin onwongo ölübö kör Yecu ki i Galilaya më könyö én.

56 Ì kin mon nön gïn onwongo tye ië Maria më Magadala, Maria aya ka Yakobo éka Yocepu, éka aya k'awope ka Jebedayo.

Eiko Yecu i lyël

(Marako 15:42-47; Luka 23:50-56; Jon 19:38-42)

57 Ì karë na pïny dong cido, dhanö mörö më Arimataya n'obedo alönyö na nyïngë Yocepu obino, én thon onwongo obedo alübör Yecu.

58 Én öcïdhö both Pilato cë ökwaö kom Yecu éka Pilato öcikö ni ék émii bothe.

59 Yocepu ökwanyö kom Yecu, cë oboo ökö ki böngü na leng,

60 éka opyelo i bur lyël mëre na nyen, na én onwongo ogworö i kidi. Én ölörö kidi na thwöne i dhö lyël, éka öya öcïdhö ökö.

61 Maria më Magadala éka Maria nökëne ca onwongo obedo gïn kunön n'opimere ki lyël.

Ekürpïny na kürö lyël

62 Kodiko mëre, na énë nïnö na lübö Nïnö më Yübëre, elamdhök na dito éka Eparicayo öcökëre gïn i nyim Pilato.

63 Gin okobo ni, “Adwong, wan epo ni i karë na én pod kwö, wan ewinyo ka abwöl jö nön kobo ni, ‘Kinge nïnö adek an abino cer dökü.’”

64 Cë myero imii cïk ek égwök lyël na bér naka i nïnö

më adek ek kür elübkörë öcidh gini ökwal kome ökö, cë okob gini both lwak ni en ocer ökö ki i kin jö n'öthöö. Bwöl më ajiki ni bino bedo na rac na löö bwöl më acel ökö.”

⁶⁵ Pilato ögamö ni, “Ter unu acikari n'obedo gini ekürpiny. Cidh igwök unu na bér rwök kite na un itwérö ködë.”

⁶⁶ Cë öcidhö gini më kürö dhö lyel na bér nakun mwönö gini anyuth i kom kidi éka eketho ekürpiny.

28

Cer ka Yecu

(Marako 16:1-10; Luka 24:1-12; Jon 20:1-10)

¹ Kinge Cabit k'Eyuda, i kin keko i nñö na lübö cabit k'Eyuda, Maria më Magadala éka Maria nökënë öcidhö gini më nénö lyel.

² Athura oyeyeng na dit oyengo piny, pién malaika ka Rwoth n'öya ki i polo obino piny cë othwaro kidi ökö ki i dhö lyel éka obedo i wie.

³ Malaika nön onen na ryeny calö lüth köth, éka böng méré onwongo tar calö pée.

⁴ Ekürpiny obedo gini ki lworo rwök i karë na gin önënö malaika éka komgi ömyël cë ödökö gini calö jö n'öthöö.

⁵ Entö malaika okobo both mon ni, “Kür ibed unu ki lworo, pién an angeo ni un itye ka rangö Yecu n'onwongo eguro i kor yath aria.

⁶ En ba tye kany; en ocer ökö, kite na en okobo. Bin inen unu kanya en onwongo obuto ie.

⁷ Cidh unu piiöö ek ikob unu both elübkörë: ‘En ocer ökö ki kin jö n'öthöö, éka en tye ka cidhö anyim niwu yo Galilaya. Un ibino nénö en ki kunön.’ Po unu i kom ngö na an akobo niwu.”

⁸ Cë mon öbünyö yaa ökö piiöö ki i wi lyel ki lworo éka ki yom cwiny na thwonë, cë örängö gini më cidhö kobo both elübkörë.

⁹ Athura Yecu oromo ködgí, cë omothogí ni, “Kuc obed kodwu!” Gin obino bothe, ömakö gini tyenë cë öwörö gini en.

¹⁰ Cë Yecu okobo nügi ni, “Kür ibed unu ki lworo. Cidh ikob unu both utmegona ek öcidh gini yo Galilaya; cë gin bino nénöna ki kunön.”

Köp n'ekürpiny ödwökö

¹¹ I karë na mon tye ka woth i yoo, ekürpiny mökö öcidhö i pacö éka ödwökö gini ripot both elamdhök na dito gin na kibec n'ötimëre.

¹² I karë n'elamdhök na dito öcökëre gini kanya acel k'edong, cë öyübö gini köp më miö ciläng na thwonë both acikari,

¹³ nakun kobo gini bothgi ni, “Kob unu both lwak ni, ‘Elübkörë obino gini kiwor cë ökwalö gini kome i karë n'onwongo wan eninö ökö.’

¹⁴ Ka alöc bino winyo köp ni, cë wan ebino kobo ninen, ek can mörö kür opodh i komwu.”

¹⁵ Cë acikari ögamö gini ciläng, éka ötimö gini kite n'ecikögí ködë. Köp ni obedo

këth ï kin Eyuda othuno ködë
naka tin.

*Yecu onen both élübkörë
(Marako 16:14-18; Luka
24:36-49; Jon 20:19-23; Tic
k'Ékwëna 1:6-8)*

¹⁶ Cë élübkörë apar wie acël
öcidhö gïni yo Galilaya, ï wi
kidi na Yecu onwongo okobo
bothgï më cïdhö ië.

¹⁷ Ì karë na gïn önenö Yecu,
öwörö gïni ën; ëntö jö mökö
obedo ka kalakala.

¹⁸ Cë Yecu obino bothgï éka
okobo nï, “Twër kibëc na tye ï
polo éka ï wi lobo etyeko dong
mïjö ökö botha.

¹⁹ Pï manön cïdh unu dong
ék ilök unu jö më rok kibëc
ödök gïni élübköra, baticagï
unu kï nyïng Apap, éka Wod
éka Tipo Naleng,

²⁰ pwony unugï më gwökö
gin na kibëc na an atyeko
ciköwu ködë. An atye kodwu
karë kibëc, naka ï ajiki pïny.”

Emuth na Bér i kom Yecu kite na Marako öcöö Köp na ut i buk ka Marako

Buk ni Jon Marako änë öcöö. Obedo buk acël i kin buke angwën na miö onu köp i kom Emuth na Bér i kom Yecu Kiricito. Buke nökënë änë Matayo, Luka, äka Jon. Marako nen calö obedo kï gum më nënö äka winyo Yecu kï i Jerucalem cë kï kunön öcakö bedo ngat n'oye. Kinge enwongo nië än owothro kï Paulo äka Baranaba i wothgi më acël (Tic k'Ëkwëna 12:25). Ën thon obedo amii köny both akwëna Petero pï mwaka na pol (1 Petero 5:13). Enwongo nië än onwongo köp na pol kï kom köp mërë i kom Yecu kï i kom ngö na Petero okobo nïnë.

İ buk ni, Marako miö köp i kom kwö äka tic ka Yecu. Ën oketho cwinye rwök i kom ngö na Yecu otio nakaka ngö na än okobo. Ën obedo ka nwönö nië Yecu nyutho tekö mërë më larö, gönyö äka cangö jii. Neno mërë onwongo tye i kom Yecu na calö atic äka athin k'Obanga. Tango mërë, cangö jii, gönyö jii na tipo na reco otweogi äka tekö mërë më wékö bal nyutho än na calö wod k'Obanga.

Buk ni cakëre kï köp i kom

tic ka Yecu i kin lwak, äka kï köp mërë ni ker k'Obanga dong obino ökö pïny i lobo. Pol karë Marako tero köp më guro Yecu i kor yath na calö köp më ribëre i kin Obanga kï dhanö. Na lübëre kï köp ka Marako, Yecu onwongo can pï bal onu (nën cura 8:31; 9:31; 10:33-34, 45). Marako onyutho ngö n'ötimérë na thuth i cabit më ajiki na bara Yecu öthöö äka ojiko köp mërë kï cer äka dök ka Yecu i wi polo.

*Pwony ka Jon Abatica
(Matayo 3:1-12; Luka 3:1-18; Jon 1:19-28)*

¹ Man änë acaki më Emuth na Bér i kom Yecu Kiricito, Wod k'Obanga.*

² Kite n'écöö ködë i buk k'adwarpiny Icaya:
“Obanga okobo ni, ‘An abino
oro aorna i nyimi,
na bino yübö yoo nini.’”

³ Dwön dhanö mörö tye ka
redo i thim ni,
‘Yüb unu yoo pï Rwoth,
mii unu yoo ocung atir
nïnë.’”

⁴ Aor ni onwongo obedo Jon Abatica. Ën onwongo tye i thim äka ötitö ni jii myero ebaticagi më nyutho ni gin dong ongut ökö kï i kom balgi äka olökëre gini both Obanga ek ötim nügi kïca.

⁵ Jö na pol më lobo Yudea äka Jerucalem obino gini both Jon. Gin onwongo tuco balgi äka Jon baticagi i kulo Jordan.

⁶ Jon onwongo ruko böng n'eyübö kï kom yer kinaga,

* **1:1** Baibul nökënë ba ketho Wod k'Obanga.

twoo wang pyérë kï del, camö bonyo éka mör kic më thim.

⁷ Jon ötitö both jii nü, "Ngat mörö ute na tye ka lübö köra, én pírë tek lös ökö. An ba apora më gungo pïny éka më gönyö thöl wörë.

⁸ An abaticawu kï pii, éntö én bino baticawu kï Tipo Naleng."

Batica ka Yecu

(Matayo 3:13-4:11; Luka 3:21-22; 4:1-13)

⁹ Ì karë nonu Yecu öya kï i Najaret i lobo më Galilaya éka Jon obatica én i kulo Jordan.

¹⁰ Na Yecu pod donyo malö kï i pii, cüçüth én önenö polo öyabérë éka Tipo Naleng opye i kome na cal k'amam.

¹¹ Éka dwön mörö öya kï i polo na kobo nü, "In énë Woda më amara, cwinya yom i komi."

¹² Cüçüth Tipo Naleng otero Yecu i thim,

¹³ kanya én obedo ié pi nïnö pyer angwën nakun Catan témö én. Leeni na ger onwongo thon ut kunön éka emalaika obedo gwökö én.

Yecu ocwodo écik rëc angwën

(Matayo 4:12-22; Luka 4:14-15; 5:1-11)

¹⁴ Ì karë na dong etweo Jon i buc, Yecu obino yo Galilaya nakun titö köp i kom Emuth na Bér n'öya kï both Obanga.

¹⁵ Én okobo nü, "Karë dong örömö, Ker k'Obanga dong cwök. Ngut unu éka iyee unu Emuth na Bér!"

¹⁶ I nïnö mörö acël na Yecu onwongo tye ka woth i nget

Nam më Galilaya, én önenö écik rëc arïö, Cimon éka ömïn mérë Anderiya, bolo gïni böögï i pii.

¹⁷ Yecu okobo bothgi nü, "Bin ilüb unu köra, éka an abino müöwu idökö émak jii nakaka rëc."

¹⁸ Cüçüth gïn öwëkö böögï éka ölübö gïni kör Yecu.

¹⁹ Ì karë na én öcïdhö anyim na nönök, önenö Yakobo éka ömïn mérë Jon, éthïn ka Jebedayo, n'obedo gïni i yeya yübö böögï.

²⁰ Éka cüçüth Yecu ocwodogï cë öwëkö gïni apapgi Jebedayo i yeya kï jö n'onwongo epangogï apanga éka ölübö gïni én.

Dhanö na tye kï tipo na rac
(Luka 4:31-37)

²¹ Yecu éka élübkörë öcïdhö gïni yo Kaperanaum, cüçüth i ceng Cabït k'Eyuda én ödönyö i cinagoga éka öcakö pwony.

²² Jii obedo kï ur i kom pwony mérë, pién opwonyo na calö ngat n'onwongo ut kï twër, na path kï kite n'epwony cïk pwonyo ködë.

²³ Cüçüth dhanö mörö onwongo tye i cinagogagi kï tipo na rac éka öcakö redo nü,

²⁴ "Kara imütö ngö kï bothwa, Yecu më Najaret? In ibino më tyekowa ökö? An angeo ngat na in ibedo—ngat na Leng n'Obanga ororo."

²⁵ Éntö Yecu ocoko nakun kobo nü, "Lïng ökö, éka donyi ökö kï i kome!"

²⁶ Tipo na rac ömïö én öryërë éka oredo rwök cë öya ökö kï i kome.

²⁷ Jö kibëc obedo gini ki ur rwök nakun penyere gini këngi ni, "Man ngö? Pwony na nyen na ut ki twër! Èn coko naka thon tipo na reco, éka winyo gini en."

²⁸ Emuth i kom Yecu ökëth örömö kabedo n'ögürö lobo më Galilaya kibëc.

*Yecu öcangö jö na pol
(Matayo 8:14-17; Luka 4:38-41)*

²⁹ Cucüth na Yecu dong öya ökö ki i cinagoga, öcïdhö gin ki Yakobo éka Jon yo pacö ka Cimon éka Anderiya.

³⁰ Marö ka Cimon onwongo obuto piny, na two lyetho ömakö éka cucüth gin okobo köp i kome both Yecu.

³¹ Èn dong öcïdhö bothe, ömakö cingë, éka otingo malö. Two lyetho öya ökö ki i kome éka öcakö yübö niги cem.

³² Kothyeno nön na ceng dong dönyö, jii okelo etwoe kibëc bothe éka jö na cene ömakögï.

³³ Éka jö kibëc më pacö nön ögürö gini i dholokek.

³⁴ Cé Yecu öcangö jö na pol n'onwongo ut gini ki koth twoe na papath, éka öryëmö cene na pol, èn ba oyeo ni cene më twak piën gin onwongo ngeo nga na èn obedo.

*Yecu ötitö köp i Galilaya
(Luka 4:42-44)*

³⁵ Kodiko cön na piny pod col, Yecu öya cé öcïdhö yo kanyalik éka obedo i lëga kunön.

³⁶ Èntö Cimon éka ewodhe öcïdhö gini më rangö en.

³⁷ Ì karë na gin onwongo Yecu, gin okobo nänë ni, "Jö kibëc tye ka rangöni."

³⁸ Èntö Yecu okobo niги ni, "Eru écïdh unu i peci nökënë ek an thon atit niги köp. Manön ènë gin n'omio an abino."

³⁹ Cé èn owothro i Galilaya kibëc nakun titö köp i cinagogagi éka ryëmö cene.

*Yecu öcangö ècwö na ut ki two dhöbü
(Matayo 8:1-4; Luka 5:12-16)*

⁴⁰ Ècwö mörö na ut ki two dhöbü obino cé orumo cöngë both Yecu, nakun kwaö èn ni, "Ka imitö, itwëro miöna bedo na leng."

⁴¹ Kica ömakö Yecu cé öryëö cingë ogudo éka okobo nänë ni, "An amitö, komi dong obed na leng!"

⁴² Cucüth dhöbü orwenyo ökö ki i kome éka emiö ödökö na leng.

⁴³ Cé Yecu omiö èn öcïdhö nakun cikö na tek ni,

⁴⁴ "Kür ikob both ngat mörö ngö n'ötimëre. Èntö cïdhï inyuthiri both alamdhök éka imii tyer pi bedoni na leng na lübëreki cik na yam Muca öcikö pi jö n'ecangögi ki i two dhöbü. Man bino bedo caden both jö kibëc ni in emii idökö na leng."

⁴⁵ Èntö èn öcïdhö éka örwëö ngö n'ötimëre both jö kibëc. Na calö adwogi ka ngö n'ötimëre, omiö Yecu ba döki ödonyö i pacö na kome nen èntö obedo yökö kanyalik, cé jii ki i kabedo kibëc omëdëre gini më bino bothe.

2

*Yecu öcangö ngat na kome
okwe
(Matayo 9:1-8; Luka 5:17-
26)*

¹ Kinge nünö na nönök, Yecu dökü odwogo i Kaperanaum, jüi owinyo ni en odwogo pacö.

² Lwak na pol öcökëre gini kanya acel na kabedo ödökö na ding naka i dholokek, eka en ötitö kop k'Obanga bothgi.

³ Cë cwö angwen obino n'otingo gini dhanö na kome okwe bothe.

⁴ Gin onwongo ba römö tero ecwo ni both Yecu piien lwak onwongo opong rwök. Otuco gini wi ot ki malo n'opimere ki kanya Yecu onwongo ut ie. Cë gin olwao ecwo na kome okwe n'obuto i ökëka piny i nyim Yecu. ⁵ I karë na Yecu önenö yeegi, okobo n'ecwo na kome okwe ni, "Woda, balni dong ewekö ökö."

⁶ Entö epwonye mökö me cik ka Muca onwongo obedo kany non nakun penyere gini ki i cwinygi kën-gi ni,

⁷ "Pingö dhanö ni twak ni köman? En tye ka yanyö Obanga! Obanga kékén ene twerö wékö bal!"

⁸ Cucuth Yecu ongeo ki i cwinye ngö n'onwongo gin tye ka thamö, eka openyogii ni, "Pingö ithamö unu kop ni ki i cwinywu?

⁹ Menë na yot, me kobo both dhanö na kome okwe ni, 'Balni dong ewekö ökö,' onyo ni, 'Yaa malo, ikwany ökëkani, eka icak woth'?

¹⁰ Entö an amitö inge unu ni, Wod ka Dhanö ut ki twerö

i wi lobo me wékö bal." Cë Yecu okobo both dhanö na kome okwe ni,

¹¹ "An akobo nini, yaa malo, kwany ökëkani eka icidh yo pacö."

¹² En öya malo, ökwanyö ökëka mérë eka odonyo yokö na gin kibec tye ka nenor. Jö kibec ouro eka opakö gini Obanga na kobo gini ni, "Wan anaka yam bara enenö gin mörö na calö man!"

*Yecu ocwodo Lebi
(Matayo 9:9-13; Luka 5:27-
32)*

¹³ Yecu dökü öcidhö i dhö Nam me Galilaya. Lwak na pol obino bothe eka en öcakö pwonyogi.

¹⁴ Na Yecu onwongo tye i woth, önenö Lebi wod k'Alipayo obedo i öd cökö ocoro mérë. Yecu okobo nineni, "Lüb köra." Cë Lebi öya malo eka ölübü köre.

¹⁵ Na Yecu onwongo ut i cem i ot ka Lebi, ecök ocoro eka ébal na pol onwongo tye i cem kanya acel kôde eka elübkör. Jö na pol onwongo tye n'ölübü gini kör Yecu.

¹⁶ I karë n'epwony cik ka Muca n'obedo Eparicayo önenö gini en ka cemo k'ebal eka ecök ocoro, gin openyo elübkör Yecu ni, "Pingö en cemo k'ecök ocoro eka ébal?"

¹⁷ I karë na Yecu owinyo kop ni, en okobo nügi ni, "Pathi jö na komgi yot ene mitö daktar, entö etwoe. An ba abino me cwodo jö na kitegi atir entö ébal."

*Peny i kom rio kec
(Matayo 9:14-17; Luka 5:33-39)*

18 Ì karë mörö n'onwongo élübör Jon Abatica éka Eparicayo ut gini i rio kec, jö mökö obino gini both Yecu éka openyo én ni, "Pïngö élübör Jon Abatica éka élübör Eparicayo rio gini kec, éntö megi ba rio kec?"

19 Yecu ögamö ni, "Wele k'anyom twérö rio kec n'anyom tye ködgï kanya acël?" Ba twérö gini rio kec n'anyom tye ködgï kanya acël.

20 Éntö karë bino thuno n'ebino kwanyö anyom ökö kï bothgï, cë gïn dong bino rio kec i nïnö nön.

21 "Ngat mörö ope na dapö böngü na nyen i kom böngü n'otii, cë ka ötimö, böngü na nyen bino yécö böngü n'otii ökö cë müö kanya öyec bedo na thwönë.

22 Éka ngat mörö ope na pïkö köngö ölok na nyen i ocwe* na cön. Ka öpikö, cë köngö ölok bino yécö ocwe ökö, köngö ölok bino öny éka ocwe thon bal ökö. Éntö köngö ölok na nyen myero épikï i ocwe na nyen."

Peny i kom ceng Cabït k'Eyuda

(Matayo 12:1-18; Luka 6:1-5)

23 Ì nïnö mörö acël më ceng Cabït k'Eyuda, na Yecu onwongo tye ka wok k'élübörë i pwodho bël, élübörë öcakö riidhö with bël.

24 Eparicayo okobo both Yecu ni, "Nën, pïngö gïn tye ka türö cik i ceng Cabït k'Eyuda?"

25 Éka Yecu okobo nïgi ni, "Un ba ikwanö kï i Cöc na Leng ngö na Daudi ötimö i karë na kec oneko én éka ewodhe?"

26 Ën ödönyö i öt k'Obanga i karë na Abiathar onwongo obedo Alamdhök na Dit éka öcamö ogati n'etyerö both Obanga na yam cik ökwëro ni dhanö mörö kür öcam na path k'élamdhök kékén. Ën thon ömiö nökénë both ewodhe."

27 Cë Yecu okobo nïgi ni, "Ceng Cabït onwongo éyübö pï dhanö, pathi dhanö pï ceng Cabït.

28 Pï manön Wod ka Dhanö obedo Rwoth, naka thon më ceng Cabït."

3

*Ëcwö na badë okwe
(Matayo 12:9-14; Luka 6:6-11)*

1 Ì nïnö mörö acël më ceng Cabït k'Eyuda, Yecu döki ödönyö i cinagoga éka écwö na badë okwe onwongo ut kunön.

2 Jö mökö onwongo ut gini kunön më nënö ka Yecu twérö cangö écwö ni i ceng Cabït ek enwong gini yoo më dotho én.

3 Yecu okobo both écwö na badë okwe ni, "Yaa malö ek icung i nyim jiï."

4 Cë Yecu okobo bothgï ni, "Cik yeo i ceng Cabït ni etüm gin mörö na bér onyo na rac, élar kwö onyo enek ökö?" Éntö gïn öling alinga.

* 2:22 Eyuda pïkö köngö ölok i ocwe n'eyübö kï i kom pyen dyël.

5 Ën önenögi k'akëmö éka cwinye ocwer pii nwang cwinygi. Yecu okobo n'ëcwo ni, "Ryé badi." Ën öryëo badë cë öcang ökö.

6 Cë Eparicayo odonyo gini yokö cüçüth më yübü köp kii jö na cwakö Erode kite na myero enek kii Yecu.

Lwak ölübü Yecu

7 Yecu k'elübörë öya cë öcidhö gini yo dhö nam, éka lwak na pol n'öya kii i lobo Galilaya, Judea,

8 Jerucalem, Idemea, kukidë më kulo Jordan, éka kii i lobo n'örökö Turo kii Cidon ölübü gini körë. I karë na lwak na pol owinyo gini gin na kibec na en obedo ka tïmö, gïn obino bothe.

9 Yecu okobo n'elübörë ni öyüb gini yeya nñenë, ek kür lwak ödië.

10 Ën onwongo öcangö jö na pol ii nñenö nñen, cë jö kibec na two onwongo dïrë gini më gudo en.

11 Ka tipo na reco önenö Yecu, podho gini piny ii nyime éka kok gini ni, "In ibedo Wod k'Obanga."

12 Entö Yecu öcikö tipo na reco ni kür okob gini ni ngat mörö nga na en ebedo.

Yecu öyerö ékwëna apar ariö

(Matayo 10:1-4; Luka 6:12-16)

13 Kinge manön Yecu öcidhö ii wi kidi éka ocwodo jö n'onwongo en mütö woth ködgï éka obino gini bothe.

14 Ën öyerö jö apar ariö éka ocwodogï ni ékwëna ek owoth

ködë kanya acël, éka eorgi më cïdhö titö köp k'Obanga,

15 éka më bedo kii twër më ryëmö cene.

16 Man enë jö apar ariö na en öyerö: Cimon (na en öcakö nyïngë ni Petero),

17 Yakobo éka ömïn mëre Jon, awope ka Jebedayo, (entö Yecu ömïögï nyïng ni, Boanergi, na tyen köp mëre ni, "Jö na mor kamë köth.")

18 Anderiya, Pilipo, Batulumayo, Matayo, Tomaci, Yakobo wod k'Alipayo, Tadeo, Cimon (dhanö na mütö löckën)

19 éka Yuda Ikariot n'oketho örörö i kom Yecu.

Yecu éka Belijebul

(Matayo 12:22-32; Luka 11:14-23; 12:10)

20 Cë Yecu ödönyö ii öt éka lwak na pol obino örökö en döki. Ën éka elübörë onwongo ba twëro gini nwongo caa më cem.

21 I karë na wede mëre owinyo ngö n'ötümëre, cë obino gini më makö Yecu piën gïn öthamö ni, "Ën opo ökö."

22 Epwony cik ka Muca mökö öya kii i Jerucalem na kobo gini ni, "Ën ut kii Belijebul, adwong ka cene. Kanya en nwongo tekö kii ië më ryëmö cene."

23 Cë Yecu ocwodogï éka ötwak ködgï kii carolok ni, "Catan twëro ryëmö Catan ningö?"

24 Ka ker opokere ië ariö, ker nön ba twëro cung.

25 Éka ka jö më öt opokere ië ariö, jö më öt nön ba twëro cung.

²⁶ ŋeka ka Catan opokere cē ölwënyö i kome kënë, en ba twëro cung, ajiki mëre nwongo dong othuno.

²⁷ Ngat mörö ope na twëro dönyö i öt ka ngat na ték më yakö jami mërë, thwara ka en öcakö tweno dhanö na ték ni ökö éka dong cakö yakö jami kii ödë.

²⁸ An akobo niwu köp adyer ni, bal kibec na dhanö tímö éka ayeny n'ëyanyö k'Obanga erömö tímö kica,

²⁹ éntö ngat mörö na yanyö Tipo Naleng ba ebino tímö nñë kica piën nwongo ötümö bal na bedo na twal."

³⁰ Yecu okobo nügi piën gin onwongo tye ka kobo ni, "En ut kii tipo na rac."

Aya ka Yecu éka utmego mérë

(Matayo 12:46-50; Luka 8:19-21)

³¹ Cé aya ka Yecu éka utmego mérë obino ginii. Gin ocung yokö éka eoro ngat mörö both Yecu i öt, ek obin yokö ötwak ködgí.

³² Lwak onwongo obedo nakun ögürö ginii Yecu i dyere, cé ekobo nñë ni, "Ayani éka utmegoni ocung yokö tye ginii ka rangöni."

³³ Yecu ögamö nügi ni, "Nga enë obedo ayana éka utmegona?"

³⁴ Cé önenö jö n'obedo piny n'ögürö en dyere éka okobo ni, "Man enë ayana éka utmegona."

³⁵ Ngat mörö na tímö ngö n'Obanga mítö, enë öméra, améra, éka ayana."

4

Carolok i kom acwö kodhi
(Matayo 13:1-9; Luka 8:4-

8)

¹ Yecu dökö öcakö pwony i dhö Nam më Galilaya. Lwak na pol rwök öcökérë bothe, cé en öidhö i yeya éka obedo iie nakun jii kibec odong i dhö nam.

² Yecu opwonyogü ki köp na pol ki carolok ni:

³ "Winy unu! Apur mörö öcidhö më cwöönö kodhi mérë.

⁴ I karë na en tye ka cwöönö kodhi, kodhi mökö ökir i dye yoo, éka winy ödédépö ökö.

⁵ Kodhi nökënë ökir kanya obedo kitekite na ngöm nönök iie. Kodhi ni otuu piöpiö piën ngöm onwongo rép.

⁶ Éntö i karë na ceng öryeny öwangögi rwök, oner ginii ökö piën oriigü ba ödönyö na thuth.

⁷ Kodhi nökënë opodho i kin okudhi. Okudhi ödöngö éka ödiögü cé ba önyakö nyige.

⁸ Kodhi nökënë opodho i ngöm na bér ödöngö éka nyige önyak, mökö pyer adek, mökö pyer abicel éka mökö mia acel."

⁹ Cé Yecu okobo ni, "Ngat na tye ki ithe më winyo, myero owiny."

Pwony i kom carolok

(Matayo 13:10-17; Luka 8:9-10)

¹⁰ I karë na Yecu onwongo tye kënë k'elübörë apar ariö éka jö nökënë, gin openyo en tyen carolok.

11 Ëka ën okobo nügi ni, "Müng më ker k'Obanga
ëmiöwu. Ëntö both jö nökënë
an atwak ködgï kï carolok,

12 ek,

"Ka gïn önenö, önen gïni
ëntö ba bino gïni niang.
Ka gïn owinyo, owiny gïni
ëntö gïn ba bino niang ië.

Pïen ka gïn ötimö, gïn bino
lökëre both Obanga,
ëka ën bino tïmö nügi
kïca."

*Yecu ögonyö carolok
k'acwö kodhi*
(Matayo 13:18-23; Luka
8:11-15)

13 Cë Yecu openyogï ni, "Un
ba iniang i tyen carolok ni? Un
ibino niang i carolok nökënë
kibëc ningö?

14 Apur cwö kodhi na ënë
köp k'Obanga.

15 Kodhi n'opodho i yoo
ocung pi jö na winyo köp
k'Obanga, cë cüçüth Catan
bino kwanyö köp na gïn
owinyo ökö.

16 Kodhi n'opodho kanya
obedo kitekite, ocung pi jö
na winyo köp k'Obanga ëka
cüçüth gamö gïni kï yom
cwiny.

17 Ëntö kit na ba ut gïni
k'orii n'ödonyö na thuth, ba
bedo gïni ape. Podho gïni
ökö cüçüth ka tye gïni kï pëkö
onyo ka eketho ayela i komgi
pi yee köp k'Obanga.

18 Kodhi nökënë n'opodho
i kin okudhi ocung pi jö na
winyo köp k'Obanga,

19 Ëntö par më kwö më lobo
ni, marö lönyö, ëka miti më
jami kibëc bino cë diö köp

k'Obanga ökö ëka ba nyak
gïni.

20 Ëntö kodhi n'opodho
i ngöm na bër cung pi jö
na winyo ëka gamö köp
k'Obanga. Gïn nyakö nyig-gï
pyer adek, mökö pyer abicël
onyo mia acël."

Carolok i kom tara
(Luka 8:16-18)

21 Yecu okobo both lwak
ni, "Ngat mörö ute na cwinyü
tara cë ketho i thë adita onyo
i thë étana ëka ba ketho i ka
cibo tara?

22 Pïen ba tye gin mörö
n'ökanëre na ba ebino
ngeeno, ëka müng mörö ope
na ba ebino kelo kanyalér.

23 Ka ngat mörö tye kï ithe
më winyo, myero ën owiny."

24 Yecu thon okobo nügi ni,
"Gwökëre unu kï kom gin ni
winyo unu. Gin na un ipimo
ködë, ënë thon ebino pimo
niwu ködë, ëka döki ebino
mëdö niwu.

25 Jö na tye kï gin mörö
ebino mëdö nügi, ëka jö n'ope
kï gin mörö ebino kwanyö
naka thon gin mörö na tiidë na
gïn tye ködë ökö."

Carolok i kom tuu ka kodhi

26 Yecu ömedëre më kobo
ni, "Ker k'Obanga cal k'apur
n'öcwö kodhi i ngöm.

27 Kiceng ëka kiwor, na ën
öninö onyo neno, nyig kodhi
tuu ëka döngö, Ëntö ën ba
niang kit na nwongo ötimëre
ködë.

28 Ngöm müö nyig kodhi tuu
ëka nyakö nyige kënë, më
acël pote cakö donyo, cë wie
yübëre, ëka ajiki mërë nyige
cëk.

29 Ì karë na nyige öcëk, apur cakö bino éka kaö kï pala, piiën karë më kac nwongo örömö.”

Carolok i kom nyig kodhi karadali
(Matayo 13:31-32,34; Luka 13:18-19)

30 Yecu dökü openyo ni, “Ngö na onu ebino poro kï Ker k'Obanga onyo carolok mënë na onu myero etii ködë?

31 Cal kï nyig kodhi karadali na énë tüdi rwök kï kin kodhi n'épïdhö i ngöm.

32 Éntö ka épïdhö, döngö na thwönë rwök na lõö kodhi nökënë kibëc n'épïdhö i pwodho. Jangë döngö na boco, éka wïny na ngwëcö kï malö twërō gérö udigi cë yweo i tipo mérë.”

33 Yecu ötitö köp mérë both lwak nakun tio kï carolok, okobo niigi kite na gïn twërō niang ködë.

34 Èn ba okobo gin mörö bothgi na ba otio kï carolok, éntö ka èn ut kënë k'ëlükörë, èn gönyö niigi jami kibëc.

Yecu öjükö yamö
(Matayo 8:23-27; Luka 8:22-25)

35 Ì nïnö nön na pïny dong cido, Yecu okobo both élükörë ni, “Eru engolu nam yo löka nam tung ca.”

36 Cë gïn otero Yecu i yeya éka öcakö gïnï wékö lwak i ngeegi. Yeya nökënë thon onwongo tye kanya acël ködë.

37 Éka yamö na ger obino i nam. Pii na tingere malö öcakö dönyö i yeya, éka yeya öcakö pong kï pii.

38 Ì caa nön, Yecu onwongo tye ka nïnö i ngee yeya n'otheno wie k'athen wic. Èlükörë ocoo én ek öya malö, na redo gïnï ni, “Apwony, in ba iparö ni wan écwök lüny ökö i pii?”

39 Yecu öya malö éka ocoko yamö cë okobo ni pii na tingere malö ni, “Lïng ökö! Cung moth!” Cucüth yamö ocung ökö, éka jami kibëc öling moth.

40 Cë Yecu openyo élükörë ni, “Pingö un ilwor? Un ba itye kï yee?”

41 Èlükör Yecu onwongo ödökö gïnï na lwor ökö. Cë öcakö penyere gïnï kën-gï ni, “Ecwo ni énë nga, na naka thon yamö éka pii na tingere malö winyo?”

5

Yecu öcangö dhanö na tye kï tipo na rac

(Matayo 8:28-34; Luka 8:26-39)

1 Cë Yecu éka élükörë öngölö Nam më Galilaya éka othuno gïnï yo löka nam më lobo Gereca.

2 Ì karë na Yecu donyo yökö kï i yeya, dhanö mörö na tye kï tipo na rac öya kï i wi lyene më romo ködë.

3 Dhanö ni onwongo bedo i kin lyene éka ngat mörö onwongo ope na twërō tweno én kadï kï jégélë.

4 Pol karë etweo tyënë kï cïngë éntö caa kibëc én codo jégélë éka türö nywenyo ökö kï i tyënë. Ngat mörö onwongo ope na ték na twërō löönö én.

⁵ Karë kibëc kiceng èka kiwor ën bedo i kin lyene èka i wi kite nakun kok, èka nöngölö kome kënë ki kite.

⁶ I karë na ën önenö Yecu kii kanya bobor, örängö bothe cë orumo cöngë i nyime.

⁷ Èn öcakö redo rwök ni, "Yecu, Wod k'Obanga na Malö Rwök, ngö na in imitö kii botha? Kwongiri i nyim Obanga ni ba ibino pwodona!"

⁸ Piën Yecu onwongo okobo nineni, "Yaa ökö kii kom ècwöni, in tipo na rac!"

⁹ Cë Yecu openyo tipo na rac ni, "Nyingi nga?"

Èn ögamö ni, "Nyïngwa Lejon, piën wan etye na pol i dhanö ni."

¹⁰ Tipo na reco dök ökwaö Yecu rwök ek kür öryëmgü ökö kii lobo nön.

¹¹ Öthipan pün onwongo tye ka cem i bad kidi.

¹² Cë tipo na reco ökwaö gini Yecu ni, "Or-wa i pün, ek ödönyi i igü."

¹³ Cë Yecu oyeo nügi, èka tipo na reco odonyo èka ödönyö gini i pün. Öthipan pün onwongo tye na römö elip ariö. Pün öngwëcö gini kii i bad kidi yo i nam cë pii ömwönyögi ökö.

¹⁴ Èkwath n'onwongo kwaö gini pün öngwëcö gini ökö èka örweö gini emuth i pacö na cwök èka kii lobo n'ögürö kany nön. Jii öbünyö cihö më nénö ngö n'ötimérë.

¹⁵ I karë na lwak obino both Yecu, gin önenö dhanö n'onwongo tipo na reco

opong i kome, obedo piny kunön n'oruko böng mëre èka wie tye na bër, cë lworo ömakögi kibëc.

¹⁶ Èka jö n'önénö ngö n'ötimérë, okobo gini both jö nökënë köp i kom dhanö na tipo na reco opang i kome, èka i kom pün.

¹⁷ Cë lwak öcakö kwaö Yecu ek öya ökö kii lobogü.

¹⁸ Na Yecu dong tye ka dönyö i yeya, dhanö n'onwongo tipo na reco tye i kome, ökwaö en ni ek ewoth ködë.

¹⁹ Èntö Yecu ba oyeo. Okobo nineni, "Cidh yo pacö èka both jö na megi cë ikob nügi jami kibëc na Rwoth Obanga ötimö èka kit na en ötimö nini kica ködë."

²⁰ Èn öcidhö cë öcakö kobo ngö na Yecu ötimö i kome i Dekapoli* èka jö kibëc n'owinyo ngö na en okobo, obedo gini kii ur rwök.

*Nyaka Yairo èka dhakö n'ogudo böngü ka Yecu
(Matayo 9:18-26; Luka 8:40-56)*

²¹ I karë na Yecu dökü öngölö nam kii yeya yo löka nam tung ca, lwak na pol öcökérë bothe nakun en onwongo tye i nget nam.

²² Cë atëla mörö acël më cinagoga, na nyïngë Yairo obino. I karë na en önenö Yecu, orumo cöngë piny,

²³ èka odweko en ni, "Nyara na tidi dong tye ka thöö athöa. Öma! Bin iketh cingi i kome, ek öcang cë ökwö."

* **5:20 Dekapoli** Gönyö ni peci apar.

²⁴ Yecu owothro kanya acël
ki Yairo. Lwak na pol ölübü öñ
nakun ödiö öñ.

²⁵ Dhakö mörö onwongo
tye na remo obedo cwer ki i
kome pi mwaka apar ariö na
ba cok.

²⁶ En ölimö can na thwönë,
eka öbalö lüm mérë kibéc
n'onwongo öñ ut kódë më
cülö daktea na pol. Ëntö two
mérë ömëdérë amëda na ba
ögang.

²⁷ I karë na öñ owinyo köp i
kom Yecu, obino ki kungee
nakun wok ki kin jii eka
ogudo böngü ka Yecu,

²⁸ piën öñ onwongo öthamö
pirë kënë ni, "Ka atwëro gudo
böngü mérë kékén, an abino
cang."

²⁹ Cucùth remo na cwer
ocung ökö, eka ongeo ki i
kome ni öñ écang ökö ki kom
can mérë.

³⁰ I caa nonu cucùth, Yecu
ongeo ni tükö öya ki i kome.
En ölokérë both lwak cë
openyo ni, "Nga n'ogudo
böngüna?"

³¹ Elübörë okobo nünë ni,
"In inenö lwak tye ka diöni eka
dökì ipenyo ni nga n'ogudi?"

³² Ëntö Yecu ölokérë më
nënö nga n'ogude.

³³ Cë dhakö ongeo ngö
n'ötimérë i kome, obino na
kome myël ki lworo eka
orumo cõngë i nyim Yecu cë
öñ okobo köp n'adyer kibéc
bothe.

³⁴ Yecu okobo both dhakö
ni, "Nyara, yeeni ömiö idökö
na bér. Ci dh ki kuc eka icang
ökö ki kom twoni."

³⁵ Na Yecu onwongo pod
twak kódë, cwö mörö obino

ki i pacö ka Yairo, atëla më
cinagoga. Gin okobo nünë ni,
"Nyari dong öthöö ökö. Kür
dökì iyel apwony."

³⁶ Ëntö Yecu onwongo
owinyo ngö na gin tye ka
kobo eka okobo both Yairo ni,
"Kür ibed kïlworo. Bed ki yee
kékén."

³⁷ Cë Yecu ba oyeo ni ngat
mörö më lübö körë na path ki
Petero, Yakobo eka Jon (ömin
Yakobo).

³⁸ I karë na gin obino i pacö
k'atëla më cinagoga, Yecu
önënö jii na tye ka wöö ki
koko.

³⁹ En ödönyö i öt eka okobo
niigü ni, "Pïngö iwoö unu ki
koko ni köman? Athin ba
öthöö, entö önnö anina."

⁴⁰ Lwak önyérö Yecu. Ëntö
öñ öryëmögi kibéc yökö eka
ödönyö k'apap k'athin, aya
k'athin eka elübörë adek i öt
kanya anyaka nön onwongo
obuto ië.

⁴¹ Yecu ömakö cingë cë
okobo nünë ni, "Talitha
kumi," na gönyö ni, "Athin
anyaka, yaa malö!"

⁴² Eka cucùth anyaka öya
malö eka öcakö woth (en on-
wongo tye ki mwaka apar
ariö), cë jii obedo ki thwön ur
rwök.

⁴³ Yecu öcikögü rwök ni kür
ömii gini ngat mörö onge ngö
n'ötimérë eka okobo niigü më
mii nyakö nön gin mörö ek
öcam.

6

*Ekwérö Yecu ki i Najaret
(Matayo 13:53-58; Luka
4:16-30)*

¹ Yecu öya ökö kï kunön, ödök yo lobo thurgï éka élübörë ölübü en.

² Ì ceng Cabit k'Eyuda, én öcakö pwony i cinagoga. Jö na pol n'owinyo pwony mère ouro gïni éka openyo gïni ni, "Écwö ni onwongo ryékö ni kibëc kï kwene? Kit ryékö mënë n'ëmë ön? Ën tio tango ningö?

³ Man pathi apaa bao, wod ka Maria éka ömin Yakobo, Yoce, Yuda, éka Cimon. Amego mère ba kwö i kin onu kany?" Cë gïn ökwëro yee i kome.

⁴ Cë Yecu okobo nïgi ni, "Adwarpiny éwörö i kabedo kibëc na path kï i lobo më pacö mère éka i kin wede mère kï jö më dyekalgi."

⁵ Yecu onwongo ba twëro tio tango mörö kunön, na path kï ketho cïngë i wi etwoe mörö na nönök éka öcangögï.

⁶ Ën obedo kï ur rwök piën gïn ope kï yee.

Yecu ooro élübörë apar ariö

(Matayo 10:5-15; Luka 9:1-6)

Cë Yecu owothro i pacö kï pacö, nakun pwonyo jii.

⁷ Ën ocwodo élübörë apar ariö kanya acël éka öcakö orogï k'ariö ariö nakun müögï twër i kom tipo na reco.

⁸ Yecu okobo nïgi ni kür owoth gïni kï gin mörö i wothgï na path kï lüth ögölë. Kür ömak gïni cem, ocwe éka cilëng i jëba.

⁹ Ën oyeo nïgi më ruko wör, éntö kür ömak gïni böngü më alöka.

¹⁰ Ën okobo nïgi ni, "Ka idönyö unu i öt mörö, bed unu kany nön naka ka ibino yaa unu kï kany nön.

¹¹ Ëntö ka ba égamöwu i kabedo mörö onyo ewinyowu, ka iya unu, tëng unu apua më tyënwu* ék obed caden bothgï."

¹² Cë élübör Yecu öcakö cïdhö gïni, nakun titö gïni ni jii myero ongut gïni kï kom balgi.

¹³ Gïn öryëmö cene na pol éka ewiro etwoe na pol kï möö cë écangögï.

Thöö ka Jon Abatica

(Matayo 14:1-12; Luka 9:7-9)

¹⁴ Rwoth Erode† owinyo köp i kom Yecu piën jö kibëc onwongo twakö köp i kome. Jö mökö onwongo kobo ni, "Man myero obed Jon Abatica n'ocer kï i lyël. Manön énë ömiö en tye ka tio koth tango ni."

¹⁵ Jö nökënë okobo ni, "Ën obedo adwarpiny Eliya."

Jö nökënë kobo ni, "Ën obedo adwarpiny na cal k'edwarpiny mörö na cön."

¹⁶ Ëntö i karë n'Erode owinyo köp i kom Yecu, okobo ni, "Man myero obed Jon! Écwö na an anguno ngute énë dökï ocer ökö."

¹⁷ Erode onwongo ooro acikari më makö Jon éka

* **6:11 Tëng unu apua më tyënwu** nyutho ni Obanga ökwëro jö më pacö nön, piën gïn ökwëro winyo köp k'ëkwëna. † **6:14 Rwoth** ni onwongo obedo Erode Antipa.

ketho ën ï buc pï Kerodia, dhakö k'ömän mërë Pilipo, piiën Erode onwongo ökwanyö Kerodia më bedo dhakö mërë.

¹⁸ Jon obedo ka kobo n'Erode ni, "Cik ka Muca ba yeo ni ikwany dhakö k'omeru ilök ödök megi."

¹⁹ Kerodia obedo kï cwer cwiny i kom Jon ëka ömítö më neko ën. Ëntö ba ötwérö,

²⁰ piiën Erode onwongo lworo Jon ëka ngeo ni ën onwongo obedo dhanö na bér ëka écwö na leng, cë ën ögwökö Jon na bér. Ën onwongo marö winyo twak ka Jon kadi bed wie orubere, caa kibëc ën mítö ni ewiny köp ka Jon.

²¹ Kerodia onwongo karë na bér i nänö n'Erode öyübö karama më po pï nänö n'enywölë ködë. Ën ocwodo edite mërë, etëla wi lwëny ëka edite më Galilaya.

²² I karë na nyaka Kerodia obino ëka ömyël, ën oyomo cwiny Erode ëka wele mërë. Erode okobo both nyakö ni, "Penya gin mörö kékëna in imítö. An abino miöni."

²³ Ëka ën okwongere bothe ni, "An abino miöni gin mörö kékëna in ibino penyo kï botha, naka thon nucu më kernal!"

²⁴ Anyaka ni öcidhö both aya mërë cë okobo nänë ni, "Ngö na myero apeny?"

Aya mërë okobo nänë ni, "Peny wi Jon Abatica!"

²⁵ Anyaka ni öbünyö woth piiöpö ödök cen both Erode ëka okobo nänë ni, "Amítö ìmia

wi Jon Abatica i cania kany i caa ni!"

²⁶ Cë rwoth Erode obedo kï kumo rwök ëntö pï kwong na ën okwongo i nyim wele mërë, ömio ën ba twérö kwérö na nyaka ni.

²⁷ Cucüth rwoth ooro acikari na kürö pïny i buc më cïdhö nguno ngut Jon ëka okel nïnë wie. Acikari öcidhö i buc cë onguno wi Jon

²⁸ oketho i cania, ëka okelo ömio both nyakö ni. Nyakö ni dong otero both aya mërë.

²⁹ I karë n'élübör Jon owinyo gini ngö n'ötimëre, obino gini cë ökwanyö gini kome ëka öcidhö eiko i bur lyël.

*Yecu öpidhö jö elip abic
(Matayo 14:13-21; Luka 9:10-17; Jon 6:1-14)*

³⁰ I karë n'ekwëna odwogo gini both Yecu, gin okobo nänë gin na kibëc na gin ötimö ëka opwonyo.

³¹ Cë Yecu okobo nigi ni, "Eru ecidhu yo kanya jii ope iei ek eywe na nönök." Ën okobo ni köman piiën jii onwongo tye na pol na bino ëka cïdhö gini. Yecu ëka ekwëna mërë ba obedo gini ki caa mörö më cem thon.

³² Cë gin dong ödönyö i yeya ëka öcidhö yo kanya jii ope iei.

³³ Ëntö jö na pol n'önönögï ka cïdhö, ongeogï ëka öngwëcö gini ki tyen-gi ki kin peci cë öcakö thuno gini anyim nigi.

³⁴ I karë na Yecu donyo yökö ki i yeya, ën önönö lwak jii na pol ëka kïca ömakö ën i komgi, piiën gin onwongo cal

ki rom n'akwathgii ope. Cë öcakö pwonyogi ki köp na pol.

³⁵ Na piny dong cwök yutho, élübkör Yecu obino bothe éka okobo gini ni, "Kany obedo kanyalik, éka piny thon tye ka cido.

³⁶ Kob ni lwak ek öciddh gini kanya jö mökö kwö gini ié éka i kin peci na cwök ek öwil gini cem mörö më acama."

³⁷ Èntö Yecu ögamö ni, "Mi-wugi gin mörö më acama."

Gin openyo Yecu ni, "In imitö ni wan ecidh ek etii ki denario mia ariö më wilö ogati më pidhögi?"

³⁸ Cë Yecu openyogi ni, "Ogati adi na un iut ködë? Cidh inen unu."

Gin odwogo éka okobo gini ni, "Wan eut k'ogati abic éka rëc ariö."

³⁹ Cë Yecu okobo n'élübköré ek omii jii obed gini piny i gurup i lum na mar.

⁴⁰ Jii obedo piny i gurup më mia acélacél éka pyer abicabic.

⁴¹ Yecu ökwanyö ogati abic éka rëc ariö, önenö malö i polo, éka olégö gum. Cë opoko i ogati éka omio both élübköré ek opok gini both jii. Èn thon opoko rëc ariö i kin-gi kibec.

⁴² Gin kibec ocemo éka oyeng gini.

⁴³ Éka kinge, élübkör Yecu öcökö gini nginy ogati éka rëc n'odong pong aditi apar ariö.

⁴⁴ Wel cwö n'öcamö gini ogati onwongo tye elip abic.

*Yecu owo tho i wi pii
(Matayo 14:22-33; Jon 6:15-21)*

⁴⁵ Cucüth kinge man, Yecu okobo n'élübköré ek ödöny

gini i yeya ek öciddh gini anyim yo loka Bethecaida, nakun en kobo both jii ek ödök gini pacö.

⁴⁶ Kinge na dong omotho jii, en öciddh i lega i wi kidi.

⁴⁷ Kothyeno na piny dong ocido, élübkör Yecu onwongo ut gini i yeya i dyere nam. Yecu onwongo odong kënë i ngöm.

⁴⁸ Èn önenö ni élübköré onwongo tye gini i thwon can, na yelere gini më miö yeya cihö anyim pién yamö onwongo tye ka yelogi. Na caa abungwén më kodiko dong römö, Yecu obino bothgi nakun tye ka woth i wi pii. Èn öthëna më poth kalögï,

⁴⁹ èntö i karë na gin önenö Yecu nakun tye ka woth i wi pii ki tyenë, gin okok rwök ki lworo n'othamö gini ni ködë en obedo jwök.

⁵⁰ Gin kibec onwongo komgi öthöö ökö i caa na gin önenö Yecu.

Èntö Yecu ötwak ködgï cucüth nakun kobo nigi ni, "Kür ibed unu ki lworo, bed unu na cwinywu ték! An enön!"

⁵¹ Cë Yecu öidhö i yeya bothgi, éka yamö ocung. Gin kibec ouro gini rwök,

⁵² pién gin onwongo bara öniang i kom tango më ogati. Cwinygi onwongo nwang rwök më niang.

*Yecu öcangö jö na two i
Genecaret
(Matayo 14:34-36)*

⁵³ Kinge na dong öngölö gini nam, Yecu éka élübköré ocung

gini i loka nam i Genecaret eka
oywaö gini yeya i lak nam.

⁵⁴ I karë na gin odonyo yökö
ki i yeya, cüçüth jii öcakö
ngeno en,

⁵⁵ cë örингö gini i kabedo
kibec, na tingo gini jö na
two k'ökëka yo kanya gin on-
wongo owinyo ni Yecu ut ië.

⁵⁶ Kanya kibec na en cihö
yo ië, i kin peci, peci na döngö,
onyo i nget lobo, gin okelo
etwoe yo cuk. Gin ökwaö en
ek ömii etwoe ogud lak böngü
mérë, eka jö kibec n'ogudo
ebino ecangögö ökö.

7

Kite më thékwarö k'edong (Matayo 15:1-19)

¹ I nönö mörö acél, Epar-
icayo mökö eka epwony Cik
ka Muca n'öya gini ki i Jeru-
calem, obino eka öcökérë gini
both Yecu.

² Cë önenö gini elübörë
mökö na ba lübö cik më kwer
më lwökö cing jö na bara
ecemo.

³ Eparicayo eka Eyuda kibec
ba cemo na bara ölwökö gini
cing-gi kite na cik më thékwarö
k'edong mütö ködë.

⁴ Eka ka gin odwogo ki i cuk,
ba cemo gini na bara ölwökö
cing-gi. Gin thon lübö cik më
thékwarö nökënë na pol na
calö lwökö ekopo, aguli, eka
k'aguli më mola.

⁵ Eparicayo eka epwony cik
openyo gini Yecu ni, "Pingö⁵
elüborki ba lübö gini cik më
kwer më thékwarö k'edong
ëntö cemo gini ki cing-gi na ba
elwökö?"

⁶ Yecu ögamö ni, "Un et-
wodo! Adwarpiny Icaya on-
wongo odwaro köp n'atür i
komwu kite n'écöö ködë ni,
"Rok ni wöra gini ki del
dhögü,
ëntö cwinygï bor köda.

⁷ Wöra gini nono,
pwony na gin pwony
obedo cik ka dhanö."

⁸ Un ikwérö lübö cik k'Obanga
eka ilübö unu kite ka dhanö."

⁹ Cë Yecu okobo bothgi ni,
"Itye unu ki yodhi na bér
më kwérö cik k'Obanga, ek
ilüb unu kite më thékwarö na
mewu.

¹⁰ Muca yam okobo ni, 'Wör
apapni eka ayani,' eka ni, 'Ka
ngat mörö öyanyö apap mérë
onya aya mérë, myero enek
ökö.'

¹¹ Entö un ikobo ni ka
dhanö mörö okobo n'apap
mérë onyo aya mérë ni, 'Gin
n'onwongo myero akonyi
ködë enë lim më Korban' (na
tyen köp mérë enë ni gin
n'emii ökö both Obanga),

¹² cë en kür döki ömii lim
mörö më könyö apap mérë
onya aya mérë.

¹³ Kit yoo ni, un ikwérö köp
k'Obanga eka ilübö unu kite
më thékwaröwu. Eka itimö unu
jami na pol na cal ki manön."

Gin na balö dhanö (Matayo 15:10-20)

¹⁴ Cë Yecu ocwodo lwak
bothe döki eka okobo niigü ni,
"Un kibec winy unu köpna eka
iniang unu ië.

¹⁵ Gin mörö ope na yaa ki
yökö na dönyö i dhanö na
twérö balö en, entö gin na yaa
ki i dhanö na donyo yokö enë
balö en.

¹⁶ Ngat na tye kü ithe më winyo myero ën owiny.”*

¹⁷ Ì karë na Yecu öwëkö lwak ëka ödönyö ï öt, élubkörë openyo ën tyen köp ï kom carolok ni.

¹⁸ Cë Yecu openyogi nii, “Un thon bara iñiang unu? Ba in-geo unu nii gin na kibëc na dönyö ï dhanö nakun öya kü yokë ba twërö balö ën?

¹⁹ Piën ba dönyö naka ï cwinye, éntö cüdhö ï jamie cëe donyo yokë. (Na Yecu okobo köp ni, ën onwongo tye ka kobo nii cem kibëc opore më acama.)

²⁰ Yecu ömëdérë më kobo nii, “Gin na yaa kü ï dhanö ën balö ën.

²¹ Piën gin n'öya kü ï dhanö, n'öya kü ï cwinye ën thama na reco, tüm më ölyang, kwalö kwo, nek,

²² elomi, woro më jami kibëc, tüm mökö na reco, bwölö jüii, miti më kom, nyeko, yanyö jüii, awaka, éka mingo.

²³ Tüm na reco ni kibëc yaa kü ï cwinye dhanö, éka gin ën balö dhanö.”

*Yee ka dhakö më Europoiniki
(Matayo 15:21-28)*

²⁴ Yecu öya ökö kü kunön éka öcüdhö ï lobo Turo. Ën ödönyö ï öt mörö éka ba ömítö nii ngat mörö onge, éntö ën onwongo ba twërö kanérë.

²⁵ Cë dhakö mörö na nyarë onwongo tye kü tipo na rac ï kome, owinyo köp ï kom Yecu, cë obino éka orumo cöngë ï nyime.

²⁶ Dhakö ni onwongo obedo jö Girik n'ënywölö ï Curopoiniki. Ën ökwaö Yecu më ryémö tipo na rac ökö kü kom nyarë.

²⁷ Yecu okobo niinë nii, “Ek kono éthiñö öcam ngö na gïn mítö kibëc, piën ba opore më mië cem k'ëthiñö both gwongi.”

²⁸ Dhakö ögamö nii, “Rwoth ikobo adyer, éntö gwongi thon na tye ï thë mëja camö gïnë ngïny cem k'ëthiñö n'opodho pïny.”

²⁹ Cë Yecu okobo niinë nii, “Pi köp na in ikobo, irömö cüdhö yo pacö, piën tipo na rac dong öya ökö kü kom nyari.”

³⁰ Ën öcüdhö yo pacö éka onwongo nyarë obuto ï wi étana, éka tipo na rac onwongo dong öya ökö kü kome.

Yecu öcangö athöö ith na lëbë otwere

³¹ Cë Yecu öya ökö kü ï lobo Turo éka owok ï Cidon yo Nam më Galilaya na tye ï lobo Dekapoli.

³² Éka lwak okelo écwö mörö bothe n'onwongo ithe öthöö éka ba römö twak. Cë ökwaö gïnë Yecu ek oketh cïngë ï kome.

³³ Kinge na Yecu otero ën thenge kü kin lwak, oketho nyi cïngë ï ithe, éka öngülö laö dhögë ï cïngë cëe ogudo lëbë.

³⁴ Yecu önenö malö ï wi polo, ökür éka okobo nii, “Epata,” na tyen köp mëre nii, “Yabiri!”

³⁵ Cucuth écwö ni öcakö winyo pïny. Thë lëbë thon

* **7:16** Baibul nökënenë ba oketho tyeng ni.

ögöny ökö éka öcakö twak na bér.

³⁶ Yecu öcikö lwak nü, “Kür iċidh ikob unu both ngat mörö ngö n'ötimérë.” Entö kadie bed öcikögii ni kömanön, gin ömädérë amëda më titö ngö n'ötimérë.

³⁷ Lwak obedo kii ur rwök na kobo gini ni, “Gin na kibec na en ötämö bér. En thon miö ēthöö ith winyo piny éka jö na the lebgii otwere më twak.”

8

*Yecu öpödhö jö elip angwën
(Matayo 15:32-39)*

¹ I karë nonu, lwak na pol döki örüré éka cem onwongo ope nigli. Yecu ocwodo élubkörë bothe éka okobo nigli ni,

² “Lwak othona gini rwök piēn orio gini köda nänö adek na gin mörö më acama ope.

³ Ka aorogii pacö na ba öcamö gini gin mörö, kec bino miögii wile i yoo piēn jö mökö kii kin-gi öya kii kanya bor.”

⁴ Éka élubkörë ögamö ni, “Kara wan etwérö nwongo cem na römö pödhö lwak jö ni kii kwene na kany obedo them?”

⁵ Yecu openyogi ni, “Ogati adi na un itye ködë?”

Gin ögamö ni, “Ogati abirö.”

⁶ Cé Yecu okobo ni lwak ek obed gini piny. En ökwanyö ogati abirö, öpwöyö Obanga éka opokogii, cé ömiö both élubkörë ek opok gini both lwak.

⁷ Gin thon onwongo tye gini kii rëc ariö na thihiñö. Yecu

öpwöyö Obanga éka okobo n'élubkörë ek opokgi.

⁸ Jö kibec ocemo naka oyeng gini. Éka kinge cem, élubkör Yecu öcokö gini nginy cem n'ötütura pong aditi abirö.

⁹ Jö n'onwongo tye kunön onwongo römö elip angwën. Cé Yecu okobo ni lwak ek ödök gini pacö kinge cem.

¹⁰ Cucuth, Yecu ödönyö i yeya k'élubkörë éka öcidhö yo lobo Dalmanutha.

*Eparicayo ökwaö gini
anyuth
(Matayo 16:1-6)*

¹¹ I karë n'Eparicayo mökö owinyo gini ni Yecu othuno, gin obino éka openyo gini Yecu anyuth n'oya kii i polo më temö en.

¹² I karë na Yecu owinyo köp ni, örür rwök kii i cwinye éka okobo ni, “Pingö jö më karë ni mitö gini anyuth më tango? An akobo niwu köp adyer, ba abino nyutho ni jö më karë ni koth anyuth mörö kékën.”

¹³ Cé Yecu öya ökö kii bothgi, ödönyö i yeya, éka öngölö i nam yo löka tung ca.

*Thöbi k'Eparicayo éka më k'Erode
(Matayo 16:5-12)*

¹⁴ Elubkör Yecu onwongo wigii owl ökö më makö ogati i wothgi. Gin onwongo ömakö ogati acel kékën i yeya.

¹⁵ Cé Yecu öcikögii ni, “Myero igwökérë unu kii kom thöbi k'Eparicayo éka më k'Erode.”

16 Gïn öcakö twak ï kin-gï kën-gï nï, “Ën tye ka kobo köp ni piën onu ba èmakö ogati mörö.”

17 Yecu ongeo ngö n'onwongo gïn tye ka twakö cë openyogï nï, “Pïngö itye unu ka twak nï ba ìmakö unu ogati mörö? Un pod bara ïnënö onyo ïniang unu? Cwinywu pod nwang?

18 ‘Itye unu kï wangwu cë ba ineno unu. Itye unu kï ithwu cë ba iwinyo unu pïny. Ba ïtwërö unu po ï kom gin mörö kékën?

19 Ì karë na an apïdhö jö elip abic k'ogati abic, aditi adi më ngïnyë n'odong na un ïcökö?”

Ëlübör Yecu ögamö nï, “Apar ariö.”

20 “Ëka ï karë na an apïdhö jö elip angwën k'ogati abirö, aditi adi më ngïnyë na un ïcökö?”

Cë gïn ögamö nï, “Abirö.”

21 Ëka Yecu openyogï nï, “Un pod bara ïniang?”

Yecu öcangö athöö wang i Bethecaida

22 Ì karë n'othuno gïnï i Bethecaida, jö mörö okelo athöö wang both Yecu, cë gïn ökwaö én më gudo athöö wang.

23 Ëka Yecu ömakö cïng athöö wang cë öpëö yökö i ngee pacö. Cë öngülü laö dhögë i wangë, oketho cïngë i kome éka openyo nï, “Itye ka nënö gin mörö?”

24 Ëcwö ni önënö malö cë okobo nï, “Eyo, atye ka nënö jïj, èntö gïn tye ka nen kamë yen na tye ka woth.”

25 Cë Yecu dökï ogudo wang ëcwö ni éka wangë öyabërë cë öcakö nënö jami kibëc na bër.

26 Yecu okobo nïnë ek öcïdh yo pacö thurgï nakun cïkö nï, “Kür icïdh ikob nï ngat mörö kï i pacö.”

Köp na Petero otuco i kom Yecu
(Matayo 16:13-20; Luka 9:18-21)

27 Yecu éka élüböré öya gïnï kï i Galilaya éka öcïdhö gïnï i peci na cwök kï Cecaria Pilipi. Na gïn onwongo tye i woth, én openyogï nï, “Jïj mönö kobo nï an abedo nga?”

28 Gïn ögamö nï, “Jö mökö kobo nï in Jon Abatica, mökö kobo nï in Eliya, éka jö nökënë kobo nï in ibedo ngat acël i kin edwarpïny.”

29 Cë Yecu openyogï nï, “Entö un kono, ikobo nï an abedo nga?”

Petero ögamö nï, “In ibedo Meciya.”

30 Entö Yecu öcikögï nï kür okob gïnï nï ngat mörö köp i kome.

Yecu okobo pï thöö mérë
(Matayo 16:21-28; Luka 9:22-27)

31 Cë Yecu öcakö pwonyogi nï Wod ka Dhanö myero ölim can na pol éka edong, élamdhök na dito, éka epwony cïk bino kwërö én ökö. Ebino neko én, èntö kinge nïnö adek én bino cer kï i lyel.

32 Yecu ötwakö köp ni kanyalér both élüböré. Ëka Petero ökwanyö én thenge cë öcakö coko Yecu pï kobo koth köp ni.

³³ Ëntö Yecu öwirë éka önenö élüböré, cë ocoko Petero na kobo ni, "Dök i ngea, Catan! Piën thamani ba lübö më k'Obanga éntö më ka dhanö."

³⁴ Cë Yecu ocwodo lwak éka élüböré bothe cë okobo ni, "Ka ngat mörö mítö bedo alübörä, myero én kono öcak kwérë kënë, oting yath aria mérë, éka olüb köra.

³⁵ Ka ngat mörö mítö larö kwö mérë, bino rwenyo kwö mérë ökö. Éntö ka ngat na rwenyo kwö mérë pira éka pi Emuth na Bér, bino larö kwö mérë.

³⁶ Éka ngö na in ibino nwongo ka itye ki jami më lobo ni kibec, éntö irwenyo tiponi ökö?

³⁷ Onyo ngö na dhanö twérö më më lökö ki kwö mérë?

³⁸ Ka ngat mörö lewic makö i koma éka ki köpna i karë ni na ba ewörö Obanga ié éka më bal, Wod ka Dhanö thon lewic bino makö i kom dhanö non i karë na én bino dwogo ködë ki dheo k'Apap mérë éka më k'emalaika na leng."

9

¹ Éka Yecu okobo bothgi ni, "An akobo niwu köp adyer ni tye jo mökö n'ocung kany na ba bino bílö gini thöö naka ka wang n'önénö gini ker k'Obanga ka bino ki tekö."

*Kom Yecu olökérë na path
(Matayo 17:1-13; Luka 9:28-36)*

² Kinge nünö abicél, Yecu ökwanyö Petero, Yakobo, éka Jon cë öidhö ködgü i wi kidi na bor, kanya onwongo gini tye

ié kën-gi. Na gini tye ka nénö kom Yecu olökérë na path i nyimgü,

³ éka böng mérë ödökö na tar na ryeny rwök na ngat mörö ki wi lobo ba römö lwökö ni kömanön.

⁴ Cë Eliya éka Muca onen bothgi éka öcakö gini twak ki Yecu.

⁵ Petero okobo both Yecu ni, "Apwony, bér ni onu më bedo kany! Ék egér othogo adek, acél na megi, acél më ka Muca, éka acél më k'Eliya."

⁶ Petero onwongo ba ngeo ngö na myero ekobi piien lworo onwongo ömakögi rwök.

⁷ Cë edou obino oumogü ökö, éka dwön ötwak ki i edou ni, "Man éné Woda na an amarö. Winyunu én."

⁸ Athura, i karë na gini önenö ngetgi, gini ba döki önenö ngat mörö na path ki Yecu kékén.

⁹ Na gini tye ka idho piiy ki wi kidi, Yecu öcikögi ni kür okob gini ni ngat mörö ngö na gini önenö, naka wang ka Wod ka Dhanö ocer ki i thöö.

¹⁰ Gini ba okobo ngö nötimérë both ngat mörö, éntö obedo penyere gini i kingü kën-gi ni, "Ngö na 'cer ki i thöö' gonyö?"

¹¹ Cë gini openyo Yecu ni, "Pingö epwony cik ka Muca kobo gini ni Eliya myero kono öcak bino?"

¹² Yecu ögamö nügi ni, "Adyer Eliya éné cakö bino éka dwökö jami kibec kakare. Cë pingö Cöc na Leng kobo ni Wod ka Dhanö bino lümö can rwök éka ebino kwérö ökö?

¹³ Ëntö akobo niwu nü, Eliya dong obino ökö éka jii ötimö gin na kibec na gin mitö i kome, kite na Cöc na Leng kobo nü bino türerë ködë.”

Yecu öcangö awobi na tye kii tipo na rac

(Matayo 17:14-20; Luka 9:37-43)

¹⁴ I karë na Yecu k'elübörë adek odwogo gini yo kanya elübörë nökënë onwongo ute gini ie, gin önenö Iwak na pol n'ögürögi dyere éka epwony cik ka Muca onwongo tye ka pyem ködgï.

¹⁵ Na Iwak kibec önenö Yecu, ouro gini rwök éka örингö gini më motho en.

¹⁶ Yecu openyo elübörë nü, “Ngö na un itye ka pyem ködgï ie?”

¹⁷ Dhanö mörö acél kii kin Iwak ögamö nü, “Apwony, akelo woda bothi, piën en ute kii tipo na rac na ba yeo nü en ötwaki.

¹⁸ Éka ka tipo na rac ömakö, rëdhö en piny na kome myël amyela. Cé bwo yenyo kii dhögë, kaö lakë na tek éka kome jing ökö. Akwaö elübörë më ryémö tipo na rac, entö ryémö ölöögi ökö.”

¹⁹ Yecu okobo nügi nü, “Un wang rok na yeewu ope i kom Obanga! Abino bedo kodwu naka awene? Abino diö cwinya i komwu naka awene kara? Kelunu awobi nöön botha.”

²⁰ Cé gin okelo awobi ni bothe. Entö i karë na tipo na rac önenö Yecu, oyuo awobi ni piny cüth naka örakérë na

lör alöra nakun bwo yenyo kii dhögë.

²¹ Yecu openyo apap k'awobi nü, “Otero karë na röm kwene na gin ni obedo ka türerë bothe?”

En ögamö nü, “Anaka na en pod tiid.

²² Tipo na rac rëdhö en karë kii karë i mac onyo i pii, më témö neko en ökö. Entö ka itwérö türö gin mörö, kïca omaki i komwa ek ikönywa.”

²³ Yecu okobo n'apap k'awobi nü, “Ka in itwérö! Jami kibec twérö türerë both ngat mörö kékëna yee.”

²⁴ Cüçüth apap k'awobi okok kii redo nü, “An ayee, entö könya ek abed kii yee na thwönél!”

²⁵ I karë na Yecu önenö nü Iwak tye ka ngwëc bino yo bothe, en ocoko tipo na rac nü, “In tipo na ba miö awobi ni twak éka winyo piny, aciki më donyo yokö kii kom awobi ni éka kür dökü idony i kome!”

²⁶ Cé tipo na rac öcakö koko, éka oyuo awobi ni piny naka örakérë éka odonyo yokö kii kom. Awobi ni onwongo dong cal kii lyel na jö na pol okobo nü, “En öthöö ökö.”

²⁷ Entö Yecu ömakö cingë éka otingo en malö cé ocung.

²⁸ Kinge na Yecu onwongo tye kénë i öt k'elübörë, gin openyo en nü, “Pïngö wan ba éryémö cen?”

²⁹ Yecu ögamö nügi nü, “Koth tipo na rac na calö man, etwérö ryémö kii lëga kékëna.”

* 9:29 Baibul nökënë ketho lëga éka rio kec.

Yecu ötwakö köp i kom thöö mérë dökì
(Matayo 17:22-23; Luka 9:43-45)

³⁰ Yecu éka élübkörë öya gïnï kï i kabedo nön éka owok gïnï i lobo Galilaya. Ën onwongo ba mítö ni ngat mörö onge kanya gïn onwongo tye ié,

³¹ piën onwongo mítö pwonyo élübkörë. Yecu okobo bothgï ni, "Wod ka Dhanö ebino ketho örörö i kome éka ebino miö i cïng jö na bino neko ën. Ëntö kinge nïnö adek, ën bino cer kï i thöö."

³² Ëntö élübkör Yecu ba öniang gïnï i ngö n'onwongo ën tye ka kobo, éka gïn onwongo lwor më penyo ën.

Ngat na löö kï dit
(Matayo 18:1-5; Luka 9:46-48)

³³ Kinge na dong othuno gïnï i Kaperanaum, na gïn dong tye i öt, Yecu openyo élübkörë ni, "Ngö n'onwongo un itye ka pyem ié i yoo?"

³⁴ Ëntö gïn öling alïnga, piën gïn onwongo tye ka pyem i wanga yoo ni nga énë löö kï dit kï kin-gï.

³⁵ Yecu obedo pïny, cë ochwodo élübkörë apar ariö bothe, éka okobo ni, "Ka ngat mörö mítö bedo dhanö më acël, ën myero obed dhanö më ajiki éka obed atic ka jö kibëc."

³⁶ Cë Yecu ökwanyö athïn éka oketho i dyeregï. Otingo athïn i kore, éka okobo nïgï ni,

³⁷ "Dhanö mörö na bino gamö athïn na tidi na cal

kï man kï nyïnga, nwongo ögama. Ëka dhanö mörö na gama, nwongo ba ögama an kékén ëntö nwongo ögamö Apapna n'oorा."

Tic kï nyïng Yecu
(Luka 9:49-50)

³⁸ Jon okobo both Yecu ni, "Apwony, wan énëno dhanö mörö ryëmö cene kï nyïngi, ëntö wan ejükö ën piën onwongo ën ba tye kukur onu."

³⁹ Yecu okobo nïgï ni, "Kür ijuku ën, piën dhanö mörö ope na tio tango kï nyïnga éka dökì cakö twakö köp na rac i koma.

⁴⁰ Ngat mörö kékén na ba dag onu, nwongo obedo akukur onu.

⁴¹ Ka ngat mörö ömïöwu pii më amodha piën un ibedo jö ka Kiricito, an akobo niwu köp adyer, dhanö nön ebino cülö.

Gin na miö dhanö podho i bal
(Matayo 18:6-9; Luka 17:1-2)

⁴² "Ka dhanö mörö ömïö ngat acël kï kin éthïnö ni n'oye i koma opodho i bal, bedo na bër ka etweo pong rego na thwönë i ngute cë ebolo ködë i nam.

⁴³ Cë ka cingi énë mii itimö bal, ngun ökö. Bedo na bër rwök më dönyö i kwö kï cingi acël kékén na löö më dönyö i mac na ba thöö i kapiny kï cingi ariö.

⁴⁴ Kunön, kudi na camögï ba thöö, éka mac na wangögï ba nekere.†

† 9:44 Baibul nökënë ba ketho tyeng ni.

⁴⁵ Ka tyeni änë teri i bal, ngun ökö. Bedo na bér rwök më dönyö i kwö ki tyeni acël na löö më boloni i mac kapiny ki tyeni ariö.

⁴⁶ Kanya kudigï ba thöö ki ië äka mac thon ba nekere.[‡]

⁴⁷ Äka ka wangï änë mii itimö bal, kól ökö. Bedo na bér rwök më dönyö i Ker k'Obanga ki wangï acël kékëñ na löö më bedo ki wangï ariö cë eboli ködë i mac kapiny.

⁴⁸ Kanya
‘kudigï ba thöö ki ië
äka mac thon ba thöö’

⁴⁹ Piën kadö na bino lönyö ngat acëlacël änë mac.

⁵⁰ Kadö bér, äntö ka orwenyo mit mérë ökö, itwérö miö dökö na mit ningö dökï? Un myero ibed unu ki rwöm më kadö i kinwu äka ibed unu ki kuc ki jö nökënené.”

10

*Pwony i kom këthö nyom
(Matayo 19:1-12; Luka 16:18)*

¹ Cë Yecu öya öwëkö Kaperanaum äka öcïdhö yo kupiny i lobo Yudea äka yo löka kulo Jordan. Lwak jö na pol obino dökï bothe, äka na calö kite n'önaa tímö ködë, än opwonyogi.

² Eparicayo mökö obino bothe äka ötémö gini än nakun epenyo ni, “Cik yeo ni ek ecwö ökwér dhakö mérë?”

³ Yecu ögämö nakun penyogï ni, “Ngö na cik ka Muca kobo?”

⁴ Gin ögämö ni, “Muca ömio twér both ecwö më cöönö

waraga më kwér äka öryëm än ökö.”

⁵ Yecu okobo nügi ni, “Muca ömiowu cik nön pi nwang cwinwywu.

⁶ Äntö cakérë i acaki ketho lobo ‘Obanga ocweo ecwö äka dhakö.’

⁷ ‘Pi tyen köp ni ecwö bino wékö apap mérë äka aya mérë, cë ribérë ki dhakö mérë,

⁸ äka gïn ariö bino dökö kom acël.’ Cë gïn ba dök bedo jö ariö, äntö kom acël.

⁹ Pi manön, gin n'Obanga öribö kanya acël, dhanö mörö kür opok kin-gi.”

¹⁰ I karë na gïn onwongo tye i öt dökï, elübör Yecu openyo än i kom köp na än okobo.

¹¹ Yecu okobo nügi ni, “Ka dhanö mörö ökwérö dhakö mérë, cë önyomö dhakö nökënené dökï, nwongo än ödönyö i elomi.

¹² Äka ka dhakö ökwérö cwörë cë önyomëre k'ecwö nökënené dökï, nwongo än thon ödönyö i elomi.”

Yecu ölögö gum i kom ethinö

¹³ I nïnö mörö acël jö mökö okelo ethinö both Yecu ek ogudgi, äntö elübörë ocokogi.

¹⁴ I karë na Yecu önenö, öngöö rwök. En okobo nügi ni, “Wék unu ethinö obin botha äka kür ijukugi piën ker k'Obanga tye pi jö na calö man.

¹⁵ An akobo niwu köp adyer ni dhanö na ba bino gamö

[‡] 9:46 Baibul nökënené ba ketho tyeng ni.

9:48 Icaya 66:24

ker k'Obanga na calö athïn, ba bino dönyö ië."

¹⁶ Cë Yecu otingo éthïnö i kore éka oketho cïngë iwigü cë olëgö gum i komgi.

Ëcwö n'obedo alönyö

¹⁷ I karë na Yecu öcakö woth mérë i yoo, ëcwö mörö örïngö i körë, cë orumo cöngë pïny i nyime, éka openyo ni, "Apwony na bër, atüm ngö ek anwong kwö na bedo naka?"

¹⁸ Yecu ögamö nïnë ni, "Pïngö in icwoda ni abë? Ngat mörö ope na bër, na path k'Obanga kékën.

¹⁹ In ingeo cik ni: 'Kür ineki, kür idöny i elomi, kür ikwal, kür ibed acaden më twodo, kür ibür dhanö mörö, wör apapni éka ayani.'

²⁰ Ëcwö ni öcakö gamö ni, "Apwony, atyeko gwökö cik nön kibëc cakërë i wang thina." ²¹ Yecu önenö ëcwö ni, cë ömarö en, éka okobo nïnë ni, "Gin mörö acël enë pod orem ki bothi. Apë ek icidh icadh jamini na in iute kódë kibëc éka imii lïm mérë both écan, éka ibino bedo ki lönyö na thwönë i wi polo. Cë ibin, ilüb kôra."

²² I karë n'ëcwö ni owinyo Yecu ka ötwak ni kömanön, wangë öcakö lökërë ökö, cë ödök cen ki cwer cwiny, piën en onwongo tye ki lönyö na thwönë rwök.

²³ Yecu öwirë cë önenö élübkörë éka okobo nïgi ni, "Bino bedo na ték both élönyö më dönyö i ker k'Obanga!"

²⁴ Élubkör Yecu obedo ki ur rwök i köp mérë. Éntö Yecu

okobo dökü ni, "Éthïnöna, bino bedo na ték nïngö më dönyö i ker k'Obanga!

²⁵ Bedo na yot pii kinaga më dönyö ki wang libira ni löönö pii alönyö më dönyö i ker k'Obanga."

²⁶ Élubkör Yecu dök ouro rwök éka ötwak i kin-gi këngi ni, "Cë nga na dong twërlarë?"

²⁷ Yecu önenögi cë okobo ni, "Ki both dhanö, ba twëre, éntö ki both Obanga, jami kibëc twëre."

²⁸ Petero okobo both Yecu ni, "Wan éwëkö jami kibëc më lübë kori."

²⁹ Yecu ögamö ni, "An akobo niwu köp adyer ni ngat mörö ope n'owëkö pacö mérë, onyo utmego mérë onyo aya mérë onyo apap mérë onyo éthïnö mérë onyo pwothi mérë pira éka pii Emuth na Bër,

³⁰ na en ba bino nwongo jami na kadhö manön wang mia acël i karë ni, udi, utmego, ayagi, éthïnögi, éka jamigü kanya acël k'ayela. I karë më ajiki dhanö nön bino nwongo kwö na bedo naka.

³¹ Éntö jö na pol na kobe-dini obedo më acaki bino gïni dong cen, éka jö n'odong cen bino télö anyim."

Yecu okobo pii thöö mérë dökü

³² I karë na gin tye ka cïdhö yo Jerucalem, nakun Yecu enë ötelö anyim, élubkörë ouro rwök éka jö n'onwongo lübë körë obedo gïni ki lworo. En dökü otero élubkörë apar ariö ki thenge éka okobo

bothgï ngö na bino tümërë ï kome.

³³ Yecu okobo bothgï nï, "Onu écidhö naka yo Jerucalem, éka Wod ka Dhanö ebino ketho örörö ï kome both élamdhök na dito éka epwony cik ka Muca. Gin bino ngölö thöö ï wie éka ebino miö en i cing Erok,

³⁴ na bino gini nywarö en éka ngülö laö dhögï i kome, pwodo ki del éka eneko en ökö. Kinge nünö adek, en bino cer."

Kwac ka Yakobo éka Jon

³⁵ Yakobo éka Jon, awope ka Jebedayo, obino gini both Yecu éka okobo nïnë nï, "Apwony, wan émitö ni itim nïwa gin mörö kékën na wan ebino penyoni."

³⁶ Yecu openyogï nï, "Ngö na un imitö ni an atim niwu?"

³⁷ Gin ögamö nï, "Wék ngat acél ki kinwa obed i nget cingi kucem éka ngat nökënë obed i nget cingi kucam ka in ibino bedo i then ker më dheoni."

³⁸ Entö Yecu okobo nïgï nï, "Un ba ingeo ngö na un ipenyo. Un itwérö modho k'ekopo më can na an amodho ködë, onyo itwérö unu batica ki koth batica më can na an abino batica ködë?"

³⁹ Gin ögamö nï, "Wan etwérö."

Yecu okobo nïgï nï, "Okopo na an abino modho ködë, un thon ibino modho ködë éka kit batica n'ebino batica an ködë, un thon ebino baticawu ködë."

⁴⁰ Entö köp më bedo i nget cinga kucem onyo kucam, pathi an enë amiö. Obanga

enë bino miö kabedo nön both jö na en öyerö."

⁴¹ I karë n'elübör Yecu apar owinyo köp ni, cwinyigï öwang i kom Yakobo éka Jon.

⁴² Cé Yecu ocwodogï kibec bothe éka okobo nïgï nï, "Un ingeo unu nï jö n'engeogï kamë elöc k'Erok, löögï ki twérö éka editegi na malö thon bedo ki twér i komgi.

⁴³ Un kür ibed unu nï kömanön, entö ngat na mitö bedo adit ki kinwu, myero obed aticwu.

⁴⁴ Éka ngat na mitö bedo dhanö më acél, myero obed opii ka jö kibec.

⁴⁵ Naka thon Wod ka Dhanö ba obino nï ek etii nïnë entö më tic pi jii éka më miö kwö mérë më kökö jö na pol."

Yecu öcangö wang Batulumayo

(Matayo 20:29-34; Luka 18:35-43)

⁴⁶ Yecu kanya acél k'elüböré obino gini i Jeriko. I caa na gin dong onwongo yaa më wékö Jeriko, lwak na pol ölübö körgi. Ecwo na wangé öthöö, na nyängé Batulumayo (wod ka Timayo) onwongo obedo i nget yoo kwaö kwac.

⁴⁷ I karë na en owinyo nï Yecu më Najaret enë tye ka wok, en öcakö redo na kobo nï, "Yecu, Wod ka Daudi, kica omaki i koma!"

⁴⁸ Jö na pol ocoko en nï ek öling ökö, entö en ömederë ki redo rwök, "Wod ka Daudi kica omaki i koma!"

⁴⁹ Yecu ocung éka okobo nï, "Cwod unu en obin."

Cë gïn dong ocwodo athöö wang na kobo gïnï nïnë nï, “Düi cwinyi! Yaa malö! Ën tye ka cwodoni.”

⁵⁰ Athöö wang obolo böng mërë thenge, opye kï tyënë éka obino both Yecu.

⁵¹ Yecu openyo én nï, “Ngö na in iimitö nï atüm nini?”

Athöö wang okobo nï, “Apwony, amitö wanga önen pïny.”

⁵² Yecu okobo nïnë nï, “Apé cïdhï, yeeni ocangi ökõ.” Cucuth wangë önenö pïny éka Öcakö lübö kör Yecu.

11

Yecu ödönyö i Jerucalem kï dheo

(Matayo 21:1-11; Luka 19:28-40; Jon 12:12-19)

¹ Ì karë na Yecu k'ëlübökörë dong cwök thuno i Jerucalem, gïn obino i Betepage éka Betania na cwök kï tyën Kidi më Jeituni. Ën ooro élübökörë ariö,

² éka okobo nïgï nï, “Apé unu i pacö na tye i nyimwu, éka cucuth na un idönyö ië, ibino nwongo unu athïn kana n'etweo kunön, na ngat mörö bara öidhö i wie anaka Yam. Göny unu éka ikel unu kany.

³ Ka ngat mörö openyowu nï, ‘Pïngö igonyö unu kana nöñ?’ Kob unu nïnë nï, ‘Rwoth énë mitö éka ebino dwongo ökõ piiöpiö.’ ”

⁴ Èlübökör Yecu ariö ni öcidhö, éka onwongo gïnï athïn kana n'etweo yökö i net yoo i dhö wangkac, cë ögonyö gïnï.

⁵ Jö mökö n'onwongo ocung kunön openyogï nï, “Ngö na un itye ka tïmö, nakun igonyö unu athïn kana nöñ?”

⁶ Gïn ögamö kite na Yecu onwongo okobo nïgï kïdë, éka eyeo nïgï më tero.

⁷ Cë gïn dong okelo athïn kana both Yecu éka öpëdhö gïnï böng-gï i dye ngee, éka én obedo ië.

⁸ Jö na pol öpëdhö böng-gï i dye yoo, nakun jö nökénë pëdhö jang yen na gïn ötürö kï i pwothi.

⁹ Jö n'ötëlö anyim éka jö n'ölübö körë oreo gïnï kï wöö nï,
“Ocana!”

“Gum obed i kom ngat na tye ka bino kï nyïng Rwoth!”

¹⁰ “Gum obed i kom ker ka kwarö onu Daudi na tye ka bino!”

“Ocana na tye malö i wi polo!”

¹¹ Yecu ödönyö i Jerucalem éka öcidhö i dyekal öt k'Obanga. Ën önenö jami kibëc, éntö kite n'onwongo pïny dong cwök cido, én öcidhö i Betania kanya acël k'ëlübökörë apar ariö.

Yecu ölamö yath ölam

¹² Kodiko mërë na gïn tye ka yaa wékö Betania, kec onwongo oneko Yecu.

¹³ Ën önenö yath ölam kï cecen na pote oluk, Yecu öcidhö më nënö ka étwérö nwongo nyige mörö. Ì karë na én othuno i thë yath, én ba onwongo gin mörö éntö pote kékëñ,

pïën karë nön ba obedo karë n'ölam nyak ië.

¹⁴ Cë Yecu okobo nü yath nü, "Ngat mörö myero kür döki öcam nyigi." Ëka élübörë owinyo en ka kobo.

*Yecu ödönyö i öt k'Obanga
(Matayo 21:12-17; Luka 19:45-48; Jon 2:13-22)*

¹⁵ I karë na gïn othuno i Jerucalem, Yecu ödönyö i dyekal öt k'Obanga éka öcakö ryämö jö n'onwongo tye ka cadhö jami éka éwil. En ölökö mëja ka jö na lökö ciliing atarö éka thene ka jö na cadhö amam.

¹⁶ Yecu ba oyeo nü ngat mörö öngöl dyekal öt k'Obanga kii jami mörö më acadha.

¹⁷ En okobo nügi nü, "Cöc na Leng kobo kanya aleng nü,
"Oda ebino cwodo nü
öt më läga pi lobo kibec."

Entö un ilökö ödökö kabedo n'eyak pono ië."

¹⁸ I karë n'elamdhök na dito éka epwony cik ka Muca owinyo gïni ngö na Yecu ötwakö, gïn öcakö rangö kit yoo mörö na myero enek kii Yecu ködë. Gïn onwongo tye kii lworo i kome, pïën lwak onwongo uro pwony mëre.

¹⁹ Na pïny dong cido, Yecu éka élübörë öya gïni ökö kii i Jerucalem.

*Pwony n'öya kii kom ölam
(Matayo 21:20-22)*

²⁰ Kodiko mëre na gïn tye ka wok i nget yath ölam na Yecu ölamö, élübör Yecu önönö

yath ölam na dong ötal ökö anaka kii orii naka malö.

²¹ Wi Petero opo éka öcakö kobo nü Yecu nü, "Apwony, nén! Yath ölam na in ilamö ötal ököl!"

²² Yecu ögamö nü, "Bed unu kii yee i kom Obanga.

²³ An akobo niwu köp adyer, ka ngat mörö okobo nü kidi nü, 'Mukiri, ek ipodh i nam,' éka ka ba obedo ka kalakala i cwinye entö yee nü ngö na en ebino kobo bino timëre, ebino timö nünë.

²⁴ Pi manön akobo niwu, gin mörö kékén na un ibino kwaö kii läga, bed unu kii yee nü ityeko unu nwongo, éka bino bedo mewu.

²⁵ Entö ka un itye ka läga, më acél tim kïca both ngat mörö kékén na köp mörö tye i kinwu ködë, ek Apapwu na tye malö i wi polo thon ötim niwu kïca i kom balwu."

²⁶ "Entö ka ba itimö unu nü dhanö kïca, cë Apapwu na tye malö i wi polo thon ba bino timö kïca niwu i kom balwu."*

*Peny i kom twëro ka Yecu
(Matayo 21:23-27; Luka 20:1-8)*

²⁷ Yecu éka élübörë döki odwogo gïni i Jerucalem. Na Yecu onwongo tye ka woth i dyekal öt k'Obanga, elamdhök na dito, epwony cik ka Muca, éka edong obino gïni bothe.

²⁸ Gïn openyo Yecu nü, "Koth twër mënë n'omii in itimö jami ni kibec? Nga n'omii twëro më timögii?"

²⁹ Yecu ögamö nügi nü, "An abino penyowu peny acél.

* ^{11:26} Baibul nökënë ba oketho gïni

Gam unu nïna, éka an abino kobo niwu koth twérö na an atye ka tïmö ki jami ni.

³⁰ Twérö ka Jon më batica öya ki i polo onyo ki both dhanö? Gam unu nïna!"

³¹ Gïn öcakö larö köp nön i kin-gï kën-gï éka okobo gïnï nï, "Ka onu ekobo nï öya ki i polo, én bino penyo nï, 'Pïngö ba iyee unu i kom Jon?"

³² Éntö ka onu ekobo nï, 'Öya ki both dhanö—' (Gïn onwongo lworo lwak, pién jó kibëc ngeo gïnï nï Jon adyer onwongo obedo adwarpïny.)

³³ Cë gïn dong ögamö nï Yecu nï, "Wan ba engeo."

Yecu okobo nïgi nï, "An thon ba abino kobo niwu koth twér mënë n'ömiö an atio jami ni."

12

*Carolok i kom epang pwodho ölöök
(Matayo 21:33-46; Luka 20:9-19)*

¹ Cë Yecu ötwak ködgï ki carolok nï, "Yam onwongo tye dhanö mörö n'öpïdhö ölöök i pwodho mërë. Én öcélö pwodho mërë nön ökö ki cël, ökünyö bur ié më biö pig ölöök, éka ögérö pem më kür ié. Cë én ömiö pwodho ölöök both epang pwodho mörö éka én öcïdhö ökö i lobo nökënë.

² Na karë më püdö ölöök dong örömö, én ooro atic mërë both epang pwodho ék öcïdh ööm nïnë nyig ölöök mörö n'öcék.

³ Éntö epang pwodho ömakö atic n'onwongo eoro,

cë epwodo éka éryëmö ödök cen ki cïngë nono.

⁴ Won pwodho ölöök ooro atic mërë nökënë dökï, éntö epang pwodho opwodo én i wie éka etio tic më lewig i kome.

⁵ Won pwodho ölöök ooro atic mërë nökënë dökï, éka manön gïn oneko ökö. Én ooro jö nökënë na pol; mökö ki kin-gï epwodogï, éka nökënë enekogï.

⁶ "Won pwodho onwongo pod odong ki ngat acël më aora, wode n'onwongo én marö. Më ajiki mërë én ooro wode nakun kobo nï, 'Gïn bino wörö woda.'

⁷ "Éntö epang pwodho ötwak i kin-gï kën-gï nï, 'Man énë alak jami. Bin unu, ék enek én ökö, éka jami më alaka bino bedo më onu.'

⁸ Cë gïn dong ökwanyö wod ka won pwodho ölöök eneko ökö, éka ebolo yokö ki i pwodho ölöök.

⁹ "Ngö na dong won pwodho ölöök bino tïmö? Én bino éka neko epang pwodho nön ökö kibëc cë miö pwodho ölöök nön both jö nökënë.

¹⁰ Un ba ikwanö unu ki i Cöc na Leng nï:

"Kidi n'egedo ökwérö énë ödökö kidi më gwic öt.

¹¹ Rwoth ötimö man,
éka obedo gin më aura ki wang onu?"

¹² Etëla k'Eyuda örängö gïnï yoo më makö Yecu pién ongeo gïnï nï én onwongo ötwakö carolok i komgi. Éntö gïn onwongo lworo lwak. Cë

gün Öya öwëkô Yecu éka öcidhö gïnï ökô.

Cülö ocoro both Cija

¹³ Kinge, étela dini ooro gïnï Eparicayo mökô éka jö na cwakô Erode both Yecu ék enwong köp mörö kï i dhögë na miö etwërô makö en.

¹⁴ Gin obino bothe éka okobo gïnï ni, "Apwony, wan engeo ni in ibedo dhanö na kite atir. In ba ïwëkô jö nökënë kobo nini ngö na myero itüm onyo ikobi. Ëntö in ipwonyo yoo k'Obanga na rwatërë kï köp na tye adyer. Pore më cülö ocoro both Cija onyo pe?

¹⁵ Wan myero écül ocoro onyo kür écül?"

Ëntö Yecu ongeo ökoragü nön ökô. Ën openyogï ni, "Pïngö itye ka témöna unu? Nyuth nïna denario ék anien."

¹⁶ Gin okelo acël bothe, éka Yecu openyogï ni, "Cal éka cöc na tye ié, obedo më ka nga?"

Gin ögamö ni, "Më ka Cija."

¹⁷ Cë Yecu okobo nïgi ni, "Eyo, miï unu jami ka Cija both Cija, éka jami k'Obanga both Obanga."

Éka gin obedo kï ur rwök i kom Yecu.

Peny k'Ecadukayo i kom cer kï i thöö

¹⁸ Cë Ecadukayo, na kobo gïnï ni cer ka jö n'öthöö ope, obino gïnï both Yecu kï peny.

¹⁹ Gin okobo ni, "Apwony, Muca Yam ömiöwa cïk ni ka ècwö mörö öthöö n'öwëkô dhakö mérë na ba önywölö èthïnö mörö, ömïn mérë na kwö myero olak dhakö nonu

ék önywöl öthïnö i wi ömïn mérë.

²⁰ Yam onwongo utmego mörö ute gin abirö. Më acël mérë onyomo éka öthöö na ba önywölö athin.

²¹ Ömïn mérë më arïö olakö dhakö nön, én thon öthöö ökô na ba önywölö ködë athin mörö. Éka ötimérë both ömïn mérë më adek ni kömanön.

²² Utmego abirö ni kibëc olakö en éntö ba önywölö gïnï èthïnö mörö. Më ajiki mérë, dhakö ni thon öthöö ökô.

²³ Dhakö ni dong bino bedo më ka nga i karë më cer? Piëñ utmego abirö kibëc onwongo olakö en."

²⁴ Yecu ögamö nïgi ni, "Un ba irwenyo unu pi köp ni, piëñ ba ingeo unu Cöc na Leng onyo tékö k'Obanga.

²⁵ Piëñ ka jö n'öthöö ocer, gin ba dök nyomo onyo ényömögï. Gin bino bedo na calö emalaika na tye i wi polo.

²⁶ "Ëntö kobedini, köp na makö cer ka jö n'öthöö, un bara ikwanö unu kï kom cöc ka Muca, kï köp na makö bunga na lyel, kite n'Obanga okobo ni Muca ködë ni, 'An abedo Obanga k'Abraam, Obanga ka Icaka, éka Obanga ka Jakob'?

²⁷ Ën ba obedo Obanga ka jö n'öthöö, éntö Obanga ka jö na kwö. Un irwenyo unu rwök."

Cïk na pïrë ték

²⁸ Apwony cïk ka Muca mörö onwongo ocung kunön winyo ngö n'onwongo etye ka larö. Ën öniang ni Yecu ögamö köp na bër, cë openyo

nii, "Ki kom cik kibec, menë na pire tek rwök?"

²⁹ Yecu ögamö nii, "Cik na pire tek rwök ene man: 'Winy unu jo me Icarael! Rwoth Obangawa ene obedo Obanga acel eka Rwoth.'

³⁰ Eka myero imar Rwoth Obangani ki cwinyi kibec, ki tiponi kibec, ki thamani kibec, eka ki tekoni kibec.'

³¹ Me ariö mire pire tek na rom aröma: 'Mar awodhi na calö imarö komi keni.' Cik mörö nökene ope na pire tek na löö man.'

³² Apwony cik ka Muca ögamö nii, "Eyo apwony, in ikobo na bér. In itwakö köp n'atir nakun ikobo ni Obanga tye acel kékén eka obanga nökene ope.

³³ Eka an angeo ni pire tek me marö en ki cwinyi kibec eka ki thamani kibec eka ki tekoni kibec, eka me marö awodhi na calö imarö komi keni. Man ene pire tek na löö tyer awanga eka gin aryeda."

³⁴ I karë na Yecu öniang ni apwony cik ka Muca ögamö ki ryekö, en okobo ninë ni, "In ba ibor ki ker k'Obanga."

Eka cakerë i caa non ngat mörö ba dök öthamö me penyo Yecu ki peny mörö nökene.

Meciya obedo Wodkanga?

³⁵ Kinge na Yecu onwongo tye ka pwonyo jii i dyekal öt k'Obanga, en openyogi ni, "Pingö epwony cik ka Muca kobo ni Meciya obedo akwar Daudi?"

³⁶ Daudi kikome ötwakö ki tekö ka Tipo Naleng, na kobo ni,

"Rwoth okobo both Rwotha: Bed i nget cinga me kucem naka ka an aketho langni i the tyeni."

³⁷ Daudi kikome cwodo en ni, 'Rwoth.' En dök twero bedo wode ningö?"

Jö na pol owinyo köp mire ki yom cwiny.

³⁸ I karë na Yecu tye ka pwony, en okobo ni, "Gwokere unu ki kom epwony cik ka Muca. Piën gin marö woth rimo piny nakun ruko gini böng na boco eka müti gini ni jii omothgi ki the cuk,

³⁹ eka marö gini bedo i kabedo na bëcö me dheo i öt Cinagoga eka kabedo me wörö i karama.

⁴⁰ Gin maö udi ka mon thoo, bedo gini legö lega na boco me nyuthere. Koth jo ni ebino pwodog na rac rwök."

Tyer ka dha thoo

⁴¹ Yecu obedo piny i nget kanya eketho tyer ie ki i öt k'Obanga. En önenö lwak ka bolo tyer i canduk lim. Elonyö na pol obolo lim na thwonë.

⁴² Ce dha thoo n'obedo acan obino eka obolo ciläng na nyige gin ariö.

⁴³ Yecu öcakö cwodo elübörö bothe eka okobo ni, "An akobo niwu köp adyer, dha thoo ni n'obedo acan ene obolo tyer i canduk lim na löö jo nökene kibec na tye ka müi tyergi.

⁴⁴ Piën gïn ömïö tyërgï n'ögithö gïnï kï kom lïmgï na thwönë, äntö dha thöö ni n'obedo acan, ömïö jami kibëc n'onwongo tye bothe na myero ën ökwö ködë.”

13

Yecu okobo pï muko öt k'Obanga

(*Matayo 24:1-2; Luka 21:5-6*)

¹ Na Yecu onwongo tye ka yaa kï i öt k'Obanga, alübörë acël öcakö kobo nü, “Apwony, nën kit na kite ni thwon ködë éka kit na gedo mérë bëcö ködë!” ² Yecu okobo nünë nü, “Un ïnënö gedo na thwon ni? Ba tye kidi mörö kany n'ebino wëkö i wi wadï na ba ebino bolo ökö pïny.”

Anyuth më karë më ajiki

³ Kinge, Yecu obedo pïny i wi Kidi më Jeituni nakun opimere kï öt k'Obanga, Petero, Yakobo, Jon, éka Anderiya öcakö gïnï penyo ën na ut kënë nü,

⁴ “Kob nïwa, köp ni bino tïmërë awene? Éka dökï anyuth mérë ënë ngö na bino nyutho nü köp nön cwök cobere?”

⁵ Yecu öcakö kobo nïgï nü, “Gwökérë unu, ek ngat mörö kür öbwölwu.

⁶ Piën jö na pol bino bino gïnï kï nyïngä na bino kobo gïnï nü, ‘An ënë ën,’ éka bino miö jö na pol rwenyo ökö.

⁷ Ka ibino winyo unu pï lwëny éka anii më lwëny, kür imii cwinywu opodhi, koth

jami ni myero ötümërë, äntö nwongo ajiki pïny podi.

⁸ Rok bino lwëny i kom rok nökënë, éka ker bino lwëny i kom ker nökënë. Oyeyeng bino yengo kabedo na pol éka kec thon bino podho. Manön ënë acaki më can na bino podho i wi lobo.*

⁹ “Ka jami ni bino tïmërë, myero igwökérë unu. Ebino terowu i nyim okiko both élöc éka ebino pwodowu i cina-goga gïnï. Ibino cung unu i nyim élöc éka i nyim rwodhi pïra na calö ecaden bothgi.

¹⁰ Më acël Emuth na Bër myero ettit i wi lobo thükül n'ajiki bara othuno.

¹¹ Ka émaköwu, éka ekelowu i nyim okiko, kür ipar unu ngö nü bino kobo äntö kob unu ngö n'ebino miöwu i caa nön, piën pathi un ënë ibino twak äntö Tipo Naleng ënë bino twak.

¹² Omego bino miö ömïn mérë më aneka, apap bino miö athin mérë më aneka. Ëthïnö bino jëm i kom enyodogï éka miö enekogï.

¹³ Jö kibëc bino dagöwu pï nyïnga. Äntö ngat na bino cung na tek naka i ajiki bino larë.

Can na thwönë

¹⁴ “Äntö ka ïnënö unu gin mörö më kwer na balö cwiny jö, n'ocung kanya myero kür ocung ië (ëk dhanö na kwanö öniang ië), cë jö na tye gïnï i Yudea myero örïng gïnï i wi kite.

* **13:8** Girik kobo nü man ënë acaki arem më nywöl.

¹⁵ Dhanö na tye i wi ödë kür oidhi piny, onyo ödöny i öt më kwanyö gin mörö.

¹⁶ Dhanö na tye i pwodho, kür ödök cen më ömö böngü méré.

¹⁷ Mon na yeco éka mon na dödhö éthiñö bino nënö can i karé nonu.

¹⁸ Lég unu ek köp ni kür ötimérë i karé më ngicö,

¹⁹ piën karé nön bino bedo thwön can na thwönë rwök na naka yam bara ötimérë i wi lobo, cakérë i karé n'Obanga ocweo kí lobo naka othuno ködë tin, éka ba bino tümerë döki.

²⁰ Ka Rwoth onwongo ba öngölö nänö nön na cecek, onwongo ngat mörö acél thon babwöth. Éntö piijö n'Obanga öyérögï, enë ömiö en öngölö wel nänö nonu ödökö na nönök.

²¹ "I karé nön, ka dhanö mörö okobo niwu ni, 'Nén, Meciya ene,' onyo ni, 'Nén, en éca,' kür iyee unu.

²² Piën jö na kobo ni gïn ebedo Kiricito éka edwarinpÿ na twot bino bino éka bino tio gïni anyuth éka tango na dito ek ka twëreë ébwöl gïni naka jö n'eyérögï.

²³ Gwökérë unu dong, an atyeko dong kobo ökö niwu jami kibëc na bino tümerë na karé bara örömö.

²⁴ "Éntö i karé nonu, kinge can na thwönë nön,

"ceng bino cido ökö nicuc,
éka dwe thon ba bino ryëny,

²⁵ cér bino podho gïni kí i wi polo,

éka tékö kibëc më wi polo bino yengere.'

²⁶ "I karé nön jö kibëc bino nënö Wod ka Dhanö na tye ka bino kí i pöl kí twër na dit éka dheo.

²⁷ Éka en bino oro emalaika më cökö jö méré n'eyérögï kí i thwok lobo angwën më ajiki lobo naka i ajiki më polo.

Pwony kí i kom yath ölam

²⁸ "Nwong unu pwony ni kí i kom yath ölam. Ka jangë öcakö löth, éka pote odonyo, un ingeo ni oro dong cwök.

²⁹ Kömanön thon, ka inenö unu jami ni tye ka tümerë, itwëro unu ngeo ni dwogo méré dong cwök, tye i dholokek.

³⁰ An akobo niwu köp adyer, rok më karé ni ba bino poth naka ka jami ni kibëc ötimérë.

³¹ Polo éka lobo bino rwenyo ökö, éntö köpna ba bino rwenyo.

Ngat mörö ope na ngeo nänö onyo caa

³² "Ngat mörö ope na ngeo nänö nön onyo caa nön, naka thon emalaika na tye i wi polo, onyo Wod, éntö Apap kékën enë ngeo.

³³ Gwökérë unu! Bed n'ineno unu! Ba ingeo unu awene na karé nön bino römö ködë.

³⁴ Bino ka Wod ka Dhanö rööm aröma kí dhanö na tye ka cïdhö ökö kany mörö na bor. En ka yaa kí i pacö, miö twëro both etic méré, ngat acélacél kí tic na mëgë, nakun cikö ngat na gwökö dhö wangkac ni ek obed na wangë thwolo.

³⁵ “Un thon, bed unu na wangwu thwolo, piën ba in-geo unu awene na won öt bino dwogo ködë onyo bino dwogo kothyeno onyo ding-wor onyo na thwön gwénö kok onyo kodiko.

³⁶ Ka en bino dwogo athura, kür imii en onwongwu ininö.

³⁷ Ngö na an akobo bothwu, an akobo ni jö kibec: ‘Bed na wangwu thwolo!’”

14

*Yüb më neko Yecu
(Matayo 26:1-5; Luka 22:1-2; Jon 11:45-53)*

¹ Onwongo odong nänö ariö më thuno i Karama më Poth éka Karama më Ogati na Thöbi ope iie. Elamdhök na dito éka epwony cik ka Muca onwongo tye ka rangö gini kite na myero émak ki Yecu i müng éka enek en ökö.

² Gin okobo ni, “Kür émak Yecu i karë më Karama më Poth, ek kür omii ji okel wöö.”

Ewiro Yecu i Betania

³ I karë na Yecu tye ka cem i öt ka Cimon n'onwongo obedo adhöbü i Betania, dhakö mörö obino ki cupa möö narad na ngwece kur na wel mëre tek. En ötürö dhö cupa éka önyö möö i wi Yecu.

⁴ Jö mökö n'onwongo tye gini kany nön ökécö gini rwök éka ötwak kën-gi ni, “Pingö ébalö möö ni na ngwece kur abala?

⁵ Onwongo myero écadh i wel na kadhö denario mia adek ek emii both écan!” Cé gin ocoko dhakö nön ki gero.

⁶ Éntö Yecu ögamö nügi ni, “Wék unu dhakö nön kënë. Pingö kara icoko unu en? En ötimö gin na bér botha.

⁷ Écan itye unu ködgï nänö kibec éka caa mörö kékën itwérö unu könyögï. Éntö ba ibino unu bedo köda nänö kibec.

⁸ En ötimö gin na en römö éka owiro komä më aika na caa bara örömö.

⁹ An akobo niwu köp adyer ni kanya kibec n'ebino titö Emuth na Bér iie i wi lobo thükü, gin na dhakö ni ötimö thon ebino kobo pire, ek obed më po pii en.”

Yuda oyeo më ketho örörö i kom Yecu

¹⁰ Cé Yuda Ikariot, na ene dhanö acel i kin elübör Yecu apar ariö, öcidhö both elamdhök na dito ek eyüb kit na myero emii Yecu bothgi.

¹¹ I karë na gin owinyo ngö na en onwongo mitö tümö nügi, igi obedo na yom, éka öcikere gini më miö Yuda Ikariot ciliing. Cé Yuda öcakö rangö karë na bér na en erömö miö Yecu bothgi.

Cem më Poth

¹² I nänö më acel më Karama më Ogati na Thöbi ope iie, nänö na yam engölo k'athin römö më Poth, elübör Yecu openyo gini en ni, “Ka kwene na in imitö ni wan ecidh eyüb nini cem më Poth iie?”

¹³ Cé Yecu ooro jö ariö ki kin elüböré nakun cikögï ni, “Apë unu naka i Jerucalem, ibino unu romo k'ecwö mörö n'oyeo agulu pii. Lüb unu köré,

¹⁴ Ěka kob unu both won öt na ën bino dönyö iie nü, ‘Apwony okobo nü öt wele ute kwene ēk ēcam cem më Poth iie k'ëlübörë?’

¹⁵ Ën bino nyutho niwu öt na lac na tye malö, n'eketho jami kibec iie. Kany nön ënë iyüb unu cem na më onu iie.’

¹⁶ Elübör Yecu ariö öcidhö gini yo Jerucalem ēka on-wongo gini jami kibec kite na Yecu okobo nügi ködë. Cë gin dong öcakö yübü cem më Poth kunön.

¹⁷ Na dong othuno kothyeno, Yecu obino k'ëlübörë apar ariö.

¹⁸ I karë na gin tye ka cem, Yecu öcakö kobo nügi nü, ‘An akobo niwu köp adyer nü ngat acel ki kinwu bino ketho örörö i koma, ngat acel na tye ka cem köda.’

¹⁹ Elübör Yecu öcakö kumo, nakun ngat acelacel penyo en nü, ‘Ködë an ba?’

²⁰ Yecu öcakö kobo nügi nü, ‘Dhanö acel ki kinwu jö apar ariö, na tye ka lutho cingë i wal kanya acel köda.

²¹ Wod ka Dhanö bino cihö nü kömanön kite n'ecöö ködë i kome. Entö dhanö na bino ketho örörö i kom Wod ka Dhanö bino nénö can! On-wongo bedo na bér ka dhanö nön ba énywölö.’

Cem ka Rwoth më ajiki

²² I karë na gin tye ka cem, Yecu ökwanyö ogati, ölögö gum iie, cë opoko ömiö both elübörë ēka okobo nügi nü, ‘Gam icam unu. Man énë koma.’

²³ Ěka ökwanyö ekopo, öpwöyö Obanga, cë ömiögï, ēka gïn kibec ömadhö.

²⁴ Yecu okobo nügi nü, ‘Man énë remona më cikëre na nyen, na bino öny pi jö na pol.

²⁵ An akobo niwu köp adyer nü, ba dök abino madhö pig nyig ölöök, naka i nänö nön na an abino madhö na nyen i ker k'Obanga.’

²⁶ Na dong gin otyeko wero wer, cë öcidhö gini i wi Kidi më Jeituni.

Yecu okobo nü Petero bino kwérönë

²⁷ Yecu okobo bothgi nü, ‘Un kibec ibino unu wéköna ökö, piën yam ecöö nü,

‘Abino neko akwath,
ēka rom bino këth ata.’
²⁸ Entö kinge cer, abino télö nyimwu më cihö yo Galilaya.’

²⁹ Petero öcakö kobo nü, ‘Kadi bed nü jö kibec bino wéköni ökö, entö an ba abino wéköni.’

³⁰ Yecu ögamö nü, ‘Petero, an akobo nini köp adyer, tin i dyewor na thwön gwënö bara okok wang ariö, in ibino kwéröna wang adek.’

³¹ Entö Petero ocere ki tek na kobo nü, ‘Kadi bed nü myero athöö kodi, an ba abino kwéröni na twal!’ Ěka jö kibec okwongere nü kömanön.

Yecu ölögö i pwodho Gethcemane

³² Gin öcidhö i kabedo n'ecwodo nü pwodho më Gethcemane, ēka Yecu okobo both elübörë nü, ‘Bed unu kany, ek an kono acidh alëgi.’

33 Èn ökwanyö Petero, Yakobo éka Jon cë öcïdhö ködgï. Cwinye öcakö podho na lïth rwök éka kï kumo.

34 Yecu öcakö kobo nïgi nï, "Cwinya cwer rwök na mítö nekona ökö. Bed unu kany na wangwu thwolo."

35 Yecu öcïdhö anyim na nönök, cë orumo cöngë pïny oryebere éka ölegö nï ka onwongo twërë, kono caa nön oplot ökö kï bothe.

36 "Aba, Apap, jami kibëc twërë kï bothi, kwany ekopo ni ökö kï botha, kür obed kite na an amitö, éntö obed kite na in ènë imitö."

37 Cë èn odwogo cen both élübköré éka onwongogï önnö ökö. Yecu okobo both Cimon nï, "Petero, önnö ökö? Ba irömö bedo na wangi thwolo pi caa mörö acël?"

38 Bed unu na wangwu thwolo, lëg unu both Obanga ëk kür idony unu i atëmatëma mörö. Cwinye mítö, éntö kom görü."

39 Yecu öwëkögï dökï éka öcïdhö ölegö lëga acël nön.

40 Í karë na èn odwogo, èn dökï onwongo élübköré tye ka nïnö, piën nïnö onwongo ömakö wang-gi rwök. Gin ba ongeo ngö na myero ekob gïni both Yecu.

41 Yecu odwogo wang më adek mérë, cë okobo nïgi nï, "Un pod önnö éka iyweo unu? Dong örömö! Caa dong örömö. Wod ka Dhanö dong émiö ökö i cing ébal."

42 Yaa unu malö! Eru ecidhu! Nën, dhanö na bino

ketho örörö i koma dong cwök!"

Ëmakö Yecu

43 Cucüth na Yecu onwongo pod twak, Yuda, ngat acël i kin élübkör Yecu apar ariö, othuno kï lwak n'omakö gïni pele abadë éka kï ludhi, n'elamdhök na dito, epwony cik ka Muca éka edong ènë oorogi.

44 Won örörö onwongo otyeko dong yübö anyuth ködgï nï: "Ngat na an abino nödhö leme, èn ènöñ, mak unu èn éka iter igwök unu na bér."

45 Yuda öcakö cïdhö ökö cucüth both Yecu éka okobo nï, "Apwony!" Cë önödhö leme.

46 Gin dong öcakö podho i kom Yecu, éka emakö èn.

47 Éntö dhanö mörö acël n'onwongo ocung i nget Yecu öcakö wödhö pala abadë mérë, cë otongo kï ith atic k'Alamdhök na Dit naka onguno ökö.

48 Yecu openyogï nï, "Ibino unu botha kï pele abadë éka kï ludhi më maköna calö an abedo ayak?"

49 Nïnö kï nïnö an abedo kodwu i dyekal öt k'Obanga nakun apwonyo, ngö n'ocerowu maköna? Éntö jami ni kibëc tye ka timëré më cobo ngö na Cöc na Leng kobo i koma."

50 Cë élübkör Yecu kibëc öwëkögï èn éka öngwëcö gïni ökö.

51 Awobi mörö n'orwao böngü kékén i kome, onwongo tye ka lübö kör Yecu. Í karë na lwak ötëmë më makö èn,

52 awobi ni omukere ki ngwec cë öwëkö böngü mérë i cing-gi éka öngwécö kotula.

Yecu i nyim athuko më öd okiko k'edong

53 Gin otero Yecu both Alamdhök na Dit, éka élamdhök na dito kibec, edong éka epwony cik ka Muca obino gini kanya acel.

54 Petero obedo ka lübö kör Yecu ki cecen naka othuno ködë i dyekal k'Alamdhök na Dit. Én obedo kanya acel k'ékürpiny, nakun oo mac.

55 Élamdhök na dito, éka athuko më öd okiko k'edong kibec onwongo tye gini ka rangö caden mörö na römö miögï neko Yecu. Entö ba onwongo gini gin mörö.

56 Ecaden na pol obedo ka twakö köp twodo i kom Yecu entö köpgi ba örwatérë.

57 Më ajiki mérë, jö nökënë öya malö cë ötwakö gini caden më twodo ni.

58 "Wan ewinyo én tye ka kobo ni, 'An abino muko öt k'Obanga ni n'eyübö ki cing dhanö, éka abino gérö nökënë pi nínö adek, na ba égérö ki cing dhanö.'

59 Kadi bed nü kömanön, köp më caden na gìn ötwakö ba örwatérë.

60 Alamdhök na Dit öya malö cë ocung i dyeregí éka openyo Yecu ni, "Eyo, in ba itwérö gamö köp ni kibec? Ngö na in itwérö kobo i kom gin n'ekobo i komi?" 61 Entö Yecu öling alinga ba ögamö. Cë Alamdhök na Dit döki openyo én ni, "In én ibedo Meciya, Wod k'Obanga n'ewörö?"

62 Yecu okobo ni, "An énë én. Éka ibino nénö unu Wod ka Dhanö n'obedo i net cing Won Twér kucem éka döki tye ka bino ki i pöl më polo."

63 Alamdhök na Dit öyecö böng mérë éka okobo ni, "Pingö onu pod döki émitö caden nökënë?

64 Un iwinyo unu kite na én öyanyö k'Obanga ködë. Ithamö unu nüngö ié?"

Gin kibec öngölö ni, "Én opore më thöö!"

65 Jö nökënë öcakö ngülö laö dhögï i kome, nakun eumo wangë ökö cë ebapö, n'ekobo nínë ni, "In ibedo adwarpiny, tuc nüwa!" Éka ekürpiny ökwanyö Yecu cë epwodo.

Petero ökwérö Yecu

66 Í karë n'onwongo Petero tye piny i dyekal, atic k'Alamdhök na Dit mörö n'obedo nyakö obino.

67 Í karë na én önenö Petero tye ka oo mac, én öripö Petero na cwök éka okobo ni, "In thon onwongo itye ki dhanö nön n'öya ki i Najaret, én Yecu."

68 Entö Petero ökwérö ökö na kobo ni, "An ba angeo ngö na in itye ka twakö," cë öcidhö ökö yo dhö wangkac, éka thwön gwénö öcakö kok.

69 Í karë na nyakö nön n'obedo atic önenö Petero ocung kunön döki, én öcakö kobo both jö nökënë ni, "Ecwo ni obedo awodhgï acel!"

70 Entö Petero ökwérö ökö döki.

Kinge na nönök jö mökö n'onwongo ocung gini i net

Petero öcakö kobo gini nü, "Adyer in ibedo awodhgï acël, piën in ibedo dhanö më Galilaya."

⁷¹ Petero öcakö alem i kome kënë nakun kwongere nü, "An ba angeo ècwö ni na un itye ka twakö köp i kome"

⁷² Ëka cüçüth thwön gwëñö okok wang më ariö. Cë Petero opo i köp na Yecu okobo nünë nü, "Na bara thwön gwëñö okok wang ariö, in ibino kwërona wang adek." Ëka Öcakö koko rwök.

15

Yecu i nyim Pilato

(Matayo 27:1-2; 11-14;
Luka 23:1-5; Jon 18:28-38)

¹ Keko cön, élamdhök na dito, mëd k'edong, epwony cik ka Muca, ëka athuko më öd okiko k'edong kibëc öyübü gini köp kanya acël. Gin otweo Yecu cë etero ökö ëka émiö both Pilato.

² Pilato öcakö penyo Yecu nü, "In enë rwoth k'Eyuda?"

Yecu ögamö nü, "Eyo, obedo kite na in ikobo ködë."

³ Élamdhök na dito odotho Yecu kï kwa adoth na pol.

⁴ Cë Pilato dökü openyo Yecu nü, "In ba itwëro gamö peny? Nën lwak köp na pol nedothi ködë."

⁵ Ëntö Yecu ba ögamö gin mörö, ëka Pilato obedo kï ur rwök.

Ëngölö köp më thöö nü Yecu

⁶ Ì karë më Karama më Poth kibëc, Pilato onwongo marö gönyö amabuc acël na lwak nwongo ökwaö.

⁷ Ì karë nön, ècwö mörö onwongo tye na nyïngë Baraba, na yam etweo i buc i kin jö n'øjëm n'oneko gini jii i karë më jëmgï nön.

⁸ Lwak öcakö cïdhö both Pilato më penyo en ek ötim kite na en önaa timö ködë.

⁹ Pilato openyogi nü, "Un imitö nü agöny niwu rwoth k'Eyuda?"

¹⁰ Pilato okobo nü kömanön piën en onwongo ongeo nü élamdhök na dito okelo gini Yecu pi nyeko.

¹¹ Ëntö élamdhök na dito öcupö gini lwak ek ömii Pilato ögöny Baraba nakaka Yecu.

¹² Pilato öcakö penyogi nü, "Ngö na myero an atüm ki ngat na un icwodo nü rwoth k'Eyuda?"

¹³ Lwak öwöö gini nü, "Gur en i kor yath aria!"

¹⁴ Ëka Pilato dökü openyogi nü, "Pïngö kara, ötimö ngö na rac?"

Ëntö lwak öwöö gini kï redo rwök nü, "Gur unu en ökö i kor yath aria!"

¹⁵ Pilato onwongo mütö yomo cwiny lwak, cë ögönyö Baraba niigë. En ömii twëro nü ek epwod Yecu kï del éka egur i kor yath aria.

Acikari önywarö Yecu

¹⁶ Acikari otero gini Yecu naka i dyekal k'alöc (n'ecwodo nü Praitorion) ëka ocwodo gini lwak acikari kibëc kanya acël.

¹⁷ Gin öcakö ruko Yecu kï böngü na kwar éka etweo tok öküdhö öthac, cë érwakö i wie.

¹⁸ Cë gin öcakö motho en nü, "Örëm ba, rwoth k'Eyuda!"

¹⁹ Acikari opwodo gïni wi Yecu kï lüth, öngülö gïni laö dhögï i kome, éka orumo gïni cöng-gï pïny më wörö én më anywar.

²⁰ ï karë na gïn dong önywarö Yecu, ökwanyö gïni böngü na kwar ökö kï i kome éka édwökö böng mérë i kome. Cë gïn dong otero Yecu yökö ek egur i kor yath aria.

Eguro Yecu i kor yath aria

²¹ Écwö mörö më Cirene na nyïngë Cimon apap k'Alegijanda éka Rupo, onwongo tye ka wok nakun öya kï kin pacö éka acikari ödiö én më tingo yath aria.

²² Gïn otero Yecu i kabedo n'ecwodo ni Gölgötha, na tyen köp mérë ni, "Kabedo më Cogo Wic."

²³ Cë acikari öcakö miö Yecu köngö ölök n'erubo kï yath müra,* éntö Yecu ökwérö madhö ökö.

²⁴ Gïn oguro Yecu i kor yath aria éka opoko gïni böng mérë i kin-gï nakun ebolo kwir ek énen böngü na ngat acélacél bino tero.

²⁵ Eguro Yecu i kor yath aria caa adek më kodiko.

²⁶ Gin n'écöö na nyutho köp n'edotho én iie kwanerë ni, "RWOTH K'EYUDA."

²⁷ Eguro Yecu kanya acél k'eyak ariö, dhanö acél kucem éka acél kucam. ²⁸ Man ömiö Cöc na Leng ocobere kakaré ni, "Ekwanö én i kin ébal."†

²⁹ Jö n'onwongo tye ka wok i negete, obedo gïni ka yanyö éka nywarö Yecu,

nakun yengo wigï na kobo gïni ni, "Onye, in n'imuko öt k'Obanga ökö, cë Igérö pï nïnö adek kékén,

³⁰ larë keni, idhi pïny kï i kor yath aria!"

³¹ I kite acél nön, elamdhök na dito éka epwony cik ka Muca önywarö gïni Yecu i kingi kën-gï nakun kobo gïni ni, "En ölarö jö nökënë, éntö ba twérö larë kënë!

³² Wëk Kiricito, Rwoth më Icarael, oidhi pïny kï i kor yath aria, ek énen éka eyee." Jö n'eguro kï Yecu thon öcakö gïni yanyö én.

Thöö ka Yecu

³³ I caa abicél më kiceng, pïny ocido ökö na cöl nicuc i wi lobo kibec naka othuno caa abungwën.

³⁴ Éka i caa abungwën, Yecu öcakö koko kï dwön na malö ni, "Eloi, Eloi, lama cabaktani?" Na gönyö ni, "Obangana, Obangana, pïngö iwëka ni köman?"

³⁵ I karë na jö n'ocung na cwök owinyo, gïn okobo ni, "Winy unu, én tye ka cwodo Eliya."

³⁶ Écwö mörö acél öcakö ngwëc, éka ökwanyö amor, olutho i köngö ölök na wac, cë örëpö i wi yath atad éka ömiö both Yecu ni ek ömadhi. En okobo ni, "Kür unu, eru énen ka Eliya twérö bino kwanyö én ökö pïny!"

³⁷ Yecu dökï okok kï dwön na malö cë öthöö ökö.

³⁸ Cë böngü écengë na tye i öt k'Obanga öcakö yec

* **15:23** Müra obedo yath n'erubo kï köngö ölök n'emiö both dhanö n'eguro i kor yath aria më kweeno arem. † **15:28** Baibul nökënë ba cöö tyeng ni.

opokere ië arïö, kï malö naka piny.

³⁹ Adit acikari n'onwongo ocung na cwök i nyim Yecu, owinyo redo ka Yecu éka önenö kite n'othöö ködë, cë en okobo ni, "Adyer dhanö ni onwongo obedo Wod k'Obanga."

⁴⁰ Mon mökö onwongo tye gini kunön, nakun ripö gini kï cecen. Ki kin-gi onwongo obedo Maria më Magadala, Maria (aya ka Yakobo na tiidë éka Yoce), éka Calume.

⁴¹ Gïn obedo ka lübö kör Yecu anaka kï i Galilaya, éka gïn obedo ka könyö en thon. Mon nökënë na pol n'onwongo owothro ködë më bino i Jerucalem onwongo thon tye kunön.

Eiko kom Yecu i lyël

⁴² Onwongo obedo Nïnö më Yübëre (manön nïnö na Cabit k'Eyuda bara örömö.) Na dong piny cwök cido,

⁴³ écwö na nyïngë Yocepu më Arimethea obino, en onwongo obedo dhanö na dit më öd okiko, éka en onwongo kürö Ker k'Obanga më bino. En öcidhö both Pilato kï tek cwiny më kwaö kom Yecu.

⁴⁴ Pilato obedo kï ur më winyo ni Yecu dong öthöö ökö. En ocwodo adit acikari, cë openyo ka Yecu öthöö ökö.

⁴⁵ I karë na Pilato öniang kï both adit acikari ni ötimëre ni kömanön, en ömiö kom Yecu both Yocepu.

⁴⁶ Yocepu öwilö böngü na leng. Cë ökwanyö kom Yecu ökö piny kï kor yath aria, oboo i böngü, éka opyelo i

bur lyël n'egworo i kidi, cë ölöörö kidi i dhö bur lyël éka oloro dhögë ökö. ⁴⁷ Maria më Magadala éka Maria aya ka Yoce önenö gini kakwene n'onwongo eiko en ië.

16

Cer ka Yecu
(Matayo 28:1-8; Luka 24:1-12; Jon 20:1-10)

¹ I nïnö na lübö Cabit k'Eyuda, Maria më Magadala, Maria aya ka Yakobo, éka Calume öcidhö gini më wilö möö na ngwece kur ek ecidh gini më wiro kom Yecu.

² Kodiko cön i nïnö më acel më cabit, kinge na ceng dong odonyo, gïn öcidhö i lyël.

³ Gïn öcakö penyere gini kën-gi kï i wanga yoo ni, "Nga na bino thwaro ni onu kidi kï i dhö bur lyël?"

⁴ Entö i karë na gïn othuno, önenö gini lyël éka önenö gini kidi n'onwongo thwonë, dong ethwaro ökö thenge.

⁵ Na gïn dönyö i lyël, önenö gini awobi mörö n'oruko böngü na tar n'obedo kï kucem, éka obedo gini kï lworo rwök.

⁶ Entö en okobo ni, "Kür ibed unu kï lworo, un itye ka rangö Yecu më Najaret, n'onwongo eguro i kor yath aria. En ope kany! En ocer ökö kï kin jö n'othöö! Nen unu, kany ene onwongo epyelo kome ië.

⁷ Entö apë ek ikob unu n'elüböré éka Petero ni, 'Yecu bino télö nyimwu më cihö yo Galilaya. Ibino nénö unu

ën kï kunön, kite na yam ën okobo niwu ködë.”

⁸ Cë mon odonyo yokö kï i lyël, öcakö gïnï ngwëc kï myël kom éka lworo na ba okobo gïnï gin mörö both ngat mörö kékëن, piien lworo onwongo ömakögï rwök.

Yecu onen both Maria më Magadala

⁹ Ì karë na Yecu ocer kï i lyël kodiko cön i nïnö më acël më cabit, ën öcakö nen both Maria më Magadala, dhakö na ën onwongo öryëmö cene abirö kï i kome.

¹⁰ Èn öcidhö both élubkör Yecu n'onwongo tye ka kwero cöla éka kok gïnï.

¹¹ Èntö i karë na gin owinyo nü Yecu tye na kwö, éka Maria önenö ën, gin ba oyee köp méré.

Yecu onen both élubkörë ariö

¹² Kinge, Yecu onen both élubkörë ariö i kite na path n'onwongo gin tye ka cihö yo kin pacö.

¹³ Gin ödök cen më kobo both élubkör Yecu nökënë, èntö ngat mörö ope n'oye köpgï.

Yecu onen both élubkörë apar acël

¹⁴ Kinge, Yecu onen both élubkörë apar acël i caa n'onwongo gin tye ka cem. Èn ocokögï piien gin onwongo ope kï gen éka pii nwang cwinggi piien gin ökwérö yee köp ka jö n'önénö én kinge cer méré kï i kin jö n'öthöö.

¹⁵ Yecu okobo n'élubkörë nü, “Apë unu i wi lobo kibëc éka

itit unu Emuth na Bër both dhanö kibëc.

¹⁶ Dhanö mörö na bino yee éka ebatica ën, bino larë, èntö dhanö na ba bino yee, ebino ngölö nïnë köp.

¹⁷ Anyuth ni bino nen kï both jö na yee, gin bino ryëmö cene kï nyïnga. Gin bino twak kï lëb na nyen.

¹⁸ Gin bino makö thwol kï cing-gï, éka ka gin ömadhö gin mörö na neko dhanö, cë ba bino timögï na rac. Gin bino ketho cing-gï i kom etwoe éka bino cang gïnï.”

Yecu öidhö i wi polo

¹⁹ Kinge na Rwoth Yecu ötwak ködgï, ékwanyö cë etero i wi polo éka ën obedo i nget cing Obanga kucem.

²⁰ Cë élubkör Yecu öcidhö éka ötitö gïnï köp i kom Yecu i kabedo kibëc. Rwoth otio ködgï éka omoko köp méré k'anyuth n'ölübö körë.

Buk më Tic k'Ékwëna

*Köp na ut i Buk më Tic
k'Ékwëna*

Buk ni Luka ënë öcöö ëka obedo buk na lübö kör Emuth na Bér na ën öcöö. Bangere kanya écöö buk ni kí iie, éntö calö Emuth na Bér n'écöö both dhanö na pire tek n'ecwodo ni Teopilo. Jö nökënë thamö ni écöö i kin mwaka 63 AD, éntö jö nökënë thamö ni écöö kinge mwaka 70 AD.

Buk ni cakërë kí kanya Emuth na Bér jik iie kí dök ka Yecu i wi polo. Cé kobo kite n'ëkwëna ëka élübör Yecu nökënë obedo ka kürö gini ngö na Yecu öcikërë ködgü më cobo i Jerucalem. I nänö më Pentekot, kinge nänö apar na Yecu ödök ködë i wi polo, Típo Naleng obino i komgü ëka opongogü kí tekö. Cúcüth wel élübör Yecu öcakö mëdérë piiöpöi cakërë kí i Jerucalem naka i Camaria ëka "naka i ajiki lobo" (Cura 1:8).

Acaki më buk ni twakö köp i kom Petero ëka jö n'oye na tye i Jerucalem. Cakërë kí i cura 9 cih ködë anyim na lübérë kí woth k'akwëna Paulo gini wang adek yo lobo na dit më Roma ëka më cihö yo both adit öd pido më Roma.

Tic k'Ékwëna obedo buk na nyutho kanya jö n'oye Kiricito öcakërë kí iie ëka kí kite n'obedo ka döngö ködë, köp i kom cökërë ëka ayela, köp i kom nya mérë ëka tic na tek

na Típo Naleng otio i kwö ka jö n'oye Kiricito kibec ëka i kwö k'Akiricito acélacél.

Ëcikö pii bino ka Típo Naleng

¹ Adwong Teopilo, i bukna na cön, acöö iie köp kibec na yam Yecu öcakö tio ëka pwonyo,

² naka othuno i nänö n'etero ën ködë i polo, kinge miö cik kí tekö ka Típo Naleng both ekwëna mérë na yam öyérö.

³ Kinge can mérë, Yecu obedo ka nyuthere bothgi wang na pol më moko ni ën eut na kwö. Ën obedo ka nen bothgi pii nänö pyer angwén nakun twakö köp i kom ker k'Obanga.

⁴ I karë mörö acél, na ën onwongo tye ka cem ködgü, ën öcikögü ni, "Kür iya unu kí i Jerucalem, éntö kür unu pii mick n'Apapna öcikërë më miö, na un iwinyo unu an abedo ka twakö.

⁵ Jon yam obatica kí pii, éntö odong nänö na nönök na un ebino baticawu kí Típo Naleng."

Etingo Yecu i wi polo

⁶ I karë n'ëkwëna örwatérë gini kanya acél, openyo gini Yecu ni, "Rwoth, i karë ni ënë in ibino dwökö kí löt both jö më Icarael?"

⁷ Yecu okobo bothgi ni, "Ba obedo ni un myero inge karë onyo nänö n'Apap öyübö kí twër mérë.

⁸ Éntö ibino unu nwongo tekö, ka Típo Naleng obino i komwu, ëka un ibino bedo ecaden-na i Jerucalem, i

Yudea kibëc, i Camaria, éka i ajiki më lobo."

⁹ Kinge na dong okobo köp ni, etingo Yecu malö na gin thon nënö, éka pöl ökanö ën ökö kï i wang-gï.

¹⁰ Ékwëna ka Yecu onwongo öcikö wang-gï malö i pöl na ën tye ka cïdhö, athura cwö ariö ocung i ngetgï n'oruko gïni böng na tar.

¹¹ Gin okobo ni, "Un jö më Galilaya, pïngö icung unu nakun itye ka nënöunu malö i pöl? Yecu ni, n'etingo ökö malö i wi polo kï bothwu, bino dwogo dökü i yore nön acël na un ïnënö ën tye ka cïdhö ködë i wi polo."

Êyérö Matiya më leeno ka tyén Yuda

¹² Cë gin dong öcakö dök yo Jerucalem kï i wi kidi n'ecwodo ni Kidi më Jeituni, na cwöcwök kï Jerucalem, bor mërë röm kï woth më nïnö acël më Cabit k'Eyuda.

¹³ I karë na gin othuno, öcakö idhö gïni i öt na malö kanya gin onwongo bedo gïni ië cön. Jö n'onwongo ute gïni kany nön ëné Petero, Jon, Yakobo éka Anderiya, Pilipo éka Tomaci, Batulumayo éka Matayo, Yakobo wod k'Alipayo, Cimon na yam obedo i kin jö na mítö löckën, éka Yuda wod ka Yakobo.

¹⁴ Gin kibëc rïberë kanya acël jwijwi kï mon i lëga éka Maria aya ka Yecu, éka kï utmego mërë.

¹⁵ I karë nön Petero öya ocung i kin jö n'oye i kom Yecu Kiricito[†] (na welgi römö mia acël kï pyer ariö)

¹⁶ éka okobo ni, "Utmegona, Cöc na Leng myero ocoberé kakarë na yam cön Tipo Naleng ötwakö pïre kï i dhö Daudi i kom Yuda, n'obino ötëlo jö n'ömakö Yecu.

¹⁷ Yuda onwongo obedo dhanö acël i kinwa éka önywakö ködwa tic ni."

¹⁸ (Yuda obino öwilö pwodho kï ciliing na ën onwongo kï kom tïm mërë na rac, kanya ën opodho acelawic cë ië öbarë ökö éka jamië oukere yokö kibëc.

¹⁹ Kop ni owinyere both jö kibëc na bedo gïni i Jerucalem, éka pwodho nön ecwodo kï lëbgï ni Akeldama, na tyén kop mërë ni, "Pwodho më Remo.")

²⁰ Petero ömëdërë nakun kobo ni, "Kop ni écöö i buk më Jabuli,

"Wék unu pacö mërë ödök wi obur,
ngat mörö kür obed ië'
Éka dökü ni,

"Ngat nökënë olee tic mërë më têla."

²¹ Dong pi manön bér ëyér kï kin jö ni dhanö n'obedo kï onu i karë kibëc na Rwoth Yecu obedo ka wirë i kin onu,

²² cakérë kï i batica ka Jon naka i nïnö n'etero kï Yecu malö kï kin onu. Ngat mörö n'ebino yérö bino rïberë ködwa më bedo acaden më cer ka Yecu."

* **1:12** Bor mërë röm kï woth më nïnö acël më Cabit k'Eyuda Man obedo woth më nucu maïro. † **1:15** Lëb Girik tio kï utmego.

²³ Éka dong gïn otuco nyïng jö ariïö: Yocepu n'ecwodo ni Barçaba (n'ecwodo thon ni Yucito) éka Matiya.

²⁴ Cë gïn dong öcakö lëga ni, "Rwoth, in ingeo cwiny ngat acëlacël. Nyuth niwa kï kin jö ariïö ni ngat na in lyérö

²⁵ më bedo akwëna ëk oleet ni na Yuda öwëkö éka öcïdhö ödök cen i kabedo mëre."

²⁶ Cë gïn dong öcakö bolo kwir, éka kwir opodho i kom Matiya, émëdö en dong i kom ékwëna apar acël.

2

Bino ka Típo Naleng

¹ Í karë na nïnö më Pentekot örömö, élübör Kiricito kibëc onwongo ögürë gïni kanya acël.

² Athura wöö owinyere nakun öya kï i polo na calö yamö na kudho na ger éka opong i öt ökë kibëc kany onwongo gïn obedio ië.

³ Cë gin mörö onen bothgi na cal kï lëb mac n'opokere éka opye i wi ngat acëlacël i kin-gï.

⁴ Gin kibëc opong kï Típo Naleng éka öcakö gïni dhümö lëb nökënë na papath kite na Típo Naleng ömïögï më twakö.

⁵ Í caa nön, onwongo Eyuda na bedo gïni i Jerucalem, jö n'onwongo wörö gïni Obanga n'öya kï i rok kibëc na tye i wi lobo thükü.

⁶ Í karë na gin owinyo wöö nön, lwak kibëc ögürë na wigï ocung ökë, piën ngat acëlacël

onwongo winyogï ka twakö gïni lëb thurgï kikome.

⁷ Cë ouro gïni rwök nakun kobo gïni ni, "Jö ni kibëc na tye ka twak gïni ba obedio jö më Galilaya?

⁸ Cë pïngö onu kibëc etye ka winyogï nakun ngat acëlacël tye ka twak kï lëb thurgï kikome?

⁹ Wan jö më Parithia, jö më Media, jö më Elam, kï jö na bedo i Mecopotamia, Yudea kï Kapadokia, Ponto éka Acia,

¹⁰ Perugia kï Pampulia, Ejip kï lobo Libia na cwök kï Cirene, kï wele n'öya gïni kï i Roma

¹¹ na gin Eyuda kï jö nökënë n'ölökérë gïni i diniwa, Kurete kï jö Arab, wan ewinyogï ka tuco gïni pi tic na döngö më twëro k'Obanga i lëb onu kikome."

¹² Gin kibëc ouro na ba twëro gïni niang. Gin openyere kën-gï ni, "Man körë nïngö?"

¹³ Èntö jö nökënë okobo köp më anywar i komgi nakun kobo gïni ni, "Jö ni ömér améra kï köngö."

Köp na Petero ötwakö i nïnö më Pentekot

¹⁴ Cë Petero ocung kanya acël k'ëkwëna apar acël, ötwak kï dwön na malö nakun kobo bothgi ni, "Un Eyuda ewodha, éka un kibëc ni bedo unu i Jerucalem, bër inge unu köp ni, dök içik ithwu më winyo twak na mëga.

¹⁵ Jö ni ba ömér kite na un ithamö ködë, piën caa pod adek kékën më kodiko.

16 Ëntö man köp na yam adwarpiny Joel ötwakö pирё nakun kobo nü,

17 " 'Obanga okobo nü, i karë më ajiki,
abino önyö Tipona i kom jö kibec.

Ëthinö awopewu éka anyi-rawu bino dwarz adwar,

awopewu na thinö bino nénö gini gin anyutha,
jöwu n'otii bino gini leko lek.

18 Naka thon eticna, na cwö
éka mon,
an abino önyö Tipona i
komgï i karë nön,
éka gini bino dwarz adwar.

19 An abino nyutho gin më
aura i wi polo malö
éka anyuth na papath
piny i wi lobo,
remo, mac, éka iro na
dung.

20 Ceng bino cido ökö na col
cuc,
éka dwe bino lökérë dökö
na kwar calö remo,
na bara nänö na dit
éka nänö më dheo ka
Rwoth obino.

21 Éka jö kibec na bino cwodo
nying Rwoth bino larë."

22 Petero ömädérë anyim
nakun kobo nü, "Un jö më
Icarael, winy unu köp ni:
Yecu më Najaret onwongo
obedo dhanö n'Obanga
onyutho bothwu kï tio tango,
gin më aura, éka anyuth
n'Obanga otio kanya acel
ködë i kin onu, na calö un
kikomwu ingeo."

23 Yecu ni émiö bothwu kite
na yam Obanga onwongo
öyübü nakun ngeo gin na

bino türerë i anyim, éka un
iguro en i kom yath aria,
ineko unu kï cing jö na ba
ngeo cik k'Obanga.

24 Ëntö Obanga ocero en
ökö kï i kin jö n'othöö nakun
gonyö en ökö kï kom arem më
thöö, piën thöö onwongo ba
twëro moko i kome.

25 Daudi okobo köp i kome:
" i karë kibec an anenö nü
Rwoth tye köda.
Piën en tye i cinga kucem,
an ba abino yengara.

26 Pi manön cwinya yom éka
thon lëba twak kï yom
cwiny,
koma thon bino bedo kï
gen,

27 piën in ba ibino wëkona i
kin jö n'othöö,
onyo ba ibino wëkō
Dhanöni Naleng töp.

28 In inyutho nina yoo na tera
i kwö,
in ibino miöna abedo kï
yom cwiny i nyimi."

29 Petero ömädérë anyim
nakun kobo nü, "Utmegona,
myero akob bothwu köp i
kom kwarö onu Daudi atir
ni yam en öthöö ökö éka eiko
kome, éka etye kï lyené both
onu kany naka tin.

30 Ëntö en yam onwongo
obedo adwarpiny, dök ongeo
ni Obanga yam okwongo
kwong bothe ni ebino ketho
dhanö mörö na tye i kin ekwaë
mëre më bedo i then më lög
mëre.

31 En yam önenö gin na
bino türerë i karë më anyim,
éka ötwakö köp i kom cer ka
Meciya, ni en onwongo ba

ëwëkö i kin jö n'öthöö, kome thon ba ötöp.

³² Man énë Yecu n'Obanga ocerö ökö, onu kibëc ebedo ecaden i kom köp nön.

³³ Etingo én malö i nget cïng Obanga kucem, ögamö Típo Naleng na Yam écikö ki both Apap éka öonyö i komwa gin na dong un itye ka nénö ki wangwu éka thon iwinyo unu ki ithwu.

³⁴ Piën Daudi Yam ba öcidhö i polo, éntö én okobo ni,
“Rwoth Obanga okobo both

Rwodha:

“Bed i cinga kucem

³⁵ naka ka abino miö langni dökö gin më theno tyeni.”

³⁶ “Pí manön myero jö më Icarael kibëc onge gini rwök ni Obanga otyeko ketho Yecu ni, na un iguro i kor yath aria, më bedo Rwoth éka Kiricito.”

³⁷ Í karë na jii owinyo köp ni, ödonyö i cwinygi rwök, cë openyo gini Petero éka ékwëna nökënë ni, “Utmegowa, ngö na myero wan etim?”

³⁸ Petero ögamö ni, “Ngut unu ek ebaticawu, ngat acélacél ki kinwu, i nyïng Yecu Kiricito ek etim kïca i kom bal na mewu. Éka ibino unu gamö miç ka Típo Naleng.

³⁹ Piën cikérë ni écikö pírwu k'ëthiñowu éka pi jö kibëc na tye gini kanya bor, na Rwoth Obanga onu bino cwodogï.”

⁴⁰ Cë Petero ömëdérë ki titö köp nökënë na pol nakun dwekogi ni, “Larë unu kenwu iya unu ökö ki kom wang rok n'öbal ni.”

⁴¹ Éka jö n'oyeo köp na én okobo bothgi, ebaticagi éka

ömëdérë i nönö nön jö na römö elip adek.

Gürë ka jö n'oye

⁴² Jö n'oye kibëc ömirë këngi më winyo pwony k'ëkwëna, gürë kanya acél, pokö i ogati, éka lëga.

⁴³ Ékwëna obedo tino tango éka anyuth na pol, naka jö kibëc lworo ömakögü.

⁴⁴ Jö n'oye onwongo cökérë gini kanya acél, nakun nywakö gini jami kibëc kanya acél.

⁴⁵ Gin öcadhö lönyögü éka jamigü, cë gin opoko both jö kibëc ki i kin-gü kite na miti ka ngat acélacél tye ködë.

⁴⁶ Gin ömëdérë më gürë kanya acél nönö kibëc i dyekal öt k'Obanga nakun pokö gini i ogati ki i pecigi, n'ëcamö ki yom cwiny éka ki cwiny na bér,

⁴⁷ n'ëpakö Obanga, na dhanö kibëc pwöyögü, éka Rwoth obedo ka mëdö bothgi jö n'ölarë nönö ki nönö.

3

Petero Öcangö angwalo

¹ I nönö mörö acél, Petero éka Jon öcidhö gini i öt k'Obanga i caa më lëga, caa abungwën më kothyeno.

² Onwongo tye dhanö mörö n'ongwal cakérë i karë n'enywölö én ködë, n'etingo atinga i wangkac më Öt k'Obanga n'ecwodo ni Wangkac na Bér, ek ökwa köny nönö ki nönö ki both jö na dönyö i Öt k'Obanga.

³ Í karë na ën önenö Petero éka Jon tye ka dönyö gini, angwalo ökwaögï ciliing.

⁴ Petero éka Jon öcikö wanggi i kome. Cé Petero okobo nineni, "Nénwa!"

⁵ Angwalo oketho cwinye më nénögï, nakun geno ni ebino miönë gin mörö.

⁶ Ëntö Petero okobo ni, "An ba atye kï lüm mörö, Ëntö an amii ngö na an aute ködë. Í nyïng Yecu Kiricito më Nájaret, yaa malö icak woth."

⁷ Cé Petero ömakö cïng angwalo më kucem éka otingo ën malö, cé cüçüth odon tyenë ödökö na tek.

⁸ Angwalo opye kï tyenë éka öcakö woth. Cé ödonyö ködgï i Öt k'Obanga nakun wotho, pye, éka pakö Obanga.

⁹ Í karë na jii kibëc önenö angwalo ka wotho éka pakö Obanga,

¹⁰ gin öniang ni ënë dhanö na yam kwaö köny kï i wangkac më Öt k'Obanga n'ecwodo ni Wangkac na Bér. Gin obedo kï ur rwök i kom ngö n'ötimérë i kome.

Petero ötitö köp i tyen öt ka Colomon

¹¹ Gin kibëc öngwëcö kanya acël kï ur i tyen öt ka Colomon, kanya angwalo onwongo omoko i kom Petero éka Jon.

¹² Í karë na Petero önenö köp ni, ën okobo bothgi ni, "Un jö më Icarael, ngö na miowu iuro unu ngö n'ötimérë? Pïngö un itye ka riþowa kömanön calö wan ënë etimö kï tékowa onyo kite na

wan elworo k'Obanga ködë ënë ömiö angwalo ni owoho?

¹³ Obanga k'Abraam, Icaka éka Jakob, Obanga ka kwerewa, oketho dheo mérë i kom atic mérë Yecu. Un imiö i cïng Pilato ek enek ën nakun ikwérö unu ökö i karë na Pilato mitö gönyö ën.

¹⁴ Un ikwérö Ngat na Leng éka na kite Atir, cé ikwaö unu ni ek egony niwu dhanö n'obedo anek.

¹⁵ Un ineko ngat na miö kwö, Ëntö Obanga ocero ën kï i thöö. Éka wan ënë ebedo ecaden më köp ni.

¹⁶ Pi yee i nyïng Yecu, ënë ömiö ècwö ni onwongo tékö kite na un ïnënö éka ingeo. Obedo nyïng Yecu éka yee i kome ënë ömiö ën öcang i nyimwu kite na un kibëc itye ka nénö ködë.

¹⁷ "Kobedini dong utmegona, an angeo ni yam itimö unu köp ni i karë më kwia piny, kamë etélawu.

¹⁸ Ëntö kite na yam Obanga ötwak kï i dhö edwarpiny kibëc ni Kiricito mérë myero ölim can, éka dong ocobere kakarë ni kömanön.

¹⁹ Ngut unu dong, éka ilökérë unu both Obanga, ek balwu ejwa ökö,

²⁰ ek karë më yweo na yaa kï both Rwoth obin bothwu, éka ën bino oro Yecu, na ënë Meciya n'eyérö niwu.

²¹ Ën myero obed i polo naka ka karë örömö n'Obanga bino dwökö jami kibëc kakarë, kite na yam ën öcikérë ködë k'edwarpiny mérë na leng.

²² Muca yam okobo nü, 'Rwoth Obangani bino oro adwarpiny mörö niwu, na bino yaa ki i kin utmegowu kite na en oora ködë. Un ibino winyo unu eni köp kibec na en bino kobo niwu.

²³ Ngat mörö na ba bino winyo en, ebino rwenyo wangë ökö ki kin jö thurgi.'

²⁴ "Cakérë ki i kom adwarpiny Camuel, edwarpiny kibec ötwakö köp i kom ngö na tye ka tümérë i kom karë ni.

²⁵ Un ibedo ekwaë k'edwarpiny nön, éka un ene ekethowu i cikérë k'Obanga both kwerewu. Piën Obanga okobo both Abraam nü, 'Rok kibec më wi lobo bino nwongo gum ki both ekwaeni.'

²⁶ I karë na dong Obanga oketho atic mérë, en öcakö oro bothwu ek ömiliwu gum na miö ngat acelacel lökérë wékö tümö bal."

4

Petero éka Jon i nyim athuko më öd okiko k'edong

¹ I karë na Petero éka Jon onwongo tye ka twak gini ki jii, elamdhök éka adit acikari më öt k'Obanga éka Ecadukayo obino gini bothgi.

² Ètela ni onwongo öngö gini ni Petero éka Jon onwongo tye ka pwonyo jii ni, ki twér më nyïng Yecu, jö n'öthöö bino cer gini ökö.

³ Gin ömakö Petero éka Jon cë ekethogi i buc naka othuno kodiko, piën piny onwongo ocido ökö.

⁴ Èntö jö na pol n'owinyo köpgi oyee, éka wel jö n'oye

Yecu n'obedo gini cwö ömëderë othuno elip abic.

⁵ Kodiko mérë na piny dong oru, eloc éka edong, k'epwony cik öcökérë gini i Jerucalem.

⁶ Anac Alamdhök na Dit onwongo tye kany nön, éka Kayapa, Jon, Alegijanda, éka jö kibec na tye gini i dholokek k'Alamdhök na Dit.

⁷ Gïn okelo Petero éka Jon i nyimgi nakun penyogi ni, "Koth tékö mënë na un itye ka tic ködë onyo ki nyïng nga?"

⁸ Cë Petero, opong ki Típo Naleng éka okobo bothgi ni, "Un eloc éka edong ka lwak!"

⁹ Ka tin ipenyowa unu köp i kom tic na bér n'ötímérë i kom angwalo éka kite na en öcang ködë,

¹⁰ cë dong un kibec éka jö më Icarael myero inge unu ni, pï nyïng Yecu Kiricito më Najaret na un iguro i kom yath aria, n'Obanga ocero ökö ki i kin jö n'öthöö, ene ècwö ni ocung i nyimwu n'öcang ökö.

¹¹ Ènë obedo
"kidi na un egido ikwérö unu ökö,

n'ölökérë ödökö kidi na pire tek më gwic öt."

¹² Larë ope both ngat mörö nökënë, piën Obanga ba ömio nyïng mörö nökënë i lobo kany both dhanö na myero onu élarë ködë."

¹³ I karë na jö na tye i öd athuko önenö gini tek cwiny Petero éka Jon cë öniang gini ni gin onwongo obedo jö na ba ökwanö éka ba ngeo gini gin mörö. Obedo gini ki ur éka öniang gini ni cwö ni yam obedo kanya acel ki Yecu.

¹⁴ ŋentö ka gïn önenö ècwö n'ögang ocung i ngetgi, köp mörö na gïn myero okobi ölöögï ökö.

¹⁵ Ëka ècikögï më dönyö yökö kï i athuko më öd okiko k'edong, cë öcakö gïni yübü köp kën-gï,

¹⁶ nakun kobo gïni ni, "Ebino tïmö jö ni nïngö? Jö kibëc na bedo gïni i Jerucalem otyeko ngeeno ni gïn otio anyuth na kome nen, na onu ba ètwëro kwëro.

¹⁷ ŋentö më jükö èk kür ökëth öröm kin jii, bér ècikgï èk kür ömëderë gïni më kobo nyïng ni both ngat mörö kékën."

¹⁸ Cë ecwodogï më dwogo cen, Ëka ècikögï ni kür ötwak onyo opwony gïni köp mörö kï nyïng Yecu.

¹⁹ ŋentö Petero Ëka Jon ögamö gïni ni, "Un ïngöl köp kenwu ka cë nen na bér i wang Obanga më winyowu na lõö winyo Obanga,

²⁰ piën wan ba ètwëro wëkö kobo gin na yam wan ènënö Ëka ewinyo."

²¹ Kinge bürogï, cë gïn öwëkögï öcidhö, gïn ba onwongo yoo më ketho pwod i komgi, piën jii kibëc onwongo pakö gïni Obanga pii ngö n'ötimëre.

²² Dhanö na tango më cangö ötimëre i kome, onwongo mwaka mërë kadhö pyer angwën ökö.

Lëga ka jö n'oye

²³ Cüçüth n'ögonyögï, Petero Ëka Jon ödök gïni both jö n'oye nökënë Ëka okobo nïgi ngö

n'elamdhök na dito èka edong okobo gïni.

²⁴ Ì karë na gïn owinyo köp ni, jö n'oye kibëc okok gïni kanya acël kï dwön na malö më lëga both Obanga na kobo gïni ni, "Rwoth Obanga won twër, in iketho polo kï lobo èka nam kï jami kibëc na tye ië,

²⁵ cön itwak kï dhö kwaröwa Daudi n'obedo aticni kï tækö ka Típo Naleng n'okobo ni, "Pïngö erok wöö gïni kanya acël,

ëka pïngö rok na pol yübü köp na köny mërë ope?

²⁶ Rwothi më lobo yüberë gïni pii lwëny,
ëka élöc cökëre kanya acël
i kom Rwoth
ëka i kom Ngat n'ewiro.'

²⁷ Adyer Erode Ëka Pontio Pi-lato k'Erok Ëka jö më Icarael ögürë gïni kanya acël i pacö ni i kom aticni Yecu na leng na in iwiro.

²⁸ Gin ötimö ngö na tæköni Ëka mitini omoko ni bino tïmëre.

²⁹ Ëka kobedini Rwoth Obanga, winy büragï Ëka imiiwa eticni, èk etit köpni kï tæk cwiny.

³⁰ Ryë cingi më cangö jii, èk anyuth më tango Ëka gin më aura na pol ötimëre kï nyïng aticni Yecu na leng."

³¹ Kinge na dong ölegö gïni, kabedo na gïn ögürë ië oyengere. Ëka gin kibëc opong kï Típo Naleng, cë ötitö gïni köp k'Obanga kï tæk cwiny abonge lworo mörö.

Jö n'oye önywakö gïni jamigï

³² Jö n'oye kibëc onwongo nöthëre kï gïni kanya acël i

cwiny éka i thama. Ngat mörö ope na kobo ni gin na én etye ködë onwongo obedo mögë, éntö gin önywakö jami kibec na gin onwongo tye ködë.

³³ Ékwëna ömèdérë gini më miö caden më cer ka Rwoth Yecu ki tékö rwök, éka gum na thwönë opodho i komgï kibec.

³⁴ Onwongo ngat mörö ope na gin mörö orem bothe, piën jö n'onwongo tye ki pwothigï onyo udigi öcadhö gini ökö, éka okelo gini lüm n'oya ki ië,

³⁵ cë ömiö gini both ékwëna éka më pokö both ngat acélacél kite na mitérë ködë.

³⁶ Kömanön Yocepu n'obedo Alebi më Caiprac, n'ekwëna cwodo ni Baranaba (na thérë ni, "Wod k'ajing cwiny jö").

³⁷ Ën öcadhö pwordho mérë na én onwongo tye ködë éka okelo ciliing both ékwëna.

5

Anania éka Capira

¹ Éntö écwö mörö onwongo tye na nyängë Anania n'öcadhö pwordho gin ki dhakö mérë Capira.

² Ën okelo nget lüm mörö both ékwëna éka ökanö lüm nökënë nakun dhakö mérë thon ngeo.

³ Cë Petero okobo bothe ni, "Anania, pïngö Catan openg i cwinyi, ömiö itémö bwölö Típo Naleng nakun ikanö nget lüm mökö n'oya ki ipwordho?"

⁴ Pwordho nön onwongo ba obedo megi n'onwongo bara icadhö? Éka kinge na dong icadhö ökö, onwongo ciliing nön ba tye i twéröni? Ngö n'omii ithamö më tímö koth

gin-ni? In ba ibwölö dhanö éntö ibwölö Obanga."

⁵ I karë n'Anania owinyo köp ni, én opodho piny éka öthöö ökö cüth. Cë thwön lworo ömakö jö kibec n'owinyo ngö n'ötimérë.

⁶ Cë éthinö awope obino gini anyim, eboo kome ki böngü, elabö yokö éka eiko.

⁷ Kinge caa adek, dhakö mérë obino i öt, nakun ba ngeo ngö n'ötimérë.

⁸ Petero openyo én ni, "Kob nina, man éné wel na un k'Anania inwongo unu ki cadhö pwordhowu?"

Ën ögamö ni, "Eyo, wel mérë énön."

⁹ Petero okobo nünë ni, "Un itwérö riberë kanya acél më bwölö Típo ka Rwoth ningö? Nén, kör tyen jö n'oiko cвори tye i dholokek, in thon ebino laböni yokö."

¹⁰ I caa nön cüçüth én opodho i ka tyen Petero cë öthöö ökö. Cë éthinö awope nön obino ödonyö i öt éka önenö gini ni én öthöö ökö, gin otengo éka elabö eiko i nget cwörë.

¹¹ Thwön lworo ömakö jö n'oye Kiricito kibec éka jö kibec n'owinyo ngö n'ötimérë.

Ékwëna öcangö jö na pol

¹² Ékwëna otio gini anyuth më tango éka gin më aura na pol i kin jii. Éka jö n'oye Yecu kibec onwongo marö gini riberë kanya acél i tyen öt ka Colomon.

¹³ Éntö ngat mörö ope n'öparö më riberë ködgü, kadï

bed ni jii onwongo wörögï rwök.

¹⁴ Cë jö n'oye Rwoth welgi ömädérë, cwö éka mon.

¹⁵ Na calö adwogi më tic k'Ekwëna, jii okelo etwoe i wanga yoo cë epyelogi i wi étana éka i kom ökëka gini, ek ka Petero wok i ngetgi, tipo mérë owok i kom jö mökö ki kin-gi.

¹⁶ Lwak thon öcökérë gini ki i peci n'ögürö Jerucalem nakun kelo gini etwoe éka jö na tipo na reco yelogi, cë gin kibec öcang ökö.

Eyelo Ékwëna

¹⁷ Cë Alamdhök na Dit éka jö na en tio ködë n'onwongo obedo gini dul k'Ecadukayo, nyeko ömakögi rwök.

¹⁸ Cë gin dong ömakö ékwëna éka ekethogi i buc.

¹⁹ Entö malaiaka ka Rwoth obino kiwor, öyabö dholokek më buc, éka okelo ékwëna yokö cë okobo nügi ni,

²⁰ "Apë icung unu i dyekal öt k'Obanga ek ikob unu ni jii köp më kwö na nyen ni."

²¹ I karë na gin owinyo köp ni cë ödönyö gini i dyekal öt k'Obanga na piny dong ruu éka öcakö gini pwonyo jii.

I karë n'Alamdhök na Dit éka jö na tio ködë othuno, gin ocwodo athuko më öd okiko k'edong k'Eyuda kibec, n'omädérë k'etëla ka jö Icarael. Cë gin ooro jö mökö i buc më kelo ékwëna.

²² Entö i karë na jö n'eorogï othuno i buc, onwongo gini ékwëna ope. Gin ödök cen éka okobo ni,

²³ "Wan enwongo dholokek më buc ocegere, n'acikari ocung gini yokö, entö i caa na wan eyabö dholokek, enwongo ngat mörö ope ié."

²⁴ I karë na dit acikari më öt k'Obanga éka elamdhök na dito owinyo köp ni, thamagi ocung ökö nakun uro gini kite na köp ni kibec bino thum ködë.

²⁵ Cë ngat mörö othuno éka okobo ni, "Cwö na un iketho i buc ocung gini i dyekal öt k'Obanga, tye ka pwonyo gini jii."

²⁶ I caa nön, adit acikari më öt k'Obanga éka jö na en tio ködë öciddö gini éka ekelo ékwëna. Gin ba otio ki tekö pién gin onwongo lworo ni jii twëro celogi ki kite.

²⁷ I karë n'ekelo ékwëna i nyim athuko më öd okiko k'edong, ek Alamdhök na Dit openygi.

²⁸ En okobo nügi ni, "Wan emiöwu cik na tek ek kür ipwony unu ki nyäng ni. Nen ngö na dong un itimö! Ibedo unu ka pwony i Jerucalem kibec, éka itye unu ka moko më miö remo ka ngat ni bedo i wiwa."

²⁹ Entö Petero éka ékwëna nökënë ögamö gini ni, "Wan myero ewiny Obanga na lös winyo dhanö.

³⁰ Obanga ka kwerewa ocero Yecu na un ineko nakun ingabö unu en i kor yath aria.

³¹ Obanga otingo en malö i nget cingë kucem i kabedo më dheo na calö Atëla éka Alar, ek jö më Icarael onwong gini

karë më ngut, cë ën ötüm nügi kïca i kom balgi.

³² Wan ebedo ecaden më jami ni éka Típo Naleng thon n'Obanga ömiö both jö na winyo ën."

³³ Ì karë n'edong më öd okiko owinyo köp ni, akëmò ömakögï rwök, cë öthamö gïni më neko ékwëna.

³⁴ Èntö Aparicayo n'ecwodo ni Gamaliel, n'onwongo obedo apwony cïk, na jïi kïbëc onwongo wörö, öya malö i nyim athuko më öd okiko k'edong éka ömiö twërö ni ék eter ékwëna yökö pï caa mörö na nönök.

³⁵ Cë ën öcakö twak ködgï ni, "Jö më Icarael, bér igwökëre unu i ngö na un imitö tïmö i kom jö ni.

³⁶ Ì karë mörö n'opoth angec, onwongo dhanö mörö tye na nyïngë Teyuda, n'oporo më bedo ngat mörö na pïrë tek. Jö na römö mia angwën obino öribëré ködë, èntö ebino eneko ën ökö, éka élübörë kïbëc obino ökëth gïni ökö cë manön obedo ajiki ka jami kïbëc.

³⁷ Kinge manön, Yuda më Galilaya thon obino i karë më kwanö jïi. Ën onwongo élübörë, èntö ebino eneko ën ökö, éka élübörë kïbëc obino ökëth ökö.

³⁸ Dong pï köp na tye kobedini, amiöwu thama ni, wëk unu jö ni öcïdh gïni, piën ka yüb ni onyo tic ni obedo më ka dhanö, cë bino jik.

³⁹ Èntö ka öya kï both Obanga, cë un ba irömö unu jükö jö ni, un thon ibino

nwongo ni itye ka lwënyunu k'Obanga."

Gïn ögamö thama ka Gamaliel

⁴⁰ éka ecwodo ékwëna i öt ek epwodgï nakun écikögï ni kür dökï ötwak gïni kï nyïng Yecu. Cë éwékögï öcïdhö.

⁴¹ Èkwëna öya kï i nyim athuko më öd okiko k'edong na cwinyi yom piën Obanga ökwanögï ni opore gïni më nwongo lewic pï nyïng Yecu.

⁴² Ninö kïbëc gïn onwongo ba kengo pwonyo éka titö köp më Emuth na Bér i dyekal öt k'Obanga éka öt kï öt ni Yecu énë Meciya.

6

Èyérö èköny tic abirö

¹ Ì karë nön na wel élübör Yecu onwongo tye ka mëdëré, Eyuda n'oyeo Yecu na twakö gïni lëb Girik öcakö gïni ngüngüta i kom Eyuda na twakö lëb Iburu, piën nïnö kïbëc ka epoko cem mon thöö na mëgi ba éparö pïrgï.

² Cë ékwëna apar ariö ocwodo gïni élübör Yecu kïbëc éka okobo gïni ni, "Wan ékwëna myero ebed i tic më titö köp k'Obanga ék kür ebed i tic më poko cem.

³ Pi manön utmegona, yér unu jö abirö kï kinwu n'ewörögï, n'opong gïni kï Típo Naleng éka tye gïni kï ryëkö. Wan ebino müögï tic ni.

⁴ Èntö wan ebino mire më lega éka titö köp k'Obanga."

⁵ Ngö na gïn okobo oyomo cwiny jïi kïbëc, éka gïn öyérö Citipwano, dhanö n'opong

ki yee éka ki Típo Naleng, éyérö thon Pilipo, Porokuro, Nikanori, Timon, Paramena, éka Nikolac n'obedo dhanö më Antioquia n'ölökérë i dini k'Eyuda.

⁶ Ekelo jö abirö ni i nyim ékwëna, n'ölégö nakun ketho gini cing-gi i wigü.

⁷ Cë köp k'Obanga ömëdëre më nya. Wel élübör Yecu ömëdëre rwök i Jerucalem, éka élamdhök k'Eyuda na pol oyee gini thon.

Emakö Citipwano

⁸ Citipwano, n'Obanga ömiö gum éka ki tükö, obedo ka tio gin më aura éka anyuth më tango i kin jii.

⁹ Entö i ninö mörö acël, jö mörö më cinagoga ka jö n'égonyögü ki i opii, kanya acël ki jö mökö më Cirene éka më Alegijandaria éka jö n'oya ki i lobo më Cilicia éka Acia, jö ni obedo ka pyem ki Citipwano,

¹⁰ entö gïn onwongo ba twëro pyem ki ryékö ka Citipwano éka ki Típo Naleng n'onwongo en twak ködë.

¹¹ Cë gïn öcakö cüpö jii i müng ek okob gini ni, "Wan ewinyo Citipwano twak nakun kobo köp më ayeny i kom Muca éka Obanga."

¹² Cë gïn othuro jii, edong éka epwony cik më dini. Éka emakö Citipwano cë ekelo en i nyim athuko më öd okiko k'edong.

¹³ Gïn okelo ecaden n'obedo gini etwodo n'okobo ni, "Karë kibec écwö ni twakö

köp na rac i kom kabedo na leng éka i kom cik ka Muca.

¹⁴ Wan ewinyo en ka kobo ni Yecu ni më Najaret bino balö kabedo ni* ökö éka bino lökö kit më kwö na yam Muca ömiöwa."

¹⁵ Jö kibec n'onwongo obedo gini i athuko më öd okiko k'edong öcikö wanggi i kom Citipwano, éka önenö gini terinyime na calö terinyim malaika.

7

Twak ka Citipwano

¹ Cë Alamdhök na Dit openyo Citipwano ka ngö n'ekobo i kome tye atir.

² Citipwano ögamö ni, "Utmegona ki jö ka bebena, winya unu! Obanga më dheo onen both kwarö onu Abraam n'onwongo en pod tye ilobo Mecopotamia, na en bara obedo i lobo më Aran.

³ Obanga okobo ninë ni, 'Yaa iwék loboni éka kakani, ek icidh i lobo na an abino nyutho nini.'

⁴ "Cë Abraam öya öwëkö lobo ka jö Kaladea éka öcidhö obedo i lobo Aran. Kinge na dong apap mëre öthöö, Obanga ooro Abraam i lobo ni kanya kobedini ikwö unu ië.

⁵ Entö Obanga ba ömiö en obedo ki gin mörö më alea kadi ki ngöm mörö na titidi. En öcikérë ködë ni lobo bino bedo mégé éka ékwaë mëre kadi bed éthinö mëre pod ope.

⁶ Obanga thon ötwak k'Abraam ni, 'Ekwaëni bino

* **6:14 Kabedo ni** Obedo Öt k'Obanga na tye i Jerucalem.

bedo wele i lobo na ba obedo mëgi, éka gin bino bedo opii n'ebino yelogi pi mwaka mia angwën.'

7 Ëntö Obanga okobo ni, 'Abino ketho pwod i lobo na gin bino tic ie kamë opii, éka i ajiki mérë gin bino donyo yokö ki i lobo nön éka wöra gin i kabedo ni.'

8 Cé Obanga ömio cikëre më lirë. Éka Abraam ödökö apap ka Icaka, en olirö Icaka i nänö më aboro kinge nywölö en. Kinge Icaka ödökö apap ka Jakob, éka Jakob ödökö apap ka jö apar ariö më kaka jö Icarael.

9 "Adinga obino ömakö ethinö ka Jakob i kom öminki Yocepu, éka öcadhö gini en na calö opii both jö më Ejip. Ëntö Obanga onwongo tye ki Yocepu

10 éka ölarö en ki kom can kibec. Obanga ömio Yocepu gum éka ryekö i nyim Parao rwoth më Ejip. Parao thon ömio Yocepu obedo alöc më Ejip éka pacö mérë.

11 "Cé kec obino opodho i lobo Ejip kibec éka lobo Kanaan, n'okelo thwon can, éka kwere onu onwongo ba twerö nwongo cem mörö.

12 Ì karë na Jakob owinyo ni cem tye i lobo Ejip, en ooro awope mérë n'obedo kwere onu i woth na mëgi më acel.

13 Ì woth na mëgi më ariö, Yocepu okobo both utmego mérë nga na en ebedo, éka Parao ongeo köp i kom wede ka Yocepu.

14 Kinge man, Yocepu okobo ni ek ekel apap mérë

Jakob éka jö më pacö mérë kibec, jö pyer abirop wie abic.

15 Cé Jakob öcidhö yo kupiny i lobo Ejip, kanya en éka kwere onu öthöö ie.

16 Kom lyenegi ebino edwongo cen i Cekem éka epyelo i bur lyel n'Abraam onwongo öwilö ki wel ciläng mörö ki both ethinö k'Amor ki i Cekem.

17 "Na calö karë onyingo na cwök n'Obanga myero ocob cikëre mérë both Abraam, wel jö onu ki i lobo më Ejip ömëderë rwök.

18 Cé rwoth nökëne, n'onwongo ba ngeo gin mörö i kom Yocepu, obino ödökö alöc më Ejip.

19 En ötimö tum na rac i kom jö onu, cé ömio kwere onu ölimö can na thwonë rwök nakun diögö më bolo ethinö na pod enywölö anywöla ek kür ökwö gini.

20 "Ì karë nön ene enywölö ki Muca, en onwongo obedo athin na leng both Obanga. Egwökö en pi dwethe adek i öt k'apap mérë.

21 Ì karë n'ebolo Muca, nyaka Parao ökwanyö en éka ögwökö na calö athin mérë.

22 Epwonyo Muca ki ryekö ka jö më Ejip kibec éka en onwongo tek i twak éka i tic mérë.

23 "Ì karë na dong Muca othuno mwaka pyer angwën, en öcakö thamö më cihö limö utmego mérë n'obedo ethinö më Icarael.

24 En önenö dhanö më Ejip acel ka tye ka makö dhanö më Icarael na rac, cé Muca öcidhö më könyö dhanö më

Icarael nakun cülö kwor ki neko dhanö më Ejip.

²⁵ Muca öthamö ni utmego mérë twérö ngeo gini ni Obanga onwongo tye ka tic ködë më larögï, éntö gïn ba dök önläng.

²⁶ I nñö na lübö manön, Muca obino onwongo jö më Icarael ariö tye ka lwény. Ën ötemö më thekogï nakun kobo ni, 'Ngö ni mitö unu wanérë ië nakun ibedo unu utmego?'

²⁷ "Éntö ngat n'onwongo ömakö awodhe na rac othwaro Muca thenge éka okobo nñë ni, 'Nga n'omii ni ibed alöc éka angöl-köpwa?'

²⁸ In imitö nekonä kite na woro ineko ki dhanö më Ejip ködë?"

²⁹ I karë na Muca owinyo köp ni, cë öngwécö ökö i lobo më Midian, kanya én obedo ië na calö arok éka önywölö éthinö awope ariö.

³⁰ "Kinge na dong mwaka pyer angwën opoth ökö, Muca onwongo tye i thim n'onwongo cwök ki Kidi Cinai, cë Obanga onen bothe na cal ki malaika i bunga na lyél.

³¹ I karë na Muca önenö gin nön, obedo ki thwön ur rwök éka öcidhö na cwök i ngete, cë owinyo dwön Rwoth Obanga na kobo ni,

³² 'An abedo Obanga ka kwereni, Obanga k'Abraam, Icaka éka Jakob,' cë kom Muca ömyël, lworo ömakö éka ba dök ödiö cwinye më nénö.

³³ "Cë Rwoth Obanga okobo both Muca ni, 'Göny wör ökö

ki i tyeni, kabedo na in icung ië ni obedo ngöm na leng.

³⁴ An dong anënö kite na joga tye ka lümö can ködë i Ejip, atyeko winyo kokogï, éka atye ka bino dong pïny më larögï. Bin dong ek aori idök cen yo Ejip.'

³⁵ "Man énë Muca na gïn obino ökwérö nakun kobo gini ni, 'Nga n'omiö ni in ibed alöc éka angöl-köp?' Obanga ororo Muca më bedo alöc éka alar nakun owok ki both malaika n'onen bothe ki i bunga.

³⁶ Muca ökwanyögï ki i lobo më Ejip nakun tímö gin më aura éka anyuth më tango i lobo Ejip, i Nam na Kwar éka pi mwaka pyer angwën i thim.

³⁷ "Man énë Muca n'okobo both jö më Icarael ni, 'Obanga bino oro niwu adwarpïny na cal köda ki kin jö na mewu.'

³⁸ Muca énë onwongo tye kanya acél ki jö më Icarael i thim ki malaika n'ötawak ködë ki i wi Kidi Cinai, éka ki kwere onu, cë ki kany nön Muca ögamö köp më kwö më köbö both onu.

³⁹ "Éntö kwere onu ökwérö gini winyo én. Gin ökwérö Muca éka ölökérë gini më dök cen i lobo më Ejip ki i cwinygï.

⁴⁰ Gin okobo both Aron ni, 'Yüb niwa obanga na bino télö nyimwa, pién Muca mörö ni, n'ötölo onu më yaa ki i lobo më Ejip, ba engeo ngö n'ötimérë bothe!

⁴¹ Manön énë karë na gïn öyübö ki cal jwök n'obedo calö athin thwön më awöra. Gin okelo tyergï both athin

thwön ni éka öcakö bedo gïni
kï yom cwinyï kom ngö na gïn
öyübö kï cïng-gï.

⁴² Entö Obanga ölokérë ökö
cë ömïögï karë më wörö cér
më polo na calö obangagï,
kite na yam écöö kädë i buk
k'edwarpïny nï,

"Un jö më öt Icarael, yam
ityérö unu gin aryéda
mörö më lee botha éka
mïc
pi mwaka pyer angwën
na un itye i thim?

⁴³ Pathï nï kömanön, un itingo
këma k'obanga Molek
éka cér k'obangawu
Repan,
cal jwogi na un iyübö më
awöra.

Pi manön an abino terowu
i opii naka i ngee Ba-
bilon.'

⁴⁴ Kwere onu yam tye kï
këma më caden i thim më
nyutho nï Obanga tye i kin-
gï. Gin öyübö i kite n'Obanga
onwongo onyutho nï Muca,
na lübérë kï kite na én önenö
kädë.

⁴⁵ Kinge, kwere onu ögamö
këma éka obino gïni kï Yocua i
karë na gïn omaö lobo kï both
rok n'Obanga öryémögï ökö kï
i nyimgï. Këma obedo i lobo
nön naka i karë ka Daudi.

⁴⁶ Daudi onwongo gum kï
both Obanga éka ökwaö nï
ëk émië ègér öt n'Obanga ka
Jakob bedo ié.

⁴⁷ Entö Colomon énë ögérö
öt n'Obanga.

⁴⁸ Kadii bed nï kömanön,
Obanga na Malö Rwök ba
bedo i öt n'ègérö kï cïng jö, kite
na yam adwarpïny okobo nï,

⁴⁹ "Polo énë kabedo më
löcna,
éka lobo énë ka theno
tyëna.

Rwoth okobo nï,
Koth öt mënë na un ibino
gérö nïna?

Onyo ka yweona bino bedo
kwene?

⁵⁰ Pathï cïnga énë öyübö
jami ni kibëc?"

⁵¹ "Un jö na ngutwu nwang,
ïcal unu kï jö n'ökwerö
Obanga éka un ba ibino
mïö cwinywu më winyo
köp k'Obanga. Un ïcal kï
kwerewu: Un i karë kibëc
ikwerö unu Tipo Naleng!

⁵² Adwarpïny mënë na kw-
erewu ba oyelo? Gin thon
oneko jö na yam okobo köp
cön më bino ka Ngat na Kite
Atir, na un iketho örörö i
kome éka ineko unu ökö.

⁵³ Un jö n'ëmiöwu cik
k'Obanga na yam emalaika
okelo gïni, cë ba ilübö unu."

Ecelo Citipwano kï kite

⁵⁴ I karë n'ëtëla k'Eyuda
owinyo gïni ngö na Citip-
wano okobo, akëmö ömakögï
nakun kaö lakgi i kome.

⁵⁵ Entö Citipwano opong kï
Tipo Naleng, cë önenö malö
i wi polo éka önenö dheo
k'Obanga na ryëny rwök,
éka Yecu n'ocung i nget cïng
Obanga kucem.

⁵⁶ Cë Citipwano okobo nï,
"Nén unu, anënö polo öyabërë
éka Wod ka Dhanö n'ocung i
nget cïng Obanga kucem."

⁵⁷ Jö kibëc oumo ithgï éka
ëcakö wöö kï dwön na malö cë
gïn kibëc omukere i kome,

⁵⁸ Ëywaö Citipwano yökö i ngee pacö éka ècakö celo en ki kite. Ècaden opyelo böng-gi i ka tyen awobi mörö na nyängé Caulo.

⁵⁹ I karë n'etye ka celo Citipwano ki kite, en ölegö ni, "Rwoth Yecu gam tipona."

⁶⁰ Cë Citipwano orumo cöngë piny éka okok ni, "Rwoth kür iketh bal ni i komgi." I karë na en okobo köp ni, cë öthöö.

8

¹ Éka Caulo onwongo tye kunön më müö caden i kom thöö ka Citipwano.

Caulo oyelo jö n'oye Kiricito

I nñö nön ayela na dit opodho i kom jö n'oye Kiricito na bedo gini i Jerucalem, éka gin kibec öketh gini ökö ata i lobo më Yudea éka Camaria cë èkwëna kékén enë odong.

² Jö na wörö Obanga enë oiko gini Citipwano, nakun kumo gini pire rwök.

³ Entö Caulo onwongo müö ni etyek jö n'oye Kiricito ökö, nakun wocho i öt ki öt na ywaö cwö thon ki mon më twenogi i buc.

Emuth na Bér ètitö i lobo Camaria

⁴ Jö n'oye n'onwongo öketh gini i kabedo kibec, ötitö gini köp k'Obanga.

⁵ Pilipo öcidhö yo kupiny i pacö mörö më lobo Camaria éka ötitö nügi köp i kom Meciya kunön.

⁶ I karë na lwak na pol owinyo köp ka Pilipo éka önenö gini anyuth më tango

na en otio, gin kibec oketho cwinygi më winyo ngö na en obedo kobo.

⁷ Típo na reco odonyo gini yökö ki kom jö na pol nakun redo gini ki koko rwök, cë jö na pol na two akwea ömakögi éka engwalo na mulo amula öcang gini ökö.

⁸ Cë yom cwiny na thwönë obedo i pacö nön.

Cimon n'onwongo tio tic më jwöjwök

⁹ Entö i pacö nön onwongo tye ècwö mörö na nyängé Cimon n'onwongo tio tic më jwöjwök, na jö Camaria onwongo uro en rwök. En obedo ka wakere ni en ebedo ngat mörö na dit.

¹⁰ Jö kibec më rwöm na malö éka rwöm na piny oketho gini cwinygi i köp na en kobo nakun kobo gini ni, "Ècwö ni obedo tükö k'Obanga n'ecwodo ni 'Tükö na Dit.'"

¹¹ Gin obedo ka ketho cwinygi më winyo köp mëre piiñ pii karë na lac en obedo müögü uro tic mëre më tango më jwöjwök.

¹² Entö i karë na gin oye köp më Emuth na Bér na Pilipo ötitö i kom ker k'Obanga éka nyäng Yecu Kiricito, cë cwö naka thon ki mon ebaticagi.

¹³ Cimon thon oye, éka ebatica en. En öcakö lübö kör Pilipo i kabedo kibec na cihö yo iie nakun bedo ki ur na dit i kom anyuth éka tango na dito na en önenö.

¹⁴ I karë n'èkwëna na tye i Jerucalem owinyo ni jö Ca-

maria oyeo köp k'Obanga, gïn ooro Petero éka Jon bothgï.

¹⁵ Ì karë na gïn othuno, öcakö gïnï lëga pïrgï ek gïn onwong Típo Naleng,

¹⁶ piën Típo Naleng onwongo bara obino i kom ngat mörö ki kin-gï, éntö yam ebino ebaticagï i nyïng Rwoth Yecu.

¹⁷ Cë Petero éka Jon oketho cïng-gï i komgï, éka onwongo gïnï Típo Naleng.

¹⁸ Ì karë na Cimon önenö nï Típo Naleng émiö ka ékwëna ketho cïng-gï i kom jïi, én ömítö miögï cïlling éka okobo nï,

¹⁹ “Mia unu thon tékö ni, ek ngat mörö na an abino ketho cïnga i kome, onwong Típo Naleng.”

²⁰ Éntö Petero ögamö nï, “Ek cïllingni orweny ökö kanya acël kodi, piën in ithamö nï itwérö wilö mïc k'Obanga ki cïlling!

²¹ In ipe ki gin mörö n'epoko nini i kom köp ni, piën cwinyi ba tye n'atür i nyim Obanga.

²² Ngut ökö ki kom bal ni éka ilég both Rwoth, ek ka twérë én bino tïmö nini kïca pi bedo ki koth thama ni i cwinyi.

²³ Piën anenö cwinyi openg ki këc cwiny rwök, éka idökö amabuc më bal.”

²⁴ Cë Cimon ögamö nï, “Lëg unu pïra both Rwoth ek gin mörö na un ikobo kür opodhi i koma.”

²⁵ Ì karë na dong otyeko kobo gïnï köp më caden éka ki titö köp ka Rwoth, Petero éka

Jon ödök gïnï yo Jerucalem, nakun tü tö köp më Emuth na Bér i kin peci na pol ka jö Camaria.

Pilipo éka adit më Ethiopia

²⁶ Malaika ka Rwoth okobo both Pilipo nï, “Yaa malö icidh yo kukwap i gudo thim na yaa ki i Jerucalem lungo pïny yo Gaja.”

²⁷ Cë én öcakö woth éka oromo k'écwö më Ethiopia n'epudho, adit na pïrë tek na lõõ lïm ka Kandake kibëc, alöc na dhakö më lobo Ethiopia. Ecwö ni onwongo öcidhö yo Jerucalem më wörö Obanga.

²⁸ Ì karë na én tye ka dök cen yo pacö, én onwongo obedo i gadigadi nakun kwanö buk k'adwarpïny Icaya.

²⁹ Cë Típo Naleng okobo both Pilipo nï, “Apë na cwök, iwoth ki gadigadi nön.”

³⁰ Éka Pilipo öringö yo gadigadi, cë owinyo ka én tye ka kwanö buk k'adwarpïny Icaya, éka Pilipo openyo nï, “In iniang i ngö nï tye ka kwanö?”

³¹ Én ögamö nï, “An atwérö niang iie niängö, ka ngat mörö ope na gönyö nïna?” Éka ocwodo Pilipo ek obed kanya acël ködë.

³² Dul na én onwongo tye ka kwanö ki i Cöc na Leng tye nï köman:

“Epëo calö römö n'etero më angöla,
éka na calö athin römö
n'ölïng i nyim anyar
yer,
cë én ba oelo dhögë.

9

Caulo ölokérë oyeo Yecu

1 Ëntö, Caulo onwongo pod bürö élübkör Rwoth nakun müti nekogi. Èn öcïdhö both alamdhök na dit

2 ëka openyo pü waraga më cïdhö ködë i cinagoga kibëc na tye i Damaciko, ëk ka ebino nwongo jö na lübö yoo ka Rwoth kunön cwö onyo mon, ekelgi na calö emabuc yo Jerucalem.

3 Ì karë na èn tye ka woth, na dong cwök kï Damaciko, cë tar obino kï i polo athura ëka öryëny öcarö kome.

4 Èn opodho i ngöm ëka owinyo dwön na kobo nünë ni, "Caulo, Caulo, pïngö itye ka yelona?"

5 Caulo openyo ni, "In ïnga Rwoth?"

Cë Rwoth ögamö ni, "An Yecu na in itye ka yelo.

6 Kobedini yaa malö, ïdony i pacö, cë ebino kobo nini gin na myero itim."

7 Jö n'onwongo tye i woth ködë ocung gïni aliliing, gïn owinyo dwön nön, èntö ba önenö gïni ngat mörö.

8 Caulo öya malö kï pïny, èntö i karë na èn öyabö wangë, onwongo ba römö nénö gin mörö. Cë gïn öpëö èn apëa kï cïngë më tero i Damaciko.

9 Pi nünö adek èn onwongo ba römö neno, ba cemo onyo ba madhö gin mörö.

10 Ì Damaciko onwongo tye alübkör Yecu na nyïngë Anania. Rwoth ötwak ködë

33 Pï twëro mérë n'ëtürö ökö, ba èngölö nünë köp atir.

Nga na twëro twak pï èkwaë mérë?

Pïen kwö mérë onwongo èkwanyö ökö kï wi lobo."

34 Ècwö n'epudho openyo Pilipo ni, "Öma, kob nüna, nga n'adwarpiny tye ka twak i kome, tye ka twak i kome kënë onyo i kom ngat nökënë?"

35 Cë Pilipo öcakö kï dul më Cöc na Leng nön ëka okobo nünë Emuth na Bër i kom Yecu.

36 Na gïn tye ka woth i gudo, othuno gïni kanya pii tye ië cë ècwö n'epudho okobo ni, "Nën, pii ene! Ngö na gënga nwongo batica?"

37 Ëka Pilipo okobo nünë ni, "Ka iyee kï cwinyi kibëc cë itwëro."

Èn ögamö ni, "An ayee ni Yecu Kiriciço ènë obedo Wod k'Obanga."*

38 Ëka èn ömiö twëro ni ëk gadigadi ocung. Cë gïn kibëc ödönyö gïni i pii, ëka Pilipo obatica èn.

39 Ì karë na gïn donyo malö kï i pii, cë Tipo ka Rwoth otero Pilipo ökö athura, ëka ècwö n'epudho ba dök önenö Pilipo, èntö èn ömëdëre kï woth mérë kï yom cwiny.

40 Èntö Pilipo onwongo ni etye i Ajota nakun wowotha më titö köp më Emuth na Bër i kin peci kibëc naka othuno i Cecaria.

* 8:37 Baibul nökënë ba oketho tyeng ni.

í anyuth nakun cwodo nü,
“Anania!”

En ögamö nü, “Eyo Rwoth.”

11 Rwoth okobo nünë nü, “Cidh i öt ka Yuda na tye i Yoo n'Ocung Atür, éka ipeny pi écwö na nyängë Caulo më Taruco, en kobedini tye i lëga.

12 I anyuth en önenö écwö mörö na nyängë Anania ka dönyö bothe më ketho cingë i kome ek wangë öyabérë.”

13 Anania ögamö nü, “Rwoth, awinyo köp na pol i kom dhanö ni éka ki gin na reco na en obedo ka timö i kom jö k'Obanga na leng na tye i Jerucalem.

14 Éka en obino kany ki twér n'oya ki both élamdhök na dito më makö jö kibec na cwodo gini nyangi.”

15 Entö Rwoth okobo both Anania nü, “Cidhi! Caulo obedo ngat na an ayerö më tero nyänga both Erok ki rwodhigë éka both jö më Icarael.

16 An abino nyutho nünë can na thwönë na myero en ödang pi nyänga.”

17 Cé Anania öcidhö ödönyö i öt na Caulo tye ie, oketho cingë i kome éka okobo nünë nü, “Oméra Caulo, Rwoth Yecu n'onyuthere bothi i wanga yoo n'onwongo in itye ka bino yo kany, oora bothi nü ek wangi öyabérë inen piny döki, éka ipong ki Tipo Naleng.”

18 Cucüth gin mörö na cal ki pök rëc opodho ki i wang Caulo cé öcakö neno. En öya malö éka ebatica.

19 Kinge camö cem mörö cé ték mërë odwogo.

Caulo ötitö köp k'Obanga i Damaciko

Caulo obedo kanya acël k'elübör Yecu i Damaciko pi nünö na nönök.

20 Cé cucüth öcakö titö i cin-agoga kibec nü Yecu obedo Wod k'Obanga.

21 Jö kibec n'owinyo köp mërë ouro gini éka openyo gini nü, “Pathi écwö ni enë Yam okelo ayela i Jerucalem i kin jö na cwodo nyäng Yecu? Éka en ba obino kany më terogi both élamdhök na dito na calö emabuc?”

22 Titö köp ka Caulo ömëdérë amëda më bedo na tek, naka Eyuda na bedo i Damaciko wigü ocung ökö, pién en onyutho atür nü Yecu enë Meciya.

23 Kinge na nünö na pol opoth, Eyuda mökö öyübérë gini më neko en.

24 Entö Caulo onwongo öniang i kom yub na mögi. Kiceng éka kiwor gïn obedo ka kürö dhö wangkac më neko en.

25 Entö i kiwor, elübörë otingo en éka elwao piny k'adita ki kany mörö na thwolo ki i kom cël.

Caulo öcidhö i Jerucalem

26 I karë na Caulo othuno i Jerucalem, en ötemö më rübérë k'elübör Yecu, entö gïn kibec onwongo lworo en nakun ba yee gini nü en dong obedo alübör Yecu.

27 Cé Baranaba okelo en both ékwëna éka okobo nigi kite na Caulo önenö ki Rwoth kódë i wanga yoo më Damaciko. Baranaba okobo nigi thon ngö na Rwoth

okobo nü Caulo éka kite na en opwonyo ködë abonge lworo ki nyäng Yecu i Damaciko.

²⁸ Cë en dong obedo ködgï kanya acël nakun wowotha éka twakö nyäng Rwoth abonge lworo i Jerucalem.

²⁹ En ötwak éka opyem k'Eyuda mökõ na twakö lëb Girik, éntö gïn ötämö më neko en.

³⁰ I karë na utmego ongeo gïnï köp ni, gïn otero Caulo i Cecaria, éka eoro en yo Taruco.

³¹ Cë jö n'oye Kiricito kibëc na tye i lobo Yudea, i Galilaya, éka i Camaria obedo gïnï ki kuc. Ömëdëre gïnï ki döngö na welgi thon mëdëre nakun lübö gïnï yoo më lworo Rwoth, éka Tipò Naleng obedo jïngö cwinyï.

Petero öcangö Ainea

³² I karë nön, Petero owotoho i kabedo kibëc, éka i woth mëre nön en örwatëre ki jö k'Obanga na leng na bedo gïnï i Lida.

³³ Ki kunön en onwongo ècwö mörö na nyängë Ainea, n'onwongo tye ki two akwea éka obedo ka buto abuta i wi étana pi mwaka aboro.

³⁴ Petero okobo nünë ni, "Ainea, Yecu Kiricito öcangö twoni ökõ, yaa malö, idöl kabutoni." Cüçüth, en öya malö.

³⁵ Jö kibëc n'onwongo bedo gïnï i Lida éka Caron önenö gïnï en cë ölokëre gïnï both Rwoth.

Petero ocero Tabica

³⁶ I Jopa onwongo tye alübör Yecu na dhakö na nyängë Tabica (na ka ègonyö

i lëb Girik tyenë nü Dokac). En onwongo obedo ka tio tic na bëcö éka könyö écan.

³⁷ I karë nön, two ömakö cë öthöö ökõ. Éka élwökö kome, cë epyelo i öt na malö.

³⁸ I karë n'elübör Yecu owinyo gïnï ni Petero onwongo tye i Lida na cwök ki Jopa, cë ooro gïnï jö ariö bothe më cïdhö kwaö en ni, "Tim bér, ibin bothwa piöpiö."

³⁹ Cë Petero öya malö éka öcïdhö ködgï. I karë na en othuno, etero en i öt na malö. Öt onwongo opong ki mon thöö n'onwongo tye ka kok éka nyutho gïnï böng-gï na Dokac obedo ka yübö niги.

⁴⁰ Entö Petero okobo ni jö kibëc më dönyö yokö, cë en orumo cöngë pïny éka ölegö. En ölokëre both athöö cë okobo nünë ni, "Tabica, yaa malö." Éka Tabica öyabö wangë! I karë na en önenö Petero, öya malö cë obedo abeda!

⁴¹ Petero ömakö cïngë cë otingo en malö. En ocwodo mon thöö éka jö k'Obanga na leng kibëc cë onyutho en na kwö bothgi.

⁴² Emuth ni ökëth örömö lobo Jopa kibëc éka jö na pol oyee gïnï i kom Rwoth.

⁴³ Petero obedo i Jopa pi nünö na pol i pacö k'anyöng löö na nyängë Cimon.

¹ Yam onwongo ècwö mörö tye ï Cecaria na nyïngë Korinelio, adit më dul acikari n'ecwodo nü më Itali.

² Ën onwongo ödyérë éka lworo Obanga kï jö më ödë kibëc. Ën onwongo thon miö jami na pol më könyö ècan, éka lëgö both Obanga jwijwi.

³ Ì nïnö mörö acël i kin caa abungwën më kothyeno, ën önenö malaika k'Obanga i anyuth n'obino bothe éka okobo nü, "Korinelio!"

⁴ Korinelio öcikö wangë bothe kïlworo, cë okobo both malaika nü, "Adwong, kob nïna ngö nü mítö."

Malaika ögamö nü, "Lëgani kï mïc më könyö ècan othuno malö both Obanga, ömiö ën opo piri.

⁵ Kobedi dong or cwö mörö yo Jopa ëk öcïdh okel gïni ècwö na nyïngë Cimon n'ecwodo nü Petero.

⁶ Ën bedo i pacö ka Cimon anyöng lëö, na ödë tye i dhönam."

⁷ Ì karë na malaika n'ötwak ködë öcïdhö ökö, Korinelio ocwodo etic mérë ariö éka acikari acël n'ödyérë kï kin jö na gwökö ën.

⁸ Ën okobo nïgi köp kibëc n'ötimérë éka oorogï yo Jopa.

Anyuth ka Petero

⁹ Kodiko mérë na caa abicël dong cwök, n'ëkwëna ka Korinelio tye i wothgï na dong cwök dönyö gïni i pacö, Petero öidhö i wi öt malö më cïdhö i lëga.

¹⁰ Kec öcakö neko ën, nakun mítö nü ècam gin mörö, éntö

onwongo pod éyübö cem ayüba cë öcakö nénö anyuth.

¹¹ Önenö polo öyabérë éka gin mörö na cal kï cüka na thwönë obino pïny nakun tye kï thwoke angwën. ¹² I cüka nön onwongo tye ië kwa leeni na tyen-gï angwën, leeni na wotho i ngöm kï korgï, éka kï wïny na ngwëcö kï malö.

¹³ Cë dwön mörö obino bothe nakun kobo nïnë nü, "Petero yaa malö, inek, éka icam."

¹⁴ Èntö Petero ögamö nü, "Rwoth pathï nü kömanön, piën an anaka yam bara acamö gin mörö n'obedo më kwer onyo na ba leng."

¹⁵ Dwön döki ötwak ködë wang më ariö, "Kür icwod gin mörö nü ba leng n'Obanga ömiö ödökö na leng."

¹⁶ Man ötimérë wang adek, cë cüçüth gin nön edwökö ökö i wi polo.

¹⁷ Ì karë na Petero onwongo pod tye ka uro tyen köp më anyuth na ën önenö, cwö na Korinelio oorogï onwongo gïni öt na Petero tye ië, cë ocung gïni i dhö wangkac.

¹⁸ Gïn öcakö cwodo, nakun penyo gïni ka Cimon n'ecwodo nü Petero bedo kany nön.

¹⁹ Ì karë na Petero pod tye ka thamö i kom anyuth na ën önenö, Tipo Naleng okobo nïnë nü, "Petero, cwö adek tye ka rangoni.

²⁰ Yaa malö, icidh pïny iwoth ködgï. Kür ikwér më woth ködgï, piën an aorogï."

²¹ Petero öcakö cïdhö pïny éka okobo both cwö nön ni, "An énë ngat na un itye ka rangö. Tyën köp ngö n'ömiö un ibino?"

²² Gïn ögamö ni, "Wan éya ki both Korinelio n'obedo adit acikari më Roma. Ën obedo dhanö na kite atür éka lworo Obanga, na jö kibëc n'obedo Eyuda wörö. Malaika na leng okobo nïnë ni ek ocwodi icidh i öde, ek en owiny ngö na in irömö kobo."

²³ Cë Petero ocwodogü éka oterogi i öt më bedo wele mérë.

Petero i öt ka Korinelio

Kodiko mérë Petero öcakö woth köggi, éka utmego mökö ki i Jopa owothro köggi.

²⁴ I nïnö na lübö manön gïn othuno i Cecaria. Korinelio onwongo tye ka kürögü éka onwongo ocwodo wede éka nyikonei mérë kibëc na cwök ködë.

²⁵ I karë na Petero tye ka dönyö i öt, Korinelio oromo ködë éka opodho oryebere pïny i tyenë më wörö en.

²⁶ Entö Petero otingo en malö nakun kobo ni, "Yaa malö icung, an thon abedo dhanö adhana kamë in."

²⁷ Petero obedo ka twak ki Korinelio éka ödonyö i öt cë onwongo jö na pol n'öcökëre gïni.

²⁸ En öcakö kobo nïgi ni, "Un kibëc ingeo ni cik ba yeo ni ek Ayuda mörö öribëre k'Arok mörö, kadi thon thuno bothe, entö Obanga dong otyeko nyutho nïna ni kür acwod dhanö mörö ni ba opore onyo ni ba leng.

²⁹ I karë n'ecwoda, an abino na ba akwërø. An apenyi, kob nïna pïngö icwoda?"

³⁰ Éka Korinelio ögamö ni, "Nïnö angwën n'opoth angec, an onwongo atye i lëga i öda i koth caa ni, caa abungwën më kothyeno. Athura écwö mörö n'oruko böng na ryëny ocung i nyima

³¹ éka okobo ni, 'Korinelio, Obanga otyeko winyo lëgani éka opo pi mücni na in imiö both écan.

³² Kobedi dong or jö mörö yo Jopa both Cimon n'ecwodo ni Petero. Ën obedo welo i pacö ka Cimon n'obedo anyöng löö na bedo i dhö nam.'

³³ Cë aoro jii ökö cüçüth, éka in thon itimö bér më bino. Kobedini wan kibëc etye kany i nyim Obanga më winyo köp kibëc na Rwoth öcikö bothi më kobo niwa."

Erok owinyo Emuth na Bér

³⁴ Cë Petero öcakö twak na kobo ni, "An dong aniang adyer ni Obanga kara ba pokon kin dhanö

³⁵ entö yeo jö kibëc më rok na papath na lworo en éka tio gin na tye atür.

³⁶ Un ingeo köp na yam Obanga ooro both jö më Icarael, nakun titö nïgi Emuth na Bér më kuc na bino pi Yecu Kiricito na en Rwoth ka jö kibëc.

³⁷ Un ingeo ngö n'ötimërë i Yudea kibëc, cakërë ki i Galilaya kinge batica na Jon ötitö

³⁸ kite n'Obanga owiro Yecu më Najaret ki Típo

Naleng éka tékö. Cë Yecu owothro i kabedo kibéc na tio tic na bécö éka cangö jö kibéc n'onwongo Catan yelogü, pién Obanga onwongo tye ködë.

³⁹ “Éka wan ékwëna ebedo ecaden më jami kibéc na én ötimö i lobo k'Eyuda éka i Jerucalem. Gin oneko én n'eguro agura i kor yath aria,

⁴⁰ éntö Obanga ocero én kí kin jö n'othöö i nänö më adek éka ömio én onen,

⁴¹ jö kibéc ba önenö én, éntö onen bothwa wan jö n'Obanga onwongo öyerö cön më bedo ecaden mérë. Wan éné jö n'ocemo éka emedho ködë i karë na én ocer kí kin jö n'othöö.

⁴² Éka öciköwa më cihö tüö köp i kabedo kibéc éka më miö caden ni Yecu éné ngat n'Obanga öyerö më bedo angöl-köp ka jii kibéc, jö na kwö kí jö n'othöö.

⁴³ Edwarpiny kibéc miö caden i kome ni ngat acélacél na yee i kome ebino tímö kíca i balgï kí nyäng Yecu.”

Erok ögamö gini Tipon Naleng

⁴⁴ Na Petero pod tye ka twakö köp ni, Típo Naleng opye i kom jö kibéc n'onwongo tye ka winyo köp mérë.

⁴⁵ Eyuda n'oye n'elirögü n'wothro gini kí Petero obedo kí ur ni mic më Típo Naleng emiö thon both Erok.

⁴⁶ Pién gin owinyogü ka twakö lëb na papath éka pakö gini Obanga.

Cë Petero okobo ni,

⁴⁷ “Ngat mörö tye na römö jükö ni kür ebatica jö ni kí pii? Gin dong otyeko nwongo Típo Naleng kite na onu thon enwongo ködë.”

⁴⁸ Cë én ömio twérö ni gin myero ebaticagü kí nyäng Yecu Kiricito. Cë gin ökwaö Petero më bedo bothgi pí nänö mörö na nönök.

11

Petero ödwökö köp both jö n'oye Kiricito

¹ Í karë nön ékwëna éka utmego na tye gini i Yudea owinyo gini ni Erok thon oyeo kóp k'Obanga.

² Éntö i karë na Petero öcidhö naka i Jerucalem, dul ka jö n'elirögü n'oye Yecu öcakö kobo ni én ötimö gin na rac

³ nakun kobo gini ni, “In icidhö both jö na ba elirögü éka icemo ködgí.”

⁴ Cë Petero öcakö kobo nügi ngö n'otimérë körë kí körë.

⁵ “Í karë n'onwongo atye i lëga i Jopa, anenö gin anyutha. An anenö gin mörö n'obino piny kí wi polo na cal kí cüka na thwöné i wang lek, nakun bino piny na tye kí thwoke angwén, cë obino naka piny i nyima.

⁶ Í karë na an aripö kom cüka, anenö leeni na tyen-gi angwén, leeni më thim, leeni na wootho i ngöm kí korgi éka winy na ngwécö kí malö.

⁷ Cë awinyo dwön mörö na kobo ni, ‘Petero, yaa malö, inek éka icam.’

⁸ “Éntö an agamö ni, ‘Rwoth pathi ni kömanön, pién gin

mörö më kwer onyo na ba leng anaka yam bara ödönyö ï dhögä.'

⁹ "Dwön öcakö twak kï i polo wang më arïö nï, 'Kür ic-wod gin mörö n'Obanga ömïö ödökö na leng nï ba leng.'

¹⁰ Man ötimërë wang adek cë jami nön kibëc edwökö ökö yo wi polo.

¹¹ "I caa nön cüçüth, ënë jö adek n'eorogi kï i Cecaria othuno gïni ködë i öt n'onwongo an abedo iie.

¹² Tipo Naleng öcakö kobo nï awoth ködgï kür akwër. Utmege abicël thon owotho gïni köda éka wan ödönyö i öt k'écwö nön.

¹³ Ën okobo niwa kite na ën önenö kï malaika ka bino bothe i ödë éka okobo nï, 'Or jö mörö yo Jopa ék öcidh oc-wod gïni Cimon n'ecwodo nï Petero.

¹⁴ Ën bino kelo nini köp na in éka kï jö kibëc më pari bino larë.'

¹⁵ "I karë na an acakö twak, Tipo Naleng opye i komgï kite na cön öcakö pye ködë i komwa i acaki.

¹⁶ "Cë apo i kom ngö na Rwoth okobo cön nï, 'Jon yam batica jii kï pii, entö un ebino baticawu kï Tipo Naleng.'

¹⁷ Ka cë Obanga ömïögï müc na röm kï man ömïö onu jö n'eyee i kom Rwoth Yecu Kiricito, cë an döki abedo nga na myero apyem k'Obanga?"

¹⁸ I karë n'owinyo gïni köp ni, gïn dong öling alinga éka öcakö gïni pakö Obanga nakun kobo gïni nï, "Wan ënenö nï Obanga oyeo n'Erok

thon më ngut kï kom balgi éka më nwongo kwö."

Jö n'oye Kiricito na bedo i Antiokia

¹⁹ Jö na yam ökëth i karë më ayela n'obino öcakérë kinge thöö ka Citipwano, obino öcidhö gïni naka i Poiniki, Caiprac éka Antiokia, nakun pwonyo gïni köp k'Obanga both Eyuda kékën.

²⁰ Entö jö mökö kï kin-gï, n'oya kï i Caiprac éka Cirene obino öcidhö gïni yo Antiokia cë öcakö gïni twak kï jö Girik nakun titö nïgi Emuth na Bër i kom Rwoth Yecu.

²¹ Tëkö ka Rwoth Obanga onwongo tye ködgï éka wel Erok na pol oyee cë ölokérë gïni both Rwoth.

²² Emuth ni owinyere both jö n'oye Kiricito na tye gïni i Jerucalem éka gïn ooro Baranaba yo Antiokia.

²³ I karë n'othuno éka önenö tic më kïca k'Obanga, ën obedo kï yom cwiny cë öcükö cwinygi më cung na tek i kom Rwoth kï cwinygi kibëc.

²⁴ Baranaba onwongo obedo dhanö na bër n'opong kï Tipo Naleng éka yee cë ömïö wel jö na pol obino gïni both Rwoth.

²⁵ Cë Baranaba öcidhö yo Taruco më rangö Caulo.

²⁶ I karë na ën onwongo, öcakö kelo ën yo Antiokia. Baranaba kï Caulo obedo kanya acël kï jö n'oye Kiricito pi mwaka acël külü nakun pwonyo gïni jö na pol. Nyïng élübör Yecu écakö cwodo nï Ekiricito kï i Antiokia.

27 Ì karë nön edwarpiny mökö öya kii Jerucalem obino gini yo Antioquia.

28 Ngat acél ki kin-gü na nyängé Agabu ocung cē okobo köp na Tipo Naleng onyutho ninen ni wang mörö kec bino podho i wi lobo thükü. (Man ötimérë i karë më löc ka Kalaudio.)

29 Elübkor Yecu öcakö moko thamagi ni myero eter köny both utmego na bedo gini i Yudea, nakun ngat acélacél miö na lübëre kii tækö mëre.

30 Gin ötimö ni kömanön, éka ooro gini Caulo gin ki Baranaba më tero mücgü both edong ka jö n'oye Kiricito na tye i Jerucalem.

12

Eneko Yakobo, éka etweo Petero i buc

1 Ì karë nön rwoth Erode öcakö makö jö mökö ki kin jö n'oye Kiricito.

2 Èn oneko Yakobo ömin Jon ki pala abadë.

3 Ì karë na èn dong önënö ni oyomo cwiny Eyuda, èn Ömedérë ki makö Petero thon. Man ötimérë i karë më Kwer më Ogati na Thöbi ope ië.

4 Kinge makö Petero, oketho èn i buc, éka émiö èn i cing ekürpiny na tye gini jö angwénangwén i dul angwén. Erode öthéna më kelo Petero i nyim lwak èk étém pido köp i kome kinge nínö më Poth.

5 Èntö i karë na Petero tye i buc, jö n'oye Kiricito obedo ka mëdérë gini ki lëga both Obanga pïrë.

Ègonyö Petero kii buc

6 Ì kiwor mëre na dong myero Erode okel èn i nyim okiko më atëma, Petero onwongo obuto piny n'öninö i kin acikari ariö, nakun etweo èn ki jégélë ariö, éka jö na kürö piny thon onwongo tye ka kürö dholokek më buc.

7 Athura, malaika ka Rwoth onen éka tar öryény öcarö i buc. Èn odhongo lak nget Petero éka ocoo èn ökö, nakun kobo ninen ni, "Yaa malö piiöpiöl!" Cé jégélë opodho ökö ki ngut cingë.

8 Cé malaika okobo ninen ni, "Ruk böngüni éka wori." Éka Petero ötimö ni kömanön. Malaika dök okobo ninen ni, "Kac cukani i komi éka ilüb köra."

9 Éka Petero öcakö lübö körë yo yokö ki i buc, èntö èn onwongo ope ki thama mörö kékén ni gin na malaika tye ka tímö onwongo tye ka tímérë adyer, èn onwongo thamö ni etye ka nënö gin anyutha i wang lek.

10 Gin ökadöhö ekürpiny më acél éka më ariö cē obino gini naka i dholokek nywenyo na wok cihö yo pacö. Dholokek öcakö yabëre kënë nïgi, éka owok gini ki i ië. Ì karë na gin dong owothro othuno i gudo, malaika öcakö wëkö Petero ökö athura.

11 Éka Petero öcakö nïang kënë nakun kobo ni, "Kobedi dong aniang atir ni Rwoth ooro malaika mëre më laröna ki i cing Erode, éka ki kom gin na kibéc n'Eyuda önënö gini ni bino tímérë i koma."

12 Ì karë na èn dong öniang na bër, öcakö cihö i öt ka

Maria aya ka Jon n'ecwodo thon nü Marako, kanya jö na pol onwongo öcökérë gini iie, éka tye gini i lega.

¹³Petero ödwöngö dholokek më wangkac na dönyö i pacö, éka atic më pacö nön na nyängë Roda obino yo bothe më yabö dholokek.

¹⁴İ karë na en önläng i dwön Petero, cwinye obedo na yom rwök, öcakö ngwéc ödök cen na ba öyabö dholokek éka okobo niigü ni, "Petero tye ocung i dholokek yoköl!"

¹⁵Gin okobo nineni, "In wii ba tio." Éntö i karë na en ökwérö ni tye atir, gin öcakö gamö nineni, "Manön twérö bedo malaika mérë."

¹⁶Éntö Petero ömädérë ki dwöngö dholokek, éka na gin öyabö dholokek önenö gini en, cë gin obedo ki ur rwök.

¹⁷Éka Petero öcakö jükögü ki cingë ni ek öling gini ökö, cë öcakö kobo niigü kite na Rwoth ökwanyö en ködë yökö ki i buc, éka dök okobo niigü ni, "Kobunu ni Yakobo éka utmego nökënë ngö n'ötimérë." Cë öcakö yaa öciddö yo kany ökënë.

¹⁸Kodiko na piny oru, arubaruba obedo tye i kin acikari na rac, pi gin n'ötimérë i kom Petero.

¹⁹Kinge n'Erode ömio twérö më rangö Petero ki tek cë ba onwongo, öcakö penyo ekürpiny éka ömio twérö ni ek enegki ökö.

Cë Erode öya ki i Yudea öciddö i Cecaria éka obedo kunon pi karë mörö na nönök.

Thöö k'Erode

²⁰Erode obedo ka dhaa ki jö më Turo éka Cidon cë öcökérë gini kanya acel më bino twak ködë. Ka gin onwongo twérö ki both Blacito, atic ka rwoth n'egen, gin openyo Erode ni emitö gini kuc, pién lobogü jengere i kom lobo ka rwothgi pi cem n'ekelo niigü.

²¹İ nünö n'emoko, Erode onwongo oruko ruk më ker mérë, cë öciddö obedo i wi then ker mérë éka öcakö twak ki lwak.

²²Lwak öcakö redo ki wöö rwök ni, "Man ene dwön obanga, pathi më dhanö."

²³Cüçüth, malaika ka Rwoth ömio en otwore pién ba ömio dheo both Obanga éka kudi öcakö camö kome cë öthöö ökö.

²⁴Éntö köp k'Obanga ömädérë ameda më nya.

²⁵İ karë na Baranaba gin ki Caulo otyeko gini tic n'eorogi ie, cë ödök gini i Jerucalem, nakun wotho gini kanya acel ki Jon n'ecwodo ni Marako.

13

Eoro Baranaba gin ki Caulo

¹Jö n'oye Kiricito na tye gini i Antiochia onwongo tye k'edwarpiny éka epwonye na nyäng-gi: Baranaba, Cimeon n'ecwodo ni Niga, Lucio më Cirene, Manaen (n'ödöngö kanya acel k'Erode n'obedo alöc) éka Caulo.

²İ karë na gin tye i lega më wörö Rwoth éka ki rio kec, Tipò Naleng okobo niigü ni, "Yer nina unu Baranaba gin ki

Caulo pï tic na an acwodogï ië.”

³ Kinge na gïn dong otyeko läga éka kï rio kec, oketho gïnï cïng-gï i komgï éka eorogi më cïdhö tio tic k'Obanga.

Baranaba éka Caulo ötitö köp k'Obanga i Caiprac

⁴ Ì karë na Tipo Naleng oterogi, gïn öcïdhö yo dñö nam i Celecia. Gïn öya kï kunön, ökwang gïnï naka i cula nam më Caiprac.

⁵ Ì karë na gïn othuno i Calamic, ötitö gïnï köp k'Obanga i cinagoga k'Eyuda kibëc. Gïn owothro kï Jon Marako më könyögï.

⁶ Gïn owothro öngölö cula nam naka othuno gïnï yo Papoc. Kï kunön, oromo gïnï k'ajwoga mörö, n'obedo adwarpïny na twot n'obedo Ayuda na nyïngë Bar-Yecu.

⁷ Èn onwongo obedo okone k'alöc lobo na nyïngë Cerigio Paulu n'onwongo obedo ngat na ryék. Alöc nön ocwodo Baranaba gïn kï Caulo bothe, piien èn onwongo mítö winyo köp k'Obanga.

⁸ Èntö Elima n'obedo ajwoga (kite na nyïngë gönyö ködë i lëb Girik) öcakö pyem ködgï nakun mítö lökö cwiny alöc ökö kï kom yee mërë.

⁹ Cë Caulo n'onwongo thon ecwodo ni Paulo, opong kï Tipo Naleng, öcikö wangë i kom Elima éka okobo ni,

¹⁰ “In ibedo athiñ ka Catan, langö ka gin na kibëc na bëcö. In ipong kï köp më bwöl, k'ököra na reco. In ba itwëro wëkö lökö köp ka

Rwoth Obanga n'atür më bedo twodo?

¹¹ Kobedini cïng Rwoth Obanga dong tye i komi, wangï bino thöö ökö, éka pï karë mörö ba ibino nënö tara ceng.”

Cucüth wangë öcakö thüthiba kï pii éka pïny ödökö na col nünë. Öcakö témö më rangö ngat mörö ek öpë èn kï cïngë.

¹² Ì karë n'alöc önënö ngö n'ötümérë, èn oyee piien ouro rwök kit pwony n'epwonyo i kom Rwoth.

Paulo éka Baranaba i lobo Antioquia më Picidia

¹³ Kinge, Paulo k'ewodhe öya gïnï kï i Papoc cë ökwang gïnï kï mel yo Perga i lobo Pampulia. Kï kunön, Jon Marako öwëkögï cë ödök cen yo Jerucalem.

¹⁴ Èntö Paulo gïn kï Baranaba öya gïnï kï i Perga cë öcïdhö gïnï yo Antioquia më lobo Picidia. I nünö më Cabit k'Eyuda, gïn ödönyö i Cinagoga éka obedo gïnï pïny.

¹⁵ Kinge na dong etyeko kwanö kwan kï i buk më Cik ka Muca éka k'edwarpïny, etëla më Cinagoga ooro köp bothgi na kobo gïnï ni, “Utmego, ka itye unu kï köp mörö më cükö cwiny jii, bin ikob unu.”

¹⁶ Paulo öya malö ocung cë öjükögï kï cïngë na kobo ni, “Jö Icarael éka un Erok kibëc na wörö Obanga, winya unu!”

¹⁷ Obanga ka jö Icarael öyérö kwere onu, ömiögï önya na pol i karë na gïn bedo i

lobo Ejip, ki tēkō na dit, en ökwanyögi ökō ki i lobo nön.

18 Ödiō cwinye i komgi i thim pi mwaka na römö pyer angwën.

19 En otyeko rok abirö na tye i lobo Kanaan éka ömiiö lobo nön both jō Icarael mē bedo möḡi.

20 Man kib̄ec otero mwaka na römö 450.

“Kinge man, Obanga obino ömiiögi engöl-köp mē löönögi naka i karé k'adwarpiny Camuel.

21 Cé jii openyo pi rwoth, éka Obanga obino ömiiögi Caulo wod ka Kic na yaa ki i kaka ka Benjamin n'obedo i lōc pi mwaka pyer angwën.

22 Kinge kwanyö Caulo, Obanga öyérö Daudi mē bedo rwothgi. En okobo i kome ni: ‘An anwongo Daudi wod ka Jece, ene ngat na yomo cwinya, en bino tūmō jami kib̄ec na an amitö ni en ötüm.’

23 “Ki kom ekwaë ka Daudi, Obanga okelo ni jō mē Icarael Alar Yecu, kite na en öcikö ködë.

24 Na bara Yecu obino, Jon Abatica ötitö köp mē ngut éka batica both jō mē Icarael kib̄ec.

25 I karé na Jon dong cwök tyeko tic mérë, en okobo ni, ‘Un ithamö ni an anga? An ba abedo ngat na un itye ka kürö pîrë, éntö en tye ka bino ki köra, na an ba apora mē gonyö wör tyenë’.

26 “Utmegona, un ekwaë k'Abraam, éka un Erok na lworo Obanga, köp mē larë ni eoro dong ökō both onu!

27 Éntö jō na yam bedo gini i Jerucalem k'etelaḡi onwongo ba öniang gini i kom Yecu, ba öniang gini thon i köp n'edwarpiny okobo, éka n'ekwanö i ceng Cabit k'Eyuda kib̄ec. Gin ocobo köp k'edwarpiny nakun ngölö gini ni köp olöö Yecu.

28 Kadï ba onwongo gini bal mörö mē ngölö nünë thöö, gin openyo Pilato ek oyee mē neko en ökō.

29 I karé na dong otyeko gini cobo köp na yam ecöö i kome, gin ökwanyö en ökō ki kor yath, cé epyelo kome i bur lyël.

30 Éntö Obanga ocero en ökō ki kin jō n'othöö.

31 Cé en obedo nen pi nünö na pol both jō na yam en owothro ködḡi ki i Galilaya obino yo Jerucalem. Kbedini dong gin ene ecaden mérë both jō onu.

32 “Eka wan etitö niwu emuth na bér ni gin na yam Obanga öcikö both kwere onu,

33 en dong ömiiö ocobere pi onu, ekwaëgi, ki cero Yecu. Kite n'ecöö ködë i Jabuli mē arïö ni,

“In ibedo woda,
tin dong adökö apapni.”

34 Eka man ene gin n'Obanga okobo i kom cero en ki kin jō n'othöö ni ba bino töp i lyël, ekobo i köp ni:

“Abino miöwu gum na leng
na genere na yam
acikö both Daudi.”

35 Dök ekobo i Jabuli nökënë ni:

“ ‘Ba ibino wëkô kom Dhanöni Naleng töp.’

36 “I karë na Daudi otyeko tic na lübëré ki yüb k'Obanga i karë mérë, cë en öthöö, éka eiko kome kanya eiko kwere mérë ié cë kome ötöp.

37 Ëntö ngat n'Obanga obino ocero ki i thöö, kome ba obino ötöp.

38 “Pî manön utmegona, an amitö ni inge unu ni pî Yecu enë ömïö wan etitö niwu köp më tümö kïca i kom bal.

39 Dhanö acélacél n'oye Yecu ebino kwanö ni en kite atir i nyim Obanga, gin mörö na cik ka Muca ba twëro tümö.

40 Gwökérë unu dong ek köp na yam edwarpiny okobo kür ötimérë i komwu:

41 “Nën, un wegi angal, ur unu éka irweny unu ökô, piien an abino tümö gin mörö i karëwu, na un ba ibino yee, kadï ngat mörö kob niwu.”

42 Na Paulo éka Baranaba yaa dong ki i cinagoga, jii ökwaögï ni myero gin dök odwog cen ek okob niги köp na thuth i ceng Cabït k'Eyuda na lübö manön.

43 I karë n'ékëthö lwak, pol Eyuda éka jö n'ölökérë gin i dini k'Eyuda n'omirë gin both Obanga ölübü gin i kör Paulo gin ki Baranaba cë gin obedo twak ki lwak na cükö cwinygi ni myero ömëdérë gin më bedo i kïca k'Obanga.

44 I ceng Cabït k'Eyuda na lübö manön, pol lwak ki i pacö öcökérë gin kanya acél më winyo köp ka Rwoth.

45 Ëntö i karë n'Eyuda mökö önenö gin i lwak, nyeko ömakögï ökô, éka öcakö gin twakö köp më ayeny i kom ngö na Paulo onwongo tye ka kobo.

46 Cë Paulo gin ki Baranaba ötwak gin i tek cwiny abonge lworo na kobo gin ni, “Wan onwongo myero ècak twakö köp k'Obanga bothwu, èntö na calö dong ikwérö unu ökô éka ba iparö unu ni ipore unu pî kwö na ba thum, wan dong ewékowu cë élökérë both Erok.

47 Man enë gin na yam Rwoth öcikowa na kobo ni: “An akethi më bedo tar both Erok,

ek imii larë othun naka i ajiki piny kibec.”

48 I karë n'Erok owinyo gin i köp ni, cwinygi obedo na yom, éka öcakö gin i wörö köp ka Rwoth, cë jö kibec n'onwongo eyerögï pî kwö na ba thum oyee gin.

49 Köp ka Rwoth ökëth örömö lobo non ökô kibec.

50 Ëntö Eyuda orubo gin i cwiny mon na lworo gin Obanga, na tye gin i rwom më dito na malö kanya acél k'etela më pacö non. Cë öcakö gin i yelo Paulo gin ki Baranaba éka eryemögï ökô ki i lobogi.

51 Ëntö Paulo éka Baranaba ötengö gin i apua ki i tyen-gi më nyutho ni gin ökwérögï, cë öcidhö gin i yo Ikonio.

52 Cë elübör Yecu openg ki yom cwiny éka ki Tipò Naleng.

14

Paulo ëka Baranaba i lobo Ikonio

¹ Na gin dong tye i pacö mê Ikonio, ödönyö gini i cingagoga k'Eyuda. Ki kunön gin obedo ka twak ki tek n'omio wel k'Eyuda na pol ëka Erok oyee gini.

² Entö Eyuda n'ökwerö yee orubo gini cwiny Erok nakun müö gini thama na reco i kom utmego.

³ Paulo gin ki Baranaba obedo gini kunön pi karë mörö na lac nakun twakö gini pi Rwoth ki tek cwiny abonge lworo mörö. Rwoth thon omoko caden mê kïca mérë nakun müögï tekö mê tio anyuth mê tango ëka gin mê aura.

⁴ Entö lwak mê pacö onwongo opokere gini ökö, dul nökënë both Eyuda ëka nökënë both ékwëna.

⁵ Cë Erok ëka Eyuda, kanya acël k'ëtelagï omoko thamagi mê tímö gin na rac i komgi ëka ki celogi ki kidi.

⁶ Ì karë n'ëkwëna öniang gini i kom köp nön, öcakö lüü gini ökö naka yo Licitra ëka Derube i peci na tye i lobo Likaonia ëka ki lobo n'ögürögï,

⁷ kanya gin ömëderë mê titö Emuth na Bér.

Paulo ëka Baranaba i peci mê Licitra ëka Derube

⁸ Ì karë na gin tye i Licitra, onwongo gini écwö mörö na bedo abeda na ba twero woth. Ën onwongo ongwal ökö cön ki i aya mérë ëka ba ötämö woth.

⁹ Ën obedo winyo ka Paulo twak, cë Paulo öcikö wangë i kome ëka önënö ni en tye ki yee na römö müö en cang.

¹⁰ Cë Paulo oreo kï dwön na malö ni, "Yaa malö, icung atir!" Ëka écwö nön öcakö pye malö cë öcakö woth.

¹¹ Ì karë na lwak önënö gini ngö na Paulo ötimö, öcakö wöö gini ki lib Likaonia nakun kobo gini ni, "Obanga obino gini piny both onu i the cal ka dhanö!"

¹² Cë öcakö cwodo gini Baranaba ni "Jeuc," ëka Paulo ni, "Ermec," piën en onwongo obedo adwong na löö twak.

¹³ Cë alamdhök ka Jeuc, na öt wörö jwökgi tye i ngee pacö, okelo thwoni ëka athure i dhö wangkac mê pacö piën en ëka lwak onwongo mitö müö gini tyer both ékwëna.

¹⁴ Entö i karë n'ëkwëna Baranaba gin ki Paulo owinyo gini pi köp nön, öcakö yécö gini böng-gi ki komgi nakun mwömëre gini yokö ki kin lwak na redo gini ni,

¹⁵ "Pïngö itimö unu gin ni? Wan thon ebedo dhanö adhana calö un. Wan etitö niwu Emuth na Bér ek ilökérë unu ökö ki kom gin na köny mérë ope yo both Obanga na kwö n'ocweo polo ki lobo ëka nam ki jami kibec na tye ië.

¹⁶ Ì karë na cön en oyeo ni rok kibec owoth gini i yoo na iigë ömitö.

¹⁷ Kadï bed ni kömanön, en Yam ba öwëkö dhanö abonge caden mérë ëka ki gin na bér na en tímö. Ën müö köth cwe niwu ki i polo, en müowu cem

na büp éka miöwu ibedo unu
ki yom cwiny."

¹⁸ Ëntö naka thon ki köp ni
Paulo éka Baranaba ba obedo
na yot niigi më jükö lwak më
tyérö tyér bothgi.

¹⁹ Cë Eyuda mökö n'obino
gini ki i Antiokia éka i Iko-
nio öcüpö gini lwak më dök
kukurgi. Gin ocelo Paulo
ki kidi éka öcakö ywanö gini
en yökö i ngee pacö, nakun
thamö gini ni en dong öthöö
ökö.

²⁰ Ëntö kinge n'ëlübör Yecu
öcökérë gini bothe, en öya
malö éka ödök cen i pacö.
Kodiko na piny oru, owotho
gini kanya acél ki Baranaba
naka i Derube.

*Paulo gin ki Baranaba ödök
cen yo Antiokia i lobo Ciria*

²¹ Kinge na gin ötitö Emuth
na Bér i pacö nön, gin ölökö jö
na pol më bedo ëlübör Yecu.
Cë gin ödök cen i Licitra, Iko-
nio éka Antiokia,

²² nakun jingö gini cwiny
ëlübör Yecu éka cükö cwinygi
më cung i yee atir nakun kobo
gini ni, "Onu myero enwong
can na pol më dönyö i ker
k'Obanga."

²³ I karë na Paulo gin ki
Baranaba öyérö gini edong pi
jö n'oye Kiricito ki i kabedo
acélacél, gin öcakö miö jö nön i
cing Rwoth na gin yee i kome
nakun öcakö gini ki lëga both
Obanga éka ki rio kec.

²⁴ Kinge na gin owok i Pi-
cidia, obino gini naka i Pam-
pulia,

²⁵ éka i karë na gin otyeko
titö köp k'Obanga i Perga, cë
öcidhö gini yo Atalia.

²⁶ Ki kany nön, gin ökwang ki
mel yo Antiokia, kanya yam
emiögi ié i thë kïca k'Obanga
pi tic na gin onwongo dong
otyeko.

²⁷ I karë n'othuno gini
kunön, öcökö gini jö n'oye
Kiricito kanya acél, cë okobo
gini gin na kibec n'Obanga
otio nakun wok ki bothgi
éka kite n'Obanga öyabö ki
dholokek më yee both Erok.

²⁸ Éka obedo gini kunön
k'ëlübör Yecu pi karë na lac.

15

Athuko më Jerucalem

¹ Jö mökö öya ki i Judea
obino gini yo Antiokia nakun
pwonyo gini utmego ni, "Ka
ba ëliröwu kite na pwony ka
Muca mütö ködë, un ba itwëro
larë."

² Man ömiö Paulo éka
Baranaba obedo ka larö köp
ki pyem ködgü na ték. Cë
eyérö Paulo éka Baranaba
ki jö nökënë n'oye gini, më
ciddhö naka yo Jerucalem both
ékwëna éka edong pi köp ni.

³ Lwak jö n'oye Kiricito
oorogi éka na gin tye ka
woth ngölö i Poiniki éka
lobo Camaria, gin okobo
kite n'Erok ölökerë gini ködë.
Emuth ni ömiö utmego kibec
obedo ki yom cwiny.

⁴ I karë n'obino gini yo
Jerucalem, jö n'oye Kiricito
éka ékwëna, k'edong obino
öjölögü. Baranaba éka Paulo

okobo bothgï gin na kibëc
n'Obanga otio ködgï.

⁵ Cë jö n'oye na tye gini i dul
k'Eparicayo öya gini malö éka
okobo gini ni, "Erok myero
élirgï, ek ecikgi më lübö cïk ka
Muca."

⁶ Ékwëna éka edong öcökérë
gini më larö köp ni.

⁷ Kinge larö köp pï caa
na lac, Petero öya malö cë
öttwak ködgï: "Utmegona, un
ingeo ni i karë mörö n'opoth
angeç Obanga obino öyera ki
i kinwu, ek amii Erok owiny
köp më Emuth na Bër na yaa
ki i dhöga éka oyee gini.

⁸ Obanga, na ngeo cwiny
dhanö, onyutho ni en oyeogi
nakun miögï Tipo Naleng,
kite n'ötimö ködë i kom onu.

⁹ En ba oketho apokapoka
mörö i kin onu éka gin, éntö en
ömiö cwinygi obedo na leng
ki yee.

¹⁰ Cë kobedini dong, pïngö¹
itye ka témö unu Obanga
nakun iketho unu ayokoth
i ngut élübör Yecu na wan
onyo kwere onu ba twëro gini
tingo?

¹¹ Pathi ni kömanön pïen
wan eyee ni onu kibëc élarë
i yoo acël nön pï kïca ka
Rwothwa Yecu i kite na gin
tye ködë nön."

¹² Jö kibëc n'öcökérë öling
gini alinga nakun etye ka
winyo Baranaba éka Paulo
ka tye ka kobo gini köp i kom
anyuth më tango éka gin më
aura n'Obanga ötimö i kin
Erok nakun tio ködgï.

¹³ Ikarë na gin otyeko twak,
Yakobo ögamö ni, "Utmegona,

winya unu.

¹⁴ Cimon okobo both onu
kite n'Obanga öcakö nyutho
par mérë i kom Erok nakun
kwanyö jii ki kin-gi ek obed
mëgë.

¹⁵ Köp k'edwarpiny
örwatérë ki köp na yam écöö
ni,

¹⁶ " 'Kinge man an abino
dwogo
éka agérö öt ka Daudi na
yam örëdhérë.

An abino gérö kanya yam öbal
ökö,
éka abino röcö na bër.

¹⁷ Ek jö n'odong örang gini
Rwoth,
éka Erok kibëc n'ecwodogï
ki nyïngä,
man köp ka Rwoth Obanga,
na tio jami ni'

¹⁸ n'ömiö ongere anakä
yam cön.

¹⁹ "Pï manön thamana dong
tye ni onu kür emii obed na
ték pï Erok na tye ka lökérë
gini both Obanga.

²⁰ Nakaka manön, onu
myero écöö waraga bothgï
éka ekob nïgi ni myero kür
öcam gini cem mörö n'etyerö
both cal jwogi, kür obed gini
jö ölyang, kür öcam gini ringo
leeni n'ädëö adëa, éka kür
öcam gini remo.

²¹ Pïen cïk ka Muca ebedo
ka titö i peci kibëc cakérë cön
éka ékwanö i cinagoga i ceng
Cabït k'Eyuda kibëc."

*Waraga both Erok n'oye
Yecu*

²² Cë ékwëna éka edong, ki
jö kibëc n'oye Kiricito, omoko
gini më yëro cwö mörö
n'obedo mëgï ek eorgï owoth

gini ki Paulo éka Baranaba yo Antiokia. Gin öyerö Yuda (n'ecwodo ni Barcaba) éka Cila, cwö ariö n'onwongo obedo gini etela i kin utmego.

²³ Man waraga n'eorogi ködë:

Both utmegowa n'obedo Erok n'oye Kiricito na tye i Antiokia, Ciria éka Cilicia, wan ékwëna éka edong n'ebedo utmegowu, emothowu.

²⁴ Wan ewinyo ni jö mökö öya ki bothwa kany abonge twéröwa, na tye ginii ka yellowu ki köp mökö na rubo thamawu ki ngö na gin tye ka kobo.

²⁵ Manön ömiö wan emoko ki cwinywa acel më yérö cwö mörö ek eorgi bothwu nakun wotho ginii kanya acel ki nyikoneiwa më amara Baranaba éka Paulo,

²⁶ cwö na dong otyeko jalö kwögï pi nyäng Rwoth Yecu Kiricito.

²⁷ Pi manön wan eoro Yuda éka Cila më bino kobo niwu ki dhögï ngö na wan etye ka cöönö.

²⁸ Nen calö bér both Tipo Naleng éka wan ek kür eketh yec mörö na pëk rwök i komwu na kadhö köp na pürgi tek na wan écö püng kany:

²⁹ Kür icamunu cem n'etyérö both cal jwogi, kür icamunu remo, kür icamunu ringo leeni n'edéögï adëa éka kür itümunu tüm më ölyang. Ka igwökérë unu ki kom jami ni, cë ibino unu tímö na bér.

Bed unu dong na bér.

³⁰ I karë n'eorogi, gin öcakö

cidhö yo Antiokia, kanya gin ögürö jö n'oye Kiricito kanya acel éka émiögï waraga.

³¹ I karë na gin ökwanö waraga, obedo gini ki yom cwiny pi köp më cükö cwinygi.

³² Cé Yuda éka Cila n'onwongo obedo gini ed-warpiny, ötwakö gini köp na pol më cükö cwinygi éka më jingö yeegi.

³³ Kinge na dong otyeko gini karë mörö na nönök, cë jö n'oye ömiögï ödök cen ki gum më kuc both jö n'oorogi.

³⁴ Entö Cila öthamö ni bér en ebed kunön.*

³⁵ Cé Paulo éka Baranaba odong gini i Antiokia, kanya gin ki lwak na pol opwonyo éka ötitö gini köp ka Rwoth.

Paulo opokere ki Baranaba

³⁶ Kinge karë mörö na nönök, Paulo okobo both Baranaba ni, "Erö ödök cen ek ecidh elim utmego ki i peci kibec na onu ebedo ka titö köp ka Rwoth ie ek enen kite na gin tye ködë."

³⁷ Baranaba onwongo mitö ni ewoth gini ki Jon na nyängë nökënë ecwodo ni Marako,

³⁸ entö Paulo ba dök öthamö na bér më woth ködë pién obino öwökögï ökö i Pampulia éka ba obino ömëderë ködgï i tic.

³⁹ Gin obedo ka larö köp na gwaü, naka othuno niigi pokere ökö. Baranaba owotho ki Marako cë ökwang gini yo Caiprac,

* **15:34** Baibul nökënë ba ketho gini tyeng ni.

⁴⁰ éntö Paulo öyérö Cila cë öya gïnï éka utmego ömiögï i cïng Rwoth ek pi käca mëre ögwökgi.

⁴¹ Ën owok i Ciria éka i Cilia nakun jïngö cwiny jö n'oye Kiricito.

16

*Timoteo owotho ki Paulo
éka Cila*

¹ Paulo döki othuno naka yo Derube éka Licitra, kunön onwongo tye ié alübkör Yecu na nyïngë Timoteo, n'aya mërë onwongo obedo Ayuda éka dhanö n'oye Yecu, éntö n'apap mërë obedo dhanö më Girik.

² Utmego na tye gïnï i Licitra éka Ikonio ötwakö gïnï köp na bér i kom Timoteo.

³ Paulo ömitö nï ewoth ködë i woth mërë, cë en ölirö Timoteo pi Eyuda na tye gïnï kunön pién gïn kibec onwongo ngeo nï apap mërë onwongo obedo dhanö më Girik.

⁴ Kite na gïn obedo wowotha i peci na papath, gïn ömiö jö n'oye Kiricito cik na yam ékwëna éka edong omoko gïnï i Jerucalem nï ek ölüb gïnï.

⁵ Kömanön jö n'oye Kiricito öjïng na tek i kom yeegi éka welgi obedo ka mëdérë na pol nïnö ki nïnö.

Anyuth na Paulo önenö i Teroa

⁶ Paulo éka ewodhe owotho gïnï i lobo Perugia éka Galatia, pién Tipo Naleng ögëngögï nï kür ötit gïnï köp k'Obanga i lobo Acia.

⁷ Í karë na gïn othuno i wang lobo më Micia, gïn

ötëmö cïdhö yo Bitinia, éntö Tipo ka Yecu ba oyeo nï gïn öcïdh kunön.

⁸ Gin dong öcakö wok i Micia, éka öcïdhö gïnï yo Teroa.

⁹ Í kiwor Paulo önenö ècwö mörö më Macedonia i gin anyutha, n'ocung nakun kwaö en nï, "Kwang nam ibin i Macedonia ek ikönywa."

¹⁰ Kinge na Paulo dong önenö gin anyutha, wan eyübëre piöpiö më yaa cïdhö yo Macedonia, pién onwongo éniang na bér nï Obanga ene ocwodowa më cïdhö titö köp më Emuth na Bér bothgi.

Lökërë ka Lidia

¹¹ Wan ècakö kwang ki yeya ki i Teroa atür naka i Camoturake éka kodiko mërë ethuno i Neapoli.

¹² Ki kunön wan ècïdhö yo Pilipi i pacö na jo Roma lõö, na ene pacö na dit na lõö ki i lobo Macedonia. Wan ebedo kunön pi nïnö na pol.

¹³ I ceng Cabit k'Eyuda wan ècïdhö yokö i nge wangkac yo lak kulo, kanya wan éthamö nï etwëro nwongo kany mörö më lëga. Wan ebedo pïny më twak ki mon n'onwongo ogürë gïnï kany nöö.

¹⁴ Ngat acél n'obedo winyo twakwa ene dhakö na nyïngë Lidia, n'oya ki i pacö n'ecwodo nï Tuatira. En onwongo obedo dhakö na cadhö böng na kwar na bécö më wel éka na wörö Obanga. Rwoth öyabö cwinye éka obedo ketho cwinye i köp na Paulo kobo.

¹⁵ Í karë na en éka ki jö më ödë ebaticagï, en öjölöwa

yo pacö mérë nakun kobo nü, "Ka un iyeo nü an dong abedo ngat n'oye Rwoth, cë ibin ebed unu i pacöna." Ën ödiöwa rwök naka ömiö wan eyeo më woth ködë.

Paulo éka Cila i buc

¹⁶ Ì nünö mörö acël na wan onwongo etye ka cïdhö i läga, wan ärwatérë kï nyakö mörö n'obedo opii. Ën onwongo tye kï tipo mörö na miö en kobo gin mörö më karë më anyim. Ën onwongo kelo lïm na thwönë both rwodhi mérë kï köp na en kobo.

¹⁷ Nyakö ni obedo lübö kör Paulo éka wan kibëc na redo nü, "Cwö ni obedo gini etic k'Obanga na Malö Rwök na gini tye ka kobo niwu kit yoo na myero ilarë unu ködë."

¹⁸ Ën obedo ka tümö nü kömanön pii nünö na pol. Më ajiki mérë akëmö ömakö Paulo cë olökérë okobo nü jwök nü, "Aciki i nyim Yecu Kiricito, donyi ökö kï i kome!" Ì caa nön cüçüth tipo na rac öya cë öwëkö en.

¹⁹ Entö i karë na rwodhi mérë önenö nü gen më nwongo lïm öya ökö, ömakö gini Paulo éka Cila cë eywaögü eterogi yo cuk i nyim elöc.

²⁰ Gïn okelogi i nyim engöl-köp cë okobo gini nü, "Jö ni obedo Eyuda éka tye gini ka rubo pacöwa

²¹ nakun pwonyo gini kite mökö na cikwa ba yeo nü wan ègam onyo elübgï, piien wan ebedo jö Roma."

²² Cë lwak örübérë gini më lwëny i kom Paulo éka Cila.

Ëngöl-köp öcikö nü ègony böng kï komgi éka epwodgi kï lüth.

²³ Kinge na dong etyeko pwodogï rwök, cë eterogi i buc nakun ècikö ngat na gwökö buc nü ek ögwökgï na bér.

²⁴ Ngat na gwökö buc okethogii öd buc na tye iie éka etweo tyen-gi i kom yen na pék.

²⁵ Na dong cwök römö dingwor Paulo éka Cila onwongo tye gini i läga na werö gini wer both Obanga, n'emabuc nökënë thon onwongo tye ka winyogü.

²⁶ Athura thwön oyeyeng mörö oyengo piny rwök naka thë öt më buc thon oyengere. Cüçüth dholokek kibëc më öt buc öyabérë ökö, éka jégële kibëc n'etweo k'emabuc ögony gini ökö.

²⁷ I karë na ngat na gwökö buc ocoo cë önenö dholokek kibëc më öt buc thwolo, en öwödhö pala abadë mérë éka onwongo mitö cöbérë kënë piien ongeo nü emabuc ölüü ökö.

²⁸ Entö Paulo oreo nü, "Kür iwaniri keni! Wan kibëc eute kany!"

²⁹ Ngat na gwökö buc ocwodo mac, ömwömérë i öt, cë öcïdhö orumo cöngë piny na kome myel amyela i nyim Paulo éka Cila.

³⁰ Cë en dong okelogi yokö éka openyo nü, "Editena, ngö na myero atüm ek alarë?"

³¹ Gïn öcakö gamö nü, "Yee i kom Rwoth Yecu éka ibino larë, in kï jö më odi kibëc."

32 Cë ötwakö gini köp ka Rwoth bothe éka kí jö kibec na bedo gini i ödë.

33 I caa nön më kiwor ngat na gwökö buc oterogi éka öcidhö olwökö wang retgi, cë cüçüth en éka jö më ödë kibec ebaticagi.

34 Ngat na gwökö buc okelogi i ödë éka ömioigi cem. En onwongo opong kí yom cwiny piien en kí jö më ödë kibec oyee gini i kom Obanga.

35 I karë na dong piiy oru kodiko, engöl-köp ooro acikarigi both ngat na gwökö buc kí twerö nakun kobo ni, "Göny unu jö nön öcidh gini."

36 Ngat na gwökö buc okobo both Paulo ni, "Engöl-köp öcikö ni, un kí Cila myero egonywu ök. Kobedini dong itwérö unu cihö. Apé unu kí kuc."

37 Entö Paulo okobo both acikari ni, "Gin opwodowa i kin lwak na bara engölö niwa köp, kadï bed ni wan ebedo jö më Roma éka okethowa gini i buc. Cë kobedini gin mitö gönyöwa i müng? Pathi ni kömanön! Mitö gin kí komgii obin ek ögonywa gini."

38 Acikari ödwökö gini köp nön both engöl-köp éka i karë n'owinyo gini ni Paulo éka Cila onwongo obedo gini jö më Roma, gin obedo kí lworo.

39 Cë gin obino öbakö dhögü bothgi éka ökwanyögi ök, na kwaögü më wékö pacö nön.

40 Kinge na Paulo éka Cila odonyo gini yokö kí i buc, éka öcidhö gini i öt ka Lidia, kanya gin örwatérë kí utmego éka

öcükö cwinyagi. Cë gin öcakö cihö.

17

Paulo opwonyo i Tecalonika

1 I karë na gin owok kí Ampipoli éka Apolonia, obino gini i Tecalonika, kany onwongo cinagoga k'Eyuda tye ië.

2 Paulo ödönyö i cinagoga kit n'onwongo en marö timö ködë, éka pi ceng Cabit k'Eyuda adek en obedo larö köp ködgü i kom köp na yaa kí i Cöc na Leng.

3 En obedo gönyö köp körë kí körë nakun nyutho ni Meciya myero ölim can éka ocer kí kin jö n'öthöö. Paulo okobo ni, "Yecu ni na an atye ka titö köp i kome bothwu ene Meciya."

4 Eyuda mökö n'owinyo oyee cë örübérë gini kí Paulo éka Cila. Pol jö Girik na lworo Obanga éka kí mon na döngö thon oyee gini.

5 Entö Eyuda mökö onwongo tye gini kí nyeko éka öcakö gini cökö jö mökö na kitegi reco kí the cuk, ögürë gini kanya acel éka öcakö gini kelo wöö na rac i pacö. Gin öcidhö i öt ka Jacon më rangö Paulo gin kí Cila, ek ekelgi yokö both lwak.

6 Entö i karë na gin ba onwongogi, öywaö gini Jacon éka utmego mökö nökënë i nyim elöc më pacö kí wöö ni, "Jö ni n'obedo gini kelo ayela i wi lobo thükü, obino gini ködë naka kany,

7 ëka Jacon ögamögï parë. Gin tye gïnï ka türö cïk ka Cija nakun kobo gïnï ni rwoth nökënë tye n'ecwodo ni Yecu."

8 ï karë na gïn owinyo köp ni, lwak ëka élöc më pacö obedo gïnï ki podho cwiny.

9 Cë öcakö gïnï gamö cïlling ki both Jacon ëka ki jö mökö cë dong ëwëkögï öcïdhö.

Paulo ëka Cila öcïdhö gïnï i Berea

10 Cucüth kiwor nön, jö n'oye ooro gïnï Paulo gin ki Cila ökö yo Berea. ï karë na gïn outhuno kunön, öcïdhö gïnï i cinagoga k'Eyuda.

11 Eyuda më Berea onwongo kitegi bëcö lõö Eyuda më Tecalonika, piën ögamö gïnï köp n'etero nïgi ki yom cwiny na bér, ëka nïnö ki nïnö gin onwongo rïpö Cöc na Leng më nënö ka köp na Paulo tye ka pwonyo tye atir.

12 Eyuda na pol oyee, ëka cwö na pol ki mon na pïrgi tek n'engeogi n'obedo jö Girik thon oyee gïnï.

13 ï karë n'Eyuda na bedo i Tecalonika öniang gïnï ni Paulo tye ka titö köp k'Obanga i Berea, gin thon öcïdhö kunön më rubo jii ëka ki cüpögï.

14 Cë cucüth jö n'oye otero gïnï Paulo ökö i dhö nam, entö Cila ëka Timoteo odong gïnï i Berea.

15 Jö n'oterö Paulo okelo gïnï en naka i Atene. Ki kunön gin odwogo cen ki köp na Paulo öcikögï ködë yo both

Cila ëka Timoteo ni myero gïn öcïdh bothe piöpïö ka twëre.

Paulo i Atene

16 Na Paulo onwongo pod tye ka kürö Timoteo ëka Cila i Atene, cwinye ocwer rwök më nënö ni pacö nön opong ki cal jwogi.

17 Pi manön, en obedo larö köp k'Eyuda ëka jö Girik na lworo Obanga i cinagoga, ëka ki jö mökö na en obedo nwongogï i thë cuk nïnö ki nïnö.

18 Ëryekö mökö më dul k'Epikurea ëka Citoik öcakö gïnï larö köp ködë. Jö nökënë openyo gïnï ni, "Ngö na ngat ni na twak atata mütö kobo kany?" Jö nökënë ögamö ni, "Nen calö en mütö twakö köp i kom obanga mörö na path." Gin okobo kömanön piën Paulo onwongo tye ka titö Emuth na Bér i kom Yecu ëka cer ka jö n'öthöö.

19 Cë gin otero en i nyim athuko më Areopago, nakun kobo gïnï nïnë ni, "Wan emitö ngeeno kit pwony na nyen na in itye ka pwonyo.

20 In itye ka kelo kit pwony mökö na papath i ithwa, ëka wan emitö nïang i tyenë."

21 ï karë nön jö më Atene ki wele na bedo kunön onwongo balö karëgi më twakö ëka winyo köp mörö na nyen.

22 Paulo öya malö cë ocung i nyim athuko më Areopago ëka okobo ni, "Un jö më Atene, an anënö ni i yodhi kibec ibedo unu edini rwök.

23 Piën ka an atye ka wowotha nakun arïpö gin na un iwörö, anwongo keno tyer n'ecöö ni, 'Both obanga na ba

ngere.' Dong gin na un iŵörö na ba ingeo unu énë an abino më titö niwu.

²⁴"Obanga n'ocweo wi lobo ki jami kibec na tye iie, énë Rwoth më polo ki lobo éka én ba bedo i udi n'égérö ki cingjö.

²⁵ Éka én ba mütö ni etii nñé gin mörö n'eyübö ayuba ki cing dhanö, calö én onwongo mütö gin mörö, piën én kikome énë müö kwö, yweo, éka gin na kibec.

²⁶ Én ocweo rok kibec më wi lobo ki kom dhanö acël, ek obed gini i wi lobo thükü. Én oyübö karë éka kabedo na myero gin ökwö iie.

²⁷ Obanga ötimö kömanön ek dhanö örangë, éka onwong én, othun bothe kadibed ni én ba bor ki both ngat acélacël ki kin onu.

²⁸ Pi én, wan ékwö i én, ewotho i én, ebedo i én, kite na jo mökö thon öcöö gini ki kin ecöcwu ni, 'Wan thon obedo éthiné.'

²⁹ "Pi manön, kite na onu obedo éthin k'Obanga, onu kür dök étham ni Obanga cal ki gol onyo ryal onyo kidi onyo cal mörö n'eyübö ki dirü éka ki thama ka dhanö.

³⁰ Obanga yam ba öparö pii dhanö i karë më kwia piny, éntö kobedini én dong öcikö ni jo më kabedo kibec myero ongut gini pii balgi,

³¹ pii én dong oketho nñö n'ebino ngölö ki köp both jo kibec më wi lobo ki köp atir nakun dong öyérö ngat na myero öngöl köp. Én thon omoko caden both jo kibec, ki cero Yecu ki kin jo n'öthöö."

³² Í karë na gïn owinyo köp i kom cer ka jo n'öthöö, jo mökö öcakö nywarö én, éntö jo nökénë okobo gini ni, "Wan émitö winyo köp ni dökü i ceng nökénë."

³³ Éka Paulo öya cë öwëkö athuko.

³⁴Jö mökö na nönök örübëre ködë éka ödökö gini jo n'oye. Í kin-gi onwongo tye iie Dionicio dhanö më Areopago éka dhakö mörö na nyängë Damaric, ki jo nökénë na pol.

18

Paulo i Korinti

¹ Kinge manön Paulo öya ki i Atene éka öcïdhö yo Korinti.

² Éka én onwongo Ayuda mörö na nyängë Akwila, n'enywölö i lobo Ponto, na pod onwongo odwogo ki i lobo Itali gin ki dhakö mërë Piricila. Piën Kalaudio ömio twëro ni Eyuda öya gini ökö ki i Roma. Cë Paulo öcïdhö më limögi

³ éka obedo bothgi. Én onwongo obedo atic këma calö gin éka otio kanya acël ködgi.

⁴ Í ceng Cabit k'Eyuda kibec én obedo larö köp i cinagoga më témö lökö thama k'Eyuda éka jo Girik.

⁵ Í karë na Cila éka Timoteo obino gini ki i Macedonia, Paulo ömio karë mërë kibec më titö köp k'Obanga nakun müö caden both Eyuda ni Yecu énë onwongo obedo Meciya.

⁶ Éntö i karë n'Eyuda opyem gini ki Paulo éka öcakö yanyö én, cë én öcakö tengö böng kome nakun kobo

bothgi nü, "Remowu obed i wiwu! An gira balna mörö ope. Cakëre tin cih köde anyim, an abino cihö both Erok."

⁷ Cë Paulo öya öcikhö yo pacö k'ecwö mörö na nyïng Tito Yucito, Arok na wörö Obanga na ödë cwöcwök ki cinagoga.

⁸ Kiricipac, atëla na lös cinagoga éka ki jö më ödë kibec oyee gini Rwoth, cë jö na pol më Korinti n'owinyo gini en, oyee éka ebaticagi.

⁹ Í nünö mörö acel i kiwor, Rwoth ötwak ki Paulo i anyuth éka okobo nünë nü, "Kür ibed ki lworo, entö bed ka twak, kür iling.

¹⁰ Piën an atye kanya acel kodi, éka ngat mörö ope na bino tímö gin mörö na rac i komi, piën an atye ki jö na pol i pacö ni."

¹¹ Cë Paulo obedo kunön mwaka acel ki dwethe abicel, nakun pwonyog i köp k'Obanga.

¹² Í karë na Galio obedo alöc më lobo Akaya, Eyuda mökö öcikëre gini kanya acel cë ömakö gini Paulo, éka etero en i nyim angöl-köp më apida.

¹³ Gin okobo nü, "Ecwö ni tye ka neeno jü më wörö Obanga i yoo na ba rwatere ki cikwa."

¹⁴ Entö i caa n'onwongo Paulo dong cwök twak, Galio okobo both Eyuda nü, "Winy unu Eyuda, ka onwongo koko ni ocung i kom tím mörö na rac onyo bal mörö na rac, onwongo bedo na bér an më winyo kokowu.

¹⁵ Entö kit na calö obedo peny na makö köp onyo nyïng mökö na dök i kom cik na mewu, un kikomwu inen unu kit më cobo. An ba abino bedo angöl-köp i kom köp na calö koth manön."

¹⁶ Cë en öryemög i ökö ki i nyim pido.

¹⁷ Éka gün kibec ölokëre i kom Cocitene, atëla më cinagoga, cë öcakö gini pwodo en i nyim pido. Entö Galio ba oketho cwinye ie.

*Paulo ödök cen i Antioquia
më Ciria*

¹⁸ Éka kinge Paulo obedo i Korinti pi karë mörö na nönök, cë öwëkö utmego éka ökwang ki mel më cihö i lobo Ciria. En önywakö gini yoo kanya acel ki Piricila éka Akwila. Na pod bara öcakö woth, Paulo ölyelö wie ki i Cenikeria, piën onwongo okwongo kwong.

¹⁹ Í karë na gün othuno i Epeco, Paulo öwëkö Piricila éka Akwila kunön, entö en öcikhö i cinagoga më larö köp kanya acel k'Eyuda.

²⁰ Í karë na gün openyo en nü obed bothgi pi karë mörö, entö en obino ökwérö ökö.

²¹ Entö i caa na en tye ka yaa öcikëre nü, "An abino dwogo cen bothwu ka Obanga ömitö." Cë öcakö kwang ki mel nakun yaa ki i Epeco.

²² Í karë na mel othuno i Cecaria, Paulo öcikhö yo Jerucalem më motho jö n'oye Kiricito éka öcakö dök cen yo Antioquia.

²³ Kinge tero karë mörö i Antioquia, Paulo ödök cen

nakun wok ki i Galatia éka Perugia nakun jingö cwiny élubkör Yecu.

Apolo opwonyo i Epeco

²⁴ Í karë nön Ayuda mörö na nyängé Apolo, n'obedo dhanö më Alegijandaria obino yo Epeco. Ën onwongo obedo écwö n'ökwanö rwök, na tye ki ngec na thuth i kom Cöc na Leng.

²⁵ Ën onwongo epwonyo i yoo ka Rwoth, cë obedo twak ki tekö éka opwonyo köp i kom Yecu atir kadü bed ni en onwongo ngeo köp i kom batica ka Jon kékën.

²⁶ Ën öcakö twak ki tek cwiny i cinagoga. Í karë na Piricila éka Akwila owinyo gini köp na en twakö, gin ocwodo en yo pacögï cë ömiö en öniang i yoo k'Obanga na bér rwök.

²⁷ Í karë n'Apolo onwongo mitö cihö yo lobo Akaya, utmego ödiö cwinye éka öcöö gini waraga both élubkör Yecu ek öjöl gini en. Í karë na en othuno kunön, en obino obedo më köny na thwönë both jö n'onwongo oye gini pii kica k'Obanga.

²⁸ Ën obino ölöö thama k'Eyuda atir i nyim lwak nakun nyutho ki i kom Cöc na Leng ni Yecu onwongo obedo Meciya.

19

Paulo i Epeco

¹ Í karë n'Apolo onwongo tye i Korinti, Paulo owok i yoo na tye i dyere lobo éka othuno

i Epeco. Ën onwongo élubkör Yecu mökö kunön

² éka openyogï ni, "Un yam inwongo unu Tipo Naleng i karë na un iyee Kiricito?"

Gin ögamö ni, "Pe, wan bara ewinyo ni Tipo Naleng thon tye."

³ Cë Paulo openyogï ni, "Koth batica mënë na un inwongo?"

Gin ögamö ni, "Batica ka Jon."

⁴ Paulo ögamö ni, "Batica ka Jon onwongo obedo batica më ngut. Ën okobo both jii më yee i kom ngat na tye ka bino ki körë, na manön ene Yecu."

⁵ Í karë na gin owinyo köp ni, cë ebaticagi i nyäng Rwoth Yecu.

⁶ Í karë na Paulo oketho cingë i komgi, Tipo Naleng obino i komgi cë gin öcakö twakö lëb na papath éka dwaropiny.

⁷ Wel cwö kibec onwongo römö apar ariö.

⁸ Paulo ödönyö i cinagoga éka obedo twak ki tek cwiny pii dwethe adek, nakun larö köp éka ywaö thamagi i kom ker k'Obanga.

⁹ Èntö jö mökö na ba yee n'odhing öcakö gini twakö köp na reco i kom yoo ka Kiricito i nyim lwak, cë Paulo öwëkögi éka öcihö k'élubkör Yecu. Ën obedo ka larö köp ködgï nïnö ki nïnö i öt kwan ka Tairana.

¹⁰ Man obedo timéré pii mwaka ariö, ek Eyuda éka jö Girik kibec na bedo gini i lobo Acia owiny gini köp ka Rwoth.

Awope ka Cekewa

¹¹ Obanga otio tango na
döngö kï i cïng Paulo,

¹² naka thon atame cïng
onyo böng n'ogudo ën, on-
wongo etero both etwoe cë
twogi cang ökö éka tipo na
reco thon yaa wékögï.

¹³ Eyuda mökô n'onwongo
rimo pïny nakun ryëmô gïni
tipo na reco kï i kom jïi,
ötämö gïni tic kï nyïng Yecu
më ryëmô cen kï kom jö na
cen ömakögï nakun kobo gïni
ni, "An aciköwu i nyïng Rwoth
Yecu, na Paulo pwonyo pïrë,
më donyo yokö kï i kome!"

¹⁴ Awope ka Cekewa abirö,
n'onwongo obedo alamdhök
na dit k'Eyuda, onwongo
thon tïmö gïni ni kömanön.

¹⁵ Entö i nïnö mörö acël tipo
na rac ögamö nïgi ni, "An an-
geo Yecu, éka thon an angeo
Paulo, entö un ibedo unu jö
mënë?"

¹⁶ Cë ècwö n'onwongo tipo
na rac tye i kome opye i komgï
éka ölöögï ökö. Ën ölwënyö
ködgï éka ömiögï öngwëcö
yökö kï i öt kotula nakun
remo cwer kï i komgï.

¹⁷ I karë na köp ni owinyere
both Eyuda éka jö Girik na
bedo gïni i Epeco, lworo öcakö
makögï rwök éka nyïng Rwoth
Yecu éwörö i rwöm na malö.

¹⁸ Jö na pol n'oye obino
gïni nakun tuco kanyalér tïm
mökö na rac na gin obedo ka
tïmö.

¹⁹ Jö na popol n'onwongo
obedo gïni ejwogi okelo gïni
bukegi më thyeth kanya acël
éka éwangögï i nyim lwak. I
karë na gin örïbö wel më

buke, cë enwongo römö wel
ciliing na nyïng elip pyer abic.

²⁰ I kit yoo ni, köp ka Rwoth
ömëdërë éka ödöngö kï tékö.

²¹ Kinge na köp ni kibëc
ötämërë ökö, Paulo omoko
thama mërë më cïdhö yo
Jerucalem nakun wok kï i
Macedonia éka Akaya. Ën
okobo ni, "Kinge na an abedo
kunön, an thon myero alim
Roma."

²² Ën ooro Timoteo éka
Eracito, cwö ariö n'onwongo
könyö ën më tio tic ka Rwoth
yo Macedonia, nakun ën
dong më bedo i lobo Acia pi
karë mörö na nönök.

*Arubaruba n'ötämërë i
Epeco*

²³ I karë nön ayela na
thwönë öcakérë i kom Yoo ka
Kiricito.

²⁴ Ècwö mörö na nyïngë
Demeterio athedh ryal, ën
thetho ryal yübü kï cal jwök
na dhakö na nyïngë Atemi cë
kelo kï lim na thwönë both
ëdirü tic cïng.

²⁵ Ën ocwodogï kanya acël
kï jö nökënë na tio koth tic
acël nön cë okobo bothgï
ni, "Un cwö, ingeo unu ni
lonyöwa yaa kï kom tic ni."

²⁶ Kobedi dong un inenö éka
iwinyo unu ni Paulo mörö ni
tye ka neeno jïi éka tye ka
miö jö na pol rwenyo ökö kï
i Epeco kany éka rwök mërë
i lobo më Acia thükül. Ën
tye ka kobo ni obanga na
dhanö öyübö ayüba ba obedo
obanga kikokome.

²⁷ Pathi döki cath kékën énë
tye na rac, entö naka thon öt
wörö obanga na pïrë tek më

Atemi bino bedo gin mörö na köny mérë ope, éka obanga na dhakö n'ewörö i lobo Acia éka i wi lobo thükü ebino kwanyö dheo mérë ökö."

²⁸ I karë na gïn owinyo köp ni, akémö ömakögï éka öcakö gïni redo nï, "Atemi ka jö Epeco dit rwök!"

²⁹ Cé arubaruba na thwönë örömö i pacö ökö. Jii ömakö Gayo éka Aricitako më Macedonia na yam wotho gïni ki Paulo kanya acël, éka gïn kibec ömwömërë ki cwiny acël i öt tuko.

³⁰ Paulo ömítö dönyö i kin lwak éntö élübkör Yecu öjükö en ökö.

³¹ Edite mökö thon më lobo Acia, nyikonei ka Paulo, ooro gïni köp nü kür ötäm më dönyö i öt tuko.

³² Athuko obedo k'arubaruba, jö mökö onwongo wöö gïni i kom gin acël, jö mökö i kom gin nökënë. Pol jii ba ongeo gïni thon ngö n'onwongo gïn tye iie kany nön.

³³ Eyuda mökö othwaro gïni Alegijanda anyim éka jö mökö ki kin lwak oredo gïni nakun ekobo nï en okob ngö na tye ka tümërë. Alegijanda öjükögï ki cïngë nakun mítö pido mérë i nyim jii.

³⁴ Éntö i karë na gïn öniang nï en onwongo obedo Ayuda, lwak kibec oredo ki dwön acël pi caa na römö arïö nï, "Atemi ka jö Epeco dit rwök!"

³⁵ Kinge, karan më pacö öjükö lwak ek öling gïni cé okobo nï, "Un jö më Epeco, nga na ba ngeo ki wi lobo nï pacö më Epeco enë gwökö öt wörö Atemi na dit rwök, éka ki

cal mérë na yam opodho ki wi polo?

³⁶ Pi manön, kite na pyem mörö ope i köp ni, un dong myero ibed unu moth, kür itim unu gin mörö k'abünyë.

³⁷ Un ikelo cwö ni kany, ba öyakö gïni gin mörö ki öt wörö jwök onyo yanyö obanga onu na dhakö.

³⁸ Ka cé Demeterio éka edirü tic cïng ewodhe tye gïni ki köp më adoth i kom ngat mörö, öt pido tye n'øyabëre éka élöc thon tye. Myero gïn oter i pido.

³⁹ Ka tye köp nökënë na un imítö kelo, manön myero etyeki i athuko më cik.

⁴⁰ Kit na tye ködë, pëkë twërô podho i kom onu pi arubaruba n'ötümërë tin. Pi köp nön onu ba étwërô nyutho tyen köp mörö më wöö n'ötümërë."

⁴¹ Kinge na dong ötwakö köp ni, en ökëthö athuko ökö.

20

*Paulo öcïdhö yo Macedonia
éka i lobo Grecia*

¹ 28I karë na dong wöö othum, Paulo ocwodo élübkör Yecu bothe, kinge cükö cwinygi éka mothogï, cé öcïdhö yo Macedonia.

² En obedo ka woth i lobo nön nakun cükö cwiny jii ki köp na pol, éka kinge obino othuno i lobo Grecia

³ kanya en obedo iie pi dwethe adek. En onwongo tye ka yübëre më kwang ki mel më cïdhö yo Ciria. I karë na en ongeo nü Eyuda öyübö gïni köp i kome, cé Paulo

ölökö thama mérë më dök cen
nakun wok kii i Macedonia.

⁴ Èn owothro kanya acél
kii Copater wod ka Piro më
Berea, Aricitako éka Cekondo
më Tecalonika, Gayo më
Derube éka Timoteo, kanya
acél kii Tukiko éka Tropimo
më lobo Acia.

⁵ Jö ni öcïdhö anyim éka
öküröwa gïni i Teroa.

⁶ Èntö wan ékwang kii i Pilipi
kinge Kwer më Ogati na
Thöbi ope iie éka kinge nünö
abic ethuno bothgi i Teroa,
kanya wan ebedo iie pü nünö
abirö.

Ecer Yutiko kii i thöö

⁷ Ii nünö më acél më cabit,*
wan ècökëré kanya acél më
poko ii ogati. Paulo obedo
twak kii jii, pién onwongo
dong mütö cïdhö ökö kodiko
mérë, cë en obedo twak naka
dingwor.

⁸ Tara na pol onwongo tye
ka lyel i öt na malö na wan
ècökëré iie.

⁹ Na Paulo onwongo
mëdérë amëda kii twak, athin
awobi na nyïngé Yutiko
onwongo obedo i derica cë
nünö ömakö wangë rwök éka
opodho piny kii i derica më öt
më adek na malö, cë etingo
en na dong öthöö.

¹⁰ Èntö Paulo oidho piny cë
oryebere i kom awobi nön,
éka öthünö cë öcakö kobo ni,
“Kür ipar unu, en pod kwö.”

¹¹ Cë Paulo öidhö ödök i öt
na malö, opoko i ogati éka
öcamö gïni kanya acél. Paulo
ömëdérë kii twak naka piny
oru cë öcakö cïdhö.

¹² Jii otero awobi nön na
kwö yo pacö éka na cwinyig
yom rwök.

Paulo örwatérë k'edong më Epeco

¹³ Wan ècïdhö anyim kii
mel cë ékwang naka i Acco,
kanya onwongo wan ebino
më kwanyö Paulo kii iie. Èn
onwongo öyübérë më woth kii
tyënë yo kunön.

¹⁴ È karë na en oromo ködwa
i Acco, èkwanyö en kii mel cë
wan ècïdhö ködë kanya acél
naka yo Mitilene.

¹⁵ Wan ècakö kwang kii
kunön éka kodiko mérë
ethuno kany mörö n'opimere
kii Kioc. Kinge nünö nön wan
ëngölö naka yo cula nam më
Camoc éka kinge nünö acél
wan ethuno i Miletto.

¹⁶ Paulo onwongo omoko
thama mérë më kwang kalö
Epeco akala, ek kür ébal caa i
lobo Acia, pién onwongo mütö
cïdhö piöpiö ek ka twérë ebed
i Jerucalem i nünö më Pentekot.

¹⁷ Èntö i karë na wan
ethuno i Miletto, Paulo ooro
köp yo Epeco më cwodo
edong ka jö n'oye Kiricito ek
obin gïni bothe.

¹⁸ È karë na gïn othuno, en
okobo nïgï ni, “Un ingeounu
kite na an akwö ködë i kinwu,
cakëré i nünö më acél na an
abino ködë i lobo Acia.

¹⁹ An atio both Rwoth kii
mwolo na dit rwök éka kii pii
wanga, kadï bed onwongo
atyé i atëmatëma na rac
n'Eyuda öyübö gïni i koma.

* **20:7** Nünö më acél më cabit obedo ceng cabit kite n'Eyuda kwanö kii nünö ködë.

²⁰ Un ingeo nü an ba abedo kï lworo më titö niwu köp mörö na twërö könyöwu, éntö an apwonyowu i kin lwak éka i öt kï öt.

²¹ An abedo kobo köp n'atir both Eyuda éka both jö Girik nü myero ongut gïnï kï kom bal cë ölokérë gïnï both Obanga éka obed gïnï kï yee i kom Rwothwa Yecu.

²² "Kobedini dong an atye ka cïdhö yo Jerucalem nakun abedo amabuc ka Tipo Naleng, na ba angeo ngö na bino tïmëré i koma kï kunön.

²³ Gin na an angeo kékën énë nü Tipo Naleng öcïka nü i pacö kibëc, buc éka pëkë tye ka kemo koma.

²⁴ Éntö kwöna anënö calö gin mörö na köny mérë ope kï botha, thwara ka atio ködë më tyeko tic na Rwoth Yecu ömïa—tic më miö caden më Emuth na Bër më kïca k'Obanga.

²⁵ "Kobedini dong an angeo nü ngat mörö ope kï kin jö na an abedo titö köp më Ker k'Obanga bothgi na dök bino nënöna.

²⁶ Pï manön, an akobo bothwu tin nü, ka kwö ka ngat mörö kï i kinwu bino rwenyo, remo mérë ope i wia.

²⁷ Pién ba abedo kï lworo më titö niwu gin na kibëc n'Obanga mitö nü inge unu.

²⁸ Gwökérë unu kenwu éka kï jö kibëc na Tipo Naleng okethowu më gwökögï. Bed unu ékwath ka jö k'Obanga n'oye Kiricito na én öwïlö kï remo ka Kiricito kikome.

²⁹ Angeo nü, ka dong ayaä ökö, orudi na ger bino bino i kinwu éka ba bino wëkë rom.

³⁰ Naka thon jö mökë kï kinwu bino gïnï yaa më lökë köp n'atir ökö ek öywa elübör Yecu i körgï.

³¹ Pï manön gwökérë unu! Po unu nü onwongo abedo coko ngat acélacél kï i kinwu na ba aling pï mwaka adek kiwor éka kiceng, nakun akok kï pii wanga.

³² "Kobedini dong an amiöwu i cïng Obanga éka kï köp më kïca mérë na twërö miö idöngö unu, éka bino miöwu inwongo gin na én öyübö më miö both jö kibëc na én ölönyögi.

³³ An ba abedo kï miti i kom ryal, gol onyo böngü ka ngat mörö.

³⁴ Un kï komwu ingeo unu nü an anwongo gin na kibëc na mítérë botha éka both jö na an atio ködgi kï tic më cïnga.

³⁵ I kom tic kibëc na an dong atio, anyutho niwu nü, kï tic na ték myero ököny jö na görü, nakun epo i kom köp na Rwoth Yecu kï kome okobo nü: 'Gum na thwönë tye i miö na löö gamö.'

³⁶ I karë na dong otyeko kobo köp nöñ, én orumo cöngë piñy ködgi kibëc éka ölegö.

³⁷ Gin kibëc okok kï pii wang-gi, nakun thünö gïnï ngut Paulo éka emotho én kï moth më mar.

³⁸ Gin n'ocwero cwinygi rwök énë köp na én okobo nü gïn ba dök bino nënö wangë. Cë ökwangö gïnï én i mel.

Woth ka Paulo yo Jerucalem

1 Kinge na dong epokere ködgï, wan ècakö kwang kï mel atir më cïdhö naka i Koc. Kodiko mërë wan ècidhö naka i Rodec, éka éya kï kunön ècidhö naka i Patara.

2 Ì karë na wan enwongo mel na cïdhö yo Poiniki, ècakö dönyö ië éka èmëdërë kï wothwa.

3 Ì karë na wan ènènö cula nam më Caiprac ewok kï kuk-wap mërë, éka èkwang naka i lobo Ciria. Wan ethuno i Turo, kanya myero èkwany yec ökõ kï i mel.

4 Ì karë na wan etye kunön enwongo èlübör Yecu, ebedo bothgi pi nïnö abirö. Tipo Naleng ömiögï öjükö Paulo ni kür öcidh yo Jerucalem.

5 Èntö i karë na nïnöwa örömö më yaa, wan edwogo i mel. Èlübör Yecu kibec mëd kï mon éka èthinö owotho ködwa më yaa kï i pacö më cïdhö i dhö nam éka kï kunön erumo cöngwa më lëga.

6 Kinge mothogï, wan ècakö dönyö i mel, éka gïn ödök cen yo pacö.

7 Wan èmëdërë kï wothwa më yaa kï i Turo, cë ethuno i Potolemai éka emotho ut-mego cë ebedo ködgï pi nïnö acël.

8 Kodiko mërë na wan eyaa, ècidhö ethuno i Cecaria éka ebedo i öt ka Pilipo atit Emuth na Bér na yam èn ngat acël i kin jö abirö.*

9 Èn onwongo tye k'anyira mërë angwën na bara

ënyömögï na gïn obedo ed-warpiñy.

10 Ì karë na wan ebedo kunön pi nïnö mörö na popol, adwarpiny na nyïngë Agabu obino n'öya kï i Yudea.

11 Èn obino yo bothwa, cë ökwanyö del më wang pyer Paulo, otweo kï cïngë éka tyenë cë okobo ni, "Tipo Naleng okobo ni, 'Man ènë kite n'Eyuda na tye i Jerucalem bino tweno won del ni éka ebino miö èn i cïng Erok.'"

12 Ì karë na wan ewinyo köp ni, wan kanya acël kï jö na kunön èkwaö Paulo ni, "Kür öcidh yo Jerucalem."

13 Cë Paulo ögamö ni, "Pïngö ikok éka ibalö unu cwinya? An ayübara pathi pi tweco kékën èntö naka thon më thöö i Jerucalem pi nyïng Rwoth Yecu."

14 Ì karë na èn ba oyeo thamawa, wan ècakö wëkö èn nakun ekobo ni, "Ek gin na Rwoth mitö ocobere."

15 Kinge nïnö nön gïni, wan ècakö yübëre më cïdhö yo Jerucalem.

16 Èlübör Yecu mökö n'öya gïni kï i Cecaria owotho ködwa naka i pacö ka Munacon, kanya myero wan ebed ië. Èn onwongo obedo dhanö më Caiprac na yam cön öcakö bedo alübör Yecu.

Paulo othuno i Jerucalem

17 Ì karë na wan ethuno i Jerucalem, utmego öjölöwa gïni kï yom cwinya.

18 Kodiko mërë Paulo öcidhö ködwa both Yakobo,

* **21:8** Dhanö acël i kin jö abirö n'onwongo éyérö na calö akony tic i Jerucalem.

ëka edong kibëc onwongo tye gini.

¹⁹ Kinge mothogï, cë ën okobo bothgï körë kï körë tic n'Obanga otio na pol i dhö tic mérë i kin Erok.

²⁰ I karë na gin owinyo köp ni, gin öpako Obanga. Cë okobo gini both Paulo ni, "Ömïnwa, in inen, Eyuda elip adi na dong oye gini, ëka gin kibëc lübö cik ka Muca rwök.

²¹ Ènìangögï ni in ipwonyo Eyuda kibëc na bedo gini i kin Erok ni ek öwëk gini lübö cik ka Muca ökö, nakun ikobo nügi ni kür olir èthinögï onyo olüb gini cikwa.

²² Ngö na myero wan étim? Gin bino winyo ni in ibino.

²³ Cë dong tím gin na wan ekobo nini. Wan etye kï cwö angwën kany na dong okwongere gini ökö.

²⁴ Woth kï jö nön ëka ilonyiri kanya acél ködgï, cë icül lim na mítërë, ek ölyël gini wigï ökö. Cë jö kibëc bino ngeeno ni köp n'onwongo ebedo ka twakö i komi obedo twodo, éntö in kikomi itye ka gwökö cik.

²⁵ Éntö pi Erok n'oye, wan etyeko cöönö waraga bothgï kï köp na wan emoko ni, kür öcam gini cem n'ëtyérö both cal jwogi, kür öcam gini remo, kür öcam gini ringo leeni n'ëdëö adëa ëka ökwër gini tím ölyang ökö."

²⁶ Kodiko mérë Paulo otero jö nön ëka ölönyérë kanya acél ködgï. Cë öcidhö gini i öt k'Obanga më miö ngec i kom nïnö dwe na nïnö më lönyérë

bino jik ië ëka mü ebino miö pi ngat acélacël.

Emakö Paulo

²⁷ I karë na nïnö abirö më lönyérëgi dong cwök thum, Eyuda mökö n'oya gini kï i lobo Acia önënö gini Paulo kï i öt k'Obanga. Gin orubo lwak kibëc ëka ömakö gini en,

²⁸ nakun redo gini na ték ni, "Un jö më Icarael, könywa unu! Man ëné ècwö na tye ka pwonyo jii na rac i kabedo kibëc, i kom jö na mëwa, cik na mëwa, naka kabedo ni. Ëka na dong lös kibëc en okelo jö Girik i öt k'Obanga, cë öpyëdö kabedo na leng ni."

²⁹ Gin okobo ni köman pién gin onwongo önënö Tropimo n'obedo dhanö më Epeco na tye kanya acél kï Paulo i pacö, ëka öthamö ni onyo Paulo ëné okelo en i öt k'Obanga.

³⁰ I pacö kibëc orubere ëka jii obino gini kï ngwëc kanya acél ëka emakö Paulo cë öywaö gini en kï i öt k'Obanga, cúcüth oloro gini dholokek ökö.

³¹ Na gin dong onwongo mítö neko en, köp othuno both adit acikari ni pacö më Jerucalem kibëc onwongo tye ka rubere.

³² En öcakö kwanyö edite cúcüth ëka acikari cë öngwëcö ködgï yo both lwak. I karë na lwak önënö gini adit ëka acikari mérë, gin öwëkö pwodo Paulo ökö.

³³ Adit acikari obino ëka ömakö en, cë ömiö twëro ni etwe en kï jégéle ariö. Cë openyo lwak ni, "Nga ënön, ëka öbalö ngö?"

³⁴ Jö mökō ki kin lwak oredo gïni nakun köpgï ba rwaterë, jö nökënë kobo man éka jö nökënë kobo gin na path. Kinge n'adit acikari ba öniang i kom köp kikome pi wöö n'obedo na thwönë, ömiö twérö niëk eter Paulo i lai.

³⁵ I karë na Paulo othuno më idhö malö, gero ka lwak ömëdérë rwök naka acikari otingo en atinga i wi baagi.

³⁶ Lwak n'obedo ka lübögï ömëdérë gïni ki wöö nakun redo gïni ni, "Nek en ökö!"

Paulo opido i nyim lwak

³⁷ I karë n'onwongo acikari dong cwök dönyö ki Paulo i lai, Paulo openyo adit acikari ni, "Atwérö twak kodi?"

En ögamö ni, "In ingeo lëb Girik?

³⁸ Pathi in enë dhanö më Ejip na yam öcakö jem éka otero enek elip angwën yökö i thim?"

³⁹ Paulo ögamö ni, "An abedo Ayuda, dhanö më Taruco i lobo Cilicia, anywöli më pacö na pire ték rwök. Öma! Akwai imia atwak ki lwak."

⁴⁰ Adit acikari oyeo éka Paulo öcakö cung malö cë öjükö lwak ki cingë. I karë na gin kibec dong öling, en öcakö twak ködgï i lëb Iburu.

22

¹ "Utmegona éka jö ka bebena, winyunu pido na an akelo bothwu."

² I karë na gin owinyo ka en tye ka twak ködgï i lëb Iburu, gin öcakö ling moth.

Cë Paulo okobo ni,

³ "An abedo Ayuda, énywöla i Taruco na tye i Cilicia, éntö adöngö i pacö ni, apwonya obedo Gamaliel. An epwonya rwök i kom cik ka kwaröwa. An abedo ki cwiny më wörö Obanga kite na un thon itye unu ködë tin.

⁴ An abedo yelo élübkör Yoo ni naka inekogï, éka twoe cwö ki mon i buc.

⁵ Alamdhök na Dit éka jö kibec na bedo i öd okiko obedo gïni caden-na. An thon agamö waraga ki bothgi më cïdhö yo both utmegogï na tye i Damaciko, éka acidhö yo kunön më kelo jö ni na calö emabuc yo Jerucalem ek émiigï pwod.

Paulo okobo kite na en elökëre ködë

⁶ "I karë na an atye ka woth, na dong acwök ki Damaciko na caa abicel më kiceng dong cwök römö, tar na ryeny rwök öya ki wi polo athura éka ömënya ögura dyere.

⁷ An apodho pïnyi ngöm éka awinyo dwön mörö na kobo ni, 'Caulo! Caulo! Pïngö itye ka yelona?'

⁸ "An agamö ni, 'In ìnga, Rwoth?'

"En ögamö ni, 'An Yecu më Najaret, na in itye ka yelo.'

⁹ Ewodha önenö gïni tar éntö ba öniang gïni dwön ngat n'onwongo tye ka twak köda.

¹⁰ "Cë an agamö ni, 'Rwoth ngö na myero atim?'

"Rwoth okobo ni, 'Yaa malö éka icidh yo Damaciko. Ebino kobo nini gin na kibec n'ëmiö niëk itim ki kunön.'

11 Ewodha öpëa kï cïnga yo Damaciko piën ryëny ka tar onwongo oneko wanga ökö.

12 “Ecwö mörö na nyïngë Anania obino më nënöna. Ën onwongo obedo dhanö na wörö Obanga nakun lübö cïk ka Muca kibëc éka dhanö n'Eyuda kibëc na bedo kunön wörö.

13 Ën obino ocung i ngeta éka okobo ni, ‘Ömëra Caulo, ek wangi öyabërë! Éka i caa nön cüçüth wanga öyabërë cë anënö en.

14 “Cë en okobo ni, ‘Obanga ka kwere onu oyeri ek inge ngö na en mütö, inen Ngat na Kite Atir éka iwiny köp na en twakö.

15 In ibino bedo acaden mérë both jö kibëc i kom ngö na in inenö éka iwinyo.

16 Kobedi dong ngö na in itye ka kürö? Yaa malö, ek ebatica in éka élwök balni nakun icwodo nyïng Rwoth.’

17 “I karë na an adök yo Jerucalem éka onwongo atye i lëga i öt k'Obanga, acakö nénö anyuth

18 éka anënö Rwoth ka tye ka twak na kobo nina ni, ‘Yaa ökö piöpiö iwék Jerucalem, piën gïn ba bino yeo köp më caden-ni na in itye ka kobo i koma.’

19 “An agamö ni, ‘Rwoth, jö ni ngeo gïn ni an abedo ka woth i cinagoga kibëc më pwodo jö n'oye i komi éka më terogi i buc.

20 Éka i karë n'eneko acaden-ni Citipwano, an onwongo acung kunön nakun acwakö ngö n'ötimérë éka

agwökö naka thon böng ka jö n'onwongo tye ka neko en.’

21 “Cë Rwoth okobo nina ni, ‘Apë, an abino oroni yo kanya bor both Erok.’

Paulo éka adit acikari më Roma

22 Lwak obedo ka winyo Paulo naka en okobo köp ni. Cë gïn öcakö redo kï dwön na malö ni, “Nek unu en ökö! Ën ba opore më bedo na kwö i lobo!”

23 Na gïn onwongo tye ka wöö nakun bolo böng-gï éka ékirö apua malö,

24 adit acikari ömjö twëro ni ek eter Paulo i lai. Ën öcikö ni ek epwod kï del éka openy en pïngö ji onwongo tye ka wöö i kome ni kömanön.

25 I karë na gïn otweo Paulo ek epwod kï del, en okobo both adit acikari n'ocung kany nön ni, “Cik yeo ni epwod ngat mörö n'obedo dhanö më Roma na bara engölö köp ölöö en?”

26 I karë n'adit acikari owinyo köp ni, en öcikhö okobo both adit acikari nökënë. Ën openyo ni, “Ngö na in ibino tümö? Ecwö ni obedo dhanö më Roma.”

27 Adit acikari öcikhö both Paulo éka openyo ni, “Kob nina, in ibedo dhanö më Roma?”

En ögamö ni, “Eyo, an abedo.”

28 Cë adit acikari okobo ni, “An acülö wel na thwönë rwök më bedo dhanö më Roma.”

Entö Paulo ögamö ni, “An énywöla anywöla ië.”

29 Jö n'onwongo öyübërë më penyo en ojer gïn cen

cucüth. Adit acikari thon obedo kï lworo i karë na en öniang ni Paulo na en etweo obedo dhanö më Roma.

Paulo i nyim athuko më öd okiko k'edong

³⁰ Kodiko mérë, kite n'adit acikari onwongo mítö niang i tyen köp kikokome n'omio Eyuda odotho gini Paulo, en ögonyö Paulo cë öcikö ni ek edite elamdhök éka athuko më öd okiko k'edong kibec ögüré gini. Cë en okelo Paulo éka omio ocung i nyimgi.

23

¹ Paulo öcikö wangë i kom athuko më öd okiko k'edong n'ocökérë gini cë okobo ni, "Utmegona, an abedo kwö na cwinya bér i nyim Obanga naka tin."

² Alamdhök na dit na nyingë Anania omio twero both jö n'ocung i nget Paulo ek odhong gini dhögë.

³ Cë Paulo okobo nineni, "Obanga thon bino dhongoni, in kor öt n'epuo na tar! In ibedo kany nön më ngölö köp nüna na lübëre kï cik, nakun in kikomi itürö cik më miö twero ni myero edhonga!"

⁴ Jö n'onwongo ocung gini i nget Paulo okobo ni, "In ba iparö më yanyö Alamdhök na Dit k'Obanga?"

⁵ Paulo ögamö ni, "Utmegona, an ba angeo ni en obedo Alamdhök na Dit, pién ecöö ni, 'Kür itwak gin mörö na rac i kom alöc na löö jö na megi.'"

⁶ Entö ka Paulo öniang ni jö mökö kï kin-gi obedo

Ecadukayo éka jö nökënë obedo gini Eparicayo, cë en oreo kï i athuko më öd okiko k'edong ni, "Utmegona, an abedo Aparicayo, wod k'Aparicayo. An acung kany më témöna kï pido pién atye kï gen i kom cer ka jö n'othöö."

⁷ I karë na en okobo köp ni, apokapoka öcakérë i kin Eparicayo k'Ecadukayo éka athuko opokere ök.

⁸ Pién Ecadukayo kobo gini ni cer mörö ope éka emalaika onyo tipo gini thon ope entö Eparicayo yee gini i komgi kibec.

⁹ Cë wöö obedo na thwönë rwök éka epwonye mökö më cik n'onwongo obedo gini Eparicayo öya malö cë opyem gini na kobo ni, "Wan ba enwongo gin mörö na rac i kom dhanö ni, cë ka tipo onyo malaika ene ötwak kädë?"

¹⁰ Pyem ömèdérë rwök naka adit acikari onwongo dong lwor ni gin römö yeyécö Paulo na thithinö. En omio twero both acikari më cihö yo piñy bothgi ek ökwany gini Paulo ök kï bothgi kï tekö éka ekel en i lai.

¹¹ Kodiko mérë i kiwor, Rwoth ocung i nget Paulo cë okobo ni, "Dii cwinyi! Kite na in imio caden i koma i Jerucalem, cë myero in thon imii caden i Roma."

Yüb më neko Paulo

¹² Na dong piñy oru, Eyuda mökö öyübö gini köp kanya acel nakun kwongere gini ni gin ba ebino cem onyo madhö gin mörö naka ka wang eneko gini Paulo.

¹³ Jö n'øyübö gïnï köp ni welgi onwongo kadhö pyer angwën.

¹⁴ Gïn öcidhö okobo both elamdhök na dito éka edong nï, "Wan etyeko kwongere na tek nï ba ebino camö onyo madhö gin mörö naka ka wan eneko Paulo.

¹⁵ Pi manön un kanya acël k'athuko më öd okiko k'edong myero iter unu köp both adit acikari ék okel én i nyimwu na calö pod ibino unu mëdérë më rangö köp mérë na bér. Wan eyübërë ökö më neko én na bara én othuno na cwök kany."

¹⁶ Éntö i karë n'okeo ka Paulo owinyo köp n'eyübö ni, én öcidhö i laï cë okobo ni Paulo.

¹⁷ Cë Paulo ocwodo adit acikari acël éka okobo nïnë nï, "Ter athin awobi ni both adit acikari na lööwu, én tye kï köp mörö na én mütö kobo nïnë."

¹⁸ Éka én otero awobi ni both adit acikari na löögï.

Adit acikari okobo nï, "Paulo n'obedo amabuc ocwoda cë ökwa nï ék akel awobi ni bothi piën én tye kï köp mörö na én mütö kobo nini."

¹⁹ Adit acikari na löögï ömakö cïng athin awobi ni cë otero én thenge éka openyo nï, "Ngö na in imütö kobo nïna?"

²⁰ Én okobo nï, "Eyuda mökö oyere gïnï dong më penyoni ék ikel Paulo diki i nyim athuko më öd okiko k'edong, na calö gïn pod ebino mëdérë më rangö köp mérë na bér.

²¹ Éntö in kür iyee nïgï piën tye jö na kadhö pyer angwën kï kin-gï na tye ka kürö én i yoo. Gin okwongere ökö nï ba ebino camö onyo madhö gin mörö naka ka wang n'eneko gïnï Paulo. Gin dong öyübërë ökö kobedini, tye gïnï ka kürö ngö na in ibino kobo i kwacgi."

²² Adit acikari na löögï ömïö athin awobi ni öcidhö nakun cikö én nï, "Kür ikob both ngat mörö nï in ikobo köp ni botha."

Eköbö Paulo both Pilice

²³ Cë adit acikari na löögï ocwodo edite wi acikari ariö éka okobo nïgï nï, "Yüb unu acikari mia ariö, wegi angole pyer abirö éka wegi töng mia ariö ék öcidh gïnï yo Cecaria caa adek më kiwor.

²⁴ Yüb unu thon angole nï Paulo öngwëc ködë ék ethun ködë na bér both adit Pilice."

²⁵ Cë adit acikari na löögï öcöö waraga köman:

²⁶ An Kalaudio Liciac amothi in adit Pilice.

²⁷ Ecwo ni Eyuda énë ömakö éka onwongo dong cwök neko gïnï, éntö an acidhö bothgi k'acikarina cë alarö én kï i cïng-gï, piën onwongo aniang nï én obedo dhanö më Roma.

²⁸ An onwongo amitö ngeno ngö na gïn odotho én ië, cë akelo én i nyim athuko më öd okiko k'edong-gï.

²⁹ An anwongo nï edotho én k'adoth na makö cïkgï, éntö köp mörö onwongo ope na römö miö èngölö nïnë thöö onyo tweno én i buc.

³⁰ Ì karë n'ënïanga nü gïn öyübö köp më neko ècwö ni, an abünyö oro ën ökô bothi cùcùth. An thon acikö jö n'odotho ën më müöni adothgï na gïn odotho kï ën ködë.

³¹ Cë acikari owothro gïnï kï Paulo i kiwor naka etero ën yo Antipatiric kite n'ëcikögï ködë.

³² Kodiko na pïny dong oru, gïn öcakö dök yo laï éka èwëkö wegi angole më woth ködë.

³³ Ì karë na wegi angole othuno gïnï i Cecaria, gïn ömïö waraga both adit Pilice éka ömïö gïnï Paulo thon bothe.

³⁴ Adit Pilice ökwanö waraga cë openyo Paulo lobo na ën öya kï ië. Ì karë na ën öniang nü Paulo öya kï i Cilicia,

³⁵ cë ën okobo nü, "An abino winyo pidoni ka jö n'odothi obino gïnï kany." Éka ën dong ömïö twërô nü myero ègwök Paulo i laï na yam Erode ögérö.

24

Paulo i nyim Pilice

¹ Kinge nünö abic alamdhök na dit na nyïngë Anania obino k'edong k'Eyuda éka apid-köp mörö na nyïngë Terutulo, më müö adothgï i kom Paulo i nyim adit Pilice.

² Ì karë n'ecwodo Paulo, Terutulo öcakö dotho ën i nyim Pilice nakun kobo nü, "Wan ebedo kï kuc pï karë na lac i thë lòc na megi éka neno na megi okelo nüwa alökalöka na pol i lobo ni.

³ Ì kabedo kibëc éka kï kit yodhi na papath, adwong Pilice, wan iwa yom i komi rwök.

⁴ Èntö na bara atero na bor rwök, akwai ék ibed kï kïca më winyo köpwa na cecek.

⁵ "Wan enwongo nü dhanö ni obedo ngat na kelo ayela. Èn obedo kelo arubaruba i kin Eyuda na tye i lobo thükü. Èn thon obedo atëla wi dul jö më Najaret,

⁶ éka ën thon ötämö pyëdö naka öt k'Obanga, cë wan èmakö ën ökô.

⁷ Èntö adit acikari na nyïngë Liciac obino bothwa kï gero na thwönë rwök cë ökwanyö ën ökô kï i cïngwa.*

⁸ In itwërô nwongo köp na tür më adothwa ka in kikomi ipenyo ën."

⁹ Eyuda öribërë gïnï i kom adoth nön éka omoko gïnï nü köp ni kibëc tye atür.

¹⁰ Ì karë n'adit Pilice öcimö Paulo nü ék ötwaki, ën ödök ië nü, "Adwong, angeo nü ibedo angöl-köp më rok ni pi mwaka na pol cë an cwinya yom më pido i nyimi.

¹¹ In itwërô nwongo piiöpöö nü an pod athuno i Jerucalem na nünö apar ariö bara opoth më cïdhö wörö Obanga.

¹² Jö n'odotha ba onwongo gïnï nü an atye ka pyem kï ngat mörö i öt k'Obanga onyo rubo lwak i cinagoga kibëc onyo kany mörö nökënë kï i pacö.

¹³ Éka gïn ba twërô moko bothi köp më adoth na gïn kobedini tye ka kobo i koma.

* **24:7** Baibul nökënë ba ketho tyeng ni.

¹⁴ Ëntö an aye ni an awörö Obanga ka kwere onu na calö alüb kör Yoo, na gïn cwodo ni obedo dul mörö. An aye i kom gin na kibéc n'ëcöö i cik ka Muca éka më k'edwarpiny,

¹⁵ éka an thon atye kï gen i kom Obanga, na gïn kikomgï thon yeo gïni ni cer ka jö na kitegi atür éka kï jö na kitegi ba tye atür bino bedo tye.

¹⁶ Pï manön ömio an i karë kibéc atëmö më bedo na cwinya leng i nyim Obanga éka dhanö.

¹⁷ "Kinge mwaka na pol, an abino acidhö yo Jerucalem më tero mïc both jö na mëga n'obedo gïni écan éka më miö tyér both Obanga.

¹⁸ I karë na an atio tic ni, gïn onwonga i dyekal öt k'Obanga na dong atyeko lönyeré. Lwak onwongo ope i ngeta éka ayela mörö thon ope.

¹⁹ Ëntö Eyuda mökö n'öya gïni kï i lobo Acia, n'onwongo myero obed gïni i nyimi kany éka okel gïni adoth, ka gïn tye kï köp mörö i koma.

²⁰ Onyo jö ni na dong tye gïni kany öcak kobo gïni bal na rac na gïn onwongo i koma i karë na an acung i nyim athuko më öd okiko k'edong,

²¹ kono ka köp acël ni kékën, na an akok iie i karë na an acung i nyimgi, köp na makö cer ka jö n'öthöö enë ömio an tin acung i nyimi më ngölö köp i koma."

²² Cë Pilice n'onwongo tye kï ngec n'örömö i kom Yoo ka Rwoth, öjükö pido më mëdérë anyim éka okobo ni, "An

abino ngölö köpni ka Liciac adit acikari obino."

²³ En ömio twëro both adit acikari më gwökö Paulo i buc ëntö më miö en bedo abonge ayela mörö éka oyeo ni nyikonei mérë më miö könny na mitérë bothe.

Paulo i nyim Pilice éka Drucila

²⁴ Kinge karë mörö n'opoth, Pilice obino kï dhakö mérë Drucila n'onwongo obedo Ayuda. En ocwodo Paulo éka obedo ka winyo ka en twak i kom yee i Kiricito Yecu.

²⁵ I karë na Paulo tye ka twakö köp i kom kite atür, gwökérë kën éka ngölö-köp na tye ka bino, Iworo öcakö makö Pilice éka okobo ni, "Manön örömö pi caa ni! In itwëro cihö. Kadök anwongo karë cë abino cwodoni."

²⁶ I caa nön thon en obedo kï gen ni Paulo twëro miö en lïm mörö, pï manön en obedo ka cwodo Paulo jwijiwi éka twak ködë.

²⁷ Kinge na mwaka ariö opoth, Poricio Pecito oleo ka tyen Pilice. Ëntö Pilice öwëkö Paulo i buc piën en onwongo mitö ni Eyuda öpwö en.

25

Paulo i nyim Pecito

¹ I karë na Pecito obino i lobo n'ëmiö ni en ölöö, kinge nïnö adek en öya kï i Cecaria öcidhö yo Jerucalem.

² Cë élamdhök na dito éka etëla k'Eyuda öcidhö gïni bothe éka okelo gïni adothgi i kom Paulo.

³ Gin ökwaö Pecito nü ek ötim nügi bér ek ékob Paulo ökö piöpiö yo Jerucalem, piën gin onwongo öyübérë më kürö en i wanga yoo ek enek ökö.

⁴ Pecito ögamö nü, "Etye ka gwökö Paulo i Cecaria, éka an kikoma thon acwök cïdhö yo kunön.

⁵ Ek jö mökö ki i kin etélawu obin owoth gini köda ek oketh adothgi i kome ki kunön ka en ötimö gin mörö na rac."

⁶ Kinge tyeko nünö aboro onyo apar ködgı, en ödök cen yo Cecaria, kodiko mérë en obedo piny i öt pido éka ömiö twérö ni ek ekel Paulo i nyime.

⁷ I karë na Paulo othuno, Eyuda n'oya gini ki i Jerucalem ocung n'ögürö gini en dyere k'adoth na pol i kome, na gin ba römö moko nü adoth nön tye atir.

⁸ Cé Paulo öcakö pido mérë ni, "An ba abalö gin mörö i kom cik k'Eyuda, onyo i kom öt k'Obanga, onyo i kom Cija."

⁹ Entö Pecito onwongo mitö yomo cwiny Eyuda cé openyo Paulo ni, "In irömö cïdhö yo Jerucalem ek acidh angöl köp i kom adoth ni ki kunön?"

¹⁰ Paulo ögamö ni, "An dong acung ökö i nyim pido ka Cija, kanya myero éngöl köpna ie. An ba abalö gin mörö i kom Eyuda, kite na in kikomi thon ingeo na bér.

¹¹ Ka an abalö bal mörö na römö ngölö nina thöö, an ba akwérö më thöö. Entö ka adoth n'Eyuda ni oketho gini i koma obedo köp twodo, ngat mörö ope ki twérö më müona i

cïng-gi. Adwökö kokona both Cija!"

¹² Kinge na dong Pecito otyeko larö köp kanya acel k'ëmii thama mérë, en ögamö ni, "In ikok më pido i nyim Cija, ibino cïdhö yo both Cija!"

Paulo i nyim Agiripa éka Berinice

¹³ Kinge nünö na nönök, rwoth Agiripa éka Berinice othuno gini i Cecaria më jölo Pecito.

¹⁴ Kite n'onwongo gin bino tero nünö na pol kunön, Pecito önywakö köp ka Paulo gin ki rwoth nakun kobo ni, "Ecwö mörö tye kany na Pilice obino öwëkö na calö amabuc.

¹⁵ I karë na an acidhö yo Jerucalem, élamdhök na dito éka edong k'Eyuda okelo gini adoth i kome, éka openya gini më ngölö nünë thöö."

¹⁶ An akobo nügi ni, "Ba obedo cik ka jö më Roma më miö ngat mörö i cïng jö n'odotho en, na bara émiö en karë më cung ködgı i pido, ek en opid pido mérë ködgı pi gin n'edotho en ie.

¹⁷ I karë na gin obino köda kany, an ba agalara k'adoth, entö kodiko mérë abedo piny i öt pido cé amiö twérö ni ek ekel en.

¹⁸ Entö i karë na jö n'odotho en öya malö më twak, gin ba odotho en i kom bal mörö n'onwongo an atye ka thamö.

¹⁹ Entö obedo gini larö köp i kom dinigi éka i kom ngat mörö na nyängë Yecu na yam öthöö na Paulo kobo ni kwö.

²⁰ Rangö kör köp nön ölöa ökö, ömiö apenyo ka en römö

26

Pido ka Paulo i nyim Agiripa

¹ Cë Agiripa okobo both Paulo nü, "In itye kï twërö më twak piri keni." Cë Paulo otingo cïngë éka öcakö pido mërë nakun kobo nü,

² "Rwoth Agiripa, an tin atye kï gum më cung i nyimi më gamö adoth kibëc n'Eyuda odotha gïnï ië,

³ pïen an angeo nü in ingeo na bér kite më thëkwarö k'Eyuda éka kï köp mökö na gïn larö i kin-gï. Pi manön, an dong akwai ék idii cwinyi iwiny köpna.

⁴ "Eyuda kibëc ngeo gïnï kite na an akwö ködë cakëre i karë na pod abedo athin, anaka i acaki më kwöna i lobona kikome éka thon i Jerucalem.

⁵ Gïn öcakö ngenona pi karë na lac éka gïn twërö moko caden ka mitö gïnï, gïn ngeo nü an onwongo abedo Aparicayo, nakun alübö dul më diniwa na cik mërë tek rwök.

⁶ Éka kobedi dong pi gen-na i kom gin n'Obanga öcikö both jö ka kwere onu, enë ömio etye ka pidona tin.

⁷ Man enë cikëre na kakä onu apar ariö tye gïnï kï gen më nénö nü ocobere kite na gïn bino tic n'Obanga kï cwinyigï kibëc kiceng éka kiwor. Rwoth Agiripa, abedo pi gen ni enë ömio Eyuda tye ka dothona.

⁸ Pïngö jö mökö kï kinwu ba yee nü Obanga twërö cero jö n'öthöö?

cïdhö yo Jerucalem ék écïdh èngöl köp më adoth ni kï kunön.

²¹ Èntö i karë na Paulo okok nü ék Alöc na Dit enë obin öngöl köp mërë, cë amiö twërö ni myero ègwök én i buc naka ebin eter yo both Cija."

²² Cë Agiripa okobo both Pecito nü, "An kikoma amitö winyo köp ka dhanö ni."

Pecito ögamö nü, "Diki kodiko ibino winyo."

Paulo i nyim Agiripa

²³ Kodiko mërë Agiripa gïn kï Berinice obino gïnï kï thwön dheo éka ödönyö gïnï i öt më ngölö-köp kanya acël k'edite acikari më rwöm na malö éka étela më kin pacö. Kï twërö ka Pecito, ekelo Paulo.

²⁴ Cë Pecito okobo nü, "Rwoth Agiripa éka kï jö kibëc na tye ködwa kany, nén unu dhanö ni! Eyuda kibëc öbakö gïnï dhögï botha i Jerucalem éka i Cecaria kany, na wöö gïnï nü én ba opore më kwö.

²⁵ An ba anwongo nü ötümö gin mörö na römö ngölö nïnë thöö, èntö kite na én okok pi Alöc na Dit, an thon amoko më tero én yo Roma.

²⁶ Èntö an ape kï gin mörö na myero acöö i kome both Alöc na Dit më Roma. Pi manön akelo én i nyimwu kibëc, cë rwök mërë i nyimi in rwoth Agiripa ék ka onu epenyo én, anwong gin mörö më acöa.

²⁷ Pién anënö nü köny mërë ope më tero amabuc mörö ka ba enyutho köp mörö më adoth i kome."

⁹ “An kikoma athamö nii myero atüm gin na kibec n'onwongo twérë më jém i kom nyäng Yecu më Najaret.

¹⁰ Man énë ngö na an abino atüm i Jerucalem. An atweo jö k'Obanga na leng na pol i buc nakun atio kii twérö na an anwongo kii both élamdhök na dito éka i karë n'enekogii, an abolo kwir nii myero éngöl niigï thöö.

¹¹ Pi karë na pol an amiö epwodogi i cinagoga kibec nakun adiögï më yanyö nyäng Yecu. An onwongo ager i komgi éka thon acidhö i peci k'erok më yelogi.

Paulo ötwakö köp më lökëre mérë

¹² “In nünö mörö an onwongo atye ka cihö yo Damaciko kii twérö éka kii or k'élamdhök na dito.

¹³ Na dong caa abicël cwök römö, Adwong, i caa n'onwongo an atye i wanga yoo, an anënö tar n'öya kii i polo, n'aryëny löö ceng ökö, öryëny öcarö komwa kanya acel kii jö na an awotho ködgï.

¹⁴ Wan kibec epodho piny, éka awinyo dwön mörö na kobo nüna i lëb Iburu nii, ‘Caulo, Caulo, pïngö itye ka yelona? Bedo na tek nini më gwéenö lëb dinö.’

¹⁵ “Cë an apenyo nii, ‘In ìnga Rwoth?’

“En ögamö nii, ‘An Yecu na in itye ka yelo.

¹⁶ Kobedi yaa malö éka icung. An anen bothi më yéröni më bedo aticna éka më bedo acaden i kom gin na in inënö kii botha éka gin na an

abino nyutho bothi i karë më anyim.

¹⁷ An abino laröni kii both jöwu éka kii both Erok. An aori yo bothgi

¹⁸ më yabö wang-gi éka lökögï kii i cöl piny yo tar, éka kii kom tükö ka Catan yo both Obanga, ék obin onwong gini kica i kom bal éka onwong gini kabedo i kin jö n'Obanga ölönyögï pï yee i koma.’

Caden ka Paulo both Eyuda éka Erok

¹⁹ “Cë dong rwoth Agiripa, an ba abino akwérö gin anyutha n'öya kii i polo.

²⁰ An atütö köp më acaki both jö na tye i Damaciko éka thon both jö na tye i Jerucalem naka kii jö kibec na tye i Judea éka thon both Erok nii jö kibec myero ongut gini kii kom balgi éka ölokérë gini both Obanga ék onyuth gini atir nii gin dong élökérë kii timö tic na bëco na gin tio.

²¹ Pi köp ni énë ömio Eyuda mökö obino ömaka gini kii i öt k'Obanga éka ötämö gini më nekona.

²² Èntö Obanga ögwöka naka tin, éka an acung kany më miö caden cakérë kii both jö na thinö naka both jö na dito. An ba apwonyo gin mörö na path kii köp n'edwarpiny éka Muca okobo nii bino timërë—

²³ Meciya myero ölim can éka én bino cakö cer kii kin jö n'öthöö, én bino kelo tar k'Obanga both Eyuda éka both Erok.”

Paulo ötämö ywanö thama k'Agiripa ék oye Yecu

²⁴ Ì karë na Paulo tye ka mëdérë kï pido mérë, Pecito oredo kï dwön na malö nï, “Paulo, in ipo, kwan rwök ömiö idökö apoa.”

²⁵ Èntö Paulo ögamö nï, “Adwong Pecito an ba apo, gin na an atwakö tye atir éka obedo më niäng.

²⁶ Èka rwoth Agiripa ngeo köp ni kibëc. An atwak abonge lworo piën angeo nï köp ni kibëc en tye kï ngec ië. Ba tye köp mörö n'ötimëre i müng.

²⁷ Rwoth Agiripa, in iyee köp k'edwarpiny? An angeo nï iyee.”

²⁸ Cë Agiripa okobo both Paulo nï, “In ithamö nï i kom caa na nönök itwëro lököna më bedo Akiricito?”

²⁹ Paulo ögamö nï, “Kadï bed pi caa na nönök onyo na lac, an alëgö both Obanga nï pathi in kékën èntö naka jö kibëc na tye gini ka winyo köpna tin ek obed gini calö an, na path kï jégëlë ni.”

³⁰ Cë rwoth Agiripa, adit Pecito, Berinice éka kii jö kibëc öya malö éka öcidhö gini.

³¹ Na gin tye ka cihö yökö, ötwak kën-gi éka oyere gini nï, “Ècwö ni ba ötimö gin mörö na rac na römö ngölö nïnë thöö, onyo cihö i buc.”

³² Èka Agiripa okobo both Pecito nï, “Dhanö ni onwongo myero ègony ökö ka onwongo en ba okok më pido i nyim Cija.”

27

Paulo öcakö woth më cihö

i Roma

¹ Ì karë na dong emoko nï myero wan èkwang më cihö yo Itali, Paulo éka emabuc nökënë èmiögï i cing adit acikari na nyïngë Julian, na lõö nget dul mia acél kï kin dul acikari n'ecwodo nï Augucito.

² Wan èdönyö i mel n'öya kï Adramitio n'onwongo cwök kwang më cihö i dhö nam më lobo Acia, éka wan ècidhö i dhö nam, wan k'Aricitako dhanö më lobo Macedonia na tye i Tecalonika.

³ Kodiko mérë wan ethuno i Cidon, éka Julian ki cwinye na bér i kom Paulo, öwëkö en më cihö both nyikonei mérë ek ömii gini en gin na en mitö.

⁴ Ki kunön, wan dök éya më kwang cë ewok i nget cula nam më Caiprac piën yamö onwongo yelowa.

⁵ Ì karë na dong èkwang èngölö dye nam na lac n'opimere kï dhö nam më Cilicia éka Pampulia, wan ethuno i Mira na tye i Licia.

⁶ Ki kunön adit acikari onwongo mel n'öya kii Alegijandaria na tye ka cihö yo Itali, cë ömiiwa èdönyö ië.

⁷ Wan èkwang momoth pi nïnö na pol, éka ethuno kï ték i nget lobo Kuniduc. Ì karë na yamö öyüköwa ökö më mëdérë atir, wan èkwang eroko nget cula nam më Kurete n'opimere kii Calamone.

⁸ Wan eroko nget cula nam më Kurete kï ték cë ethuno i kabedo n'ecwodo nï Kabedo na Bér na mel cung ië, na cwök kii pacö më Lacea.

⁹ Wan onwongo ébalö caa na pol éka kwang thon onwongo ödökö na rac, piiën nïnö na dit më Rio Kec* onwongo oplot ökö. Cë Paulo ötwak k'edite më mel nï,

¹⁰ "An anënö nï wothwa ni bino bedo na rac, éka bino rwenyo jami na pol kï i mel, pathi yéc kékén éntö kwö onu thon."

¹¹ Éntö adit acikari nakaka winyo ngö na Paulo okobo, én ölübö thama k'adwö mel éka më ka won mel.

¹² Kite na kanya mel cung ië nön onwongo ba bér i karë më ngicö, jö na pol öthamö nï myero ékwang écöh gïni anyim, kï gen më thuno i Poinike ek etyek karë më ngicö kunön. Man onwongo obedo ka cungo ka mel na tye i Kurete, na nyime okemo kukwap kuthö éka kukuju kuthö.

Yamö oyengo mel na rac

¹³ Í karë na yamö n'öya kï kukwap öcakö kudho momoth, gïn öthamö nï man dong örwatérë kï ngö n'onwongo gïn mítö. Cë öcakö gïni ywanö gin na jükö mel ökö kï i pii, éka öcakö gïni kwang nakun roko gïni nget cula nam më Kurete.

¹⁴ Na bara önyikö na bor, yamö na ger n'ecwodo nï, "Yamö më kukuju kukidë" öcakö kudho kï ték n'öya kï i cula nam.

¹⁵ Yamö ömakö mel éka opango wie na ba dök twëro kemo kukur yamö cë éwékö

mel më cïdhö kanya yamö mítö terowa ië.

¹⁶ Na dong wan eroko nget cula nam na tidi n'ecwodo nï Kauda, wan étëmö kï ték më larö yeya.[†]

¹⁷ Í karë n'etic më mel öywaö yeya, otingo gïni kï i pii cë ekelo i mel, gïn öcakö miö thöl owok kï i thë mel cë etweo ködë kanya acél. Gïn onwongo tye kïlworo nï onyo érömö dönyö gïni i kwoo më Ciritic i dhö nam më Libia, cë gïn öcakö lyano gin na jükö mel pïny ék ömii mel owoth momoth nakun yamö énë kólö.

¹⁸ Kodiko mérë na yamö na ger ömëdérë kï kudho rwök, cë etic më mel öcakö gïni yuno jami ökö kï i mel i öd pii.

¹⁹ I nïnö më adek, öcakö gïni yuno jami kom mel mökö i öd pii kï cïng-gï.

²⁰ Wan ebedo pi nïnö na pol na ba énënö wang ceng onyo cér, éka yamö ömëdérë kï kudho na rac. Í ajiki mérë wan éjalö gen kibëc më larö kwöwa.

²¹ Kinge na jö n'onwongo tye i mel obedo gïni pi nïnö na pol na ba camö gïni gin mörö, Paulo öya malö ocung i nyimgi cë okobo nï, "Un onwongo myero iwinya unu ék kür éya kï i Kurete, kono ba epodho i can ni éka kï rwenyo jami.

²² Éntö kobedini akwaöwu ni idii unu cwinywu, piiën kwö ka ngat mörö kï i kinwu ba bino rwenyo, éntö mel énë

* ^{27:9} I koth karë ni, kwang i nam onwongo bedo na ték piiën yamö nwongo ger.

† ^{27:16} Yeya onwongo obedo më kwang ka pëkë tye i mel.

bino bal ökö.

²³ Wono kiwor malaika k'Obanga na an abedo dhanö mérë éka na an atio píre, obino éka ocung i ngeta

²⁴ cë okobo ni, 'Paulo, kür ibed kï lworo. In myero icung i nyim Cija, éka Obanga otyeko miö kwö ka jö na in iwotho ködgï kibëc bothi.'

²⁵ Dong bed unu na cwinywu ték, piën atye kï yee i kom Obanga ni gin na kibëc bino tímérë kite na én okobo nïna ködë.

²⁶ Ëntö wang na mel ot-womere kï cula nam mörö."

Mel ötür

²⁷ I kiwor më nïnö më apar angwén, yamö onwongo pod terowa arii i dyere nam më Adria, cë na dong cwök römö dingwor, etic më mel opimo niëcwök thuno gïni i ngöm.

²⁸ I karë na gïn opimo thuth më i nam cë onwongo gïni ni römö tyëlö mia acël kï pyer ariö. Kinge na gïn dök önyïnyikö na nönök, opimo gïni cë onwongo ni thuth mérë römö tyëlö pyer abungwén.

²⁹ Gïn onwongo lworo ni mel twëro twomo kidi kï öd nam cë öcakö gïni bolo gin na jükö mel angwén kï kungee, éka öcakö gïni lëga ni ek pïny oru.

³⁰ I karë n'etic i mel onwongo tye gïni ka rangö yoo më lüü ökö kï i mel, gïn otero yeya i nam na calö mítö gïni bolo gin na jükö mel kï kunyime.

³¹ Cë Paulo okobo n'adit acikari éka acikari gïni ni, "Ka

etic më mel ba obedo gïni i mel onu ba ebino kwö."

³² Cë acikari öcakö gïni ngölö thöl na makö yeya éka ewëkö opodho i öd pii.

³³ I karë na pïny dong mítö ruu, Paulo öcükö cwinygi kibëc më cem. Én okobo ni, "Pi nïnö apar angwén n'opoth, un ibedo kï thwön par na dit éka ba icamö unu gin mörö.

³⁴ Kobedini akwaöwu icam unu cem mörö pi bedo na kwö. Ngat mörö ope kï kinwa na bino rwenyo yer wie mörö acël."

³⁵ Kinge na dong okobo köp ni, ökwanyö ogati, öpwöyö Obanga i nyimgi éka opoko ië cë öcakö camö.

³⁶ Gïn kibëc cwinygi öjing éka öcakö gïni cem.

³⁷ Jö kibëc na tye i mel onwongo tye 276.

³⁸ I karë na dong ocemo gïni oyeng, oyuo gïni ngano kibëc i öd nam ek mel obed na yot.

³⁹ Na pïny dong oru, gïn ba ongeo lobo nön, éntö önenö gïni dhö nam n'opong kï kwoo, kanya gïn omoko thamagi më tero mel ië ka twërë.

⁴⁰ Öngölö gïni gin na jükö mel, cë ewëkö ölüny ökö i nam, i caa nön thon ögonyö gïni thöl na makö gin n'ëdwö kï mel. Cë öngabö gïni böngü na tidi kï kunyime ek yamö ömakï, éka ewëkö mel öcidhö na kemo dhö nam.

⁴¹ Ëntö i karë na gïn othuno kanya pii më nam romo ië, cë nyim mel otwomere kï kwoo na tye i thë pii éka mel omoko

ökö na ték, thërë thon ötür na thiithinö kï tékö ka pii.

⁴² Acikari öcakö gïnï yübü köp më neko emabuc ëk mörö kür ökwang ölü ökö.

⁴³ Ëntö adit acikari onwongo mítö larö kwö ka Paulo, cë öjükögï kï yübgï nön. Ën ömiö twërö nï jö na ngeo kwang öcak gïnï pye i pii më cïdhö i lak nam. ⁴⁴ Jö nökënë ölüb körgï i wi bao onyo i wi ngïny mel n'ötütüra. Cë öwëkö gïn kibëc othuno yo dhö nam na bér.

28

Paulo i cula nam më Malta

¹ Í karë na wan dong ethuno na bér i dhö nam, enwongo nï cula nam nön ecwodo nï Malta.

² Jö na bedo i cula nam nön obedo gïnï kï cwiny më kïca i komwa, éka öjölöwa gïnï na bér. Oobo gïnï mac piën köth onwongo öcakö cwe éka pïny thon onwongo ngic.

³ Paulo öcökö rïdö yen cë obolo i mac, éka thwol omwomo pï lyetho ka mac cë ödölërë i cïngë.

⁴ Í karë na jö na bedo i cula nam nön önenö gïnï thwol n'ödölërë i ngut cïng Paulo, cë öcakö gïnï twak kën-gï nï, "Adyer ècwö ni myero obed anek. Kadï bed öbük kï i nam, Angöl-köp atir ba bino yeo nï nïnë më bedo na kwö."

⁵ Ëntö Paulo ötengö thwol obolo i mac na ba ötimö en kï gin mörö na rac.

⁶ Jïi obedo ka kürö nakun thamö gïnï nï badë cakö kwot onyo müö en thöö athura. Ëntö gïn ökürö pï karë na lac éka önenö gïnï nï gin mörö na rac ba ötimëré i kome éka öcakö lökö thamagi ökö cë okobo gïnï nï en obedo obanga.

⁷ Í nget nam kany nön onwongo tye pwothi ka Pubilia adit na lõö cula nam. Ën öjölöwa éka ögwököwa na bér pï nïnö adek.

⁸ Í karë nön apap ka Pubilia onwongo kome lïth, obuto pïny na two lyetho ömakö éka cadö remo. Paulo öcïdhö bothe më nénö en, kinge läga oketho cïngë i kome, éka öcangö en.

⁹ Kinge na man dong ötimëré, etwoe nökënë kibëc na tye gïnï i cula nam obino gïnï bothe éka öcang gïnï.

¹⁰ Gïn ömiöwa wörö kï mïc na pol éka i karë na wan ècakö woth, gïn döki okelo jami na mítërë më könyöwa i wothwa.

Paulo othuno i Roma

¹¹ Kinge dwethe adek, wan ëmëdëré kï wothwa kï mel mörö na dit n'oya kï i Alegijandaria n'obedo i cula nam nön i karë më ngicö na tye kï cal wi rudi k'obanga.*

¹² Wan ethuno i Cirakuca éka ebedo kunön pï nïnö adek.

¹³ Éka kï kunön wan éya ethuno i Regio. Kinge nïnö acël yamö na yaa kï kukwap okudho cë i nïnö më ariö wan ethuno i Puteoli.

* **28:11 Rudi k'obanga** na nyïng-gï Kactor éka Pulak. Both jö më Roma onwongo obedo obanga më woth. Më nénö cërgï n'onwongo etero na calö gin na bér pï jö na kwang kï mel.

¹⁴ Kï kunön wan enwongo utmego mökö n'öjölöwa gïni më bedo bothgi pï cabit acël. Kinge wan éya éka ethuno i Roma.

¹⁵ Utmego na tye kunön owinyo gïni ni wan etye ka bino, gïn obino naka i cuk k'Appioc, éka kabedo n'ecwodo ni Öt Wele Adek më rwatérë ködwa. I caa na Paulo önenögï, öpwöyö Obanga éka cwinye ödökö na ték.

¹⁶ I karë na wan ethuno i Roma, gïn oyeo ni Paulo obed i ödë kënë éka k'acikari na gwökö en.

Paulo ötitö köp k'Obanga i Roma

¹⁷ Kinge nïnö adek, Paulo ocwodo étela k'Eyuda kanya acël. I karë na gïn öcökérë, en okobo bothgi ni, "Utmegona, kadi bed ba atümö gin mörö na rac i kom jö onu onyo i kom cik ka kwere onu, an onwongo émaka kï i Jerucalem éka émia i cing jö më Roma.

¹⁸ Jö më Roma ötemö gïni rïpö köp i koma éka onwongo mitö gïni gönyöna, piën ba onwongo gïni bal mörö i koma na römö ngölö nïna thöö.

¹⁹ Éntö i karë n'Eyuda ökwérö gïni ökö, ömiö an atero kokona më pido both Cija, kadi bed onwongo ape kï miti më ketho adoth i kom jö na mëga kikome.

²⁰ Pi tyen köp ni, enë ömiö an akwaö më nénö éka më twak kodwu ek akob niwu körë kï körë ni an etwea kï jégélë piën an ayee ni gen ka jö Icarael otyeko bino dong ökö."

²¹ Gïn ögamö ni, "Wan ba enwongo waraga mörö n'oya kï Yudea na makö köp i komi, éka ngat mörö ope kï kin utmego n'omiö ngec onyo n'okobo köp mörö na rac i komi.

²² Éntö wan émitö winyo kite na thamani tye ködë, piën wan engeo ni jö na tye gïni i kabedo kibec twak gïni na rac i kom dul ni."

²³ Gïn öyübö më rwatérë kï Paulo i nïnö nökënë, éka jö na pol obino gïni bothe i öt kanya onwongo en bedo ië. Cakérë kodiko naka kothyeno en obedo moko caden éka kï gönyö tyen köp më ker k'Obanga éka ötemö më lökö thamagï i kom Yecu kï cik ka Muca éka kï cöc k'edwarpiny.

²⁴ Jö nökënë oyeo gïni köp na en ötwakö, éntö jö nökënë ba obino oyee.

²⁵ Gïn ba oyere i kin-gü këngi éka öcakö gïni këth kinge köp na Paulo ötwakö ni, "Tipo Naleng yam okobo köp n'atir both kwerewu nakun wok kï dhö adwarpiny Icaya ni,

²⁶ " 'Apë both jö ni éka ikob nïgi ni,

"Un ibino winyo éntö ba ibino niang unu ië.

Un ibino nénö éntö ba ibino unu ngeno."

²⁷ Piën cwiny jö ni ödökö na nwang,

ithgï odhing ba winyo pïny,
éka ömiö wang-gü ökö.

Cë dong wang-gü ba nénö pïny,
éka ithgï ba winyo,
éka cwinygi thon ba niang

ëka ba römö lökërë gïnï botha
ëk acang-gï.'

²⁸ "Pï manön amütö nï inge
unu nï larë ni na yaa kï both
Obanga dong ëmïö ökö both
Erok, ëka gïn bino winyo."

²⁹ Ì karë na ën okobo köp
ni, Eyuda öya öcïdhö gïnï ökö
nakun pyem gïnï rwök i kin-gï
kën-gï.[†]

³⁰ Pï mwaka ariö Paulo
obedo kunön ì ödë na ën
opango ëka obedo jölö jö kibëc
na bino gïnï bothe.

³¹ Ën obedo ka titö köp më
ker k'Obanga ëka pwony ï
kom Rwoth Yecu Kiricito. Ëka
ngat mörö ba ötämö më jükö
ën.

[†] **28:29** Baibul nökënë ba ketho tyeng ni.

Waraga më acël na Paulo öcöö both jö Korinti 1 Jö Korinti Köp na ut i waraga ni

Waraga më acël na Paulo öcöö both jö Korinti onwongo öcöö më tyeko pëkō më kwö k'Ekiricito éka kï yee n'onen kï both jö n'oye Kiricito na Paulo öcakö i Korinti. I karë nön Korinti onwongo obedo pacö na dit ka jö Girik n'öökö kwa kaka na papath na bedo iie, obedo pacö na dit më Roma na tye i Akaya. Korinti onwongo engeo rwök i kite më cadhö wil, awaka më thékwarö, tic më ölyang n'onya rwök, éka kï kwa dini na pol.

Köp k'akwëna Paulo na pирë ték onwongo tye i kom pëkō na calö apokapoka, tüm më ölyang i kin jö n'oye Kiricito, peny i kom miti më kom éka nyom. Köp më kwö n'opore, kite na jö n'oye Kiricito myero obed gïni ködë, mïc më Típo Naleng éka köp më cer. Ki neno na thwönë, Paulo onyutho kit n'Emuth na Bér twak ködë i kom pëkō ni gïni.

Cura 13, na nyutho mar na calö mïc k'Obanga na pирë ték na en mïö both jögë, obedo köp na ngere rwök i buk ni.

Moth n'öya kï both Paulo

¹ Waraga ni öya kï both Paulo n'eyérö kï miti k'Obanga më bedo akwëna ka

Kiricito Yecu, éka kï both ömïn onu Coctene.

² Wan etye ka cöönö both jö k'Obanga n'oye Kiricito na tye i Korinti, bothwu jö n'Obanga otyeko lönyöwu i Kiricito Yecu, éka ocwodowu më bedo jö na leng, kanya acël kï jö na tye i kabedo kibëc na cwodo nyïng Rwoth onu Yecu Kiricito n'obedo Rwothgi éka më onu.

³ Ék Obanga Apap onu éka Rwoth Yecu Kiricito ömïïwu kica éka kuc.

Paulo ömïö pwöc both Obanga

⁴ Karë kibëc an amiö pwöc both Obangana pï kïca mëre na en ömïöwu i Kiricito Yecu.

⁵ Pï bedowu i Kiricito idökö unu élönyö dong i yodhi kibëc. Itye unu dong kï ngec éka kite më twak kibëc na bër,

⁶ pïen köp na wan epwonyo i kom Kiricito ödönyö na thuth i cwinywu.

⁷ Kobedi dong un itye kï mïc kibëc më Típo na un imítö na calö itye ka kürö unu karë më nyutho Rwoth onu Yecu Kiricito.

⁸ En bino miöwu icung na ték naka i ajiki ék gin mörö obed n'ope n'edothowu ködë i nïnö na Rwothwa Yecu Kiricito bino dwogo.

⁹ Obanga, n'ocwodowu më rïbëre kanya acël kï Wode Yecu Kiricito Rwoth onu, obedo Obanga na genere.

Apokapoka n'obedo i kin jö n'oye Kiricito

¹⁰ Abakö dhöga bothwu utmegona, kï nyïng Rwoth onu Yecu Kiricito, ni un kibëc

myero iyere unu kenwu i köp acël ek kür imii unu apokapoka obed tye i kinwu éntö nöthérë unu i cwiny éka thama acël.

¹¹ Utmegona, jö mökö n'oya ki i pacö ka Koloe okobo gini botha ni dha tye i kinwu.

¹² Gin na an atye ka kobo ene: Jö mökö ki kinwu tye ka kobo ni, "An abedo dhanö ka Paulo." Jö nökënë kobo ni, "An abedo dhanö k'Apolo," onyo ni, "An abedo dhanö ka Kepa,"* onyo ni, "An abedo dhanö ka Kiricito."

¹³ Kiricito opokere? Onwongo Paulo eguro i kor yath aria pírwu? Ngat mörö tye i kinwu n'ebatica ki nying Paulo?

¹⁴ An apwöyö Obanga piien Yam an ba abatica ngat mörö ki kinwu na path ki Kiricipac éka Gayo,

¹⁵ ek ngat mörö kür okob ni ebatica en ki nyingga.

¹⁶ (Eyo, an thon abatica jö mö pacö ka Citipwanu, éntö an ba apo ni abatica ngat mörö nökënë.)

¹⁷ Piën Kiricito ba oora mö batica jii, éntö mö titö Emuth na Bér, éka pathi ki ryekö ka dhanö, ek kür omii thoo ka Kiricito i kor yath aria obed gin na könny mérë ope.

Kiricito enë Tékö éka Ryekö k'Obanga

¹⁸ Köp i kom yath aria obed köp mö mingo both jö na tye ka rwenyo, éntö ki both onu jö n'Obanga tye ka larö, obed tékö k'Obanga.

¹⁹ Ecöö Yam ni,
"Abino balö ryekö ka jö na ryek,
éka abino kethö ngec ka jö na ngeo piny ökö."

²⁰ Cé dong eryekö kara ut gini kwene? Epwony Cik ka Muca ut gini kwene? Jö na pyem mö karë ni ut gini kwene? Obanga ba ölokö ryekö mö lobo ni ödökö mö mingo?

²¹ Pi ryekö k'Obanga ömio jii ba ongeo en ki ryekogi, éntö Obanga otio ki köp mö mingo na wan etitö mö larö jö na yee.

²² Eyuda penyo gini pi anyuth mö tango, éka jö Grecia rangö gini ryekö.

²³ Éntö ka wan etitö ni Kiricito onwongo eguro i kor yath aria, nwongo obedo gin mörö na rac ki both Eyuda, éka ki both Erok, nwongo obedo köp mö mingo.

²⁴ Éntö both Eyuda éka Erok n'Obanga ocwodogii mö bedo jögë, Kiricito obedo tekö k'Obanga éka ryekö k'Obanga.

²⁵ Gin n'ëthamö ni obedo mingo k'Obanga, ryek löö ryekö ka dhanö, éka gin n'ëthamö ni obedo görü k'Obanga, tek löö tekö ka dhanö.

²⁶ Utmegona, tham unu i kom kite n'onwongo itye unu ködë i karë n'ecwodowu. Jö na pol ki kinwu onwongo ba ryek gini i kite mö lobo ni, polwu onwongo ba obedo wegi twër éka polwu ba obedo wegi dheo.

* **1:12 Kepa** Manön Petero. **1:19** Icaya 29:14

²⁷ Ëntö Obanga öyérö jö na jii kobo ni ming gini, më miö lewic both jö na thamö ni gin éryék. Obanga öyérö jö na görü më miö lewic both jö na ték.

²⁸ Obanga öyérö jö mökö më rwöm na piny na jii caö ni könygi ope, naka thon jami mökö n'ope, ek etii ködgü më dwökö piny jami na jii kobo ni pürgi ték,

²⁹ ek ngat mörö kür öwakérë i nyim Obanga.

³⁰ Obanga enë ömiiowu ikwö unu i Kiricito Yecu, n'ödökö ryékö onu n'oya ki both Obanga. Pi Kiricito, ömii Obanga ökwanö onu ni kite onu atir, ömii onu ebedo jö na leng éka ögonyö onu ki kom bal.

³¹ Pi manön, kite n'ëcöö ködë i Cöc na Leng ni, "Ngat mörö na mitö wakérë, myero öwakérë i Rwoth."

2

¹ I karë na an abino bothwu, utmegona, an ba abino ki ryékö onyo twak mörö na malö më kobo niwu müng* i kom Obanga.

² Piën an onwongo ba amitö ngeeno gin mörö i karë na an atye i kinwu, na path ki Yecu Kiricito kékén éka thöö méré i kor yath aria.

³ An abino bothwu na an atye ki görü, ki lworo éka ki myël kom rwök.

⁴ Twakna éka titö köpna onwongo ba obedo më ryékö éka köp na ywaö thama, éntö më nyutho tékö më Tipo,

5 ek yeewu kür ocung i kom ryékö ka dhanö, éntö i kom tekö k'Obanga.

Ryékö na yaa ki both Obanga

⁶ Wan étwakö köp më ryékö i kin jö n'otengo i cwinygi, éntö pathi ryékö më karë ni onyo ryékö k'elöc më karë ni, na gin kikomgi dong tye ka rwenyo ökö.

⁷ Éntö wan étwakö ryékö k'Obanga më müng, ryékö n'onwongo ékanö ökö éka ryékö n'Obanga öyübö më kelo ni onu dheo na bara wi lobo öcakérë.

⁸ Ba tye elöc mörö më karë ni n'oniang ië, kono yam gin öniang, kono ba oguro ginii Rwoth won dheo i kor yath aria.

⁹ Éntö kite n'ëcöö ködë ni, "Gin na wang ba önenö, ith ba owinyo, thama ka dhanö ba ögamö gin n'Obanga öyübö pi jö na marö en."

¹⁰ Éntö Obanga ömii Tijo Naleng otuco both onu.

Tijo Naleng rangö jami kibec, naka thon müng k'Obanga na thuth.

¹¹ Nga na ngeo thama ka dhanö nökënë, na path ki cwiny na tye i dhanö nön kékén? I yoo acël nön, dhanö mörö ope na ngeo thama k'Obanga, na path ki Tijo k'Obanga kékén.

¹² Onu ba égamö cwiny më lobo, éntö égamö Tijo Naleng n'oya ki both Obanga,

ëk éniang i kom mïc n'Obanga
ömiö onu nono.

¹³ Man énë ngö na wan
ëtwakö, wan ba ëtwakö köp
n'epwonyo kï ryëkö ka
dhanö, éntö köp na Típo
Naleng opwonyowa ködë,
nakun pwonyo köp më Típo
n'atir both jö na tye kï Típo.

¹⁴ Dhanö na ba oye Kiricito,
ba twëro gamö ngö na Típo
k'Obanga miö, piën kï bothe
obedo gin mörö më mingo,
ëka én ba twëro niang ië piën
koth gin nön éniang ië kï Típo.

¹⁵ Dhanö na tye kï Típo
niang jami kibëc, éntö én
kikome, ngat mörö ope na
twëro niang i kome.

¹⁶ Kite na Cöc na Leng kobo
ni,
“Nga na twëro ngeo thama ka
Rwoth
ëk opwony én?”

Entö onu etye kï thama ka
Kiricito.

3

*Apokapoka i kin jö n'oye
Kiricito*

¹ Utmegona, i karë na an
atyé bothwu ba atwak kodwu
na calö jö na dong tye kï Típo,
éntö atwak kodwu na calö jö
na tye kï kit kwö më lobo, na
calö éthiñö na töcö i Kiricito.

² Yam apidhöwu kï cak,
pathi kï cem na têték, piën
onwongo ba itwëro unu cem,
kadi thon kobedini pod bara
irömö unu camö cem na têték,

³ un pod itye kï kit kwö
më lobo. Piën un pod itye
k'adïnga i kinwu éka idha unu
kenwu, manön ba nyutho ni

un pod itye unu kï kit kwö më
lobo? Ba pod itye unu ka lübö
kite ka dhanö?

⁴ Ka jö mökö kï kinwu
kobo ni, “An abedo dhanö
ka Paulo,” éka jö nökënë ni,
“An abedo dhanö k'Apolo,”
ba nwongo un pod ibedo unu
dhanö adhana?

⁵ Kara Apolo énë nga?
Paulo énë nga? Wan énë etic
n'omiö iyee unu Emuth na
Bér, kite na Rwoth opoko kï
tic both ngat acélacël.

⁶ An apidhö kodhi, Apolo
öönyö pii ië, éntö Obanga
omiö ödöngö.

⁷ Dong kadi ngat n'opidhö
onyo ngat n'öönyö pii, gin
kibëc ba obedo gin mörö éntö
Obanga kékën énë miö jami
döngö.

⁸ Dhanö n'opidhö éka dhanö
n'öönyö pii, gin kibëc tio pi
gin acël. Ngat acélacël bino
nwongo öcara mërë na röm
aröma kï tic na én otio.

⁹ Piën wan ebedo etic kanya
acël k'Obanga, un ibedo unu
pwodho k'Obanga, éka thon
ibedo unu gedo k'Obanga.

¹⁰ Pi gum k'Obanga n'ëmia,
omiö yam an acakö thë öt calö
agedo n'obedo adirü, dhanö
mörö nökënë tye ka gedo i
wie. Entö dhanö acélacël
myero ögwökëre i kite na én
gedo ködë.

¹¹ Piën ngat mörö ope na
twëro cakö thë öt nökënë na
path kï man na dong ècakö, na
énë Yecu Kiricito.

¹² Entö ka ngat mörö ogedo
i wi acaki thë öt nön kï gol
onyo kï ryal, onyo kï kite

më wel, onyo yen, onyo lum agada, onyo lum öcici,

¹³ tic ka ngat acälacël bino nen ökö kanyalër, piën nünö më ngölö köp bino nen ki mac, na bino témö tic ka dhanö acälacël kite na tye ködë.

¹⁴ Ka gedo ka ngat mörö odong n'égérö i kom acaki thë öt nön, dhanö nön bino nwongo míc më pwöc.

¹⁵ Ëntö ka ngat na tic mérë öwang ökö, én ba bino nwongo míc mörö më pwöc, én kikome bino bwöth, na calö dhanö n'owok i mac awoka cë opoth.

¹⁶ Un ba ingeo ni ibedo unu öt k'Obanga éka Tipò k'Obanga thon bedo i iwu?

¹⁷ Dong ka ngat mörö öbalö öt k'Obanga, Obanga thon bino balö én, piën öt k'Obanga leng, un kikomwu ibedo unu öt k'Obanga nön.

¹⁸ Kür ibwölérë unu kenwu. Ka dhanö mörö ki kinwu thamö ni én eryék ki rwöm më lobo më karë ni, myero én ödök ngat na ming, ek én ödök na ryék.

¹⁹ Piën ryékö më lobo ni ki i nyim Obanga obedo gin më mingo. Kite n'écöö ni, "En makö jö na ryék i ökoragï më bwölgï kén-gi."

²⁰ Éka döki ni, "Rwoth ngeo ni thama k'eryékö köny mérë ope."

²¹ Dong, ngat mörö myero kür öwakëre i kom dhanö, piën jami kibec obedo mewu,

²² kadi Paulo, onyo Apolo, onyo Kepa, onyo lobo ni,

onyo kwö, onyo thöö, onyo gin mörö na tye, onyo gin mörö na bino bedo i anyim. Manön kibec obedo mewu,

²³ un thon ibedo më ka Kiricito, éka Kiricito obedo më k'Obanga.

4

Ëkwëna ka Kiricito

¹ Myero inenwa unu na calö etic ka Kiricito, éka na calö jö n'ekethogï më gwökö müng k'Obanga.

² Gin na mítérë ki both egwök jami énë ni gìn myero obed jö na genere.

³ Ki kubotha man köp na tüdi mörö ka ingölö unu köp i koma, onyo okiko mörö më ka dhanö. An thon ba angölö köp i koma këna.

⁴ Piën ki kubotha an angeo ni cwinya lér, éntö man ba mia alöö köp. Rwoth énë ngölö köpna.

⁵ Pi manön, kür ingöl unu köp mörö na karë bara örömö, na bara Rwoth odwogo. En bino mënyö gin n'opono i piny na col, dök bino nyutho tham na tye i cwiny jö kanyalër. I karë nön Obanga bino pwöyö ngat acälacël i kite na mítérë.

⁶ Utmegona, köp ni bino dwogo i koma këna éka i kom Apolo pi un, ek ipwonyere unu i komwa i thë köp n'ekobo ni, "Kür ikadh unu ngö n'écöö," ek ngat mörö ki kinwu kür öwakëre, nakun pakö dhanö acël éka caö ngat nökënë.

⁷ Nga n'omiö in ibedo ngat na path ki jö nökënë? Ngö na

in itye ködë na ba emii amia? Cë ka emii amia, pïngö iwakiri ködë na calö ba emii amia?

⁸ Dong ityeko unu yeng ökö! Idökö unu dong ëlönyö! Idökö unu rwodhi abonge wan! Ka onwongo amitö adyer nü idök unu rwodhi, ek wan thon ebed rwodhi kanya acel kodwu!

⁹ Piën ki kubotha nen calö, Obanga onyuthowa wan ëkwéna i nyim lwak ki cen na calö jö n'ëngölö niigi köp më thöö, piën wan dong edökö gin më anëna both wi lobo thükül, both emalaika éka both jii.

¹⁰ Wan edökö emingo piën eyee i kom Kiricito, entö un ïryék unu i Kiricito! Wan ëgörü, entö un iték unu! Eketho wörö i komwu, éka wan écaöwa!

¹¹ Naka i caa ni kec k'orio nekowa, wan eruko opeki, jii pwodowa, éka pacöwa thon ope.

¹² Wan etio tic na ték ki cingwa. Ka jii lamöwa, wan élamö niigi gum. Ka eyellowa, wan edangö adanga.

¹³ Ka ébalö nyängwa, wan egamö ki mwolo. Wan dong écal ki yugi më wi lobo, wan ebedo ciло më jami kibec naka tin.

¹⁴ An ba atye ka cöönö köp ni më müowu lewic, entö më pwonyowu na calö éthinöna na an amarö.

¹⁵ Piën kadi bed nü itye unu ki jö elip apar na télöwu i yoo ka Kiricito, un ba itye ki bebe na pol. An yam adökö apapwu i Kiricito Yecu pü Emuth na Bér.

¹⁶ Pi manön an akwaöwu, më poro kitena.

¹⁷ Man énë ngö n'omiö aoro Timoteo bothwu. Èn obedo athin na mëga i Rwoth na an amarö, éka genere. Èn bino po wiwu i yoo na an alübö i Kiricito Yecu, na an apwonyo ki lwak jö n'oye Kiricito na tye i kabedo kibec.

¹⁸ Jö mökö ki kinwu tye ka thamö ni an ba abino bothwu, éka omiö gïn tye ka wakere.

¹⁹ Entö ka Rwoth oyeo, an abino thuno bothwu piiöpiö, cë abino niang i tekö ka jö na wakere non, entö pathi köp na gïn twakö awaka.

²⁰ Ker k'Obanga ba obedo twak awaka entö më tekö.

²¹ Ngö na un imitö? Myero abin bothwu ki lüth, onyo abin ki mar éka ki cwiny më mwolo?

5

Tüm më ölyang

¹ Köp owinyere botha adyer ni tum më ölyang tye i kinwu. Tum më ölyang non ba timere naka thon i kin jö na ba ngeo Obanga. Dhanö mörö tye n'omaö apap méré dhakö.

² Éka pod iwakere unu! Ba itwëro unu thon kumo ek ngat n'ötömö koth tum non eryem ökö ki kinwu?

³ An ki kubotha, kadü koma ope kunön, an atye kodwu i cwiny. An na calö ngat na tye kunön atyeko ngölo köp ökö i kom dhanö n'ötömö tum na rac non.

⁴ Ka igürë unu i nyäng Rwothwa Yecu, éka an atye

kodwu ï cwiny éka tékö ka Rwothwa Yecu ute,

⁵ mii unu dhanö ni both Catan, ék onek miti më kwö më anywölli ökö, éka tipo méré olarë i nïnö ka Rwoth.

⁶ Awakawu ba bér. Un ba ingeo nü thöbi na tidi mörö miö mökö ogati yenyo?

⁷ Kwany unu thöbi na cön ökö, ék ibed unu ogati na nyen na thöbi ope ié na calö itye unu. Piën athin römö onu më Poth na énë Kiricito, étyerö dong ökö.

⁸ Pi manön dong, onu myero kür ekwer karama ki thöbi na cön, na énë thöbi më rac cwiny éka tím mökö na reco, éntö eru ekwer k'ogati na thöbi ope ié, na énë lér ic éka ki köp adyer.

⁹ Yam acöö niwu i waraganan nü kür iribëre unu ki jö na tímö tím më ölyang.

¹⁰ An onwongo ba akobo jö na tímö tím më ölyang më lobo ni, onyo eworo më jami éka eyak, onyo éwör cal jwogi. I köp nön un myero iya unu ökö ki i lobo ni.

¹¹ Éntö kobedini an acöö bothwu nü kür iribëre unu ki dhanö mörö na cwidere nü ngat n'oye, ka én ötímö tím më ölyang onyo én obedo aworo më jami, onyo awör cal jwök onyo ayany jö, amérö, onyo ayak. Kür thon icem unu ki koth dhanö nön.

¹² Manön ba obedo ticna më ngölö köp both jö na ba ngeo gini Yecu. Pathi un énë myero ingöl unu köp both jö na tye i kinwu?

¹³ Obanga énë bino ngölö köp both jö na ba ngeo gini Yecu. "Ryém unu dhanö na rac ökö ki kinwu."

6

Pido i kinjö n'oye

¹ Ka dhanö mörö ki kinwu tye ki köp mörö i kom awodhe, píngö lewic ba makö én më pido dhanö nön i nyim jö na kitegi ba tye atür nakaka pido dhanö nön i nyim jö k'Obanga na leng?

² Un ba ingeo unu nü jö k'Obanga na leng bino ngölö köp both jö më lobo? Éka ka un ibino ngölö köp both jö më lobo, un ba irömö ngölö köp mökö na thithinö?

³ Un ba ingeo nü onu ebino ngölö köp n'emalaika? Köp na makö kwö na onu etye ié ni kono?

⁴ Kara ka dong itye unu ki köp më alara, píngö iteru unu i nyim jö na pírgi ba ték both jö n'oye Kiricito?

⁵ Akobo man ék lewic ömakwu. Ngat mörö na ryék ope i kinwu na twérö tyeko köp na tye i kinjö n'oye?

⁶ Éntö nakaka tímö nü kömanön, ngat mörö n'oye dök pidere k'omín méré i nyim jö na ba oye Kiricito.

⁷ Pidere i kinwu kenwu nyutho nü köp ölööwu ökö. Thwara idang unu gin na rac. Thwara iwék unu jii obuwu.

⁸ Nakaka tímö nü kömanön, un ki komwu ibuo unu jö éka itímö unu gin na rac, naka i kom utmegowu kikome.

⁹ Un ba ingeo unu nü jö na kitegi ba tye atir, ker k'Obanga ba bino bedo mögi? Kür imii ébwölwu, kadijö na tímö tím më ölyang, onyo ewör cal jwogi, onyo jö na dönyö gini i elomi, onyo cwö n'obedo gini jö ölyang, onyo cwö na buto kï cwö ewodhgí,

¹⁰ onyo ekwoe, onyo eworo më jami, onyo emerö, onyo jö na yanyö jii, onyo eyak—ker k'Obanga ba bino bedo mögi.

¹¹ Jö mökö kï kinwu yam obedo gini koth jö nön. Ëntö un dong etyeko lwököwu ökö, etyeko lönyöwu më bedo jö na leng, etyeko kwanöwu nü un jö na kitewu atir i nyäng Rwoth Yecu Kiricito éka kï Típo k'Obanga onu.

¹² "An atwérö tímö jami kibéc," éntö ba nyutho nü jami kibéc könyö. "An atwérö tímö jami kibéc," éntö ba abino yeo gin mörö më lököna më bedo opii mérë.

¹³ "Cem tye pü ic, éka ic tye pü cem." Ëntö gin ariö nön kibéc Obanga bino tyekogii ökö. Kom ba obedo më tím më ölyang, éntö tye pü Rwoth, éka Rwoth tye pü kom.

¹⁴ Obanga yam ocero Rwoth kï kin jö n'öthöö, bino cero onu thon kï tékö mérë.

¹⁵ Un ba ingeo unu nü komwu obedo dul kom Kiricito? Myero dong akwany dul kom Kiricito alök ödök dul kom ölaya? Ba twérë!

¹⁶ Onyo ba ingeo unu nü dhanö na ríbérë kï dhanö n'obedo ölaya dökö kom acél kódë? Pién yam écöö nü, "Gin

ariö bino dökö kom acél."

¹⁷ Ëntö dhanö n'öríbérë kï Rwoth dökö cwiny acél kódë.

¹⁸ Ríng unu ökö kï kom tím më ölyang. Bal nökënë kibéc na dhanö tímö ba gudo kome, éntö dhanö na tímö tím më ölyang balö kome kënë.

¹⁹ Un ba ingeo unu nü komwu énë obedo öt ka Típo Naleng na bedo i iwü, n'Obanga ömioyü? Un ba ibedo unu mewu kenwu.

²⁰ Un éwílöwu awila kï wel. Pi manön, tii unu kï komwu më ketho dheo i kom Obanga.

7

Köp i kom nyom

¹ Kobedini më dök i köp na un icöö waraga iie: Bér ka écwö mörö ba obedo kï dhakö.

² Ëntö pi tím më ölyang, écwö acélacél myero obed kï dhakö mérë éka dhakö acélacél obed kï cwörë.

³ Écwö myero ocob miti ka dhakö mérë, dhakö thon myero ocob miti ka cwörë.

⁴ Dhakö ba tye kï twér i kome kënë, éntö cwörë énë tye kï twér i kome, kömanön thon écwö ba tye kï twér i kome kënë, éntö dhakö mérë énë tye kï twér i kome.

⁵ Kür itwon awodhi komi, kono pi karë mörö na nönök kékën na nwongo iyübö unu ayuba, ek inwong unu karë më lëga both Obanga. Kinge ríbérë unu dökü kanya acél, ek kür Catan ötemwu, pi mitiwu na ba jükérë.

⁶ An akobo man nakun ayeo ayea, éntö ba amiö na calö cik.

⁷ Kono twërë, onwongo amütö nijü kibec obed calö an. Entö dhanö acälacël tye kii mür mérë na píre ték n'Obanga ömio, dhanö ni tye kii mür ni, dhanö nökënë tye kii maca.

⁸ Both jö na bara onyomo éka mon na cwögï öthöö, akobo ni köman, bér ka gin obedo na ba onyomo, kite na an atye ködë.

⁹ Entö ka gin ba twërö gwökëre kén-gi, gin myero onyom, piën nyom bér löö n'écwö onyo dhakö më dangö miti më kom.

¹⁰ Both jö na dong onyomo, acikögï ni dhakö kür opokere kii cwörë, (entö pathi an énë acikö, Rwoth énë öcikö).

¹¹ Entö ka dhakö opokere kii cwörë, én myero obed kür önyömérë, onyo odwog cen both cwörë. Éka écwo myero kür opokere kii dhakö mérë.

¹² Both jö nökënë kibec (an énë akobo, pathi Rwoth), ka omego mörö n'oye Kiricito tye kii dhakö mérë na ba oye Kiricito éka dhakö nön yeo më bedo ködë, én myero kür ökwër dhakö mérë.

¹³ Éka ka dhakö mörö tye kii cwörë na ba oye Kiricito éka écwo nön yeo më bedo ködë, én myero kür ökwër cwörë.

¹⁴ Piën écwo na ba oye Kiricito dökö na leng pi dhakö mérë, éka dhakö na ba oye Kiricito dökö na leng pi cwörë. Ka onwongo ba obedo ni kömanön éthinöwu ba obedo na leng, entö kite na tye ködë, gin dong leng.

¹⁵ Entö ka dhanö na ba oye Kiricito mitö pokere

k'awodhe, én twërö pokere. Ecwo onyo dhakö n'oye Kiricito ope kii dic ié, piën Obanga ocwodo onu më bedo kii kuc.

¹⁶ In itwërö ngeo nüngö, in dhakö, ka ibino larö cwori? Onyo in ingeo nüngö, in écwo, ka ibino larö dhakoni?

¹⁷ Dong dhanö acälacël myero ölüb kit kwö na Rwoth ömio én, éka kwö n'Obanga ocwodo én ié. Man énë ngö na an acikö both jö kibec n'oye Kiricito.

¹⁸ Tye ngat mörö n'onwongo élirö i karë n'ecwodo én? Én kür dök örang yoo më dwökö kome ek obed calö dhanö na ba élirö. Tye ngat mörö n'onwongo ba élirö i karë n'ecwodo én? Én myero kür ölrë.

¹⁹ Bedo dhanö n'ölirë onyo na ba ölrë obedo gin mörö na köny mérë ope. Gwökö cik k'Obanga énë ngö na píre ték.

²⁰ Dhanö acälacël myero obed kite n'Obanga onwongo én i karë n'ecwodo én ködë.

²¹ In onwongo ibedo opii i karë n'ecwodi? Kür ibed ki par, entö ka itwërö nwongo yoo mörö më yaa ökö kii i opii, tii ködë.

²² Pi ngat n'onwongo obedo opii i karë na Rwoth ocwodo én, énë dhanö na Rwoth ögonyö ökö kii i opii. Kömanön thon, dhanö n'onwongo löörë kénë i karë n'ecwodo én, obedo opii ka Kiricito.

²³ Un onwongo éwilöwu ki wel na malö, kür ibed unu opii ka dhanö mörö.

²⁴ Utmegona, dhanö acälacël myero obed i nyim

Obanga i kite na yam ecwodo
en ködë.

*Jö na bara onyomo éka mon
thöö*

²⁵ Köp na makö jö na bara onyomo, ba atye kï cïk mörö n'oya kï both Rwoth, éntö an amiö thamana ië na calö dhanö n'Obanga ötimö nñen kïca éka ömiö obedo dhanö na genere.

²⁶ Pi can na kobedini ödiöwa, an athamö ni bér ka dhanö mörö obedo kite na en tye ködë.

²⁷ Ka ibedo dhanö n'onyomo, kür irang yoo me pokere. Éka ka ba inyomo kür irang dhakö me anyöma.

²⁸ Éntö ka inyomo, nwongo ba itimö bal, éka ka nyakö mörö na bara ongeo écwö önyömérë, nwongo ba ötimö bal. Éntö jö na nyomo bino nwongo gïni pëkö na pol i kwö ni. An amitö ni akwany pëkö ni ökö kï komwu.

²⁹ Utmegona, ngö na an atye ka twakö ene ni karë dong cwök. Cakérë kobedini cïdh ködë anyim, jö na tye kï mon myero obed gïni na calö jö n'ope kï mon.

³⁰ Jö na kumo, myero obed gïni na calö jö na ba tye ka kumo. Jö na igi yom myero obed gïni na calö jö na igi ba yom. Jö na wilö jami myero obed gïni na calö jö n'ope kï gin mörö.

³¹ Jö na tio kï jami me lobo ni myero obed gïni na calö jö na ba tye ka tic ködë, piën lobo kite na tye ködë, bino thum ökö.

³² An amitö ni ibed unu abonge par. Dhanö na bara onyomo, cwinye parö köp ka Rwoth, kite na myero eyom kï cwiny Rwoth ködë.

³³ Éntö dhanö na dong onyomo ökö, parö pi jami me lobo ni, kite na myero eyom kï cwiny dhakö mérë,

³⁴ éka thama mérë popoka. Dhakö na bara ényömö onyo nyakö na bara ongeo écwö mörö, parö köp ka Rwoth ek ebed na leng i kome éka i cwinye. Éntö dhakö na dong ényömö parö pi köp me lobo ni, kite na myero eyom kï cwiny cwörë ködë.

³⁵ An akobo köp ni pi könyöwu, pathi me jüköwu, éntö me miö jami kibec owoth kakarë, cwinywu thon obed i kom Rwoth na gin mörö ope na lökö thamawu thenge.

³⁶ Ka ngat mörö thamö ni kite me bedo mérë kï nyakö na en ecikérë ködë me nyömö ba tye na bér, éka mwaka ka nyakö non tye ka bedo na thwönë, éka en thamö ni myero ényöm, en myero ötim kite na en mitö ködë. En nwongo ba tye ka timö bal. Gin myero onyom.

³⁷ Éntö ka dhanö mörö cwinye tek na gin mörö ope na diö en, na dong otyeko thon yeo me wékö nyakö non na bara ényömö, en nwongo ötimö gin na bér.

³⁸ Komanön thon, dhanö n'onyömö nyakö na en ecikérë ködë nwongo ötimö bér, éntö dhanö na ba önyömö nyakö na en ecikérë ködë nwongo ötimö bér rwök.

³⁹ Cik gëngö dhakö më pokere kï cwörë ka pod kwö, ëntö ka cwörë öthöö ökö, ën dong twëro nyömëre k'ëcwö mörö kékën na ën mítö, ëntö ëcwö nön myero obed dhanö na tye i Rwoth.

⁴⁰ Ëntö kï thamana ën bino bedo kï yom cwiny ka obedo kënë, éka an athamö nï atye ka miö ngö na yaa kï i Típo k'Obanga ka atye ka kobo köp ni.

8

Cem n'ëtyérö both caljwogi

¹ Köp na makö cem n'ëtyérö both cal jwogi, eyo onu engeo nï "onu kibec etye kï ngec." Koth ngec nön miö onu obedo k'awaka ëntö mar ënë miö onu ecung na tek.

² Ka dhanö mörö thamö nï engeo gin mörö, nwongo ba ngeo gin mörö kite n'onwongo myero ën onge ködë.

³ Ëntö ka ngat mörö marö Obanga, Obanga thon ngeo ën.

⁴ Cë dong köp i kom camö cem n'ëtyérö both cal jwogi, onu engeo nï cal jwök ba obedo gin mörö na tye i lobo, éka dökü nï obanga nökënë ope na path k'Obanga acël kékën.

⁵ Kadï bed nï gin mökö tye n'ecwodo nï obanga i wi polo onyo i wi lobo, tye "obanga" na pol éka "rwothi" na pol,

⁶ Ëntö onu eut k'Obanga acël, na ënë Apap, na jami kibec yaa kï bothe, na onu ëkwö pï ën, éka Rwoth tye acël, Yecu Kiricito, na jami kibec

öya kï bothe éka onu ëkwö pï ën.

⁷ Kadï bed nï kömanön, jö kibec ba tye kï ngec nön. Jö nökënë tye na dong önaa ökö kï cal jwogi naka tin, gïn cemo nakun nwongo pod thamö gïni nï man cem n'ëtyérö both cal jwogi, éka miö thama na görüs na tye i cwinyigï na nyuthigï balgï bal ökö.

⁸ Ëntö cem ba bino miö onu bedo na cwök k'Obanga. Onu ba ebino bedo na rac ka ba ecemo, éka thon ba ebino bedo na bër ka ecemo.

⁹ Gwökëré unu, ek twëro nï ut unu ködë kür ödök gin mörö na miö jö na görüs podho gïni i bal.

¹⁰ Piëñ ka dhanö mörö na tye kï thama na görüs i cwinye oneni ka in itye ka cem i öt cal jwök nakun in itye kï ngec, ba bino mëdö nïnë tek cwiny më camö cem n'ëtyérö both cal jwogi?

¹¹ Éka dong omeru ni na görüs na yam Kiricito öthöö pïrë, ën bino thöö pï ngec na megı.

¹² Ka iibalö unu both utmegowu na yeegi görüs, éka iwanö unu thama më cwinyigï na pod görüs, nwongo iibalö unu i kom Kiricito.

¹³ Pï manön ka cem miö ömëra podho ökö i bal, cë ba abino camö ringo dökü ek kür amii ömëra opodh i bal.

9

Twëro k'Akwëna

¹ An ba alööra këna? An ba abedo akwëna? An yam ba anënö Rwoth onu Yecu?

Un ba ibedo unu adwogi më ticna i Rwoth?

² Ka jö mökö ba yeo nü an abedo akwëna, éntö kí kubothwu an abedo akwëna, piën un kikomwu ibedo unu anyuth nü an abedo akwëna ka Rwoth.

³ Man énë pidona both jö na ngölö köp i koma.

⁴ Wan ba etye kí twér më cem éka math?

⁵ Wan ba etye kí twér më miö dhakö n'oye woth ködwa, kamë ékwëna nökënë éka utmego ka Rwoth, éka Kepa?

⁶ Onyo an éka Baranaba kékën énë myero etii pí kwö?

⁷ Nga na tio kamë acikari, cë cakö cülö öcara mërë kënë? Nga na pïdhö ölök i pwodho mërë, na ba camö nyig ölök n'ögëk kí ië? Nga na kwaö kwath na ba madhö cak n'oya kí kom rom na én kwaö?

⁸ An atye ka twakö köp ni i kite ka dhanö kékën? Cik kono ba kobo nü kömanön?

⁹ Piën i Cik ka Muca éccöö nü, "Kür itwe dhö thwön ka tye ka nyönö kal." Obanga onwongo mönö thama mërë ut i kom thwoni?

¹⁰ Én ba okobo köp nön both onu? I adyer, köp mërë yam éccöö pí onu, piën apur myero opur nakun tye kí gen, ngat na pwodo bël thon myero opwod nakun tye kí gen më nwongo gin mörö kí ië.

¹¹ Ka wan écwö kodhi më tipo i kinwu, manön twérö bedo thwön köp mörö na thwönë ka wan ékaö jami mökö më kom kí bothwu?

¹² Ka jö nökënë tye kí twérö më köny nön kí bothwu, cë

wan ba élöögi ökö kí twérö nön?

Entö kadi bed nü twérö nön tye bothwa, wan ba etio ködë, wan édiö cwinywa i köp kibëc ek kür eketh orii mörö na gëngö kobo köp më Emuth na Bér i kom Kiricito.

¹³ Un ba ingeo nü jö na tio i öt k'Obanga gïn nwongo cemgï kí i öt k'Obanga, éka jö na tio gïn i kom keno tyér epoko nügi tyér n'etyérö?

¹⁴ Rwoth yam thon öcikö i kit yoo acél nön nü jö na titö köp më Emuth na Bér myero onwong gïn gin mörö na gïn kwö ködë pí titö köp më Emuth na Bér.

¹⁵ Entö an ba atio kí twérö ni mörö. Éka an ba acöö köp ni ek titüm unu i koma ni kömanön. Bedo na bér ka athöö löö na dhanö mörö lökö wakérëna dökö gin mörö na ka cungo mërë ope.

¹⁶ Ka an atitö köp më Emuth na Bér, myero kür awakara ködë, piën édia adia ië. Ka ba atitö köp më Emuth na Bér, cë an abino nénö can.

¹⁷ Ka atimö man kí cwinya këna, abino nwongo cül, entö ka atimö nakun ba amitö, nwongo atye ka cobo tic n'ëmia.

¹⁸ An abino nwongo koth cül mënë? Cül na mëga énë yom cwinya na an anwongo kí kom titö köp më Emuth na Bér, na ba angölö cül mörö ië both jö na winyo gïn, nakun thon ba atio kí twérö na an aute ködë ek anwong köny mörö kí both jö na an atitö nügi köp i kom Emuth na Bér.

¹⁹ Kadï bed nü alööra këna
i nyim jö kibëc, entö dong
atyeko mïra më bedo opii ka
jö kibëc, ek anwong-gi na pol.

²⁰ Ka atye both Eyuda,
abedo calö Ayuda ek anwong
Eyuda mökö. Both jö na tye
i thë cik ka Muca an abedo
thon na calö dhanö na tye i
thë cik, (kadï bed an ba atye i
thë cik), ek anwong jö na tye i
thë cik.

²¹ Both Erok n'ope i thë cik
ka Muca an abedo na calö
dhanö n'ope i thë cik, (nakun
nwongo ba atye abonge cik
k'Obanga, entö abedo i thë cik
ka Kiricito), ek anwong jö na
ba tye i thë cik.

²² Both jö na görü gini
i yeegi, an abedo na calö
dhanö na görü thon, ek
anwong jö na görü. An alübö
kite kibëc na dhanö tye ködë,
ek ömia alar jö mökö i yoo
kibëc.

²³ Manön kibëc atio pii köp
më Emuth na Bér, ek an thon
anywak gum mörö na yaa ki
iie.

²⁴ Un ba ingeo unu nü jö na
pyem ki ngwëc kibëc ngwëcö
gini, entö dhanö acël kékë
enë nwongo miç më pwöc?
Un thon ngwëc unu kömanön
ek inwong unu miç më pwöc.

²⁵ Dhanö acélacél na pyem
i tuko myero ögwökérë kënë i
yodhi kibëc. Gin tímö manön
ek enwong gini tok më dheo
na ba rii, entö onu étimö pii
nwongo tok më dheo na rii
naka naka.

²⁶ An gira angwëcö atir
na ba acacapa, ba adhongo
piñy ata kamë ngat mörö na

dhongo yamö nono.

²⁷ Ayelo koma, éka amiö
bedo opina ek ka dong
atyeko titö köp both jö
nökënë, kür abed dhanö na
ba ebino miö miç.

10

¹ Utmegona, amitö nü inge
unu nü kwere onu kibëc yam
obedo gini i thë pöl, éka gïn
kibëc yam owok i dye nam.

² Gïn kibëc yam ebaticagï i
pöl éka i nam, ek obed gini jö
ka Muca.

³ Gïn kibëc yam öcamö cem
acël nön më tipo,

⁴ gïn kibëc omodho pii acël
nön n'oya ki i lëla më tipo
n'owotho ködgï, éka lëla nön
onwongo obedo Kiricito.

⁵ Kadï bed nü kömanön,
Obanga onwongo iie ba yom
ki pol jö mökö éka dong komgi
n'othöö onwongo ökëth ata i
thim.

⁶ Jami ni ötimérë na calö
apor both onu, cikö onu nü
kür dök ebed parö gin na
reco, na calö yam gïn öparö.

⁷ Kür ibed unu jö na wörö
cal jwogi kite na jö mökö ki
kin-gi ötimö ködë. Kite n'ecöö
ködë i Cöc na Leng nü, "Lwak
obedo piñy i cem ki math, cë
oya gini malö më myël."

⁸ Onu myero kür edony i
tímö tím më ölyang, na calö
jö mökö ki kin-gi yam ötimö
ködë, éka jö elip pyer ariö
wie adek öthöö gini ökö i nänö
acël.

⁹ Onu kür etém Kiricito, na
calö jö mökö yam ötimö éka
thwone onekogï.

¹⁰ ŋeka kür īngüngüta unu na calö jö mökö ki kin-gi Yam öngüngüta gini ködë, ŋeka malaika më thöö otyekogii ökō.

¹¹ Jami ni ötämërë bothgii na calö apor both onu. Ēcōjami ni kibëc i Cöc na Leng më pwonyo onu jö n'ëkwö i karë ni më ajiki.

¹² Pi manön ek ngat mörö na thamö ni ecung na tek, ögwökëre ek kür opodhi.

¹³ Atëmatëma mörö ope na maköwu na ba makö jö kibëc. Obanga genere, ŋeka en ba bino yeo ni etëmwu rwök na löö ngö na un itwëro dangö. Ka etëmwu, Obanga bino miöwu yoo më bwöth ökō, ek ibed unu ki tekö më dangö.

¹⁴ Pi manön, ewodha na an amarö, wék unu wörö cal jwogi ökō.

¹⁵ An atwak kodwu na calö jö na ryék, tham unu kenwu i köp na an atwakö.

¹⁶ Ekopo më gum na onu elégö gum ié, ba obedo rïbérë i remo ka Kiricito? Ogati na onu epoko ié, ba obedo rïbérë i kom Kiricito?

¹⁷ Pién ogati tye acël, onu n'epol ebedo kom acël, pién onu kibëc énywakö camö ogati acël nön.

¹⁸ Tham unu pi jö më Icarael, jö na camö gin n'etyérö both Obanga ba rïbérë gini më tic i keno tyér?

¹⁹ Ngö na an atye ka kobo? An atye ka kobo ni cem n'etyérö both cal jwogi obedo gin mörö, onyo ni cal jwök obedo gin mörö?

²⁰ Pe, ngö na an atye ka kobo ene ni gin aryëda na jö na ba ngeo Obanga ryëdö gini, gin tyérö both cene, entö ba tyérö gini both Obanga. An ba amitö ni iribérë unu ki cene.

²¹ Ba itwëro unu madhö ekopo ka Rwoth éka më cene. Ba itwëro unu cem i mëja ka Rwoth éka dökii mëja ka cene.

²² Onu emitö ni nyeko ömak cwiny Rwoth? Un ithamö ni onu etek elöö en?

Tii unu jami kibëc pii dheo k'Obanga

²³ "An atwëro tímö jami kibëc," entö manön ba nyutho ni jami kibëc könyö. "An atwëro tímö jami kibëc," entö manön ba nyutho ni jami kibëc döngö yee ka dhanö.

²⁴ Ngat mörö kür örang gin na könyö en kékën, entö myero olüb gin na könyö awodhe.

²⁵ Cam unu gin mörö kékën n'ecadhö i cuk më ringo, abonge penyo gin mörö pii lworo thama më cwinywu.

²⁶ Pién "lobo éka jami kibëc na tye ié obedo më ka Rwoth."

²⁷ Ka cé dhanö mörö na ba oye Kiricito ocwodowu icem, éka imitö unu cihö cem, cam unu gin mörö kékën n'eketho i nyimwu abonge penyo gin mörö pii lworo thama më cwinywu.

²⁸ Entö ka ngat mörö okobo niwu ni, "Man ngö na dong etyérö ökō both cal jwök," cé kür icam unu, pii parö ngat na dong okobo köp nön më

po wiwu, éka pii thama më cwinye na nyutho bal.

²⁹ Manön an akobo pii thama na tye i cwiny dhanö nökënë ca, pathii pii thama na ute i cwinyi. Pïngö ègëngö twërôna na an atye kôdë më tîmö gin mörö ni ökö, pii thama na tye i cwiny dhanö nökënë?

³⁰ Ka an acemo nakun apwöyö Obanga, pïngö éyanya pii gin na dong atyeko pwöyö Obanga ökö pirë?

³¹ Dong ka icamö unu cem onyo imadhö unu math, onyo jami kibëc na un itio, tûm unu kibëc më miö dheo both Obanga.

³² Kür iibal unu cwiny Eyuda, kadü thon jö Grecia, onyo jö k'Obanga n'oye Kiricito,

³³ kit na calö an atëmö yomo cwiny ngat acëlacël i gin na an atio kibëc. An ba arangö ngö na könya këna, entö arangö gin na könyö jö na pol, ek olare gini.

11

¹ Lüb unu kitena, na calö an thon alübü kite ka Kiricito.

Umo wic i caa më wörö Obanga

² Apwöyöwu piien i köp kibëc ipo unu pira, nakun ilübö unu pwonya na yam amiö bothwu.

³ Entö amütö inge unu ni Kiricito enë obedo wi ècwö acëlacël, ècwö enë obedo wi dhakö mérë, éka Obanga enë obedo wi Kiricito.

⁴ Ècwö mörö na lëgö, onyo na titö köp k'Obanga, nakun

oumo wie, manön nwongo okelo lewic i wie.

⁵ Entö dhakö na lëgö, onyo na titö köp k'Obanga nakun ba oumo wie, nwongo okelo lewic i wie, piien ba tye apokapoka mörö i kin en ki dhakö n'olyelö wie.

⁶ Ka dhakö mörö ba umo wie, myero olyelö yer wie ökö, éka ka obedo më lewic ni dhakö ka olyelö wie, onyo önyarö yer wie anyara, en myero dong oum wie.

⁷ Ècwö kür myero oum wie, piien en obedo cal k'Obanga éka dheo k'Obanga. Entö dhakö enë dheo k'ècwö.

⁸ Piëن ècwö ba öya ki kom dhakö, entö dhakö enë öya ki kom ècwö.

⁹ Ècwö onwongo ba ecweo pii dhakö, entö dhakö enë ecweo pii ècwö.

¹⁰ Pi tyen köp ni, éka piien pii emalaika, dhakö myero oruk gin mörö më umo wie më nyutho ni etye i the twër ka cwörë.

¹¹ Entö i kin jö ka Rwoth, dhakö ba twërò cung kënë abonge ècwö, éka ècwö ba twërò cung kënë abonge dhakö.

¹² Piëن na calö dhakö öya ki kom ècwö, i yoo acël nöñ, ècwö thon dhakö enë önywölö. Entö jami kibëc öya ki both Obanga.

¹³ Ngöl unu köp ni kenwu: Pore ni dhakö më lëga both Obanga na ba oumo wie?

¹⁴ Kite n'enywölö onu kôdë thon ba pwonyo onu ni ka ècwö omiö yer wie ölöth na boco ba miö en lewic?

¹⁵ Ņント ka dhakö tye kï yer wie n'ölöth na boco manön obedo më dheo mërë, piën ēmio ën yer na boco nön ek oumere ködë.

¹⁶ Ņント ka ngat mörö mítö kelo pyem ië, wan epe kï kit na calö manön, ope thon i kin jö k'Obanga n'oye Kiricito.

Bal n'ödönyö i Cem ka Rwoth

¹⁷ An aciköwu nakun thon atye kï köp mökö na an ba abino pwöyöwu ië, piën cökérëwu gin mörö ope ië na bér, entö kelo bal kékën.

¹⁸ Köp më acël na an atyeko winyo ënë nü ka un icökérë kanya acël na calö jö n'oye Kiricito, apokapoka bedo tye i kinwu éka an thon aye köp nön,

¹⁹ piën apokapoka myero obed tye i kinwu, ek jö na genere onen gini ökö kanya leng.

²⁰ Ka icökérëunu kanya acël, nwongo ba obedo cem ka Rwoth ënë un icamö adyer,

²¹ piën ngat acélacël cakö camö cem mërë ökö, nakun jö mökö kec nekogii, éka jö mökö mér ökö.

²² Un ba ityeunu kï peciwu, kanya un itwëro cem kï math ië? Onyo icaöunu jö k'Obanga n'oye Kiricito, nakun ikethounu lewic i kom jö na ba tye kï gin mörö? Ngö na myero akob bothwu? Ímitöunu nü apwöwu? Ba abino pwöyöwu pï köp ni.

Cem ka Rwoth

²³ Piën pwony na yam apwonyowu ködë, Rwoth ënë ömä, nü, i kiwor nön n'eketho

örörö i kome, Rwoth Yecu ökwanyö ogati,

²⁴ éka i karë na dong opwöyö, opoko ië, éka okobo ni, "Man ënë koma na tye pírwu, tímunu nü köman më po ködë pira."

²⁵ Kömanön ka öcamö gini cem më kothyeno othum, ökwanyö ekopo éka okobo ni, "Ekopo ni ënë cikérë na nyen i remona. Tímunu nü köman i karë kibëc na un imadhö, më po ködë pira."

²⁶ Pï karë kibëc na un icamö ogati ni, éka thon ka imadhöunu kï i ekopo ni, nwongo ityeunu ka titö köp më thöö ka Rwoth, naka ka ën bino dwogo.

²⁷ Pï manön, ka dhanö mörö öcamö ogati ni, onyo ömadhö kï i ekopo ka Rwoth ni, nakunkite mërë ba opore, nwongo ën ödökö abal më pyëdö kom kï remo ka Rwoth.

²⁸ Dhanö acélacël myero kono öngirë kënë, na bara öcakö camö ogati éka madhöngö na ute i ekopo nön.

²⁹ Piën ngat na camö onyo madhö nakun ba öniangna bér i kom ngö n'ecwodo ni kom Rwoth, nwongo ën tye ka kelo ngölö köp i kome kënë ka cë öcamö onyo ömadhö.

³⁰ Manön ënë ömio jö na pol kï kinwu görü éka two gini, jö mökö thon öthöö gini ökö.

³¹ Ņント ka onu étwëro ngölö köp i kom onu kï köp n'atür, onwongo ba engölö köp i kom onu.

³² Dong ka Rwoth ënë ngölö köp i kom onu, ën pwodo onu më pwonyo onu, ek kür engöl

köp ölöö onu kanya acël kï jö më lobo.

³³ Pï manön dong, utmegona, ka un içökëré kanya acël më camö cem ka Rwoth onu, ngat acëlacël myero ökür awodhe.

³⁴ Ka dhanö mörö kec oneko, myero ën kono ocem kï i pacö mérë, ék köp kür ölööwu ka içökëré unu kanya acël. Köp nökënë n'odong an abino yübü ka an athuno bothwu.

12

Mic na Típo Naleng müö

¹ Kobedi dong utmegona, köp i kom mïc na Típo Naleng müö, amítö nï inge unu na bér.

² Ingeo unu nï, i karë na un onwongo pod ibedo unu jö na ba ngeo Obanga, onwongo irwenyo unu ökö më wörö cal jwogi na ba twak.

³ Pï manön an amítö iñiang unu nï ngat mörö ope na Típo k'Obanga müö ën kobo nï, "Yecu élamö," éka ngat mörö ope na twérö kobo nï, "Yecu éné Rwoth," na path ka Típo Naleng éné müö ën kobo.

⁴ Mic tye na kothgï papath, éntö Típo acël nön éné pokö.

⁵ Tic tye na kothgï papath n'etio pï Rwoth, éntö etio pï Rwoth acël nön.

⁶ Yodhi më tic tye na papath, éntö Obanga acël nön éné tio kï jïi i yodhi kibëc.

⁷ Dhanö acëlacël émiö mïc më Típo më könyö jö nökënë.

⁸ Típo Naleng müö dhanö acël köp më ryékö, Típo Naleng nön müö dhanö nökënë köp më ngec.

⁹ Típo Naleng nön müö yee both dhanö nökënë, both dhanö nökënë, Típo Naleng nön müö mïc më cangö jïi,

¹⁰ both dhanö nökënë ën müö mïc më tio tango, both dhanö nökënë më twakö köp na calö adwarpiny, both dhanö nökënë pokö kin cwiny na papath, both dhanö nökënë dhümö lëb na papath, éka both dhanö nökënë më gónyö lëb na papath.

¹¹ Éntö Típo Naleng nön ënë tio tic kï mïc ni kibëc, ën pokö mïc na papath both dhanö acëlacël kite na ën mítö kódë.

Kom acël kï dul na papath

¹² Kom dhanö tye kï dul na pol na papath, éntö dul na papath nön bedo dul kom acël. Ènë kom Kiricito.

¹³ Piëñ onu kibëc, Eyuda éka jö Grecia, opii éka jö na löörë kén-gï, onu ebatica éka édökö kom acël i Típo acël nön, onu kibëc énywakö Típo acël nön.

¹⁴ Piëñ kom dhanö ba tye ië dul acël kékën, éntö tye ië dul na pol.

¹⁵ Ka onwongo tyen jö kob nï, "An ba abedo dul kom piëñ an ba abedo cïng," manön ba müö ën kwérö më bedo dul kom.

¹⁶ Ka onwongo ith kob nï, "An ba abedo dul kom piëñ an ba abedo wang," manön ba müö ën kwérö më bedo dul kom.

¹⁷ Ka onwongo kom kibëc obedo wang jö, onwongo étwérö winyo köp ningö? Ka onwongo kom kibëc obedo ith jö, onwongo étwérö ngweno pïny ningö?

¹⁸ ŋtö kite na tye ködë, Obanga oketho dul na papath i kom, dul acélacél kite na én mítö ködë.

¹⁹ Ka onwongo gïn kibëc obedo dul kom acél kékën, kom onwongo ba twëro bedo tye.

²⁰ Na calö tye ködë, dul kom tye na papath, éntö kom tye acél.

²¹ Wang jö ba twëro kobo nü cïng jö nü, "An ba amiti!" Wic thon ba twëro kobo nü tyen jö nü, "An ba amiti!"

²² Nakaka manön, dul më kom mökô n'ëthamö nü görü éné döki nwongo mítérë rwök,

²³ éka dul kom mökô n'ëthamö nü dheogï ope éné onu émiö wörö na pürë ték, éka dul kom na ba nen na bér éné eruko ki ruk na bér,

²⁴ nakun dul kom onu na nen na bér ba dök mítö gin mörö. Obanga öribö dul më kom nakun miö dheo na thwönë na lös both dul na dheogï nök,

²⁵ ék apokapoka kür obed tye i kom, éntö ék dul acélacél öpar pi dul kom awodhe.

²⁶ Ka dul kom mörö acél tye ka rem, dul kom nökënë thon rem kanya acél ködë. Ka éwörö dul kom acél, dul kom na papath kibëc bedo ki yom cwiny ködë.

²⁷ Dong un kibëc ibedo unu kom Kiricito, éka dhanö acélacél ki kinwu obedo dul kom Kiricito.

²⁸ Obanga oketho jö ni i kin lwak jö n'oye Kiricito, më acél ékwëna, më ariö edwarpiny, më adek epwonye, éka jö na tio tango, éka thon jö na tye ki

mic më cangö jii, jö na twëro könyö jö nökënë, jö na tye ki mic më têla éka jö na dhümö gïni lëb na papath.

²⁹ Jö kibëc obedo gïni ékwëna? Jö kibëc obedo gïni edwarpiny? Jö kibëc obedo epwonye? Jö kibëc tio tango?

³⁰ Jö kibëc tye ki mic më cangö jii? Jö kibëc dhüm ki lëb na papath? Jö kibëc gönyö gïni lëb?

³¹ Keth unu cwinywu më nwongo mic na pïrgi ték.

Éka dong an abino nyutho niwu yoo na bér na lös.

13

Mar

¹ Ka an adhüm ki lëb jö nökënë éka më k'emalaika, nakun ba atye ki mar an abedo calö ölang na kok rwök onyo agece.

² Ka an atye ki mic më twakö köp na calö adwarpiny nakun aniang müng, éka atye ki ngec kibëc, éka ka an atye ki yee kibëc, na an arömö köbö kidi na thwönë kany ökënë, nakun ba atye ki mar, an nwongo ba abedo gin mörö.

³ Ka an amiö jami kibëc na an atye ködë both écan, éka ajalö thon koma më awanga ki mac, nakun ba atye ki mar, ba bino könyöna ki gin mörö.

⁴ Mar diö cwinye, obedo thon nyakica, mar ba nyek, ba wakérë,

⁵ ba ger, ba rangö gin na makö kome kënë, ba ngöö piöpiö, ba kanö gin na rac n'ëtimö i kome.

6 Cwinye ba bedo na yom i tüm na ba tye atir, éntö cwinye yom i köp na tye adyer.

7 Mar diö cwinye i jami kibëc, yee köp kibëc, tye kï gen i karë kibëc, dangö köp kibëc.

8 Mar ba jik. Dwaropïny bino thum ökö, naka thon dhümö lëb bino jik ökö, éka ngec bino jik thon ökö.

9 Piën onu engeo dul mökö na nönök kékën, éka edwardo thon dul na nönök,

10 éntö ka gin n'opong obino, gin n'obedo dudul bino jik ökö.

11 I karë na an abedo athün, atwak kamë athün, athamö thama kamë athün éka apyem kamë athün. Kobedini na dong atengo, awékö kite më thino ökö.

12 Gin na onu énénö i caa ni, obedo calö cal na nen ribiribi kï i kiyo, éntö i karë na bino anyim ca onu ebino nénérë wang kï wang. Kobedini an angeo dul mörö kékën, éntö i nínö na bino anyim ca an abino bedo kï ngec kibëc, kadï bed engea na bér.

13 Dong tye gin adek na bino bedo naka naka: yee, gen, éka mar. Éntö gin na pïrë tek na löögï kibëc énë mar.

14

Mic më dhümö lëb na papath

1 Yelere unu më nwongo mar, keth unu cwinywu thon më nwongo mic më tipo, na löö kibëc mic më twakö köp na calö adwarpïny.

2 Piën dhanö na dhümö lëb na papath ba twak kï jii

éntö nwongo én tye ka twak k'Obanga. Ngat na niang i köp mérë ope, nwongo én tye ka kobo müng më Típo Naleng.

3 Éntö dhanö na twakö köp na calö adwarpïny, twak kï jii nakun döngö yeegi, cükö cwinygi, éka kweo cwinygi.

4 Dhanö na dhümö lëb na papath döngö yee mérë kënë, éntö dhanö na twakö köp na calö adwarpïny nwongo tye ka döngö jö n'oye Kiricito.

5 An amitö nü idhüm unu lëb na papath, éntö na lõö kibëc an amitö nü itit unu köp k'Obanga. Dhanö na twakö köp na calö adwarpïny pïrë tek lõö ngat na dhümö lëb na papath, thwara ka ngat mörö ögonyö both jii gin na én kobo, ek ököny jö n'oye Kiricito më döngö.

6 Utmegona, ka an abino bothwu nakun adhümö lëb na papath, köny ngö na an abino bedo kódë bothwu, ka ba an akelo niwu köp mörö n'Obanga onyutho nïna, onyo ngec mörö, onyo köp mörö na calö më k'adwarpïny, onyo pwony mörö?

7 Naka thon gin n'ope kï kwö, na kok na calö pelu onyo adungu, ka dwönë ba winyere na bér, jii bino niang ningö i wer n'etye ka küdhö onyo n'etye ka göönö?

8 Éka buruji, ka ba eküdhö kï dwön më cwodo, nga na bino yübëre më cidhö i lwény?

9 I kite acél nön, nga na bino niang i gin na un ikobo ka itye unu ka dhümö lëb na papath, nakun ikobo unu köp na ba éniang ië? Köpwu bino këth i

wi yamö ata.

¹⁰ Tye koth lëb na pol i wi lobo na gïn kibëc papath, éntö ba tye mörö na tyën köp mérë ope.

¹¹ Ka an ba angeo lëb dhanö mörö na tye ka twakö, an abedo na calö arok bothe, éka én thon bedo na calö arok botha.

¹² Dong kömanön, un thon na calö iketho unu cwinywu më nwongo mïc më Típo, tém unu më löönö mïc na müö jö n'oye Kiricito cung na ték.

¹³ Pi manön, dhanö na tye ka dhümö lëb na papath én myero öleg both Obanga ek ömii én mïc më gönyö ngö na én etye ka kobo.

¹⁴ Pién ka an alégö nakun adhümö lëb, cwinya lëgö, éntö nwongo thamana ba tímö gin mörö ié.

¹⁵ An atüm ngö kobedini? An abino lëgö both Obanga ki cwinya nakun alégö ki thamana thon. An abino wero wer ki cwinya nakun abino wero ki thamana thon.

¹⁶ Ka in ipwöyö Obanga ki cwinyi kékén, dhanö nökënë n'obino i gürëwu twérö kobo "Amën" ningö i pwöcni i kite ménë nakun ba öniang i kom ngö na in ikobo?

¹⁷ Kadï onwongo imiö pwöc na bér, ba bino könyö dhanö nökënë ca më döngö kadï kicél mörö.

¹⁸ An apwöyö Obanga pién an adhümö lëb na papath na lööwu kibëc,

¹⁹ éntö i gürë ka jö n'oye Kiricito an amitö kobo köp mörö abic kékén ki thamana

më pwonyo ki jö nökënë, nakaka kobo köp elip apar nakun adhümö ki lëb na ba ngere.

²⁰ Utmegona, kür ibed unu kamë éthiñö i thamawu. Bed unu éthiñö i tímö gin mörö na rac, éntö i thamawu bed unu jö n'otengo.

²¹ Yam écöö i Cik ni,
"An abino twak ki jö më rok
ni ki lëb na jii dhüm
ködë na papath
éka ki dhö Erok.
An abino twak both jö ni,
éntö kadï bed ni gïn ba
bino winyona,"
man köp ka
Rwoth.

²² Manön nyutho ni dhümö lëb na papath émiö ek obed anyuth both jö na ba oye Kiricito, pathi both jö n'oye, éntö twakö köp na calö adwarpiny tye pi jö n'oye, pathi pi jö na ba oye.

²³ Dong ka jö kibëc n'oye Kiricito ögürë kanya acél nakun jö kibëc dhümö lëb na papath, éka jö nökënë na ba niang, onyo jö na ba oye Kiricito obino ié, gïn ba bino kobo ni un ipo?

²⁴ Éntö ka jö kibëc tye ka twakö köp na calö adwarpiny, éka dhanö mörö na ba oye Kiricito, onyo dhanö na ba niang obino i cökérë, én bino niang i kom bal mérë pi gin na én owinyo ki both jö kibëc. Köp na jii kibëc okobo bino ngölö nïnë köp.

²⁵ Müng na tye i cwinye ebino kelo kanyalér, éka bino ryebere pïny, wörö Obanga

nakun tuco nü, "Adyer, Obanga tye i kinwu."

Kite më wörö Obanga

²⁶ Utmegona, ka igürë unu, dhanö acélacél tye ki wer, ngat nökënë pwonyo, ngat nökënë kobo ngö n'Obanga onyutho nänë, ngat acél bino dhümö lëb na papath, éka ngat nökënë bino gönyö ngö n'ekobo. Éntö jami ni kibec myero ötimérë i yoo na könöy döngö ka jö n'oye Kiricito.

²⁷ Ka dhanö mörö dhümö lëb na papath, myero gïn obed jö ariö onyo jö adek, kür ökal wel nön, nakun eleo alea, éka ngat mörö myero ögony ngö na gïn kobo.

²⁸ Éntö ka ngat mörö ope na gönyö, myero ngat na mítö twak ki lëb na papath nön öling alinga i ka gürë ka jö n'oye Kiricito, myero ötwak én kënë éka both Obanga.

²⁹ Edwarpiny myero obed jö ariö onyo jö adek, éka jö nökënë pimo köp na gïn tye ka kobo.

³⁰ Ka cë Obanga onyutho köp mörö both ngat mörö nökënë n'obedo piny i kinwu, dhanö n'onwongo tye ka twak myero öling ökö.

³¹ Piën un kibec itwérö twakö köp na calö adwarpiny nakun ileo unu alea, ék jö kibec opwonyere éka dök thon öcük cwinygi.

³² Ngat na tye ka twakö köp na calö adwarpiny myero ölöö mïc mérë më twak,

³³ piën Obanga ba obedo won arubaruba, én obedo won kuc.

Na calö jö k'Obanga na leng kibec n'oye Kiricito,

³⁴ mon myero öling alinga ka tye gïni i kin jö n'oye Kiricito. Ba eyeo nïgi më twak, éntö gïn myero ömirë i the löc kite na Cik kobo ködë.

³⁵ Ka cë gïn mítö ngeno köp mörö, myero gïn openy cwögi ki pacö. Obedo lewic rwök both dhakö më twak i ka gürë ka jö n'oye Kiricito.

³⁶ Onyo ithamö unu nü köp k'Obanga yam öcakëre ki bothwu, éka dökü obino bothwu kékën?

³⁷ Ka ngat mörö thamö nü én ebedo adwarpiny onyo etye ki mïc mökö më Tipo, myero én ongee nü köp na an acöö bothwu énë cik n'oya ki both Rwoth.

³⁸ Éntö ka ngat mörö ba oketho köp ni i thama, én thon ba ebino ketho thama i kome.

³⁹ Dong utmegona, keth unu cwinywu më twakö köp na calö adwarpiny, éntö dhümö lëb na papath thon kür ijük unu.

⁴⁰ Éntö gin mörö kibec myero etim i kite na bér, körë ki körë.

15

Cer ka Kiricito

¹ Kobedi dong utmegona, an amítö poono wiwu i kom köp më Emuth na Bér na yam atitö bothwu, na un dong igamö ökö, éka thon icung unu ië.

² Pi köp më Emuth na Bér ni énë ömiö ilarë unu, ka dong imakö unu na ték köp na yam

atitö bothwu, kono onwongo ba iyee unu nono.

3 Pi köp na an amiöwu na pire dit më acel, na an thon agamö kobo ni—Kiricito yam öthöö pi bal onu, nakun lübö Cöc na Leng na yam écöö.

4 Eiko en, éka ecero en ökö i nñö më adek, nakun lübö Cöc na Leng na yam écöö.

5 En onen both Kepa, cë onen both ékwëna apar ariö.

6 Kinge manön onen both utmego na lõö mia abic wang acel, pol jo mökö ki kom jo nön pod tye gini na kwö, kadï bed ni jo mökö öthöö gini dong ökö.

7 Cë en onen dökü both Yakobo, éka both ékwëna kibëc,

8 cë i ajiki mërë kibëc onen botha thon, kadï bed ni an abedo calö ngat mörö n'enywölö i karë na ba opore.

9 Piën an atidü rwök ki kin ékwëna kibëc, n'onwongo ba apora ni ek ecwoda ni akwëna, piën yam ayelo jo k'Obanga n'oye Kiricito.

10 Entö pi kica k'Obanga n'omia, ene omio an atye kite na an aute ködë, éka kica mërë na en omia onwongo ba obedo më nono. An atio tic na tek rwök na lõö jo nön kibëc, kadï bed ni pathi an, entö kica k'Obanga ene otio köda.

11 Adyer kadï bed onwongo ni an onyo gin, köp na wan dong etitö, ene köp na un iyee.

Cer kajö n'öthöö

12 Kobedi dong ka etitö ni ecero Kiricito ki kin jo n'öthöö, pïngö jo mökö ki

kinwu kobo ni cer ka jö n'öthöö ope?

13 Entö ka cer ka jö n'öthöö ope, cë Kiricito thon ba ecero.

14 Éka ka Kiricito ba ecero, cë titö köpwa bedo na könny mérë ope, naka thon yeewu könny mérë ope.

15 Mëd i kom manön, onu thon ebedo ecaden më twodo i kom Obanga, piën onu etwakö köp i kom Obanga ni ene omio Kiricito ocer ki i thöö. Entö ka tye adyer ni jö n'öthöö ba ecerogi, cë Obanga ba ocero Kiricito.

16 Ka cero jö n'öthöö ope, cë nwongo Kiricito thon yam ba ecero.

17 Ka Kiricito yam ba ecero, cë yeewu könny mérë ope thon, nwongo pod itye unu i thë bal.

18 Cë jo na dong öthöö gini na yee i Kiricito nwongo orwenyo gini ökö.

19 Ka genwa i Kiricito könnyowa i kwö më karë ni kékén, cë nwongo enenö onu ki kica rwök na lõö jo kibëc.

20 Entö i adyer mérë, Kiricito ecero dong ökö ki i kin jo n'öthöö, en tye na calö wi kac ka jö n'öthöö.

21 Piën dhanö ene okelo thöö, dök thon cer ka jö n'öthöö dhanö ene okelo.

22 Kite na jo kibëc thöö ködë i Adam, kömanön thon jo kibëc ebino müögï kwö i Kiricito.

23 Entö ngat acälacel ki kakarë, më acel Kiricito, na ene wi kac, éka kinge jo ka Kiricito i karë më dwogo mérë.

²⁴ Cë ajiki pïny dong bino thuno, na Kiricito bino miö ker i cïng Obanga Apap, na nwongo dong otyeko türö kit lög kibëc, twërö kibëc éka tékö.

²⁵ Piën Kiricito myero obed i lög naka wang n'Obanga oketho lang mérë kibëc i thë tyenë.

²⁶ Langö n'ebino tyeko më ajiki énë thöö.

²⁷ Piën yam écöö ni, "Obanga oketho jami kibëc i thë tyenë." Ëntö ka ekobo ni oketho "jami kibëc" i thë lög mérë, cë nen kanyalér ni ba ékwanö én Obanga kikome n'oketho jami kibëc i thë lög ka Kiricito.

²⁸ Ka dong etyeko ketho jami kibëc i thë lög mérë, én Wod kikome thon ebino ketho i thë lög k'Obanga ék Obanga öcök jami kibëc i thë lög mérë.

²⁹ Kobedi dong, ka cer ka jö n'othöö ope, jö na dong ebaticagi pi jö n'othöö bino gini tümö ngö? Ka cer ka jö n'othöö ope kadü thon kicel, pingö dong ebatica dhanö na kakargi?

³⁰ Pingö onu dong ebedo kanya rac caa kibéc?

³¹ An athöö nänö kibëc, utmegona, manön akobo bothwu atir, pi wakérë na an atye kodë i Kiricito Yecu Rwoth onu.

³² Kadü bed yam alwënyö kï leeni na ger i Epeco, kite na dhanö kobo ni, kit köny ménë n'anwongo ië? Dong ka cer ka jö n'othöö ope, "Eru ecemu éka emedhu,

piën diki onu ebino thöö ökö."

³³ Kür imüi ébwölwu: "Woth ki jö na reco balö kite na bëcö."

³⁴ Dwog unu cen i tham n'atür éka ikwër unu bal ökö. Piën jö mökö ba tye gini kï ngec nön i kom Obanga. Akobo man ek lewic ömakwu.

Kit kom na dhanö bino cer kodë

³⁵ Gwök onyo ngat mörö bino penyo ni, "Jö n'othöö ebino cerogi ningö? Kit kom ménë na gin bino bedo kodë?"

³⁶ In iming! Kodhi na in icwö ingöm, ba twërö nwongo kwö wang n'othöö kono.

³⁷ Éka gin na in icwö énë kodhi nono, onyo kodhi kal onyo koth kodhi na path na ba obedo kom gin na donyo.

³⁸ Ëntö Obanga miö kom i kodhi nön kite na yam én öyerö kodë, kodhi acélacél kï kit kothe.

³⁹ Ringo kom gin na kwö kibëc ba röm: Ringo dhanö path, ringo leeni path, ringo winy path éka më rëc thon path.

⁴⁰ Dök thon kom më polo éka më lobo tye, ëntö kom më polo tye kï dheo mérë na path, éka kom më lobo thon tye kï dheo mérë na path.

⁴¹ Ceng tye kï koth dheo mérë acél, dwe thon tye kï dheo mérë na path, cér thon tye gini kï dheogi na path, éka cér thon kitegi papath kï dheo na gin miö.

⁴² Obedo thon nü kömanön i kom cer ka jö n'othöö. Gin

ëcwö obedo gin na thöö, éntö ka ecero ba dök thöö.

⁴³ Écwö na nwongo ope kï dheo mérë, éntö ecero na nwongo dheo mérë dong tye, écwö na nwongo pod görü, éntö ecero na nwongo tye kï tækö.

⁴⁴ Écwö na nwongo obedo kom më lobo ni, éka ecero én na nwongo obedo kom më cwiny.

Ka kom më lobo ni ute, cë nyutho nü kom më cwiny thon ute.

⁴⁵ Cöc na Leng kobo nü onu nü, "Dhanö më acël obedo Adam n'ödökö dhanö na kwö." Éntö Adam më ajiki ödökö tipo na müö kwö.

⁴⁶ Éntö kom më tipo ba öcakö bino éntö kom më lobo ni énë öcakö bino, cë dong kom më tipo bino kï körë.

⁴⁷ Dhanö më acël ecweo kï kom apua më lobo, éntö dhanö më ariö na énë Kiricito öya kï i polo.

⁴⁸ Jö më lobo cal gini kï dhanö n'ecweo kï kom ngöm më lobo, éka jö më polo cal gini kï dhanö n'öya kï i polo.

⁴⁹ Dong kite na yam onu eruko cal ka dhanö n'ecweo kï ngöm më lobo ni, kömanön thon onu ebino ruko cal ka dhanö n'öya kï i polo.

⁵⁰ Man énë ngö na an akobo bothwu, utmegona, nü gin na tye kï ringo kom éka remo ba twëro leeno ker k'Obanga. Éka gin na töp ökö thon ba twëro leeno gin mörö na ba töp.

⁵¹ Winy unu müng nü: Pathi ni onu kibëc ebino thöö, éntö ebino lökö onu kibëc ökö—

⁵² piöpö pï karë na nönök mörö kékën, na calö wang na ryapi éka ka buruji më ajiki bino kok, piën buruji bino kok, éka dong ebino cero jö n'öthöö ökö na ba dök bino gini thöö, cë ebino lökö onu thon.

⁵³ Pï kom na töp myero orukere kï gin na ba töp, éka gin na thöö myero orukere kï gin na ba thöö.

⁵⁴ Dong ka gin na töp orukere kï gin na ba töp, éka gin na thöö thon orukere kï gin na ba thöö, cë bino nyutho köp na yam écöö nü bino cobere kakarë nü, "Thöö dong émwönyö ökö i lög."

⁵⁵ "In, thöö, lögni tye kwene? In, thöö, kwirni tye kwene?"

⁵⁶ Kvir ka thöö énë bal, éka tükö më bal énë cik.

⁵⁷ Éntö pwöc myero obed both Obanga na müö onu lög pï Rwoth onu Yecu Kiricito.

⁵⁸ Pï manön, utmegona më amara, cung unu na tek abonge gin mörö na yengowu, mëdëre unu thon kï tic ka Rwoth nünö kibëc, nakun iniang unu nü i Rwoth onu, yelerewu pathi më nono.

16

Mic më könyö jö k'Obanga

¹ Dong na makö köp më jwoko lim më könyö jö k'Obanga na leng, kite na calö acikö jö n'oye Kiricito na tye

ï Galatia, un thon myero itüm unu ni kömanön.

² ï nünö më acël kibec më cabit, dhanö acélacël ki kinwu myero opok lüm mökö oketh path, nakun lübö kite na en onwongo ködë. Kür dök iküra unu naka ka an athuno kunön éka icak unu ajwok.

³ Éka ka an athuno bothwu, an abino miö waraga më nyuthere both jö na un iyérö éka më orogü ki mic na mewu yo Jerucalem.

⁴ Éka ka pore nüna më cihö, cë gïn twëro woth köda.

Köp ka Paulo më ajiki

⁵ An abino lümöwu kinge wok ki Macedonia, piien an atye ka yübü më wok ki i Macedonia.

⁶ Í karë mökö gwök onyo an abino bedo bothwu pi karë mörö onyo an abino bedo kunön pi karë më ngicö piny, ek ikönya unu i wothna kanya an abino cihö iie.

⁷ An ba amitö ni anenwu kobedini, ageno ni an abino bedo bothwu pi karë mörö, ka Rwoth oyeo.

⁸ Entö an abino bedo i Epeco naka i nünö më Pentekot.

⁹ Dholokek na lac më tic etyeko yabö ökö nüna, kadü bed ni jö na pol tye ka pyem köda.

¹⁰ Ka Timoteo obino, nén unu ni ba obedo ki lworo mörö i karë na en tye i kinwu. Piien en tye ka tio tic ka Rwoth, kite na an atye ka tic ködë.

¹¹ Ngat mörö kür ökwér en, entö köny unu en, ek owoth ki kuc ka en tye ka dwogo botha.

An atye ka kürö en më dwogo botha kanya acël ki utmego.

¹² Kobedi dong köp i kom ömin onu Apolo, an akwaö en më bino lümöwu kanya acël ki utmego nökënë, entö en onwongo ba mitö bino i karë nön, cë bino bino ka karë na bér onwongere.

Köp më ajiki

¹³ Bed unu na wangwu thwolo, cung unu na ték i kom yeewu, bed unu cwö na cwinygi ték, cung na ték.

¹⁴ Tím unu jami kibec ki mar.

¹⁵ Ingeo unu ni Citipwanu éka jö më ödë ene öcakö gini dökö jö n'oye më acël i lobo Akaya, dök thon öjalérë gini kén-gi më tic pi jö k'Obanga na leng. Dong akwaöwu utmegona,

¹⁶ më bedo ki winy bothgi éka ki jö nökënë kibec na yelere giri më tic kanya acël ködgi.

¹⁷ Cwinya onwongo yom i karë na Citipwanu, Porotunatuc éka Akaika othuno gini, piien gin obedo ka miö köny n'onwongo un ipe kany më miö.

¹⁸ Gin dong okweo cwinya éka cwinywu thon. Myero imii unu pwöc both koth jö na calö man.

Moth më ajiki

¹⁹ Jö n'oye Kiricito na tye gini i lobo Acia omothowu. Akwila éka Piricila omothowu gini ki cwinygi kibec i Rwoth, kanya acël ki jö n'oye Kiricito na cökérë gini i ödgí.

20 Utmegeo kibec omothowu. Mothere unu ki moth me mar.

21 An, Paulo, acöö moth ni ki cinga kikokome.

22 Ka ngat mörö ba marö Rwoth, cen myero ömakü. Rwothwa, bin!

23 Kica ka Rwothwa Yecu obed kodwu.

24 Mar na möga obed bothwu kibec i Kiricito Yecu. Amën.

Waraga më arïö na Paulo öcöö both jö **Korinti** **1 Jö Korinti** **Köp na ut i** **waraga ni**

Waraga më arïö na Paulo öcöö both jö Korinti, ècöö i karë n'onwongo wat mérë kï jö n'oye Kiricito na tye i Korinti öbal rwök. Jö mökö kï kin jö n'oye Kiricito onwongo ötwakö gïni köp na rac kanyalér i kom Paulo, éntö en onyutho bothgï köp më ribérë kanya acël éka en thon onyutho yom cwiny mérë i karë na köp ni ötimérë.

Köp mérë më acël kï i waraga ni, Paulo önywakö köp më wat mérë kï jö n'oye Kiricito na tye i Korinti, nakun kobo bothgï pïngö en ègamö kï gero më yanyö éka kï jém na tye i kin jö n'oye Kiricito. Paulo onyutho yom cwiny mérë ni twak na en ètwakö kï gero okelo ngut éka ribérë. Cé en ökwaö jö n'oye Kiricito më müö köny both ècan n'obedo gïni Ekiricito na tye i Yudea. I cura më ajiki, Paulo ocung na ték i kom tic mérë na calö akwëna nakun jükö jö mökö na nönök na tye i Korinti n'onwongo gïn öyübérë nakun kobo gïni ni gïn enë ebedo èkwëna n'atir, nakun do tho gïni Paulo ni obedo akwëna na twot.

Moth n'öya kï both Paulo

¹ Waraga ni öya kï both Paulo, n'eyérö kï miti k'Obanga më bedo akwëna ka Kiricito Yecu éka kï both ömín onu Timoteo.

Both jö k'Obanga n'oye Kiricito na tye i Korinti, kanya acël kï jö k'Obanga na leng kibëc na tye i Akaya kibëc:

² Èk Obanga Apap onu éka Rwoth Yecu Kiricito ömiïwu kïca éka kuc.

*Obanga na kweo cwinywa
kibëc*

³ Pwöc obed both Obanga Apap ka Rwoth onu Yecu Kiricito, Apap n'obedo akïca éka Obanga na kweo cwiny jö kibëc.

⁴ Èn kweo cwinywa kï i canwa kibëc, ek wan thon ekwe cwiny jö na tye kï can na papath kï kweo cwiny na wan kikomwa enwongo kï both Obanga.

⁵ Pi kite na can na Kiricito ödangö opodho i komwa na thwönë, kömanön thon pi Kiricito wan thon ekweo cwinywa rwök.

⁶ Ka wan ödangö can, manön miö ekweo cwinywu éka inwongo unu larë. Ka ekweo cwinywa, manön thon miö ekweo cwinywu, miö un icakö nwongo tékö më dangö kit can na wan thon ödangö.

⁷ Wan etye kï gen na ték pi un, pién wan engeo ni ka un inywakö unu kódwa can na wan ödangö, un thon ebino kweo cwinywu kite n'ekweo kï cwinywa.

⁸ Utmegowa, wan émitö ni inge unu can na wan ödangö

í lobo Acia. Pëkô ödiöwa rwök na wan ba dök èrömö dangö, ömiö wan ba dök ebedo kï gen mörö më kwö.

⁹ Adyer, wan onwongo engeo kï i cwinywa nü dong etyeko ngölö niwa köp më thöö. Ëntö man ötimërë ek kür eketh gen i komwa kënwa ëntö both Obanga na cero jö n'öthöö.

¹⁰ Èn ölaröwa kï i can na rac më thöö, éka èn dökï bino laröwa. Wan dong eketho genwa i kome nü èn bino laröwa dökï.

¹¹ Myero iřibërë unu ködwa i läga, ek ömii jö na pol öpwö Obanga pîrwa pî gin na bér n'ëtimö i komwa pî läga ka jö na pol.

Gin n'ömiö woth ka Paulo Ögalërë

¹² Gin na wan èwakërë pîrë èn ene, wan engeo kï i cwinywa adyer nü wan èkwö na bér i lobo ni, éka rwök mëre wan èkwö kanya acël kodwu abonge bal mörö na cwinywa leng kit n'Obanga ömitö ködë. Pathi pî ryëkö ka dhanö ëntö pî kïca k'Obanga.

¹³ Wan ba écöö bothwu gin mörö na un ba iřömö kwanö onyo niang ië. Ageno nü ibino unu niang na bér,

¹⁴ kite na calö dong iñiang unu na nönök nü i nñö na Rwothwa Yecu bino dwogo, un ibino wakërë unu pîrwa kite na wan thon ebino wakërë pîrwu.

¹⁵ Piën an onwongo aniang na bér, ömiö ayübö nü myero acak lïmöwu ek inwong unu gum wang kïriö.

¹⁶ An ayübö më wok lïmöwu ka acihö yo Macedonia éka dökï ka adwogo kï Macedonia, ek ikönya unu iwothna yo Yudea.

¹⁷ Èn karë na an ayübö kömanön, onwongo ba abedo lölökö köpna. Ba ayübö calö dhanö mörö na kobo nü, "Eyo" onyo "Pe" awang acël.

¹⁸ Ëntö kite n'Obanga obedo ngat na genere, köp n'onwongo wan ekobo bothwu ba obedo "Eyo" éka "Pe."

¹⁹ Piën Yecu Kiricito, Wod k'Obanga, n'onwongo wan kï Cilibwano éka Timoteo étitö bothwu nü ba obedo ngat na kobo nü, "Eyo" éka "Pe," ëntö i èn, wan enwongo "Eyo" kékën.

²⁰ Piën gin n'Obanga öcikö nü étimö kibëc ocobere i kome, pî manön wan ekobo nü, "Amën" i Yecu Kiricito pî miö dheo both Obanga.

²¹ Obanga ènè ömiö wan ecung na ték kanya acël kodwu i Kiricito, éka èn owirowa.

²² Èn dong ömwönö anyuth mëre i komwa, éka oketho Tîpo mëre i cwinywa më moko nü èn ebino miö gin na kibëc na èn öcikö.

²³ An acwodo Obanga më bedo caden-na nakun akobo kï cwinya kibëc nü an ba abino adwogo i Korinti, piën onwongo amitö tîmö niwu kïca.

²⁴ Pathi nü wan etye kï twëro i kom yeewu, ëntö wan etio kodwu kanya acël ek un ibed kï yom cwiny, piën un icung na ték i kom yee.

2

¹ Ëntö kï kubotha onwongo athamö nï dwogona myero kür okel niwu cwer cwiny nökëne.

² Ka acwero cwinywu, cë nga na döki bino yomo cwinya? Pathi dhanö na an acwero cwinya?

³ Manön ènë ömio an acöö waraga nön bothwu, ék ka abino, jö na myero oyom cwinya kür ömia gini cwer cwiny, piën onwongo ageno nï yom cwinya ènë yom cwiny na mewu.

⁴ An onwongo acöö niwu waraga kï thwön kumo éka kï cwer cwiny na pii wanga cwer, pathi pi cvero cwinywu èntö ék ömii inge unu mar na thwönë na an aute ködë i komwu.

Timö kïca both Abal

⁵ Ka ngat mörö okelo cwer cwiny, nwongo ba ocwero cwinya an këna, èntö nwongo ocwero cwinywu kibëc. Akobo nï kömanön piën ba amitö nï adii èn rwök.

⁶ Koth dhanö n'obedo nï kömanön, pwod na jö na pol oketho i kome nwongo örömö èn.

⁷ Kobedini, myero itim unu kïca nïnë éka ikwee unu cwinye, ék ömii cwer cwiny na dit kür obuu èn ökö.

⁸ Pi manön akwaöwu nï myero inyuth unu mar na un itye ködë i kome.

⁹ Man ènë gin n'omio acöö waraga më témöwu ék anen ka iwinya unu i yodhi kibëc.

¹⁰ Ka ngat mörö na un dong itimö kïca nïnë, an thon atimö kïca nïnë, éka gin mörö na an

dong atimö kïca ië, ka mörö tye, nwongo atimö kïca i nyim Kiricito pírwu,

¹¹ ék Catan kür ölööwa kï ryekö mérë. Piën wan dong engeo thama mérë.

Gin n'omio Paulo cwinyeba obedo na yom i Teroa

¹² I karë na an athuno i Teroa më titö Emuth na Bér ka Kiricito, anwongo nï Rwoth dong öyabö yoo nïna.

¹³ Èntö cwinya ba obedo na yom piën ba anwongo öméra Tito kunön. Cë amotho jö n'oye na tye kunön éka apoth yo Macedonia.

¹⁴ Èntö pwöc obed both Obanga, na karë kibëc télöwa i dore më nyutho lög ka Kiricito, döki tio ködwa ék Kiricito ongere na calö gin na kur na ngwece dung i kabedo kibëc.

¹⁵ Piën wan ebedo gin na ngwece kur ka Kiricito both Obanga, na dung na mit both jö na tye ka larë éka both jö na tye ka rwenyo.

¹⁶ Both jö na tye ka rwenyo ngwecewa obedo gin n'öthöö na kelo thöö, èntö kï both jö na tye ka larë ngwecewa obedo gin na kwö na kelo kwö. Éka nga na twëro tic ni?

¹⁷ Wan ba écal kï jö na pol nökëne na rubo gini köp k'Obanga më nwongo magoba. Èntö i Kiricito, wan etwak na cwinywa leng i nyim Obanga na calö jö n'Obanga ororo.

3

Etic më cikëre na nyen

¹ Wan döki écakö më pakérë kënwa? Onyo un imítö nü wan ebin kï waraga më nyuthere bothwu calö jö nökënë onyo waraga na un icöö?

² Un kikomwu ical kï waraga më nyuthere n'écöö i cwinywa, na ngere éka jö kibec kwanö.

³ Un dong inyutho nü ibedo unu waraga n'öya kï both Kiricito, na wan ekelo. Waraga ni ba écöö kï kalam éka ingki, éntö écöö kï Típo k'Obanga na kwö, ba écöö i kidi éntö écöö i cwiny dhanö.

⁴ Gin n'ömiö akobo kömanön piën wan ecung na tek i nyim Obanga i Kiricito.

⁵ Wan kï komwa ba érömö kobo nü gin mörö öya kï bothwa, éntö tekowa kibec öya kï both Obanga.

⁶ Èn ömiöwa érömö bedo etic më cikérë na nyen, pathi më cik n'écöö acöa éntö më Típo, piën cik n'écöö acöa kelo thöö, éntö Típo kelo kwö.

Dheo më Cikérë na Nyen

⁷ Cik na yam écöö kï nyukuta i kom kidi n'apada na tic mérë kelo thöö, onwongo obino kï dheo. Ömiö nénö wang Muca obino ölöö jö Icarael ökö pü ryeny ka terinyime, na dheo na ryeny nón obino orwenyo ökö.

⁸ Cë dong tic ka Típo ba bino bedo kï dheo na löö?

⁹ Cë ka tic na miö köp löö dhanö tye kï dheo, kara tic na kelo kwanö dhanö nü kite atir dheo mérë ba bino löönö manön ökö?

¹⁰ Adyer gin na yam tye kï dheo dong ödökö gin na dheo

mérë ope, pü dheo nökënë ca na dong löö en rwök.

¹¹ Èka ka gin n'onwongo orwenyo ökö obino kï dheo, cë gin na ruu myero obed kï dheo na löö!

¹² Pi manön, wan etye kï koth gen ni, ené ömiö wan etwak kï tek cwiny.

¹³ Wan ba écal kï Muca na yam oumo terinyime kï böngü ek jö Icarael kür önen gini kit na tar na ryeny rwenyo kódë kï i terinyime.

¹⁴ Èntö thamagi onwongo oumere ökö, naka thon tin thamagi pod oumere ka ekwanö cikérë na cön. Gin më um nón bara ekwanyö, piën twéro kwanyerë ökö pü yee i Kiricito kékén.

¹⁵ Naka tin ka ekwanö cik ka Muca, gin më um nón pod umo thamagi.

¹⁶ Èntö ka dhanö mörö ölokérë both Rwoth, gin më um nón ekwanyö ökö.

¹⁷ Kobedini, Rwoth ené Típo, éka kanya Típo ka Rwoth tye ie, kuc thon tye ie.

¹⁸ Èka wan kibec na dong ekwanyö gin më um ökö kï i terinyimwa, dong etye na calö dheo ka Rwoth, na miö ölokérë ödökö calö en, nakun dheo mérë mëdérë amëda, na bino kï both Rwoth, na ené Típo.

4

Tar më Emuth na Bér

¹ Pi manön, wan na dong emiöwa tic ni pi kica k'Obanga, cwinywa ba bino dök cen.

² Èntö wan dong ekwérö kit na reco kibec n'ekanö éka më

lewig. Éka döki ékwérö tic më bwöl ökö éka kí dwanyö köp k'Obanga, éntö wan étwakö köp adyer i nyim Obanga, éka jö kibéc na genere ngeo.

³ Ka cë Emuth na Bér na wan ekelo oumere ökö, nwongo oumere kí both jö na tye ka rwenyo kékén.

⁴ Gin jö na ba yee nonu, obanga më lobo ni dong oumo thamagi ökö ék kür önen gini tar më Emuth na Bér i kom dheo ka Kiricito, na éné cal k'Obanga kikome.

⁵ Wan ba étitö köp i komwa kénwa, éntö i kom Yecu Kiricito n'obedo Rwoth, éka wan kikomwa ebedo eticwu pí Yecu.

⁶ Pién Obanga yam okobo ni, "Wék tar öryény nakun yaa kí i cöl piny," man éné Obanga acél nön n'omiö tar mérë öryény i cwinywa më miöwa tar më ngec i kom dheo k'Obanga na ryény i wang Kiricito.

Lönyö n'ëkanö i tabö

⁷ Éntö wan etye kí lönyö ni na tye i tabö n'ecweo kí lobo, më nyutho ni tékö na thwönë yaa kí both Obanga, éntö ba yaa kí bothwa.

⁸ Édiöwa i yodhi kibéc, éntö ba éridöwa rwök. Thamawa ocung ökö, éntö genwa ba óbal.

⁹ Eyelowa, éntö Obanga ba öwéköwa ata, éteöwa piny, éntö ba éthöö.

¹⁰ Karé kibéc wan éyéo thöö ka Yecu i komwa, ék kwö ka Yecu thon onen i komwa.

¹¹ Pién karé kibéc wan n'ekwo emiré më thöö pí Yecu, ék kwö mérë onen i komwa na thöö ökö.

¹² Man dong nyutho ni thöö tye ka tic i komwa, éntö kwö tye ka tic i komwu.

¹³ Wan etye kí koth tipo nön ék yee na yam écöö ni, "An ayee, éné omiö atwak." Wan thon eyee, éné omiö wan etwak.

¹⁴ Wan engeo ni ngat n'ocero Rwoth Yecu bino cerowa thon kite n'ocero kí Yecu, éka én bino kelowa i nyime kanya acél kodwu.

¹⁵ Jami ni kibéc ötmérë píru, ék kíca k'Obanga omédéré both jö na pol, ék gin thon omédéré kí pwöc rwök më miö Obanga dheo.

Kwö më yee

¹⁶ Pí manön, cwinywa ba tye ka dök cen, kadí del komwa ni tye ka bal, éntö kwö më iwa tye ka röc nänö kí nänö.

¹⁷ Pién can n'eyelowa kódë yot, tye pí karé mörö na nönök, éka tye ka yübü niwa dheo na thwönë na ba thum éka thwönë na lös.

¹⁸ Wan ba écikö wangwa më nénö gin na nen, éntö më nénö gin na ba nen. Gin na nen bedo pí karé na nönök kékén, éntö gin na ba nen bedo naka naka.

5

Öt na ba égerö kí cing

¹ Kobedini onu engeo ni ka kom onu më lobo ni n'ebedo ié ébalö ökö, etye kí gedo n'oya kí both Obanga na ba égerö kí

cïng, öt na bedo na twal i wi polo.

² Adyer onu écür acüra i kom onu më lobo ni piën onu etye kï miti nï ek eruk onu kï kom më polo,

³ piën ka eruko onu, ba ebino nwongo onu etye koluta.

⁴ Piën ka wan pod etye i kom më lobo ni, écür acüra kï cwer cwiny n'önüöwa, pathi nï wan ba émitö nï ebed na ba erukowa, éntö wan émitö nï erukwa kï kom na nyen, ek gin na kwö ömwöny gin n'öthöö ökö.

⁵ Ngat n'øyüböwa pï köp ni enë Obanga, éka thon ömiööwa Típo mëre na calö gin na moko nï en ebino cobo gin n'ëcikö.

⁶ Pï manön i karë kibëc wan ecung na ték éka thon engeo ni ka wan ékwö i komwa ni nwongo ebedo na bor kï both Rwoth,

⁷ piën kwöwa cung i kom yee, pathi gin n'enënö kï wang.

⁸ Wan ecung na ték, nakun éthamö ni thwara éwëk komwa ökö, ek ebed i pacö kanya acél kï Rwoth.

⁹ Dong kadi bed etye i kom kany onyo kunön, wan eketho cwinywa më bedo jö na yomo cwiny Rwoth.

¹⁰ Piën onu kibëc myero ecung i nyim then më ngölököp ka Kiricito ek ngat acélacél onwong gin n'opore na en ötimö i karë n'onwongo en pod tye i kom, ka bér onyo rac.

Tic më dwökö dhanö both Obanga

¹¹ Pï manön, wan kibëc engeo ni Rwoth myero elwor, wan étemö më ywanö thama ka jö nökënë. Éntö kitewa ngere both Obanga, éka thon ageno ni ngere i ngec na tye i cwinywu na nyutho niwu bal.

¹² Wan ba dökë etye ka pakëre kënwa bothwu, éntö etye ka miöwu karë më wakëre i komwa, ek ömiüwu igam unu köp ka jö na wakëre i kom gin na nen kï yökö, éka pathi pï gin na tye i cwiny jö.

¹³ Ka wan edökö jö n'opo, nwongo wan epo pï Obanga, éntö ka wiwa tye ka tic na bér, manön obedo më könyöwu.

¹⁴ Piën mar ka Kiricito tye ka löönö kwöwa, piën wan dong engölö köp köman ni ngat acél öthöö pï jö kibëc, manön dong ömiö jö kibëc öthöö gini.

¹⁵ En yam öthöö pï jö kibëc, ek jö na kwö kür dökë obed na kwö pïrgi kën-gi, éntö obed gini kï kwö pï ngat na yam öthöö éka ocer pïrgi.

¹⁶ Dong cakëre tin më cïdhö kïdë anyim wan ba dökë enënö dhanö mörö i kite më lobo, kadi bed yam wan engeo Kiricito i kite më lobo, wan ba dökë engeo en i kite nön.

¹⁷ Pï manön ka ngat mörö tye i Kiricito, en dökö cweç na nyen, gin na cön nwongo orwenyo ökö, gin na nyen enë dong oleo kakarë.

¹⁸ Man kibëc obedo tic n'oya kï both Obanga, n'ödwököwa bothe pï Kiricito éka ömiööwa tic më dwökö jii bothe,

¹⁹ Obanga onwongo tye ka dwökö jö na tye i lobo yo bothe i Kiricito nakun ba ökwanö balgi i komgi. Eka en ömiöwa köp më dwökö jii bothe.

²⁰ Pi manön, wan dong ödökö éwang Kiricito, Obanga kwaöwu ki dwönwa. Wan thon ébakö dhöwa bothwu nakaka Kiricito ni imii unu Obanga ödwökwu bothe.

²¹ Obanga ömiö ngat n'onwongo ba obedo abal ödökö abal pi onu, ek i Kiricito onu énywak kite atir k'Obanga.

6

¹ I ticwa kanya acel k'Obanga, wan ékwaöwu ni kür iwëk unu käca méré öbal nono.

² Piën en okobo ni,
"Yam awinyi i karë më tímö dhanö na bér,
eka i karë më larë abino akonyi."

Winy unu, tin ene caa më tímö dhanö na bér. Tin ene nñö më larë.

³ Wan ba eketho orii i yoo ka ngat mörö, ek kür enwong bal mörö i ticwa.

⁴ Entö na calö etic k'Obanga, wan enyutho bérwa kénwa i kite na papath: ki dangö pëkö na ték, i ayela na pol, i can, eka ki kwö na ték n'ödiöwa,

⁵ epwodowa, etweowa i buc, écüpölwak i komwa, etio tic na ték, ebedo abonge nñö eka cem oremowa.

⁶ Wan enyutho ni wan etic k'Obanga pi kitewa na leng, pi ngec na wan etye ködë, pi

dünnö cwinywa eka kicawa, pi Tipo Naleng, eka pi mar na wan etye ködë na twodo ope iee,

⁷ i twakwa n'atir, eka pi tekö k'Obanga, wan emakö jami lwény më kite atir i cingwa kucem eka kucam.

⁸ Gin öwöröwa, eka ba öwöröwa gini thon, éyanyöwa eka épaköwa. Eterowa na calö etwodo, nakun wan etwakö köp adyer,

⁹ eterowa na calö jö na ba engeo, entö engeowa na bér, na calö jö n'öthöö entö ekwö, na calö jö n'epwodogü entö ba enekowa,

¹⁰ na calö jö na kumo entö cwinywa nwongo pod tye na yom, na calö écan entö émiö jö na pol ödökö élönyö, na calö jö n'ope ki gin mörö entö etye ki jami kibéc.

¹¹ Un jö Korinti, wan dong etwak kodwu kanyalér, eka éyabö cwinywa na lac bothwu.

¹² Wan ba eumo cwinywa ki bothwu, entö un ene iumo unu cwinywu ki bothwa.

¹³ An atwak kodwu na calö un éthinöna, yab unu thon cwinywu na lac.

Öt k'Obanga na kwö

¹⁴ Kür iribérë unu ki jö na ba oyee. Kite atir twérö bedo kanya acel ki kite na ba tye atir ningö? Onyo tar twérö ríbérë ki col piny kanya acel ningö?

¹⁵ Thama ka Kiricito twérö rwatérë ki më ka Belial ningö? Onyo ngö na dhanö

n'oye Kiricito twërō nywakö
ki dhanö na ba oye Kiricito?

16 Öt k'Obanga twërō rïberë
ki cal jwogi nïngö? Piën wan
ënë ebedo öt k'Obanga na
kwö, na calö Obanga okobo
ni, "An abino bedo ködgï, éka
abino woth i kin-gï, abino
bedo Obangagï, éka gïn thon
bino bedo jäga."

17 "Pï manön dong yaa unu
ökö ki bothgï,
éka ipokere unu, man
köp na Rwoth okobo.
Kür igud unu gin na ba leng,
éka abino gamöwu."

18 "An abino bedo apapwu,
éka un ibino bedo
awopena éka anyi-
rana,
man köp na Rwoth Won Twër
Kibëc okobo."

7

1 Nyikoneina më amara,
kite na wan dong etye ki
cikërë ni, myero onu dong
ëlonyerë ökö ki kom gin na
kibëc na lino kom onyo tipo,
nakun elworo Obanga, ék
ebed jö na leng kikokome.

*Yom cwiny ka Paulo pii
ngut ka jö Korinti*

2 Yab unu cwinywu
bothwa. Wan ba étimö gin
mörö na rac both ngat mörö,
wan ba ébwölö ngat mörö éka
wan thon ba ebuo ngat mörö.

3 An ba akobo köp ni ék köp
ölöwu, piien akobo bothwu
cön ni un pïrwu ték bothwa
rwök, më kwö kanya acel
onyo më thöö kanya acel
kodwu.

4 Atye ki gen rwök i komwu,
awakara thon pïrwu. Cwinya
okwe na bër, éka apong ki
yom cwiny i canwa kibëc.

5 ï karë na wan ethuno i
Macedonia wan ba enwongo
karë më yweo, can onwongo
ögüröwa tungi ki tungi,
lwëny i kin dhanö éka lworo
n'onwongo tye i cwinywa.

6 Éntö Obanga, na kweo
cwiny jö na cwinygi ötür, ok-
weo cwinywa pii bino ka Tito.

7 Pathi pii bino mëre këkëñ,
éntö thon pii kite na un icükö
unu ki cwinye. Èn okobo
bothwa miti na un itye ködë
më nënöna, cwer cwiny na
un itye ködë, kit cwiny na un
ibedo ködë i koma, ék yom
cwinya ömëdëre amëda.

8 Kadi bed waragana
ocwero cwinywu, an ba
angut më cöönö, kadi bed
ni angut aniang ni waraga
nön ocwero cwinywu pii karë
mörö na nönök.

9 Kobedi dong an cwinya
yom, pathi ni acwero
cwinywu, éntö piien cwer
cwinywu ömiö un ingut.
Cwer cwinywu nön onwongo
öya ki both Obanga, ék ömiiwu
kür inwong unu can mörö
pïrwa.

10 Piën cwer cwiny
n'Obanga miö kelo ngut na
tero dhanö i larë, abonge
kobo ni kono angeo, éntö
cwer cwiny më lobo kelo
thöö.

11 Nën unu kite n'Obanga
otio ki cwer cwinywu ködë!
Nën kite na dong iketho unu

kü cwinywu më nyutho nü ipe unu kibal, i akämöwu, i lworo, mitiwu më nénöna, i kite na un ilara unu ködë, éka kite na un iyübérë ködë më miö pwod i kom gin na rac! Un dong ityeko nyuthere kenwu iyoob kibec nü ba ingeo unu gin mörö i kom köp nön.

¹² Kadï bed acöö waraga bothwu, ba acöö pïngat mörö n'onwongo ötimö gin na rac, onyo pïngat mörö n'etimö gin na rac i kome, éntö acöö ek ömii kite na un idyerë ködë pírwa onen ökö bothwu i nyim Obanga.

¹³ I kom köp ni kibec ekweo cwinywa.

Mëd i kom kweo cwinywa, wan ebedo kï yom cwiny më nénö kite na Tito onwongo tye kï yom cwiny ködë, piën un kibec ikweo unu cwinye.

¹⁴ An onwongo awakara bothe pírwu, éka ba imia unu lewic. Éntö kite na gin na kibec na wan ekobo bothwu onwongo tye atir, cë dong wakérëwa pírwu i nyim Tito tye atir.

¹⁵ Éka mar mërë pírwu ödökö na ték, ka én opo kite na un ibedo kï winy i kome, kite na un igamö unu én ködë kï lworo éka kï myél kom.

¹⁶ An cwinya yom, piën atye kï gen i komwu.

8

Obanga marö ngat na miö mic

¹ Kobedini, utmegowa, wan émitö nü ibed unu kï ngec i kom kïca n'Obanga ömio

both jö n'oye Kiricito na tye i Macedonia.

² Gin owok i atëmatëma na ger, éka kï yom cwiny na gïn obedo gïni ködë i can na thwönë rwök n'ödiögï, énë lönyö na dit më cwiny n'obedo gïni ködë më miö mic.

³ Piën gïn ömio gin na gïn römö miö, éka thon na kadhö. Gin ötimö na ba édiögï adia.

⁴ Gin ökwaöwa nakun bakö dhögï nü ek enwong gïni karë më ribérë ködwa më könyö jö k'Obanga na leng.

⁵ Gin otio tic n'ölöö genwa ökö, piën gïn öcakö mire këngi both Rwoth éka dong kï miti k'Obanga gïn öcakö mire gïni bothwa thon.

⁶ Pi manön wan dong écükö cwiny Tito nü kite na calö én dong öcakö tic më kïca i kinwu, myero én dong ocob ökö.

⁷ Éntö kite na calö un ilöö dhanö i yodhi kibec — i kom yee, i twakö köp, i ngec, i ketho cwinywu, éka mar na un itye ködë i komwa — bërlilöö unu dhanö thon i tic më kïca më miö mic.

⁸ Gin na an atwakö ba obedo cik na an énë amiö, éntö amitö nyutho bothwu kite na jö nökënë oketho gïni cwinygi, ek atëm mar na un itye ködë ka obedo mar n'atir.

⁹ Piën un ingeo cwiny më kïca na Rwoth Yecu Kiricito obedo ködë, kadï bed én obedo alönyö, éntö pírwu ölokérë ödökö acan, ek i can mërë ibed unu élönyö.

¹⁰ Éka man énë thama na an amiö i kom köp ni, twérö bedo na bërlibed ka icobo unu gin na

yam īcakö i mwaka n'opoth ca. Yam un ēnē ibedo unu jō n'onwongo tye anyim, pathī tic kékēn, éntö naka thon mē ketho cwinywu i miō mīc.

¹¹ Kobedi dong amitö ni īmēdērē unu kī ticwu anyim, ek icob unu ökö. Bed unu kī miti mē tyeko na rōm arōma kī maca na yam īcakö unu kōdē nakun īkwanyö unu gin na mītērē kī i kom gin na tye bothwu.

¹² Obanga gamö mīc na dhanö tye kōdē ka cē ēn tye kī miti mē miō, na ba parō pī gin na ēn ope kōdē.

¹³ Wan ba etye ka kobo ni ēk jō nökēnē obed gini na bēr nakun īdiōwu, éntö ni ēk jō kibēc obed gini na rōm arōma.

¹⁴ Kite na calō kobedini un itye kī jami na büp, mii unu gin na gini mītö, ek wang mōrō ka gini thon bino bedo gini kī jami na büp, gini thon bino miōwu gin n'orem kī bothwu, ekā dong bino miō un ibedo na rōm arōma,

¹⁵ na calō īcōö ni, "Ngat n'ōcōkō na büp, ba tye kōdē na pol, ekā ngat n'ōcōkō na nōnōk ba tye kōdē na nōnōk."

Eoro Tito yo Korinti

¹⁶ An apwöyö Obanga n'oketho i cwiny Tito miti na thwönē na rōm kī mēga mē könyöwu.

¹⁷ Ēn ba ögamö kwacwa kékēn, éntö oketho cwinye iē rwök, n'ōmiō ēn tye ka bino bothwu pī miti mērē kēnē.

¹⁸ Wan eoro ēn kanya acēl k'ōmīnwa n'ēpakō rwök both jō n'oye Kiricito kibēc pī kite na

ēn tütö kōdē kōp mē Emuth na Bēr.

¹⁹ Pathī manön kékēn, éntö jō n'oye Kiricito öyérö gini ēn mē woth kanya acēl kōdwa i tic mē miō mīc mē kīca na wan etye ka tio pī miō dheo both Rwoth, ekā pī mitiwa mē miō köny both dhanö.

²⁰ Wan etye n'ēgwökērē rwök ek ngat mōrō kūr onwong bal mōrō i kit na wan etye ka tic kī mīc na büp ni kōdē.

²¹ Pī manön thamawa tye mē tio gini na bēr, pathī i nyim Obanga kékēn, éntö naka thon i nyim dhanö.

²² Wan thon etye ka orogī kanya acēl k'ōmīnwa nökēnē na wan ebedo ka tēmō kite i yodhi kibēc, ekā wan enwongo ni ēn obedo dhanö na ketho cwinye i kom tic na pol, éntö i karē ni dong tye ka ketho cwinye na tēk rwök na lōo tic na yam cōn, pī gen na thwönē na ēn tye kōdē i komwu.

²³ Éntö pī Tito, ēn obedo atic kanya acēl kōda ekā awodha i kinwu, ekā pī utmegowa, gini obedo eor na cung pī jō n'oye Kiricito, ekā gini ēnē jō na kelo dheo both Kiricito.

²⁴ Pī manön, nyuth unu mar na un itye kōdē both jō n'oye Kiricito, ek gini önen wakērēwa na wan etye kōdē i komwu.

9

Mīc mē könyö jō k'Obanga

¹ Kobedi dong ba mītērē an mē cōonō bothwu kōp i kom

mic n'ëmio pü jö k'Obanga na leng.

² Piën an angeo miti na un itye ködë më müö köny, éka an abedo ka wakara pürwu rwök both jö më Macedonia, nakun akobo bothgï ni un jö na tye i Akaya onwongo iyübérëunu ökö cön më müö mic anaka i mwaka n'opoth. Ketho cwinywu ömiö jö na pol thon oketho cwinygi i miö mic.

³ Èntö an atye ka oro utmego onu bothwu èk wakérëwa pürwu i köp ni kür ojik i köp kékén, èk ibed unu ni yübérë i kite na an akobo bothgï ködë.

⁴ Ka cë jö mökö më Macedonia owothro köda éka onwongo ni un ba iyübérë, wan ebino bedo kii lewic pi gen n'onwongo wan eketho i komwu.

⁵ Pi manön an athamö ni bér aor utmego ni anyim èk otyek gini yüb më mic na un icikérë më müö, èk obed n'oyübérë na calö mic na un imiö kii cwinywu kenwu na ba ediiowu adia.

⁶ Köp tye ni köman, dhanö mörö na cwöö kodhi na nönök, bino kaö thon na nönök, éka dhanö mörö na cwöö kodhi na büp, bino kaö thon na büp.

⁷ Dhanö acélacél myero ömii kite na cwinye omoko më müö, abonge cwer cwiny onyo dic mörö, piën Obanga marö ngat na müö kii yom cwiny.

⁸ Éka Obanga twérö müöwu gum më jami na pol, èk i jami

kibec éka i karë kibec ibed unu kii jami na römöwu na bér, na müö un thon itwérö müö köny na thwönë më könyö tic kibec na bécö.

⁹ Kite n'ëcöö ködë i Cöc na Leng:

"Ömiö jami mérë na pol both écan,
kite atir mérë bedo naka naka."

¹⁰ Ngat na müö kodhi both acwö kodhi éka cem më acama, bino thon müöwu kodhi éka mëdö dërö më kodhiwu cë bino nyanö kac më kite atirwu më müö mic.

¹¹ Èn bino müöwu ibedo élonyö i kit yodhi kibec èk ibed unu jö na römö bedo kii cwiny më müö mic i karë kibec, éka ka wan etero mücwu both jö na mítö, gin bino pwöyö Obanga.

¹² Tic më köny ni na un itye ka tímö bino kelo gin na mítëre both jö k'Obanga na leng, èntö pathi manön kékén, bino kelo thon pwöc na thwönë rwök both Obanga.

¹³ Piën gin na bér na ticwu kelo bino müö jö na pol më müö dheo both Obanga, piën nyutho winy na bér na un itye ködë i köp më Emuth na Bér i kom Kiricito éka pi cwiny na bér na un inywakö kii limwu ködgï éka kii jö kibec.

¹⁴ Éka i lëgagï pürwu cwinygi bino parö pürwu, piën pi kica k'Obanga na thwönë n'òkadhö karë na dong onen bothwu.

¹⁵ Pwöc obed both Obanga pi müö mérë na bér na ba kobere!

10

Pido ka Paulo pü tic mërë

¹ An, Paulo, akok bothwu nakun abakö dhöga, an'ekobo nü amwol éka dökü awör thon ka atye kanya acël kodwu, éntö an abedo na ger ka atye thenge. Pü mwolo éka dökü pü kïca ka Kiricito,

² an akwaöwu nü ka an abino bothwu, kür ïmïa unu abed kï gero éka kï ték cwiny na an ageno nü atwérö bedo ködë i kom jö mökö na thamö gïnï nü wan élübö kite më lobo ni.

³ Kadï bed nü wan etye i lobo, wan ba élwënyö kï jami lwëny më lobo ni.

⁴ Jami lwëny na onu élwënyö ködë ba obedo jami lwëny më lobo, éntö obedo gïnï jami lwëny më tékö k'Obanga, na türö cël ka lang onu.

⁵ Wan étürö thama na ba tye atir, éka awaka kïbëc na tingere malö na mïö jïi ba ngeo Obanga. Wan émakö thamagï më jëm éka émiö bedo kï winy i kom Kiricito.

⁶ Éka kinge na dong idökü unu jö na tye kï winy n'örömö, cë wan ebino pwodo ngat acëlacël na ba bino bedo kï winy.

⁷ Nën unu gin na tye i nyimwu. Ka dhanö mörö tye kï ték cwiny nü én abedo dhanö ka Kiricito, myero én önen dökü nü onu abedo jö ka Kiricito kite na én obedo ködë.

⁸ Piën kadi bed awakara rwök pü twérö na Rwoth ömiö bothwa, an ba abino bedo kï lewic më tic kï twéröna. Twérö nön én ömiö bothwa

më könyöwu, éka më döngöwu éntö pathi më dwököwu pïny.

⁹ An ba amitö nü abed calö ngat mörö na tye ka mïö lworo bothwu kï waraga na an acögï.

¹⁰ Piën jö mökö kobo nü, "Waraga mërë pëk éka ték, éntö ka én othuno bothwu kome bedo na görü, éka thon gin mörö ope i köp mërë na én twakö."

¹¹ Jö n'obedo nü kömanön myero öniang gïnï nü kite na wan étwak ködë i waragawa ka wan epe, wan ebino tïmö nü kömanön thon ka etye bothwu.

¹² Wan ba éparö më kethere kénwa onyo më pore kï jö mökö na pakérë gïnï kén-gï. Éntö ka gïn opimere kén-gï éka opore gïnï kén-gï, nwongo gïn ba ryëk.

¹³ Wan ba ebino wakérë n'ökadhö wangë n'ëmiö, éntö wan ebino wakérë kanya Obanga opoko nïwa më tic, më thuno naka thon bothwu.

¹⁴ Wan ba ebino kadhö kanya myero ejik ië calö yam ba ethuno bothwu, piën wan énë écakö thuno bothwu më titö köp më Emuth na Bër i kom Kiricito.

¹⁵ Wan ba éwakérë n'ökadhö wangë n'ëmiöwa i kom tic na jö nökënë énë oyelere ië, éntö wan etye kï gen nü ka yeewu ömëdérë, ticwa thon bino mëdérë rwök i kinwu, nakun lübö kanya yam epoko nïwa.

¹⁶ Cë wan étwérö titö Emuth na Bër i lobo na tye kanya bor. Piën wan ba émitö wakérë kï tic na dong ngat

nökënë ötimö i kakar tic ka dhanö nökënë.

¹⁷ Entö ngat na wakérë myero öwakérë i Rwoth.

¹⁸ Piën pathi ngat na pakérë kënë ènë Obanga pwöyö, entö dhanö na Rwoth pakö.

11

Paulo éka èkwëna na twot

¹ Athamö ni iđii unu cwinywu na nönök i koma pi mingona. Dii unu cwinywu köda.

² An abedo ki nyeko i komwu ki koth nyeko n'Obanga tye ködë. Piën an acikara më miöwu both ècwö acël na ènë Kiricito ek amiiwu bothe na calö nyakö na leng na bara ongeo ècwö.

³ Entö an atye ki lworo ni kite na calö thwol yam öbwölö Eba k'ököra mérë, un thon jii bino balö thamawu ökö, éka bino miöwu ba ibino marö unu Kiricito ki cwinywu kibec na leng.

⁴ Piën ka ngat mörö obino bothwu cë ötitö Yecu nökënë na path ki Yecu na wan etitö, onyo ka igamö unu tipo na path ki kom maca na un igamö, onyo Emuth na Bér na path ki kom maca na un iyeo, manön un iyeo më tic ködë.

⁵ Entö an ba athamö ni an atidi both "èkwëna na dito."

⁶ Kadï bed ni an ba aryék i twak, entö an atye ki ngec. Wan enyutho bothwu köp ni kanyalér i yodhi kibec.

⁷ Onyo an onwongo atimö bal i karë na an amwolara ek etingwu malö, piën an atitö bothwu köp më Emuth na Bér k'Obanga abonge cül mörö?

⁸ An ayakö jö n'oye Kiricito nökënë nakun agamö cül ki bothgi ek atii niwu tic.

⁹ Éka i karë na an onwongo atye kodwu na mitö gin mörö, an onwongo ba abedo pëkō both ngat mörö, piën utmego n'obino gini ki i Macedonia ömiö ngö n'onwongo an amitö. An agwökara kür abed pëkō bothwu i yoo mörö kékén, éka abino mëdara më timö ni kömanön.

¹⁰ Na calö köp n'adyer ka Kiricito tye i cwinya, ngat mörö ope na bino jükö awakana ki i lobo Akaya.

¹¹ Pängö? Piën an ba amaröwu? Obanga ngeo ni an amaröwu!

¹² Éka an abino mëdara më timö ngö na an atye ka timö, ek kür amii jö na mitö nwongo karë më miögë bedo na röm aröma ködwa i tic na gin wakérë ië.

¹³ Piën koth jö nön obedo gini èkwëna na twot, etic na bwölö jii, na lökérë gini calö èkwëna ka Kiricito.

¹⁴ Ngat mörö myero kür obed ki ur i köp ni, piën kadi Catan kikome thon lökérë na calö malaika na menyö piny.

¹⁵ Pi manön man ba obedo gin mörö më aura ka cë etic ka Catan lökérë gini calö etic na kitegi atir. Ajikigi bino bedo na röm aröma ki tic na gin otio.

Can ka Paulo na calö akwëna

¹⁶ An akobo dökë ni ngat mörö kür ötham ni an abedo aming. Entö ka ithamö unu ni kömanön, cë ijöla unu na calö

dhanö na mäng, ek ömia thon awakara na nönök.

¹⁷ Gin na an atye ka kobo k'awaka ba obedo gin na Rwoth ömia ni akob bothwu entö an atwak calö amäng.

¹⁸ Kite na jö na pol wakëre i kite na lobo wakëre ködë, an thon abino wakara.

¹⁹ Un idio cwinywu ki yom cwiny ki jö na mäng, nakun un ibedo jö na ryék!

²⁰ Adyer un idio cwinywu kadi ngat mörö tye ka lököwu më bedo opii mérë, onyo tye ka camö limwu, onyo buowu, onyo na bwönöwu, onyo bapö lemwu.

²¹ Ki lewic na mëga an ayeo ni wan onwongo egorü rwök pi köp nön!

Entö gin mörö na dhanö düö cwinye iie më wakëre pire, an atye ka twak na calö amäng, an thon adio cwinya më wakara i kom gin nön.

²² Gin obedo jö Iburu? Cë an thon abedo. Gin obedo jö Icarael? Cë an thon abedo. Gin obedo ekwaë k'Abraam? Cë an thon abedo.

²³ Gin obedo etic ka Kiricito? (An atwak na calö ngat n'opo.) An alöögi, atio tic na thwönë rwök, abedo i buc wang na pol, epwoda ki wel lüth na ba kwanerë, éka abüç ki i thöö wang na pol.

²⁴ Eyuda opwoda gini wang abic ki del wang pyer adek wie abungwën.

²⁵ Opwoda gini wang adek ki lüth, ecela ki kite wang acel, mel ötür köda wang adek, abuto i nam kiwor éka kiceng.

²⁶ An abedo ka woth pii karë na pol. Anwongo can n'oya ki i kulo na mol éka can n'oya ki both eyak. Anwongo can n'oya ki both jö më thurwa kikokome éka can n'oya ki both Erok. Anwongo can n'oya ki i pacö na dit, can n'oya ki i thim, can n'oya ki i nam. Anwongo can n'oya ki both utmego n'obedo etwodo.

²⁷ An atio tic na tek rwök pii karë na lac na ba aninö kiwor. An ario kec k'oriö pii, na ba acamö gin mörö. Adangö thon piny na ngic abonge gin mörö më aruka.

²⁸ Mëd i kom gin nökënë kibec, tye gin acel na kelo pëkō botha karë ki karë, enë par na an atye ködë pii jö n'oye Kiricito kibec na tye i kabedo na papath.

²⁹ Nga na tye ki görü éka an ba awinyo görü? Nga n'emiö opodho i bal na ia ba öwang iie?

³⁰ Ka onwongo myero awakara, an abino wakara pii gin na nyutho goruna.

³¹ Obanga éka Apap ka Rwoth Yecu, na myero épak naka naka, ngeo ni an ba atwot.

³² I karë na an atye i Damaciko, gabuna na tye i the loc ka rwoth Areta onwongo obedo ka kürö pacö ka jö Damaciko ni ek emaka,

³³ entö emia adonyö yokö n'elwa piny k'adita nakun awok ki i wang derica na tye i kom cel, éka alüü ökö ki i cingë.

12

Lek ka Paulo éka öküdhö na

tye i ringo kome

¹ An myero amédara më wakara. Kadï bed nü gin mörö ope n'enwongo ki ié. An abino mëdara më twak i kom gin na an anënö i wang lek éka gin na Rwoth onyutho botha.

² An angeo dhanö na tye i Kiricito na dong ökadöh mwaka apar wie angwén na yam etingo etero ökö malö i wi polo më adek. Kadï bed nü onwongo tye i kom onyo ba tye i kom, an ba angeo éntö Obanga énë ngeo.

³ Éka an angeo nü dhanö ni kadï bed tye i kom onyo ba tye i kom, an ba angeo éntö Obanga énë ngeo,

⁴ onwongo etingo etero malö i polo. Èn onwongo owinyo köp na ba römö atwaka, na ba eyeo dhanö më kobo.

⁵ An abino wakara pü koth dhanö na cal ki manön, éntö ba abino wakara pira këna, na path ki göragna.

⁶ Kadï bed an amítö yérö më wakara, an ba abino bedo aming, piën nwongo an abino twakö köp n'atir. Èntö an ba abino wakara ek dhanö mörö kür obed ki thama i koma na lösö gin na èn önënö onyo köp na èn owinyo awinya ki botha.

⁷ Më gwököna ek kür atingara malö këna pü jami më aura na pol na yam Obanga onyutho botha, yam eketho öküdhö i ringo koma, aor ka Catan ek oketh can i koma ek kür atingara malö këna.

⁸ Wang adek an akwaö Rwoth ek ökwany ökö ki botha.

⁹ Èntö èn okobo nüna nü, "Kicana tye na romi, piën teköna bedo na tek rwök kanya görü tye ié." Pi manön an abino wakara rwök ki yom cwiny i kom göragna, ek tekö ka Kiricito obed i koma.

¹⁰ Pi Kiricito ömiö cwinya yom pi görü na papath na an atye ködë, ayeny, can, pëkö mökö n'eyela ködë, pëkö na dia rwök, piën kanya an agörü ki ié, ènë kanya an aték ki ié.

Mar ka Paulo pi jö n'oye Kiricito na tye i Korinti

¹¹ An onwongo abedo aming! Idia unu ié, piën un onwongo myero ipaka unu. An ba atidü both "Èkwëna na dito" kadï bed an ba abedo gin mörö.

¹² Gin na kibec na nyutho nü an abedo akwëna kikome ötimëre yam i kinwu ki diö cwiny na thwönë, anyuth mökö, gin më aura, éka tango.

¹³ Gin acél kékén na an ba atimö, na an atimö both jö n'oye Kiricito nökënë, an kikoma onwongo ba abedo pëkö bothwu. Tim nüna unu kica i bal ni.

¹⁴ Kobedini dong an ayübara më bino bothwu wang më adek, éka an ba abino bedo pëkö bothwu, piën gin na an amítö ba obedo jamiwu èntö un. Ka obedo nü kömanön, éthinö kür myero ökan jami pi enyodogii èntö enyodo ènë myero ökan jami pi éthinögii.

¹⁵ An abino bedo ki yom cwiny rwök më tic ki jami kibec na an atye ködë, kadï teköna kibec pi könyö kwö

13

më tipowu. Ka an amaröwu rwök, un ibino maröna na nönök?

¹⁶ Èntö kadi bed nü kömanön, an ba abedo pëkō bothwu. Cë kite na an onwongo abedo ököra, an abino amaköwu ki bwöl.

¹⁷ Tye ngat mörö ki i kin jö n'onwongo an aorogi bothwu n'obuo gin mörö ki bothwu pira?

¹⁸ An akwaö Tito nü myero obin bothwu éka aoro ömän onu më woth ködë kanya acël. Tito obino obuowu? Pe! Onu yam ba etio tic ki cwiny acël éka élübö yoo acël kékën?

¹⁹ Un ibedo thamö pi karë kibec nü wan ebedo ka pido pürwa kénwa i nyimwu? Wan ebedo twak i nyim Obanga na calö jö na tye i Kiricito, éka jami kibec na wan etimö, utmegona më amara, obedo më jingöwu.

²⁰ Piën an atye ki lworo nü caa nökënë ka an athuno atwero nwongowu ipath ki kite na an amitö nü ibed unu ködë, éka un thon dökü ibino nwongo unu nü an apath ki kite na un imitö nü an abed ködë. An atye ki lworo nü gwök onyo itye unu ki dha, adinga, akemö, woro, ayeny, anii, awaka éka arubaruba.

²¹ An atye ki lworo nü ka adwogo bothwu dökü, Obangana bino miöna amwolara i nyimwu, éka an abino kok pi jö na pol n'öbalö cön cë ba ongut gini ki i kom timgi na ba bér, tím më ölyang éka miti më kom na gin ötimö.

*Limo ka Paulo më adek yo
Korinti*

¹ Man ènë wang më adek na an atye ka bino ködë yo bothwu. "Caden na römö ariö onyo adek ènë myero omok gini köp kibec n'ekelo më alara."

² An onwongo dong akobo niwu ökö cön i karë na an onwongo atye bothwu i limona më ariö. Kobedi dong anwö na an ape bothwu nü ka adwogo dökü, ba abino tímö kica both jö n'öbalö cön,

³ kite na un imitö moko nü Kiricito twak nakun wok ki botha. Èn ba obedo ngat na görü më tic kodwu èntö èn ték i kinwu.

⁴ Èn onwongo eguro i kor yath aria piën èn onwongo ope ki tékö, èntö kobedini èn tye na kwö pi tékö k'Obanga. Kadi onu thon ègorü i èn, èntö i ticwa kodwu onu ebino kwö kanya acël ki Kiricito pi tékö k'Obanga.

⁵ Ngirëunu kenwu, èk inen unu ka cë icung unu na ték i yeewu. Témérëunu kenwu. Un ba itye ka niang nü Yecu Kiricito tye i iwu? Thwara ka ibedo unu jö n'Obanga ba pwöyö.

⁶ An ageno nü un ibino niang na bér nü wan ba ebedo jö na ba épwöyögi.

⁷ Wan élégö Obanga pürwu èk kür itim unu gin mörö na rac. Pathi më nyutho nü wan jö n'Obanga pwöyö, èntö wan èmitö nü un itim gin na bér,

kadii bed ni wan enen calö jö
na en ba öpwöyö.

⁸ Piën wan ba etwëro tio gin
mörö na ba rwatëre kï köp
na tye atir, entö etwëro tio gin
na rwatëre kï gin na tye atir
kékén.

⁹ Cwinywa yom ka wan
ëgörü, nwongo un itëk, dökü
wan élégö ni idök unu jö^{n'otengo.}

¹⁰ Man enë gin n'omiö an
acöö köp ni na an pod atye
kanya abor kodwu, ek kür
abed na ger i komwu ka an
abino nakun atio kï twëro na
yam Rwoth ömia ek akönywu
më döngö, entö pathië më
dwököwu pïny.

Moth ka Paulo më ajiki

¹¹ Më ajiki, utmegona, bed
unu dong. Yüb unu dong
kitewu na bér, éka dökü myero
iwiny unu kokona pi gin na
an akwaöwu pïrë. Bed unu kï
thama acél, bed unu kï kuc,
éka Obanga na won mar kï
kuc bino bedo kodwu.

¹² Mothere unu kenwu kï
moth më mar.

¹³ Jö k'Obanga na leng kibec
omothowu.

¹⁴ Kïca ka Rwothwa Yecu
Kiricito, mar k'Obanga, éka kï
ribérë ka Tipo Naleng obed
kodwu kibec.

Waraga ka Paulo both Jö Galatia

*Köp na tye i waraga ka
Paulo both jö Galatia*

Na calö emuth na bér i kom Kiricito n'écakö titö éka égamö i kin jö n'onwongo ba obedo gini Eyuda, peny öya ka cë dhanö twérö lübö cik k'Eyuda më bedo dhanö n'oye Kiricito adyer. Paulo okobo cön ni man onwongo ba müterë-ni i adyer, köp na pírë tek pí kwö i Kiricito onwongo obedo yee, na nwongo eketho jami kibec atir k'Obanga. Èntö i kin jö n'oye Kiricito kibec na tye i lobo Galatia na tye i Acia, n'onwongo tye i thë lòc ka jö Roma, kunön onwongo jö na pyem ki Paulo kobo gini ni dhanö myero olüb cik k'Eyuda ka mitö bedo n'atir k'Obanga.

Waraga ka Paulo both Jö Galatia onwongo écöö më dwongo cen jö n'onwongo èbwölögï kipwony më twodo i yee n'atir éka i kwö n'Obanga mitö. Paulo öcakö twak nakun gwökö twérö mérë n'ecwodo én ködë ni akwëna ka Yecu Kiricito. Paulo ocere ni cwodo mérë më bedo akwëna öya ki both Obanga, pathi ki i twérö ka dhanö mörö, éka tic mérë na pírë tek onwongo obedo pí jö na ba obedo Eyuda. Cë én okobo ni yee kékén énë müjii twérö bedo n'atir k'Obanga. I ajiki më cura gini Paulo

onyutho ni kite ka jö n'oye Kiricito wotho na bér ki mar n'adwogi mérë yaa ki i yee i Kiricito.

Moth n'öya ki both Paulo

¹ Waraga ni öya ki both Paulo n'obedo akwëna, Pathi jö mörö énë oora, èntö Yecu Kiricito éka Obanga Apap n'ocero Yecu ki i kin jö n'othöö.

² Utmego kibec na tye gini kanya acél köda kany ömio mothgi.

Both jö n'oye Kiricito kibec na tye i Galatia.

³ Obanga Apap onu éka Rwoth Yecu Kiricito ömiliwu gum ki kuc.

⁴ Kiricito ömio kwö mérë pí bal onu, kite n'Obanga Apap onu onwongo öyübü ködë, ek elar onu ökö ki kom gin na rac më karë ni.

⁵ Dheo obed both Obanga naka naka. Amën.

Emuth na Bér nökënë ope

⁶ An auro kite na un ilökëre unu ködë piöpiö, ikwérö unu ngat na yam ocwodowu i kica ka Kiricito, éka itye ka lökëre unu i emuth na bér nökënë na path k'Emuth na Bér.

⁷ Adyer Emuth na Bér nökënë ope, èntö tye jö mökö na tye ka balö thamawu ökö nakun mitö gini lökö Emuth na Bér i kom Kiricito dökö gin na path.

⁸ Èntö kadü bed wan onyo emalaika mörö n'öya ki i polo ötitö niwu emuth na bér nökënë na path k'Emuth na Bér na yam wan etitö niwu

ca, myero écën dhanö nön ökö.

⁹ Na calö wan ekobo niwu cön, pod anwö kobo dökü: Ka ngat mörö tye ka titö niwu emuth na bér nökënë na path k'Emuth na Bér na yam igämö unu, myero écën dhanö nön ökö!

¹⁰ An kobedini atye ka rangö cwak ka dhanö, onyo cwak k'Obanga? Onyo an atye ka témö yomo cwiny jö? Ka onwongo an pod ayomo cwiny jö, kono an ba abedo atic ka Kiricito.

Kite n'Obanga ocwodo kü Paulo

¹¹ Utmegona, an amitö inge unu ni Emuth na Bér na an atitö ba obedo gin mörö na dhanö enë öcakö.

¹² An ba agamö kü both ngat mörö, onyo epwonya kódë apwonya; entö an onwongo kü both Yecu Kiricito n'onyutho botha.

¹³ Un ityeko winyo kite na kwöna na cön onwongo tye kódë i lübö dini k'Eyuda, éka kite na an onwongo aketho kü can i kom jö k'Obanga n'oye Kiricito éka atémö tyekogü ökö.

¹⁴ I dini k'Eyuda, an onwongo alöö pol jii n'obedo gini nyelwaga éka alübö thékwarö ka kwerena kibéc.

¹⁵ Entö i karë na bara énywöla, Obanga onwongo öyéra ökö, éka ocwoda pi kïca mérë. Cé oyomo cwinye

¹⁶ më nyutho nïna Wode, ek atit köp i kome both Erok. I karë na köp ni ötimëre, an ba acidhö më penyo thama kü both ngat mörö,

¹⁷ an thon ba acidhö yo Jerucalem both jö n'onwongo obedo gini ekwëna cön nïna, entö cüçüth an acidhö i lobo Arabia éka kinge adwogo yo Damaciko.

¹⁸ Cé kinge mwaka adek, an acidhö naka yo Jerucalem më rwatérë kü Petero éka abedo bothe pi nïnö apar wie abic.

¹⁹ An ba anenö akwëna mörö entö an anenö Yakobo kékén Ömïn Rwoth.

²⁰ Adyer i nyim Obanga, gin na kibéc na an atye ka cöönö niwu i waraga ni, twodo mörö ope ië.

²¹ Kinge manön an acidhö yo Ciria éka Cilicia.

²² I karë nön, jö n'oye Kiricito na tye gini i Yudea onwongo bara ngeo gini koma.

²³ Gin onwongo owinyo köp i koma kékén ni, "Ngat na yam oyelo onu kobedini dong tye ka titö köp i kom yee na yam en ötemö türö."

²⁴ Cé öpäkö gini Obanga pi gin na en ötimö i koma.

2

Ekwëna oyeo Paulo

¹ Cé kinge mwaka apar wie angwën, an adök dökü yo Jerucalem kü Baranaba. An thon awotho kü Tito.

² An acidhö kunön pién Obanga onyutho nïna ni myero acidhi ek atit i nyimgi körë kü körë Emuth na Bér na an atitö both Erok. Entö an atimö man i müng both jö na pürgi tek, ek kür ökwér gini ticna na an atio onyo na dong atyeko tio, ek obed më nono.

³ Tito n'onwongo owotho kôda ba édiö ni ek elir, kadï

bed nü ën onwongo obedo
Arok n'oya kï Grecia.

⁴ Köp ni öya piën utmego
mökö n'obedo etwodo on-
wongo odonyo i kinwa më
rïpö kuc na wan etye ködë i
Kiricito Yecu éka më müöwa
bedo opii.

⁵ Éntö më gwökö köp adyer
më Emuth na Bér pïrwu, wan
ba eyeo nü gïn ölööwa kadï na
tidi mörö.

⁶ Both jö na pïrgü ték
—kite n'onwongo gïn tye
ködë ba okelo apokapoka
mörö botha, piën Obanga ba
lengere both ngat mörö pï
kite na ën tye ködë—jö nön ba
ömëdö gïn gïn mörö i köpna.

⁷ Nakaka manön, gïn obino
ongeo nü Obanga ömia tic më
tütö Emuth na Bér both Erok,
na calö ömiö Petero tic më tütö
both Eyuda.

⁸ Obanga n'ooro Petero
na calö akwëna më tic both
Eyuda, ën onwongo thon tye
ka tic köda na calö akwëna
both Erok.

⁹ Yakobo, Petero éka Jon,
n'onwongo ngere më bedo
calö wîr ka jö n'oye Kiric-
ito, na dong öniang gïn pï
gum n'Obanga ömia wan kï
Baranaba, gïn omotho cïngwa
më nyutho nü wan kibëc etio
kanya acël. Gin oye nü wan
myero écidh both Erok, éka
gin écidh both Eyuda.

¹⁰ Gin na gïn ökwaöwa
kékën éné nü wan myero
ëmëdërë më könyö écan, gin
n'onwongo an aketho cwinya
nü myero atüm.

¹¹ Ë karë na Petero obino yo
Antiokia, an ajükö ën wang kï
wang, piën ën onwongo ötimö
gin na ba tye na bér.

¹² Na bara jö n'oya kï
both Yakobo othuno, Petero
onwongo cemo kanya acël
k'Erok. Éntö i karë n'othuno
gïn, cé Petero öcakö jer
thenge éka opokere ökö kï
both Erok piën ën onwongo
lworo jö na mütö nü ngat mörö
kékën n'oye Kiricito myero
kono élir.

¹³ Eyuda nökënë n'oye
öcakö gïn lübö kite ka Petero
nön më twodo éka Baranaba
thon öcakö lübö kitegi më
twodo nön.

¹⁴ Ë karë na an anënö nü gïn
ba dökï tye ka tic na lübëre
kï köp adyer më Emuth na
Bér, an akobo both Petero
i nyimgi kibëc nü, "In ibedo
Ayuda, éntö ikwö calö Arok
éka ba ikwö calö Ayuda. Cé
dong in itwëro diö Erok nïngö
më lübö kite k'Eyuda?

¹⁵ "Onu n'ebedo Eyuda i
anywöli éka ba ebedo 'Erok
n'obedo gïn ébal'

¹⁶ engeo nü dhanö ba
ëkwanö nü kite atir piën tïmö
gin na cïk mütö, éntö pï yee i
kom Yecu Kiricito. Kadï onu
thon Eyuda, eketho yee onu
i kom Yecu Kiricito ék ékwan
onu nü kite onu atir pï yee i
kom Kiricito, éka pathi pï tïmö
gin na cïk mütö. Pi manön, ba
ëkwanö dhanö nü kite atir piën
tïmö gin na cïk mütö.

¹⁷ "Éntö ka onu érangö
nü ëkwan onu nü kite onu
atir pï Kiricito, cé enwongo
nü onu kikome ebedo ébal
dökï, manön twëro nyutho nü

Kiricito ömiiö onu ödökö ēbal?
Adyer pathi ni kömanön!

¹⁸ Ka an agérö gin na yam
arédhö ökö piny, an amoko
këna ni an abedo ngat na türö
cik.

¹⁹ Cik kikome ene ömiiö an
athöö ek akwö pi Obanga.

²⁰ An dong etyeko gurona
ökö ki Kiricito i kor yath aria
méré eka pathi an ene döki
akwö, entö Kiricito ene tye ka
kwö i ia. Kwö na an atye
kodé i koma, an akwö pi yee
i kom Wod k'Obanga, n'omara
eka ömiré kënë pira.

²¹ An ba akwérö kïca
k'Obanga, pién ka ékwanö
dhanö ni kite atir pi cik, cë
Kiricito öthöö nono abonge
tyen köp mörö."

3

Cobo cik onyo bedo kiyee

¹ Un jö Galatia kara iming
unu köman! Nga n'örögöwu?
Yam cön onwongo enyutho
niwu kanya lér kite n'eguro ki
Yecu Kiricito i kor yath aria.

² Ek an apenywu peny acél:
Un inwongo Tipo Naleng pi
lübü cik, onyo pi yeo köp me
Emuth na Bér na un iwinyo?

³ Un kara iming köman?
Un icakö ki Tipo Naleng
k'Obanga entö kobedini
dong imitö unu tyeko ki tek
komwu?

⁴ Un ilimö can na pol nono?
I adyer onwongo ba obedo
me nono.

⁵ Obanga müowu Tipo
Naleng eka tio tango na pol i

kinwu pién ilübö unu cik onyo
pi yeo köp na un iwinyo?

⁶ I yoo acél nön, "Abraam
oye i kom Obanga, eka ekwanö
en ni kite atir pi yee mérë."

⁷ Myero inge unu ni jö na
tye ki yee, giñ ene ethinö
k'Abraam.

⁸ Cöc na Leng onyutho ni
Obanga bino kwanö Erok ni
kitegi atir pi yee. Obanga
yam ötitö köp me Emuth na
Bér both Abraam cön nakun
kobo nineni, "Rok kibec bino
nwongo gum piri."

⁹ Pi manön, jö na tye ki
yee bino nwongo giñi gum
k'Abraam n'obedo ki yee.

¹⁰ Jö kibec na jengere i lübü
cik elamogi dong ökö, pién
ecöö ni, "Cen opodh i kom jö
kibec na ba lübü gin na kibec
n'ecöö i buk me cik."

¹¹ Kobedini köp dong
ongere ökö ni ba ékwanö
dhanö mörö ni kite atir i nyim
Obanga pi timö gin na cik
mitö, pién ecöö ni, "Ngat na
kite atir pi yee bino bedo na
kwö."

¹² Entö cik ba ocung i kom
yee, pién ecöö ni, "Ngat na
timö nakun lübü gin na cik
mitö kibec bino kwö."

¹³ Kiricito ene yam ökokö
onu ki i cen n'opodho i kom
onu pién onu ba elübö cik.
En obino cë olökérë ödökö
dhanö n'elamö nakaka onu,
pién yam ecöö ni, "Cen myero
opodh i kom dhanö n'engabö
malö i wi yath."

¹⁴ En ökokö onu ek gum
na yam Obanga ömiiö both

Abraam myero Erok thon on-wong gini pü Yecu Kiricito. Ëk onu thon enwong Tipo Naleng na yam én öcikö pü yee.

Cik éka gin më Cikérē

¹⁵ Utmegona, ëk kono amii apor më kwö më karë kibëc. Ka jö ariö öcikérē gini i gin mörö na gin omoko, ngat mörö ope na dökü twëro lökö onyo mëdö gin mörö ië.

¹⁶ Obanga yam öcikérē both Abraam éka akwarë. Cöc na Leng ba okobo ni, "kü both ékwaëni," na nyutho jö na pol, éntö okobo ni, "kü both akwaru," na nyutho ngat acël kékën na énë Kiricito.

¹⁷ Ngö na an akobo ene: Cik na dong obino kicen kinge mwaka 430 ba dökü twëro türö cikérē n'Obanga otyeko moko cön éka thon ba miö gin n'ëcikö rwenyo.

¹⁸ Ka mïc n'Obanga miö obedo pü cik, cë nwongo ba lübö cikérē mérë, éntö Obanga i kïca mérë ömiö mïc both Abraam pü cikérē mérë.

¹⁹ Pingö émiö cik dökü? Cik ebino émëdö i kom cikérē ëk türö cik onen ökö kanyalër naka wang n'akwar Abraam n'eketho cikérē pïrë obino. Emalaika énë yam okelo cik cë émiö i cïng ngat na ribö dhanö kanya acël.

²⁰ Ngat na ribö dhanö ba mitërë ka ngat acël kékën énë tye; éntö Obanga tye acël.

²¹ Cik dong tye ka pyem ki cikérē k'Obanga? Pathi kömanön, piën ka onwongo émiö cik na twëro miö kwö,

cë kwanö dhanö ni kite atir obedo pü lübö cik.

²² Éntö Cöc na Leng kobo ni jö kibëc tye gini i the lög më bal, ëk gin n'onwongo écikö émiö both jö n'oye pü yeegi i kom Yecu Kiricito.

²³ Na bara yee i kom Kiricito enyutho both onu, cik onwongo gwökö onu na calö emabuc, naka i karë na dong enyutho ni onu yee.

²⁴ Kömanön, cik onwongo obedo gin na gwökö onu naka Kiricito obino; cë dong écakö kwanö onu ni kite onu atir pü yee.

²⁵ Kobedini dong yee i kom Kiricito tye, onu ba dökü étwëro bedo i the gwök më cik.

Ëthïnö k'Obanga

²⁶ Un kibëc ibedo éthïnö k'Obanga pü yee i kom Kiricito Yecu.

²⁷ Piën un kibëc n'onwongo ebaticawu i Kiricito, iruko unu dong Kiricito calö böngü na nyen.

²⁸ Apokapoka ope i kin Ayuda k'Arok,* i kin opii éka ngat na löörë kënë, i kin écwö éka dhakö, piën un kibëc itye unu acël i Kiricito Yecu.

²⁹ Ka un ibedo jö ka Kiricito, cë un dong ibedo unu éthïnö k'Abraam na bino leo gin na yam Obanga öcikö both Abraam.

4

¹ Gin na an atye ka kobo énë ni alejami ka pod obedo athin, bedo na röm aröma k'opii, kadï bed én obedo won jami kibëc.

* 3:28 Arok obedo dhanö më Grecia.

² Èn bedo i thë lòc ka jō na gwökö en éka edite na gwökö jami naka ka karë n'apap mérë öcikö örömö.

³ Man énë kite n'obedo ködë i kom onu, i karë na onu pod ebedo calö éthiñö, onu onwongo etye calö opii na tye i thë twér më lobo ni.

⁴ Èntö ka karë n'écikö kikome örömö, Obanga obino ooro Wode na dhakö önywölö éka ökwö i thë cik,

⁵ më kökö jō n'onwongo tye i thë cik, ek élök onu édök éthiñö k'Obanga ki twér n'örömö.

⁶ Kobedini kite na un dong ibedo éthiñö k'Obanga, énë ömiö Obanga ooro Tipo ka Wode i cwinywu na kok ni, "Aba, Apap."

⁷ Pi manön un ba dökü ibedo unu opii. Un ibedo éthiñö k'Obanga, éka ebino miowu gin na en öcikö.

Par ka Paulo pi jö Galatia

⁸ I karë na un bara ingeo Obanga, onwongo ibedo unu opii ka gin mökö na ba obedo gïni obanga kikome.

⁹ Èntö kobedini dong un ingeo Obanga—onyo ni Obanga dong ngeowu—piñgö un dökü imitö dök cen i opii më bedo i thë twér më lobo ni na görü éka na piñy ölöögï? Imitö unu dök më bedo opiigi dökü?

¹⁰ Un iketho cwinywu më kwero nünö mökö, dwe, karë na papath, éka mwaka.

¹¹ An atye ki lworo rwök ni ticna kibec na an atio pírwu onwongo obedo më nono.

¹² Utmegona, an akwaöwu ni ibed unu calö an, piien an

dong adökö calö un. Un ba itimö gin mörö na rac i koma.

¹³ Kite na un ingeo ni onwongo obedo pi lith koma, énë ömiö an acakö titö niwu Emuth na Bér.

¹⁴ Un ba ibino icaa onyo ikwéra unu kadibed lith koma onwongo obedo atematëma bothwu, èntö ijöla unu na bér na calö an onwongo abedo malaika k'Obanga, onyo na calö an onwongo abedo Kiricito Yecu kikome.

¹⁵ Ngö n'öbalö yom cwinywu kibec n'onwongo itye unu ködë? An arömö miö caden ni, ka onwongo twérë, onwongo myero igol wangwu ökö éka imii unu botha.

¹⁶ An dong adökö langöwu piien an akobo niwu köp adyer?

¹⁷ Jö nökënë ca témö gïni ki tek më lököwu, èntö thamagi rac. Gin na gin mitö énë ni ilökérë unu ökö ki botha ek icak unu winyogi.

¹⁸ Ka ngat mörö tye ki miti më tímö gin na bér bothwu, manön kibec bér, èntö myero ötüm gïni i karë kibec, pathi ka an atye kodwu kékën.

¹⁹ Èthiñöna më amara, pod dökü atye ka dangö arem kodwu calö dhakö na dangö arem i karë më nywöl naka ka Kiricito obedo na tye rwök i kwöwu.

²⁰ An onwongo amitö ni kono abin abed bothwu kobedini ek aniang i kom gin na myero awak bothwu, piien thama i komwu dong ocungo wia ökö!

Apor k'Aga äka Cara

²¹ Un jö na mütö nü cik ölööwu, un ba ingeo ngö na cik kobo?

²² Piën ècöö nü Abraam onwongo tye k'awope ariö, acël obedo wod ka dhakö n'onwongo obedo opii, äka acël wod ka dhakö na ba obedo opii.

²³ Wod ka dhakö n'onwongo obedo opii ènywölö i kite më kom; èntö wod ka dhakö na ba obedo opii ènywölö na calö adwogi më cikéré n'Obanga öcikö.

²⁴ Man èrömö niang iie na calö carolok, mon ariö ni nyutho cikéré ariö. Cikéré acël öya ki i wi kidi Cinai, önywölö èthänö na bino bedo gini opii: Dhakö ni ènë Aga.

²⁵ Kobedini Aga cung pii kidi Cinai na tye i Arabia na röm aröma ki Jerucalem më karë ni piien tye i opii kanya acël k'èthänö mëre.

²⁶ Èntö dhakö nökënë ca cung pii Jerucalem na tye i polo; èn löörë kënë äka èn ènë obedo aya onu.

²⁷ Piën ècöö nü:
"Bed ki yom cwiny, in dhakö
 ni bedo alür,
 na ba önywölö èthänö
 mörö;
red ki yom cwiny rwök,
 in n'arem më nywöl ba
 ogoi;
piiën èthänö ka dhakö na
 cwörë öwëkö pol
 na löö èthänö ka dhakö na
 tye ki cwörë."

²⁸ Utmegona, un ibedo èthänö më cikéré k'Obanga, na calö Icaka.

²⁹ Ì karë nön, athin n'ënywölö i kite më kom obedo yelo athin n'ënywölö pi tekö ka Típo k'Obanga, äka röm aröma thon kobedini.

³⁰ Èntö ngö na Cöc na Leng kobo? "Ryem dhakö n'obedo opii ökö ki wode, piën wode ba bino leeno jami kanya acël ki wod ka dhakö na ba obedo opii."

³¹ Pi manön, utmegona, onu ba obedo èthänö ka dhakö n'obedo opii, èntö èthänö ka dhakö na ba obedo opii.

5*Kuc i Kiricito*

¹ Onu dong obedo jö më kuc piiën Kiricito otyeko gönyö onu dong ökö ki i opii. Cung unu na tek, äka kür idök unu i opii më cik döki.

² Winy unu köpna, an, Paulo, kobedini akobo bothwu nü: Ka imiö éliröwu, cë Kiricito bino bedo gin mörö na köny mëre ope bothwu.

³ An anwö köpna döki both dhanö acälacél na miö élirë nü èn dong tye ki banya më lübö cik kibec.

⁴ Un jö na mütö nü èkwanwu ni kitewu atür pii lübö cik, un dong ityeko pokere ökö kenwu ki both Kiricito; ïnyikö unu ökö ki cecen ki kom kica k'Obanga.

⁵ Pi Típo Naleng, onu etye ki gen na thwönë rwök më nwongo kite n'atür n'ëmiö pii yee.

⁶ Piën i Kiricito Yecu, lirë onyo bedo abonge lirë ope ki köny mörö. Gin na könyö kékën ènë yee na tio ki mar.

⁷ Un onwongo itye ka ngwēc na bēr. Nga n'ojükōwu mē lübō köp mē adyer?

⁸ Ēka pwony na calō man ba öya kī both Obanga n'ocwodowu.

⁹ Pwony mē twodo ni cal kī thöbī na tidi mörö na yenyo mökö ogati kibēc.

¹⁰ An atye kī gen i Rwoth nī thamawu ba bino pokere kī mēga. Ngat na tye ka müöwu dönyö i arubaruba, Obanga bino pwodo kadi bed en nga.

¹¹ Utmegona, ka an onwongo pod atitō niwu köp mē lirē, pīngö dökī pod eketho ayela i koma? Köp na makö yath aria onwongo ba dökī römö bedo pēkō, ka an atitō nī lirē bēr.

¹² An onwongo athamö nī ka twērē jō nön na tye ka rubowu kī köp mē lirē myero ömēdērē gini anyim ēka opudhere gini kēn-gi.

¹³ Utmegona, un yam ewodowu mē bedo kī kuc. Entō kür dök ilök unu kuc na mewu obed mē cobo miti mē kwö mē anywöli. Nakaka tūmō kömanön, myero dhanö acēlacēl ömirē mē könöy awodhe kī mar.

¹⁴ Piēn cik kibēc ēribögü ökö i köp acēl kékēn nī, "Mar awodhi na calō imarö komi keni."

¹⁵ Entō ka ikarē unu calō leeni mē thim, cē myero īgwökērē unu ek kür ithum unu ökö kenwu.

Tipo Naleng ēka kite ka dhanö

¹⁶ Gin na an akobo niwu ene, miū unu Tipo Naleng

ötēlwu, ek kür icob unu mitiwu mē kwö mē anywöli.

¹⁷ Piēn miti mē kwö mē anywöli pyem kī miti ka Tipo Naleng, ēka miti ka Tipo Naleng pyem kī miti mē kwö mē anywöli. Gin ariö ni dagērē gini, manön enē gin na jüköwu mē tūmō gin na un imitō.

¹⁸ Entō ka Tipo Naleng enē tye ka tēlöwu, un ba itye i the cik.

¹⁹ Tic mē miti mē kwö mē anywöli nen ökö kanya leng. Gin ene: tūm mē ölyang, carō, tarwang,

²⁰ wörö cal jwogi, tic mē jwöjwök, adagē, dhaa, nyeko, akēmō, larö dito, pyem, apokapoka,

²¹ woro, mérö, cem mē yom cwiny na rac, kī mökö nökēnē na calō manön gini. Pod dökī aciköwu na tēk, kite na calō aciköwu cōn, nī jō na tūmō koth jami na calō man gini, ker k'Obanga ba bino bedo mēgi.

²² Entō nyig na nyak pi Tipo Naleng ene: Mar, yom cwiny, kuc, diö cwiny, kīca, bēr, gen,

²³ mwolo, ēka gwökērē kēn. Cik mörö ope na kwērō jami na calō man gini.

²⁴ Jō n'obedo gini jō ka Kiricito Yecu otyeko gini guro miti mē kwö mē anywöli kī kite mérē kibēc i kor yath aria.

²⁵ Tipo Naleng ömio onu kwö, cē onu myero ewothu nakun élübō en.

²⁶ Onu myero kür ebed k'awaka, kür ebed nyuthere rwök both ewodh onu, ēka kür ebed kī nyeko i kin onu.

6

Tümö gin na bér both jō kibéc

¹ Utmegona, ka cē ēmakö dhanö mörö tūmō bal, un jō na Típo Naleng tēlōwu myero iköny unu ēn ek odwog i yoo n'atir, nakun ikönyö unu ēn kī cwiny mē mwolo. Éntö myero igwökérë unu ek un thon kür étémwu.

² Tingunu pēkōk'ewodhwu, manön ēnē bino miöwu icobo cik ka Kiricito.

³ Ka dhanö mörö thamö ni ēn pire tēk elöö jō nökënë, nakun i adyer nwongo ēn pire ba tēk, nwongo ēn bwöléré kënë.

⁴ Dhanö acélacél myero önen tic mérë kënë ka bér. Manön miö tyen köp mē wakérë mérë bedo pi tic mérë kikome na ēn otio, na ba dök poro kī tic ka ngat mörö nökënë,

⁵ piēn dhanö acélacél tye kī yec mérë na myero oting.

⁶ Dhanö n'etye ka pwonyo kī köp i kom Kiricito myero önywak jami kibéc na bēcō na ēn tye kōdē k'apwony mérë.

⁷ Kür iwék ébwölwu: Obanga ba etuko kōdē. Gin na dhanö öcwö ēnē ēn thon bino kaō.

⁸ Ngat n'öcwö kodhi mérë i pwodho mē miti mē kwö mē anywöli, gin na ēn bino kaō kī iie ēnē thöö, éntö ngat n'öcwö kodhi mérë i pwodho ka Típo Naleng, gin na ēn bino kaō kī iie ēnē kwö na ba thum.

⁹ Kür myero onu edher mē tūmō gin na bér, piēn ka karé örömö, onu ebino kaō kac ka onu ba edhero.

¹⁰ Dong pi manön kite na onu pod etye kī karé, onu myero etiim gin na bér both jō kibéc, na lōö kibéc myero onu etii both utmego onu n'oye gini Kiricito.

Cik ka Paulo mē ajiki

¹¹ Un itwérö nénö nyukuta na thwon na an atye ka cōönö kī cinga kikome.

¹² Jō nonu na tye ka tēmō mē diöwu ni myero ilirë unu, obedo gini jō na mitö ni gìn enen na bér both jō nökënë. Tyen köp na miögi tūmō ēnē mē jükö kür eketh ayela i komgī pi yath aria ka Kiricito.

¹³ Naka thon jō n'elirögü ba lübö gini cik, éntö gìn mitö ni elirwu ek ewakérë gini pi lirë mē komwu.

¹⁴ Éntö an ba amitö ni awakara pi gin mörö, kono pi yath aria ka Rwoth onu Yecu Kiricito, kī kubotha lobo kibéc dong eguro ökö i kör yath aria, éka an kikoma thon egura ökö i kom lobo pi yath aria.

¹⁵ Piēn ka ngat mörö elirö onyo ba elirö, manön ba obedo gin mörö na pire tēk; gin na pire tēk ēnē mē bedo cweç na nyen.

¹⁶ Kuc kī kica obed i kom jō na lübö pwony ni, éka both jō k'Obanga kibéc.

¹⁷ Cakérë kobedini cihö kōdē anyim, an ba amitö ni ngat mörö oyela, piēn an atye kī poo na dong eketho i koma na nyutho ni an abedo opii ka Yecu.

¹⁸ Utmegona mē amara, kīca ka Rwoth onu Yecu Kiricito obed kodwu. Amën.

Waraga na Paulo öcöö both Jö Epeco

Köp na tye i buk ka jö Epeco

Më acël, waraga ka Paulo both jö Epeco makö köp më "Yüb k'Obanga na ën bino cobo ka karë örömö, ënë më cökö jami kibec na tye i polo éka i wi lobo, më rïbögï ökö kanya acël i Kiricito" (Epeco 1:10). Obedo thon köp both jö k'Obanga kür öwëk gïni yüb na pïrë ték ni pï ribérë ka jö kibec i bedo acël i Kiricito Yecu.

I cöc më acël na tye i waraga ka Paulo both jö Epeco, ngat n'öcöö oketho wi köp më ribérë nakun twakö kite n'Obanga Apap öyérö ki jögë, kite n'ëtimö nügi kïca éka égonyögï ki i kom balgi nakun wok ki both Wode Yecu Kiricito, éka kite na cikérë na dit k'Obanga na Tipo Naleng omoko.

I köp më ariö Paulo okobo both jö na kwanö më kwö i yoo na möö bedogï acël i Kiricito twërô bedo adyer i kwögï kanya acël.

I carolok mërë na pol nyutho bedo acël ka jö k'Obanga i ribérë ki Kiricito: jö n'oye Kiricito cal ki kom, ki Kiricito na calö awie; onyo calö gedo, ki Kiricito na calö kidi më gwic; onyo calö dhakö, ki Kiricito na calö cwörë. Jami kibec nen i tar më mar ka Kiricito, tyer, tïmö kïca, éka bedo na leng.

Moth n'öya ki both Paulo

¹ Waraga ni öya ki both Paulo n'obedo akwëna ka Kiricito Yecu pï miti k'Obanga.

Both jö k'Obanga na tye i Epeco, na gïn ënë jö na genere i kwögï kanya acël ki Kiricito Yecu:

² An alëgö Obanga Apap onu éka Rwoth Yecu Kiricito ömiliwu ibed unu ki kïca éka kuc.

Gum më tipo na tye i Kiricito

³ Eru émii pak both Obanga éka Apap ka Rwoth onu Yecu Kiricito, n'omio onu gum kibec më tipo na tye i polo i Kiricito.

⁴ Èn öyérö onu cön i Kiricito na pod bara öcakö cweo lobo, ek onu ebed jö na leng i nyime abonge bal mörö i kom onu. Pï mar mërë,

⁵ Obanga ki miti mërë kënë onwongo dong öyübö cön ni onu myero ebed éthinö mërë pï tic na Yecu Kiricito otio.

⁶ Eru émii pak both Obanga pï kïca mërë më dheo na dit, na ën ömio onu nono i Kiricito na ën marö.

⁷ Pï remo ka Kiricito Yecu, etyeko kökö onu ökö, étimö kïca i kom bal onu ökö, na lübérë ki lönyö më kïca k'Obanga na dit

⁸ na ën ömio onu na thwönë i ryekö mërë kibec éka ki niang.

⁹ Obanga ötímö man i karë na ën otuco müng më miti mërë both onu, nakun lübö

yüb mérë na bér na én onwongo öyübö mē cobo i Kiricito.

¹⁰ Yüb k'Obanga na én bino cobo ka karë örömö, énë mē cökö jami kibéc na tye i polo éka i wi lobo, mē rïbögï ökó kanya acél i Kiricito.

¹¹ Jami kibéc tímérë na lübérë kí yüb k'Obanga éka thama mérë. Obanga öyérö onu mē bedo jögë i Kiricito nakun én onwongo dong öyübö anaka kí i acaki

¹² ék wan, n'onwongo écakö bedo kí gen i kom Kiricito, myero émii pak éka dheo both Obanga.

¹³ Kiricito thon öyéröwu mē bedo jö k'Obanga i karë na un iwinyo köp adyer, Emuth na Bér n'okelo niwu larë. Un iye Kiricito, éka énë ömii ömiiwu Tipo Naleng n'onwongo Obanga öcikö pürë cön ek obed na calö anyuth mérë n'ëmwönö i komwu,

¹⁴ na énë gin n'ejengo na nyutho ni onu ebino nwongo gin na kibéc n'Obanga öyübérë mē miö onu i karë n'Obanga bino kökö jögë—na bino miö jii pakö dheo mérë.

Lëga ka Paulo

¹⁵ Pi tyén köp ni, anaka an awinyo köp i kom yeewu i Rwoth Yecu éka pi mar na un ìmarö kí jö k'Obanga kibéc,

¹⁶ an ba awékö mē miö pwöc both Obanga pürwu, nakun apo pürwu i lëgana.

¹⁷ An alégö ni Obanga ka Rwoth onu Yecu Kiricito, Obanga mē dheo, myero ömiiwu Tipo Naleng mē ryékö

eka onyuth niwu Obanga ek inge unu én na bér rwök.

¹⁸ An thon alégö ni ömény thamawu ek inge unu gen na én ocwodowu ié, kit lönyö éka dheo na thwönë na én miö both jögë ek obed mögi.

¹⁹ An thon alégö ni inniang unu kite na tékö mérë na dit tio ködë i kom onu jö n'oye Yecu. Tékö ni na tio i kom onu röm kí tic na dit mē twér na én tye ködë

²⁰ n'ocero Kiricito kí kin jö n'öthöö éka ömii én obedo i nget cingë mē kucem i polo.

²¹ Én dong tye malö i polo, löö élöc kibéc mē polo, twérö, tékö, éka nyïng kibéc n'écakö, pathi i lobo mē karë ni kékën éntö thon i lobo mē karë na tye ka bino.

²² Obanga oketho jami kibéc i the twér ka Kiricito ek ölöö, éka ömii én both jö n'oye Kiricito na calö wic nakun lös jami kibéc.

²³ Jö n'oye Kiricito obedo gini kom Kiricito, na miö jö n'oye pong na bér, nakun Kiricito thon pong i jami kibéc.

2

I Kiricito jö n'öthöö dökö jö na kwö

¹ I karë n'opoth un onwongo ibedo calö jö n'öthöö pi türö cik éka balwu.

² I karë ca onwongo un ilübö yodhi na reco mē lobo ni, nakun iwinyo unu köp ka ngat na rac na lös twér mökö na tye malö i yamö, na énë cwiny na kobedini tye ka tic i cwiny jö na ba mítö winyo köp k'Obanga.

³ Onu kibëc onwongo èröm ki jö nön i lübö miti më kwö më anywölli, nakun ecobo miti më kom onu ki gin na onu èthamö. Ìkite na yam onu etye ködë, akëmö k'Obanga onwongo myero opodh i kom onu calö jö nökënë kibëc.

⁴ Èntö Obanga obedo alönyö i kïca mérë, mar na èn Ömarö ki onu ködë dit rwök,

⁵ kadï bed nï onu èdökö jö n'öthöö ökö pï türö cïk mérë, èn ömiö onu kwö kanya acël ki Kiricito—obedo pï kïca k'Obanga ènë ömiö ilarë unu.

⁶ Obanga ocero onu ki i thöö ki Kiricito, éka ömiö onu kabedo më bedo kanya acël ki Kiricito Yecu i polo.

⁷ Obanga ötimö jami ni kibëc ek enyuth i karë kibëc na tye anyim lönyö mérë na thwönë na ba pimere më kïca n'onen i mar mérë both onu na Kiricito Yecu tímö nï onu.

⁸ Piëñ pï kïca mérë ömiö Obanga ölaröwu pï yeewu—éka man ba ötimëre pï tic mörö na un itímö, manön obedo miç k'Obanga—

⁹ pathi pï tic na dhanö tímö, ek kür ömii ngat mörö öwakëre.

¹⁰ Onu ebedo gin n'Obanga otio, èn ocweo onu i Kiricito Yecu ek ebed jö na tio tic na bëcö na èn yam öyübö cön nï ek onu étim.

Bedo acël i Kiricito

¹¹ Pi manön, po nï un cön onwongo ibedo unu Erok i kite n'enywölöwu ködë éka Eyuda cwodowu nï “jö na ba èlirö,” nakun gïn cwodere

kén-gï nï “jö n'èlirö” (na cïng dhanö ènë ötimö i komgi)—

¹² po unu nï i karë nön un onwongo ipokere ökö ki both Kiricito. Un onwongo èkooju ökö ki i kom jö Icarael, ba ïnywakö unu cikëré k'Obanga éka ki gin na kibëc na èn öcikö nï ebino tímö pï jögë. Ibedo unu i lobo ni abonge gen éka na ba ingeo unu Obanga.

¹³ Èntö kobedini i Kiricito Yecu un n'onwongo itye unu na bor k'Obanga, ekelowu dong ökö na cwök pï remo ka Kiricito.

¹⁴ Èn kikome okelo kuc i kin jö ariö, ömiöwa kodwu dong etye acël, éka èn ötürö cël më gero n'opoko onu.

¹⁵ Pi kelo kuc, èn öjwaö cïk ka Muca ökö ki cïk mérë kibëc. Èn ötimö man ek etheth jö ariö obed rok acël na nyen n'öribëre kanya acël i èn.

¹⁶ Pi thöö mérë i kor yath aria, Kiricito odwongo jö ariö both Obanga i kom acël, ömiö adagë ojik ökö.

¹⁷ Kiricito obino ötitö köp më kuc bothwu un jö n'onwongo itye unu na bor ki both Obanga éka both jö n'onwongo tye na cwök.

¹⁸ Pi Kiricito onu kibëc etyeko yabö nï onu yoo më thuno both Apap ki Tipo Naleng acël.

¹⁹ Kobedini dong un ba ibedo erok onyo wele, èntö un ibedo jö më pacö acël ki jö k'Obanga éka ibedo unu jö më ödë.

²⁰ Un dong ical ki gedo n'égérö, n'acaki thërë obedo ékwëna éka edwarpiny, ki

Kiricito Yecu kikome na calö
kidi më gwic.

²¹ Gedo ni kibec okubere
kanya acel i Kiricito eka tye ka
döngö më bedo öt k'Obanga
na leng pi Rwoth.

²² Kiricito thon tye ka
geröwu kanya acel i kome,
ek ibed unu kanya Típo
k'Obanga bedo ië.

3

Tic ka Paulo pi Erok

¹ Pi köp ni, an Paulo na
an abedo amabuc ka Kiricito
Yecu pírwu, un Erok—

² Adyer iwinyo unu kite
n'Obanga ömia më tio tic më
küca mérë pírwu,

³ dök thon kite na en
onyutho nina müng mérë, na
calö atyeko cöönö píre na
cecek.

⁴ Ka ikwanö unu ngö na an
acoo, cë un ibino niang na bér
kite na an aniang ki müng i
kom Kiricito ködë.

⁵ I karë n'opoth anget,
Obanga ba onyutho müng ni
both dhanö, entö kobedini pi
Típo Naleng Obanga onyutho
both ekwëna mérë na leng eka
edwarpiny.

⁶ Müng ni enë ni pi Emuth
na Bér, Erok ödökö gini dong
jö na leo lönyö k'Obanga
kanya acel k'Eyuda, ödökö
gini dul kom acel ködgë,
eka gin thon nywakö cikëre
n'Obanga öcikëre ködë i
Kiricito Yecu.

⁷ An adökö atic më Emuth
na Bér ni pi mic më küca
k'Obanga n'ëmia pi tic më
tékö mérë.

⁸ Kadï bed ni an pira ba tek
rwök ki kin jö k'Obanga kibec,

küca ni onwongo emia më titö
Emuth na Bér both Erok pi
lönyö na Kiricito miö na ba
erömö pimo,

⁹ eka më miö jö kibec ngeo
yüb më müng k'Obanga,
n'onwongo Obanga n'ocweo
jami kibec ökanö pi karë
n'opoth anget.

¹⁰ Miti k'Obanga i köp ni
kibec onwongo mitö tic ki jö
n'oye Kiricito më miö elöc
eka wegi twér kibec na tye i
polo ngeo ryekö k'Obanga na
kothe papath.

¹¹ Obanga ötimö man na
lüberë ki yüb mérë na ba
thum na en ömiö ocobere i
Kiricito Yecu Rwoth onu.

¹² Pi Kiricito kobedini dong
en ömiö onu diö cwiny eka tek
cwiny piën onu dong etwero
bino both Obanga pi yee.

¹³ Pi manön an alégö ni
kür idwök unu cwinywu cen
ni piën an atye ka lümö can
pírwu, man kibec obedo më
miöwu dheo.

Lëga pi jö Epeco

¹⁴ Pi tyen köp ni an arumo
conga i nyim Apap,

¹⁵ na enë Acweç më jami
kibec na tye i polo eka i lobo.

¹⁶ An alégö both Obanga
ek ki i lönyö mérë më dheo
ömiïwu twér ibed unu na tek i
cwinywu pi Típo mérë,

¹⁷ ek Kiricito obed i iwu piën
iyee unu en. An alégö ni
Obanga ömiï icung unu na tek
i mar.

¹⁸ Ibed unu ki tekö më niang
kanya acel ki jö k'Obanga
kibec, kite na mar ka Kiricito
pi onu lac ködë, bor ködë,

ödöngö ködë malö, éka kite na thuth ködë.

¹⁹ An amütö nü inge unu mar ka Kiricito na lõö ngec kibëc —éka ipong unu i gin mörö kibëc n'opong i Obanga.

²⁰ Dheo kibëc obed both Obanga, na énë twérö tio tic na thwönë rwök, na lõö gin na onu étwérö kwaö pírë onyo ketho thama onu ié, pí tékö mérë na tye ka tic i kom onu.

²¹ Dheo obed both Obanga naka naka i Kiricito Yecu éka ki jö n'oye Kiricito më wang rok kibëc! Amén.

4

Nötherë kanya acël i kom Kiricito

¹ Pí manön an na calö amabuc pi Rwoth, an akwaöwu nü ilüb unu kit kwö n'opore na rwatérë ki cwodo na yam ecwodowu ié.

² Bed unu ki wörö éka ki mwolo i kom jö nökënë; éka ibed unu jö na dangö gin na kibëc na balö cwiny dhanö, nakun ngat acélacël diö cwinye i kom awodhe ki mar.

³ Tím unu ték më gwökö rïbérë na Tipo Naleng ömïöwu ék ibed unu i kuc na tweowu kanya acël.

⁴ Kom tye acël éka Tipo k'Obanga tye acël —kite na gen thon tye acël n'Obanga ocwodowu ié—

⁵ Rwoth tye acël, yee tye acël, batica tye acël,

⁶ Obanga tye acël éka Apap ka jö kibëc. Ën lõö jami kibëc, tio i jami kibëc, éka tye i jami kibëc.

⁷ Éntö ngat acélacël i kin onu onwongo mëc më kïca, n'opore ki mëc na Kiricito ömïö bothe.

⁸ Manön énë ömïö Cöc na Leng kobo nü:

“I karë na én öidhö ködë malö, én otero opii na pol éka ömïö mëc gïni both jii.”

⁹ (Tyën köp nü “öidhö malö” gönyö nïngö? Gönyö nü én thon obino pïny i lobo.

¹⁰ Ngat n'obino pïny én acël nön énë öidhö malö kanya bor i nge polo kibëc, ék epong jami kibëc.)

¹¹ Mëc na Kiricito ömïö gïn ene: ömïö jö mökö më bedo ékwëna, mökö më bedo ed-warpïny, mökö më bedo jö na titö köp k'Obanga, jö mökö më bedo ékwath éka epwonye.

¹² Ticgï obedo më yübö jö k'Obanga i ticgï më könö jii éka më gérö jö n'oye Kiricito, ¹³ naka ka onu kibëc édökö acël i yee onu éka i ngeo Wod k'Obanga, naka ka onu édökö jö n'otengo, nwongo édöngö na röm ki Kiricito, éka onu ebino bedo calö én.

¹⁴ Cë müö onu ba dökë obedo calö éthïnö, na pii na tataga tatago yeegi, jö na wékö yamö më pwony na papath lökögï, ryékö ka jö éka yübgi më twodo na ba dökë müögï capaca.

¹⁵ Nakaka manön, onu myero étwak köp atir ki mar, onu myero édöng i yodhi kibëc éka obed calö Kiricito, na énë obedo awi jö n'oye Kiricito.

¹⁶ Énë obedo wic, dul kom kibëc rïbérë gïni i kome éka

kubere gïnï kanya acël i wang romo kïbëc na tye ië. Cë ka dul acëlacël tye ka tio tic mëre kakarë, miïö kom döngö na bër kï mar.

Kwö na nyen i Kiricito

¹⁷ An akobo niwu kï twër na Rwoth ömia nï kür myero dökï ïmëdérë unu më bedo kï koth kwö na jö na ba ngeo Obanga bedo kädë, i thamagï na köny mérë ope.

¹⁸ Thamagï önyöbërë dong ökö, ba dökï twërö niang gïnï. Gin opokere ökö kï kom kwö n'Obanga miïö pï kwia pïny n'obino nïgï pï cwinygï n'ödökö na nwang.

¹⁹ Gin ba dökï parö gin mörö, gin ömirë kën-gï i tïm më tarwang éka thon owor gïnï rwök më tïm koth tïm mökö na ba bër.

²⁰ Èntö man ba obedo kite n'onwongo epwonyowu kädë kï köp i kom Kiricito.

²¹ Adyer iwinyo unu köp i kome éka na calö èlübörë epwonyowu kï köp adyer na tye i Yecu.

²² Koth kwöwu na cön na yam ikwö unu kädë, myero iwkë unu dong ökö. Koth kwö nön öbal dong ökö pï miti na reco n'öbwölöwu.

²³ Wëk unu Obanga dong ölök thamawu më cwiny obed na nyen,

²⁴ éka iruk unu kom na nyen, n'ecweo më bedo calö Obanga i adyer më kite atir éka na leng.

²⁵ Pï manön ngat acëlacël myero iwkë köp më twodo éka ötwak köp atir both

awodhe, piën onu kïbëc ebedo jö më dul kom acël.

²⁶ "Ka akëmö ömaköwu, kür ipodh unu i bal." Kür ïmïi unu ceng ödöny nakun akëmö pod ömaköwu,

²⁷ éka kür ïmïi unu karë both Catan.

²⁸ Ngat n'obedo ka kwalö jam'i ka jïi myero öwëk kwo ökö éka öçak tio tic më tïmö gin mörö na bër kï cïngë, ek onwong gin mörö më könyö kï jö nökënenë na mütö köny.

²⁹ Kür ïmïi unu köp na rac odonyi kï i dhöwu, èntö twak unu köp na bëcö kékëna könyö më döngö jö nökënenë na lübërë kï gin na mütërë, ek jö na winyo köpwa onwong köny kï ië.

³⁰ Kür ïmïi unu Tipo Naleng k'Obanga okum, n'ëmïöwu ek obed calö anën mérë n'ëmwönö i komwu pï kürö nïnö më kököwu.

³¹ Wëk unu dong bedo kï kék cwiny, wang ic, akëmö, dha i wi jö nökënenë, ayeny, éka rac cwiny kïbëc.

³² Nakaka manön, bed unu jö na tïmö käca both ngat acëlacël kï cwiny na bër, tïm unu käca i kinwu kenwu kite n'Obanga ötïmö niwu käca i Kiricito.

5

¹ Lüb unu kite k'Obanga, piën onu ebedo èthïnö na èn marö.

² Bed unu nakun ilübö unu yoo më mar, na calö Kiricito ömarö onu, cë ömirë kënë pï onu na calö tyér n'ëwangö na ngwece kur both Obanga.

³ Dong pii manön tüm më ölyang, onyo tüm mökö më carö carö, onyo woro më lïm myero kür ekob i kinwu, piien man enë tüm na ba opore pii jö k'Obanga na leng.

⁴ Ba bër niwu më twakö köp mökö më lewic, twak mökö më mingo onyo twakö köp më arath, kür myero thon owinyere bothwu, entö thwara imii unu pwöc both Obanga.

⁵ Un iniang na bër nü ngat mörö ope i kin jö n'obedo jö ölyang, jö na tïmö tüm më carö carö, onyo jö n'owor i kom jami—koth dhanö ni obedo awör cal jwogi—na ba bino nwongo dul mörö më bedo mëgë i ker ka Meciya éka më k'Obanga.

⁶ Kür iye unu ngat mörö öbwölwu kï köp mökö na therë ope, piien akëmö k'Obanga bino i kom jö na ba winyo köp mérë pii timgi nonu.

⁷ Pi manön kür iribëre unu ködgï.

⁸ Un onwongo cön itye unu i piny na col, entö kobedini un dong itye unu i piny na tar i Rwoth. Bed unu calö ethinö më tar

⁹ (pii nyig n'onyak pii tar nen ökö i gin na kibëc na tye na bër, na kite atir éka adyer)

¹⁰ éka item unu më pwonyo ngö na yomo cwiny Rwoth.

¹¹ Kür iribëre unu i tic mörö kibëc më piny na col na ba könö, entö thwara ituc unu tic nonu ökö kanyalér.

¹² Piien obedo më lewic thon më twak i kom jami na jö na ba winyo köp tïmö gïnii müng.

¹³ Gin mörö na tar onyutho nen ökö kanya leng,

¹⁴ piien tar enë müö jami kibëc nen. Man enë ömio ekobo nü:

"Coo ökö, in ngat ininö,
cer ökö ki i kin jö n'othöö,
cë Kiricito bino menyöni."

¹⁵ Gwökëre unu, i kite na un i kwö ködë—kür ibed unu calö jö na kwia piny, entö bed unu calö jö na ryek.

¹⁶ Tii unu ki caa n'onen na bër, piien man enë karë më tïm na rac.

¹⁷ Pi manön kür ibed unu jö na mïng, entö tém unu më niang i kom gin na Rwoth mitö nü un itim.

¹⁸ Kür imer unu ki köngö ölöök na kelo tïm më carö. Nakaka manön, wék unu Tipa Naleng openg i cwinywu,

¹⁹ nakun itwak unu i kinwu kékënwu ki köp më jabuli, wer éka ki wer më cwiny. Wer unu wer më pakö Rwoth i cwinywu.

²⁰ Mi unu pwöc both Obanga Apap i karë kibëc pii jami kibëc i nying Rwoth onu Yecu Kiricito.

²¹ Mirë unu kékënwu i the loc ka jö nökënë, ngat man both awodhe, pii wörö Kiricito.

Mon éka cwö

²² Un mon, mirë unu kenwu i the loc ka cwöwu, na calö imirë unu kenwu both Rwoth.

²³ Piien écwö enë obedo awi dhakö kite na Kiricito obedo awi jö n'oye én, na gin enë kome, éka Kiricito obedo alar ka jö n'oye én.

²⁴ Kite na jö n'oye Kiricito mirë gïnii i the loc ka Kiricito,

mon thon myero ömireë gini i
thë lög ka cwög i jami kibec.

²⁵ Un cwö, mar unu monwu
kite na Kiricito ömarö ki jö
n'oye en eka ömiö kwö mèreë
pürgi,

²⁶ ek elonygi obed na leng,
kinge na dong ölwökög i pii
eka ki köp,

²⁷ ek ekel jö n'oye en i ny-
ime na calö nyakö n'eyübö
më anyöma, na poo mörö
ope i kome onyo na teriny-
ime öjüjunga onyo gin mörö
nökëne na rac, entö obed na
leng na bal mörö ope i kome.

²⁸ Iyoo acel nön, cwö myero
ömar mon-gi kite na gin marö
ki komgi kën-gi. Ngat na
marö dhakö mèreë nwongo
marö kome kënë.

²⁹ Ngat mörö ope na dag
kome kënë, entö püdhö ki cem
eka gwökö, kite na Kiricito
thon gwökö eka püdhö ki jö
n'oye en,

³⁰ piën onu ebedo dul kom
Kiricito.

³¹ Kite n'ecöö ködë i Cöc
na Leng ni: "Pi tyen köp ni
ecwö bino wékö apap mèreë
eka aya mèreë, cë ribérë ki
dhakö mèreë, eka jö ario bino
dökö kom acel."

³² Man obedo müng na dit-
entö an atye ka twak i kom
Kiricito eka ki jö n'oye en.

³³ Pi manön, ecwö acelacel
i kinwu myero thon ömar
dhakö mèreë kite na en marö
ki kome kënë eka dhakö
myero öwör cwörë.

6

Enyodo eka ethinögi

¹ Un ethinö, winy unu eny-
odowu i Rwoth, piën manön
enë bér.

² Cöc na Leng kobo ni, "Wör
apapni eka ayani," man enë
cik më acel n'ecikö pi gin mörö
na bér na bino yaa ki ie-

³ "ek ibed unu na bér eka
ibed unu i lobo pi karë na
lac."

⁴ Un jö kabebe, kür iter
unu ethinöwu i yoo na rac na
mio akämö makög i, entö mii
unug i ödöng na bér nakun
ipwonyo unug i eka inyutho
unu nügi kite na bëco na
Rwoth pwöyö.

Opii eka editegi

⁵ Un opii, winy unu
editewu më lobo ki cwiny
acel, na calö iwinyo unu
Kiricito, nakun ilworo unug i
ki myël kom.

⁶ Ticwu myero kür obed tic
n'enënö ki wang kékëñ më
yomo cwiny dhanö, entö tii
unu gin n'Obanga mítö ki
cwinywu kibec, na calö opii
ka Kiricito.

⁷ Tii unu ticwu ki cwiny na
bér, na calö itio unu pi Rwoth,
eka pathi pi dhanö,

⁸ piën un ingeo ni Rwoth
bino cülo ngat mörö kékëñ,
kadï obedo opii onyo ngat
mörö na löörë kënë pi gin
mörö kékëñ na bér na en otio.

⁹ Wegi opii, ter unu opiiwu
i yoo acel nön. Kür ibür unug i,
kite na un ingeo ni adit na
löög i eka ki un tye i polo, na en
makö jö kibec na röm aröma.

Kwot k'Obanga

¹⁰ Më ajiki, bed unu na ték
i Rwoth éka i twérö më tékö
mérë.

¹¹ Ruk unu jami më lwény
n'Obanga miö, ek icung unu
na ték, nakun igéngérë unu kí
kom ököra ka Catan.

¹² Piën onu ba élwényö kí
dhanö adhana, éntö élwényö
k'élöc éka wegi twér më yökö,
na löö wi lobo thükü i karë
ni më cöl piny éka kí tipo
mökö na reco na tye malö i wi
yamö.

¹³ Pi manön, myero iruk
unu jami lwény n'örömö
n'Obanga miö, ek ökönywu më
cung na ték ka riñö na rac
othuno, éka kinge lwény naka
i ajiki, un pod ibino cung unu
na ték.

¹⁴ Pi manön myero icung
unu nakun itweo unu wang
pyérwu kí del më köp atir, ruk
unu kite atir obed nywenyo
më gwökö korwu,

¹⁵ éka iyübérë unu më titö
köp më Emuth na Bér më kuc
na calö wör më tyénwu.

¹⁶ Mëd i kom jami ni kibéc,
yeewu myero obed kwotwu
na un itwérö neko mac kí i
kom athérö na Catan yuo.

¹⁷ Ruk unu larë obed tok
nywenyo më wiwu, éka köp
k'Obanga na énë pala abadë
ka Tipo Naleng.

¹⁸ Lég unu léga kibéc na pa-
path kí tékö ka Tipo Naleng
i karë kibéc. Bed ní yübérë
unu i karë kibéc nakun idangö
unu pëkö, éka ilégö unu pi jö
k'Obanga kibéc.

¹⁹ Lég unu thon pira ek
Obanga oyab dhöga, omia ngö
na myero atwaki, ek atuc

müng më köp më Emuth na
Bér.

²⁰ An abedo akwëna mérë
na röm kí ngat mörö na cung
pi lobo mérë, éntö etwea ökö
kí nyör. Lég unu ek atwak
abonge lworo i kom Emuth
na Bér kite na an myero at-
wak ködë.

Moth më ajiki

²¹ Omín onu Tukiko na an
amarö éka atic na genere i
Rwoth, bino kobo niwu köp
kibéc i koma éka i kom ticna,
ek un thon inge.

²² An atye ka oro én yo
bothwu pi tyén köp ni, ek én
omiiwu inge kite na wan etye
ködë éka ödiï cwinywu.

²³ An alégö ni Obanga Apap
éka Rwoth Yecu Kiricito bino
miö kuc, mar éka yee both
utmego kibéc.

²⁴ Kica k'Obanga obed both
jö kibéc na marö Rwoth onu
Yecu Kiricito kí mar na ba
thum.

1 Jö Tecalonika

*Köp na tye i buk ka Jö
Tecalonika më acël*

Tecalonika onwongo obedo pacö na dit më lobo Macedonia na tye i thë lögka jö Roma. Paulo onwongo jö n'oye Kiricito i kabedo nön kinge na en öwëkö Pilipi. Cucüth kinge, pyem obedo tye i kin Eyuda na tye gïnï ki cwiny na rac i kom titö köp ka Paulo both jö na ba obedo Eyuda n'onwongo tye gïnï ki miti më lökërë i dini k'Eyuda. Ediö Paulo më yaa ökö ki i Tecalonika më cïdhö yo Berea. Kinge na dong en othuno i Korinti, Paulo onwongo köp ki both awodhe Timoteo na en tio ködë i kom köp na tye both jö n'oye Kiricito na tye i Tecalonika.

Waraga ka Paulo më acël both jö Tecalonika onwongo ècöö më cükö cwiny éka më niangö jö n'oye Kiricito na tye kunön. En müö pwöc pi emuth i kom yeegi éka mar; Paulo po wigi i kom kwö na en ökwö ködgï i karë na en tye bothgï, éka ki gamö peny n'onwongo tye both jö n'oye Kiricito na makö köp më dwogo ka Kiricito. Paulo ökwanyö karë ni më kobo nügi më mëdëré ki tic anyim nakun kürö gïnï dwogo ka Kiricito ki gen.

¹ Waraga ni öya ki both Paulo gin ki Cilibwano* éka Timoteo,

Both jö n'oye Kiricito na bedo gïnï i Tecalonika na gïn enë jö k'Obanga Apap éka jö ka Rwoth Yecu Kiricito:

Kica éka kuc obed kodwu.

Yee ka jö Tecalonika

² Wan émiö Obanga pwöc jwijwi pürwu kibëc nakun wan epo pürwu i lëgawa.

³ Wan epo kite na un iketho ki yeewu i tic i nyim Obanga Apap onu, éka kite na un iyelere ki mar kanya acël ki kite na un idio unu ki cwinywu, pi genwu i Rwoth onu Yecu Kiricito.

⁴ Utmegowa n'Obanga marö, wan engeo ni Obanga öyeröwu dong ökö,

⁵ piën Emuth na Bér na wan etitö bothwu, ba igamö unu ki köp kékén entö ki tekö éka ki Tipo Naleng, nakun ödonyö na thuth i cwinywu. Un ingeo na bér kite na wan ebedo ködë bothwu më könyöwu.

⁶ Un ibino iporo unu kitewa éka kite ka Rwoth; kadï bed inwongo unu can na thwönë rwök, un igamö unu köp mëre ki yom cwiny na Tipo Naleng ömio.

⁷ Man ömio idökö unu apor na bér both jö kibëc n'oye Yecu na tye gïnï i Macedonia éka Akaya.

⁸ Köp ka Rwoth owinyere pathi i Macedonia éka Akaya kékén— entö köp i kom yeewu i kom Obanga owinyere öromö kanya kibëc. Pi manön wan ba dökë erömö kobo gin mörö iie,

* 1:1 **Cilibwano** Baibul nökënë cwodo ni Cila.

⁹ piiën jö nön kibëc odwongo köp i komwa kite na un ijölöwa ködë. Gin thon okobo kite na un ilökérë ködë both Obanga nakun iwëkôunu wörö cal jwogi pi tio tic n'Obanga na kwöëeka n'adyer,

¹⁰ éka më kürö dwogo ka Wode ki i polo, na en ocero ki i kin jö n'öthöö—Yecu, n'ölarö onu ki i akémö k'Obanga na tye ka bino.

2

Tic ka Paulo i Tecalonika

¹ Utmegowa, un ingeo ni binowa më lümöwu ba obedo më nono.

² Kadi bed wan énénö can éka étimö tim më lewic i komwa ki i Pilipi kite na un ingeo ködë, éka kadi bed pyem obedo na dwong, Obangawa ömïöwa ték cwiny më titö niwu Emuth mérë na Bér kanyalér.

³ Piën köp na wan étitö ba öya ki i thama na ba tye atir onyo ki i thama na ba leng, ökora mörö ope ië.

⁴ Éntö kite na calö Obanga dong otyeko pwöyöwa éka ömïöwa Emuth na Bér më atita, wan thon étitö kömanön, pathi më yomo cwiny dhanö éntö më yomo cwiny Obanga na ngeo cwiny onu.

⁵ Un ingeo unu ni wan ba étwak nono më ywaö thamawu, wan ba ékanö thamawa pi nwongo lüm—Obanga énë obedo acadenwa.

⁶ Wan ba érangö dheo ki both dhanö, kadi ki bothwu onyo ki both ngat mörö nökënë.

Na calö ékwëna ka Kiricito wan onwongo myero eketh pëkö i komwu,

⁷ éntö wan ebedo na mwol i kinwu calö aya k'athin na tye ka gwökö éthinë.

⁸ Parö pírwu ömiö ba émiöwu Emuth na Bér kékën n'öya ki both Obanga, éntö wan émiö kwöwa bothwu piën wan onwongo émaröwu rwök.

⁹ Utmegowa, un ipo kite na wan onwongo eyelere ködë ki tic; i karë na wan étitö niwu Emuth na Bér n'öya ki both Obanga, wan etio kiceng éka kiwor ék kür eketh pëkö i kom ngat mörö ki i kinwu.

¹⁰ Un ibedo ecadenwa, éka Obanga thon ngeo kite na wan ebedo ködë na leng éka n'atir abonge köp mörö n'ölööwa i nyimwu un jö n'oye.

¹¹ Un ingeo kite na wan ékönyö ngat acélacél ki i kinwu na calö apap na könyö éthinë,

¹² nakun écükö cwinywu, ekweo cwinywu éka ékwaöwu ék ilüb unu kwö n'opore both Obanga n'ocwodowu i lög mérë éka i dheo mérë.

¹³ Wan thon épwöyö Obanga karë kibëc pi köp ni, piën cakérë na un igamö köp k'Obanga na un iwin yo ki bothwa, ba igamö unu na calö köp ka dhanö éntö na calö köp adyer n'öya ki both Obanga, tye thon ka tic iwu un jö n'oyeo Yecu.

¹⁴ Utmegowa, un thon por unu kite ka jö k'Obanga n'oyeo Kiricito na tye i Yudea, na tye i Kiricito Yecu: Piën un

thon ïnëñö unu can kï both jöwu kikome na röm kï can na jö n'oye Kiricito önenö kï both Eyuda,

¹⁵ n'oneko gïni Rwoth Yecu éka edwarpiny, éka oyelowa gïni thon. Gin ba oyomo cwiny Obanga éka thon obedo gïni lang ka jö kibëc.

¹⁶ Gin thon ötemö jüköwa ökö më titö köp both Erok ek olarë gïni. Man ömio balgi ömëdëre na thwönë rwök, éntö kinge akëmö k'Obanga obino i komgi.

Miti ka Paulo më lïmö jö Tecalonika

¹⁷ Utmegowa, i karë n'epokowa kodwu pii karë na nönök (i kom éntö pathi i cwiny), wan etemö kï miti na thwönë më nwongo yoo më nënöwu dökü.

¹⁸ Wan onwongo émitö më bino bothwu; an, Paulo, atemö dökü atemö—éntö Catan öjüköwa ökö.

¹⁹ Ngö énë genwa kï yom cwinywa éka tok dheo më cung i nyim Rwothwa Yecu ka obino? Pathi un?

²⁰ Adyer un énë ibedo dhowa éka yom cwinywa.

3

¹ Më ajiki, i karë na dong wan énëñö ni ba dökü érömö dangö, wan éthamö kénwa më dong i Atene.

² Cë écakö oro Timoteo na énë öminwa éka atic k'Obanga i titö Emuth na Bér ka Kiricito, më jingö éka më cükö cwinywu i yeewu,

³ ek ngat mörö kür cwinye opodhi i atematëma nonu. Un

ingeo na bér ni can ni myero opodh i kom onu.

⁴ Piëni karë na wan etye bothwu, wan ebedo kobo niwu ni karë mörö ebino yelo onu. Éka ötimëre kömanön kite na un thon ingeo na bér.

⁵ Pi köp ni, i karë na an anenö ni ba dökü arömö diö cwinya, an aoro Timoteo bothwu ek aniang i kom yeewu. An onwongo atye ki lworo ni gwök onyo Catan öbwölöwu cë ticwa römö bedo na köný mëre ope.

Köp më cükö cwiny na Timoteo odwongo

⁶ Kobedini Timoteo pod odwogo kï bothwu yo bothwa éka én okelo niwa emuth na bér i kom yee éka marwu. Én okobo niwa ni un ipo pírwa éka itye unu kï miti më nënöwa kite na wan thon etye kï miti më nënöwu.

⁷ Pi manön, utmegowa, cwinywa dong okwe i komwu pii yeewu i can éka ayela n'eyelowu kódë kibëc.

⁸ Piëni kobedini wan ékwö pírwu ka icung unu na ték i Rwoth.

⁹ Wan étwëro miö pwöc both Obanga nïngö pírwu pii yom cwiny kibëc na wan etye kódë pírwu i nyim Obanga?

¹⁰ Kiwor éka kiceng wan élégö kï cwinywa kibëc ni énëñwu dökü ek émed gin n'orem kï i kom yeewu.

¹¹ Wan élégö ni Obanga Apap onu éka Rwoth onu Yecu öyab yoo niwa më bino bothwu.

¹² Wan élégö dökü ni Rwoth ömii marwu ömëdëre rwök

both ngat acälacël ëka both
jö kibëc kite na wan emaröwu
ködë.

¹³ Ëk ën öjing cwinywu ibed
unu jö na leng abonge köp
mörö i nyim Obanga Apap
onu i karë na Rwoth onu Yecu
bino bino ki jöge kibëc na
leng.

4

Kwö n'Obanga Mítö

¹ Më ajiki mérë utmegowa,
wan ekwaöwu i Rwoth Yecu
ni imédëre unu anyim naka
naka ki kwö na un imakö
ki bothwa më yomo cwiny
Obanga, na un itye ka lübö.

² Po unu i cik na yam wan
emiöwu ki twëro ka Rwoth
Yecu.

³ Obanga mítö ni ibed unu
jö na leng: wék unu tím më
ölyang.

⁴ Ngat acälacël myero onge
kite më bedo ki dhakö mérë
kënë ki cwiny na leng ëka ki
wörö,

⁵ kür imii unu miti më kom
obuwu calö jö na ba ngeo gini
Obanga.

⁶ Ngat mörö kür ötüm bal i
kom ömin mérë onyo öbwöl en
ki köp ni. Piën Rwoth bino
pwodo dhanö pi bal nön gini
kibëc, kite na yam wan ekobo
ëka eciköwu.

⁷ Obanga ba ocwodo onu
më nyöberë ki bal entö më
bedo jö na leng.

⁸ Pi manön, ngat n'ökwerö
cik ni ba ökwëro dhanö entö
ökwëro Obanga, na miöwu
Tipo mérë Naleng.

⁹ Kobedini köp na makö
mar më utmego wan myero
kür ecöö niwu köp mörö ië,

piën un kikomwu Obanga
dong opwonyowu ökö më
marö ngat acälacël.

¹⁰ Ëka adyer dong imarö
unu utmego kibëc i Macedonia
kibëc. Entö wan ekwaöwu,
utmegowa, ni imédëre unu ië
naka naka.

¹¹ Keth cwinywu i bedo
moth, ngat acälacël öpar pii tic
mérë nakun tio ki cingë kite
na yam wan eciköwu ködë,

¹² ek kwöwu më nïnö kibëc
ömi i jö na ba ngeo Yecu
öwörwu ëka un ba ibino
jengere i kom jö nökënë pii gin
na un imitö.

Bino ka Rwoth

¹³ Utmegowa, wan ba emitö
ni ibed na ba ingeo unu köp
i kom jö na dong öthöö, onyo
më bedo ki cwer cwiny calö jö
n'ope ki gen.

¹⁴ Wan eye ni Yecu öthöö
ëka ocer döki ëka thon wan
eye ni Obanga bino kelo jö
n'öthöö na yee i kom Yecu
kanya acël ködë.

¹⁵ Wan ekobo niwu köp ka
Rwoth ni onu jö na kwö na
pod edong naka i nïnö më
dwogo ka Rwoth, ba ebino
tëlö nyim jö na dong öthöö.

¹⁶ Rwoth bino idho piiñ ki i
polo ki cwodo më twër, dwön
malaika na dit bino winyere,
buruji k'Obanga bino kok ëka
jö na yam öthöö n'oye i kom
Kiricito bino cakö cer.

¹⁷ Kinge manön, onu jö na
pod edong na kwö ebino tero
onu kanya acël ködgë i wi pöl
më romo ki Rwoth i wi yamö
ek dong ebed both Rwoth na
twal.

18 Pī manön, cük unu cwiny ngat acēlacēl kī köp ni gini.

5

Ninō mē dwogo ka Rwoth

1 Kobedini, utmegona, köp na makō caa ēka nīnō myero wan kür écōō niwu,

2 pīen un ingeo na bēr nī nīnō mē dwogo ka Rwoth bino bino calō akwo i kiwor.

3 Na jīi pod kobo nī, "Kuc tye, pīny okwe moth, gin mörö ope na rac," cē can na rac bino podho i komgī athura calō arem mē nywöl na bino i kom dhakō na yac, ēka ngat mörö ope na bino bwöth.

4 Èntō un, utmegona, ba itye unu i pīny na cōl na twērō miō nīnō nonu bino i komwu athura calō akwo.

5 Un kibēc ibedo unu jō mē tar ēka jō mē kiceng. Onu ba ebedo jō mē kiwor onyo mē pīny na cōl.

6 Pī manön, myero onu kür ènīn calō jō nökēnē, èntō ebed na wang jō thwolo nakun ègwökērē kēn onu.

7 Pīen jō na nīnō, nīnō gini kiwor, ēka jō na mēr, mēr gini kiwor.

8 Èntō kite na onu ebedo jō mē kiceng, myero ègwökērē kēn onu, nakun nwongo eruko yee ēka mar na calō nywenyo mē gēngō kor, ēka gen mē larē na calō tok n'obedo nywenyo.

9 Pīen Obanga ba öyérō onu nī ek akēmō mērē opodh i kom onu èntō mē nwongo larē na yaa kī both Rwoth onu Yecu Kiricito.

10 Èn yam öthöö pī onu ek kadī onu èkwö onyo èthöö, ebin èkwö kanya acēl ködē.

11 Pī manön, cük unu cwiny ngat acēlacēl ēka iköny unu ngat acēlacēl mē döngö, kite na un itye ka tīmō ködē.

Cükō cwiny ēka moth mē ajiki

12 Pī manön, wan èkwaöwu utmegowa, wör unu jō n'obedo ètēlawu na tye ka tic na tēk i kinwu, na yelere gini pīrwu i Rwoth ēka na pwonyowu.

13 Bed unu kī wörö na dit ēka kī mar i komgī pī tic na gini tio. Bed unu kī kuc i kinwu kenwu.

14 Wan èkwaöwu utmegowa, jük unu jō na balō gini karēgi abonge tic mörö, cük unu cwiny jō na lwor, köny unu jō na görü, dīi cwinywu i kom jō kibēc.

15 Nēn unu nī ngat mörö ba öcülö gin na rac kī gin na rac, èntō karē kibēc tēm unu mē tīmō gin na bēr i kinwu ēka both jō kibēc.

16 Bed unu kī yom cwiny i karē kibēc;

17 lēg unu karē kibēc;

18 mīi unu pwöc i gin na kibēc, pīen manön ènē gin n'Obanga mítō kī bothwu i Kiricito Yecu.

19 Kür ijük unu Tipo Naleng mē tio tic mērē;

20 kür icaa unu köp k'edwarpīny.

21 Tēm unu gin na kibēc. Mak unu gin na bēr.

22 Kwēr unu tīm na reco kibēc.

23 An alēgō nī Obanga kikome, Obanga mē kuc,

ömii ibed unu jö na leng i
 yodhi kibec, ögwök cwinywu,
 tipowu eka komwu më bedo
 abonge bal mörö i karë më
 dwogo ka Rwoth onu Yecu
 Kiricito.

²⁴ Ngat n'ocwodowu obedo
 ngat na genere eka bino cobo.

²⁵ Utmegowa, lëg unu
 pürwa.

²⁶ Moth unu utmego kibec
 ki moth më mar.

²⁷ Aciköwu i nyïng Rwoth
 më kwanö waraga ni both ut-
 mego kibec.

²⁸ Kica ka Rwoth onu Yecu
 Kiricito obed kodwu.

2 Jö Tecalonika

Köp na tye i waraga ka Paulo më ariö both jö Tecalonika

Arubaruba na makö nünö më dwogo ka Kiricito ömädérë më kelo ayela both jö n'oye Kiricito na tye i Tecalonika. Waraga ka Paulo më ariö both jö Tecalonika makö köp i kom yee nü nünö më dwogo ka Rwoth ötímérë dong ökö. Paulo öyübö köp ni nakun kobo nü na bara dwogo ka Kiricito örömö, bal éka tüm na reco bino mëdérë rwök i thë lög ka ngat n'ecwodo nü "Atür Cik" na bino pyem ki Kiricito.

Akwëna Paulo kobo na ték i kom gin na mítérë both jö n'oye më cung na ték i kom yeegi i karë më ayela éka can, më tic pi gin na myero ökwö gini ködë kite na Paulo éka etic ewodhe obedo tic ködë, éka më dangö më tümö gin na bér.

¹ Waraga ni öya ki both Paulo gin ki Cilibwano* éka Timoteo,

Both jö n'oye Kiricito na bedo gini i Tecalonika na gin enë jö k'Obanga Apap éka jö ka Rwoth Yecu Kiricito:

² An alégö nü Obanga Apap éka Rwoth Yecu Kiricito ömiiwu käca éka kuc.

Ngölö-köp i karë më dwogo ka Kiricito

³ Utmegowa, wan myero émiï pwöc both Obanga pi karë kibec pírwu, pién yeewu tye ka döngö rwök éka mar ka ngat acélacél i kom awodhe thon tye ka mëdérë.

⁴ Pi manön, wan etye k'awaka i kin jö n'oye Kiricito n'obedo gini jö k'Obanga i kom diö cwinywu éka yee i ayela éka atëmatëma kibec na un itye ka dangö.

⁵ Man kibec nyutho ni ngölö-köp k'Obanga tye kakarë, éka pi manön ebino kwanöwu ni jö n'opore pi ker k'Obanga na un itye ka dangö can píré.

⁶ Obanga bino tümö gin na tye atir, én bino miö can i kom jö n'omiiwu can,

⁷ éka bino miö yweo both jö n'eyelo éka bothwa thon. Man bino tímérë i karë na Rwoth Yecu bino nen k'emalaika mëre na ték ki i polo i mac na lyél.

⁸ Én bino pwodo jö na ba ngeo Obanga éka na ba wörö gini Emuth na Bér ka Rwoth onu Yecu.

⁹ Én bino pwodogii ki can na bedo na twal éka ebino ryémögii ökö ki i nyim Rwoth éka ki i dheo më ték mëre

¹⁰ i nünö na én bino dwogo, én bino nwongo dheo ki both jögë kibec na leng éka wörö ki both jö na yee i kome. Un thon ibino bedo i kin-gi, pién iyee unu cadenwa na wan ekobo niwu.

¹¹ Èné ömiiwan elégö pírwu i karë kibec ek Obanga onu ömiiwu ibed jö n'opore ki

* 1:1 **Cilibwano** Baibul nökënë cwodo ni Cila.

cwodo mérë, éka ökönywu kí tékö mérë më cobo mitiwu kibéc na bécö na un itio pí yeeuwu.

¹² Cé nyíng Rwoth onu Yecu ebino wörö pírwu, éka un thon inwong dheo pírë pí kíca na yaa kí both Obanga onu éka Rwoth Yecu Kiricito.

2

Dwogo ka Rwoth

¹ Utmegowa, na lübérë kí köp i kom dwogo ka Rwoth onu Yecu Kiricito éka cökérë onu më rwaterë kódë, wan ékwaöwu ní.

² kür iwék thamawu orubere ökö piöpiö, cwinywu thon kür opodhi kadí pí köp k'adwarpiny onyo köp n'ëtitö onyo waraga mörö n'ekobo ní öya kí bothwa na kobo ní nínö ka Rwoth dong othuno.

³ Ngat mörö kür öbwölwu i yore mörö kékén, piën nínö ka Rwoth bara bino naka ka jém i kom Obanga obedo na tye éka atür cik thon onen, ngat na myero ebol i mac më kapiny.

⁴ Èn bino pyem éka bino tingere malö en kénë na löö gin na kibéc n'ecwodo ní Obanga onyo gin mörö më awöra, ék ebed i öt k'Obanga nakun nyuthere kénë ní en ebedo Obanga.

⁵ Ba ipo unu ní an akobo niwu köp ni i karë na an atye bothwu?

⁶ Un dong ingeo ngö na tye ka jükö, ék Ngat na Rac onen ka karë mérë n'opore örömö.

⁷ Piën müng më tékö k'atür cik dong tye ka tic; éntö ngat

na tye ka jükö pod mëdérë më jükö naka ka éryémö en ökö.

⁸ Cé atür cik bino nen éka Rwoth Yecu bino neko en ökö kí yamö më dhögë cé tyeko ökö i karë na en bino dwogo.

⁹ Bino k'atür cik bino yaa kí i tic ka Catan nakun tio kí koth twodo kibéc më tango, anyuth éka gin më aura gini,

¹⁰ en bino tic kí bwöl na reco kibéc i kom jö na bino rwenyo. Gin bino rwenyo piën ökwérö gini marö köp adyer na larögi.

¹¹ Pi manön, Obanga bino kethogí i thë twér më bwöl ek gin oyee köp më twodo

¹² ék köp olöö jö kibéc na yee köp më twodo éntö cwinygi yom i tímö gin na ba tye atür.

Ëyéröwu pí larë

¹³ Utmegowa na Rwoth marö, myero wan épwo Obanga pírwu karë kibéc piën Obanga öyéröwu i acaki laröwu pí Tipo Naleng na lonyöwu më bedo na leng éka pi yee köp më adyer.

¹⁴ Èn ocwodowu i larë ni k'Emuth na Bér na wan étitö niwu; ék ömii ïnywak unu dheo ka Rwoth onu Yecu Kiricito.

¹⁵ Pi manön utmegona, cung unu na ték éka imak unu pwony na wan epwonyowu kódë kadí kí köp më dhök onyo kí waraga.

¹⁶ Kobedini ék Rwoth onu Yecu Kiricito kikome éka Obanga Apap onu na marö onu kí kíca mérë okwe cwiny onu kí gen na bedo naka naka,

¹⁷ öcük cwinywu éka
öjíngwu i gin na kibec na bér
i tic éka i köp.

3

Kwac më lëga

¹ Më ajiki utmegowa, lëg
unu pírwa ék köp ka Rwoth
ömëdëre më këth piöpiö éka
ëgam kë wörö, kite n'onwongo
tye ködë bothwu.

² Lëg unu thon ék Obanga
ölärwa kë both jö na tímö bal
éka jö na reco; piën pathi jö
kibec énë tye kë yee.

³ Rwoth genere, én bino
miiowu tékö éka bino gwököwu
kë both ngat na rac.

⁴ Rwoth ömëowa gen i
komwu, éka wan etye kë gen
ni itye unu ka mëdëre anyim
më tio ngö na wan ekobo
niwu.

⁵ An alëgö ni Rwoth ötël
cwinywu i mar k'Obanga éka
idio cwiny na yaa kë both
Kiricito.

Cik më tio tic

⁶ Utmegowa, an aciköwu i
nyïng Rwoth onu Yecu Kiricito
më pokere ökö kë dhanö
mörö na bedo abeda abonge
tic éka na ba lübö pwony na
wan émiögü.

⁷ Un kikomwu ingeo na bér
kite na myero ipor unu kë
kitewa. Wan onwongo ba
ebedo abeda abonge tic i karë
na wan etye bothwu.

⁸ Wan ba écamö cem ka ngat
mörö abonge cülö, éntö wan
eyelere kë tic i kiceng éka i
kiwor ék kür eketh pëkö i kom
ngat mörö kë i kinwu.

⁹ Wan étimö kömanön pathi
ni wan epe kë twëro më
nwongo köny kë bothwu éntö
wan émirë kénwa më bedo
apor bothwu më alüba.

¹⁰ I karë na wan etye
bothwu, wan émiowu cik ni:
“Ngat n'ökwerö tic myero kür
ocem.”

¹¹ Wan ewinyo ni jö mokö
kë i kinwu bedo gini abeda
abonge tic éntö dönyö gini i tic
ka jö nökéné.

¹² Wan écikö koth jö nön
éka dökü ebakö dhöwa i Rwoth
Yecu Kiricito ni myero gin otii
ticgi ék ngat acélacél öpidhëre
kéné.

¹³ Éntö utmegowa, kür idher
unu më tímö gin na bér.

¹⁴ Ka ngat mörö ökwerö
lübö cik na tye i waraga ni,
myero iniang unu i kom ngat
nön na bér, ék kür iribëre unu
kodë ék lewic ömakü.

¹⁵ Kür iter unu én na calö
langö éntö na calö ömïnwu.

Köp më ajiki

¹⁶ An alëgö ni Rwoth më
kuc kikome ömiiwu kuc i karë
kibec éka i yodhi kibec. Rwoth
obed kodwu kibec.

¹⁷ An, Paulo, acöö moth ni
kë cinga an kikoma, man énë
kite na an aketho kë cinga i
waragana kibec. Man énë kite
na an acöö kodë.

¹⁸ Kïca ka Rwoth onu Yecu
Kiricito obed kodwu kibec.

1 Timoteo

*Köp na tye i waraga ka
Paulo më acël both Timoteo*

Timoteo n'obedo ngat n'oye Kiricito kï i Acia, onwongo aya mërë obedo Ayuda ëka apap mërë obedo dhanö më Grecia. Timoteo owothro ki Paulo ëka ökönyö ën i tic më titö Emuth na Bër.

Waraga ka Paulo më acël both Timoteo makö köp adek na pïrgi tek.

Köp më acël na tye i waraga ni obedo më jükö pwony më twodo na tye i kin jö n'oye Kiricito. Pwony ni orubere kï thama k'Eyuda ëka jö na ba obedo Eyuda, n'onwongo ocung i kom köp më yee ni lobo ni obedo gin na rac ëka ni ngat mörö twëro nwongo larë ka cë tye kï müng më ryékö ëka kï lübö pwony mökö na calö kwero cem mökö ëka kwëro nyom. Waraga ni thon tye kï köp na makö kite më tëla i kin jö n'oye Kiricito ëka wörö Obanga, ëka kï kite n'ëtëla ka jö n'oye Kiricito ëka eköny tic myero obed ködë. Më ajiki mërë, Paulo miö thama both Timoteo më bedo atic na bér ka Yecu Kiricito ëka kite na myero ën oti ködë both gurup na papath n'oye.

¹ Waraga ni öya kï both Paulo n'obedo akwëna ka Kiricito pi cik k'Obanga Alar onu ëka Kiricito Yecu na gen onu tye i kome.

² Both Timoteo athïna më adyer i yee:

Obanga Apap ëka Kiricito Yecu Rwoth onu ömïïwu gum, kïca ëka kuc.

Jükö pwony më twodo

³ Ì karë na an aya më cïdhö yo Macedonia, an amitö ni in idong i Epeco ek içik jö mökö kür dökï opwony gïni pwony më twodo

⁴ onyo kür oketh gïni cwinygi i kom köp mökö më ödödö, ëka kï nyïng mökö na gïn öryëö na böcöböcö na lübö thëkwarö. Koth jami ni kelo pyem këkën, ba könyö yüb k'Obanga—n'ocung i kom yee.

⁵ Tyen köp më cik ni ènë ni jö n'oye kibëc myero obed kï mar na dhanö tye ködë ka cwinye leng ëka na kite bér, na bal mörö ope i kome, ëka yee mërë twodo mörö ope iie.

⁶ Jö mökö ölökerë gïni ökö kï i kom köp ni cë ödönyö gïni më twakö köp atata na könny mërë ope.

⁷ Gïn mitö bedo epwony cik k'Obanga, èntö ba ngeo gïni köp na gïn twakö, onyo ngö na gïn tye ka twakö na gïn ocung iie na tek rwök.

⁸ Wan engeo ni cik bér ka dhanö mörö otio ködë i yoo na bér.

⁹ Wan thon engeo ni cik ba eketho pi jö na kitegi atir, èntö eketho pi ètür cik ëka pi jö na jém gïni, pi jö na ba lworo Obanga ëka pi ébal, pi jö na ba leng gïni, jö na ba ketho cwinygi i kom Obanga, pi jö na neko apapgï onyo ayagi, pi enek,

¹⁰ pi jö na tïmö tïm më ölyang, jö na bedo kï cwö ewodhgï, onyo jö na kwalö

dhanö ëka rwenyo gïnï ködgi ökö i müng, etwodo, jö na kwongo kwong abonge thérë—onyo ngat mörö na kwö mérë ba rwatérë kï pwony më adyer,

¹¹ man ënë pwony na nwongere i Emuth na Bér n'émia më atïta, Emuth na Bér na titö pï dheo k'Obanga më gum.

Kïca k'Obanga both Paulo

¹² An amiö pwöc both Kiricito Yecu Rwoth onu, na ën ömïa tékö, ëka önënö nï abedo ngat na genere, ëka öyéra më tio tic mérë.

¹³ Kadï bed yam onwongo abedo ngat na yanyö nyïng Kiricito ëka abedo ka ketho ayele i kom jögë, ëka ngat na ger, éntö Obanga obino onyutho kïca mérë i koma piën an abino atimö manön kibëc pï kwia pïny abonge yee.

¹⁴ Kïca ka Rwoth onu ömëdérë na thwönë rwök i koma, kanya acël kï yee ëka mar na tye i Kiricito Yecu.

¹⁵ Man ënë köp adyer na myero dhanö kibëc oyee gïnï: Kiricito Yecu obino i lobo më larö ébal —na an ënë abedo abal na lõogi.

¹⁶ Éntö pï tyen köp ni ën obino onyutho kïca mérë botha ëk i an, abal na lõö kï kin ébal, Kiricito Yecu onyuth dïö cwinye më aura botha na calö apor both jö na bino gïnï yeo ën, ëka onwong gïnï kwö na ba thum.

¹⁷ Wörö ëka dheo kibëc obed naka naka both Rwoth na lõö karë kibëc, na ba thöö, na

ba nen, Obanga acël kënë. Amën.

¹⁸ Athïna Timoteo, an amiö cik ni bothi na lübérë kï köp na yam edwarpïny okobo i komi, ëk ka in ilübö köpgï, ilwëny lwëny na bër,

¹⁹ nakun icung i yeeni na tek ëka na ii lër. Jö mökö ökwérö thama më i igi na nyutho nïgï balgï ëka ömïö yeegi dong öbalëre ökö.

²⁰ I kin-gï ënë Kumenayo ëka Alegijanda, na an amiögi i cing Catan ëk opwonygï öwëk gïnï yanyö Obanga.

2

Cik më lëga both Obanga

¹ Köp më acël na an aciki ködë ënë nï lëg pï jö kibëc. Lëg both Obanga ökönygï ëka ömïigï gum, ëka imii Obanga pwöc pïrgi kibëc.

² Lëg pï rwodhi ëka kï jö kibëc na tye gïnï i lõc, ëk ömii onu ebed kï kwö na yot n'ewörö Obanga nakun kite onu thon tye na bëcö gïnï.

³ Man bër, ëka yomo cwiny Obanga Alar onu,

⁴ na mitö nï jö kibëc ölarë gïnï ëka onge gïnï köp më adyer.

⁵ Piën Obanga tye acël, ëka ngat acël na rïbö Obanga kï dhanö tye acël, na ënë Kiricito Yecu,

⁶ na ën ömirë kënë më kökötö jö kibëc. Man ënë caden n'Obanga ömïö i karë mérë n'opore.

⁷ Man ënë ömïö Obanga öyéra më titö ëka më bedo akwëna më Emuth na Bér—an atye ka kobo köp adyer, an ba

abedo atwodo. Obanga oora më pwonyo Erok kï köp i kom yee éka adyer.

⁸ Pi manön amítö nü cwö öleg gini Obanga i kabedo kibec nakun tingo cing-gi na leng malö abonge akémö onyo dhaa.

⁹ An thon amítö nü mon myero orukere na bér, kï wörö, nakun gwökérë gini, pathi kï yer wic n'ekedo, onyo gol, onyo aculo, onyo ruk mokö më wel na malö,

¹⁰ éntö bërgi myero onen i tic na bëcö na gin tio, manön énë gin na mitérë both mon na cwodere gini kën-gi nü gin jö na wörö Obanga.

¹¹ Dhakö myero opwonyere alilëng éka obed kï winy.

¹² An ba ayeo nü dhakö myero opwony onyo më bedo kï twër i kom écwö; én myero öling alinga.

¹³ Pién Adam énë écakö cweo, éka dong Eba.

¹⁴ Éka pathi Adam énë ébwölö, éntö dhakö énë ébwölö éka ödökö abal.

¹⁵ Entö dhakö bino larö kwö mérë i karë më nywöl –ka én bino mëdérë më bedo kï yee, mar éka bedo na leng nakun gwökérë kënë.

3

Etëla ka jö n'oye Kiricito

¹ Man énë köp më adyer: Ka cë dhanö mörö mitö tic më bedo atël jö n'oye Kiricito, nwongo én omítö tic na bér.

² Atël jö n'oye Kiricito myero obed abonge köp mörö n'ejükö én ié, obed kï

dhakö acél, ögwökérë kënë, obed ngat na ryék, obed ngat n'ewörö, obed ngat na gwökö welo, obed ngat na twëro pwony,

³ na ba obedo amérö, na ba obedo ngat na kwiny, éntö na mwol, na ba dhaa atata, na ba obedo ngat na marö lïm.

⁴ Myero obed ngat na lõö jö më ödë na bér éka önën nü éthinë winye kï wörö n'opore.

⁵ Ka ngat mörö ba twëro lõö ödë na bér, én twëro gwökö jö n'oye Kiricito n'obedo gini jö k'Obanga nïngö?

⁶ Myero kür obed ngat na nyen na pod olökérë alöka, müö kethere malö k'awaka, cë podho ökö, müö köp lõö én na calö Yam ölöö Catan.

⁷ Më ajiki, én myero obed dhanö na jö na ba obedo élübkör Yecu wörö, ek kür okel lewig i kome éka omii én omok i owico ka Catan.

⁸ Komanön thon, éköny tic i kin jö n'oye Kiricito, myero obed gini jö n'ewörö, jö na dhögï ba tye arïö, jö na ba obedo émadh köngö rwök, éka kür obed gini eworo më nwongo lïm.

⁹ Gin myero obed jö na niang na bér i müng më yee onu, nakun cwinygi leng.

¹⁰ Myero kono étëmgï, ka enwongo nü köp mörö na rac ope i komgï, cë émiligï otii na calö éköny tic i kin jö n'oye Kiricito.

¹¹ Komanön thon, mon-gi myero obed mon n'opore më awöra, na ba obedo jö na twakö köp më twodo i kom jö nökënë éntö obed gini jö na

gwökérë kën-gï éka na genere
gïnï i jami kïbëc.

¹² Aköny tic i kin jö n'oye
Kiricito myero obed kï dhakö
acël éka myero ölöö ëthïnë éka
ödë na bër.

¹³ Jö n'otio na bër na calö
ëköny tic i kin jö n'oye Kiricito
nwongo gïnï dito pïrgi kën-gï,
éka dökö gïnï jö na cwinygi
ték i kom yee na tye i Kiricito
Yecu.

¹⁴ Kadï bed an atye kï gen
më bino yo bothi na cwöcwök,
an atye ka cöönö bothi cik ni
gïnï ek,

¹⁵ ka an aruu, in ibino
ngeo kite na myero jïi obed
kodë i öt k'Obanga, na ènë
jö n'oye Kiricito n'obedo gïnï
jö k'Obanga na kwö, wîr éka
acaki thërë më köp adyer.

¹⁶ Adyer onu kïbëc eyee nï
müng më dini na onu étitö
pïrë dit rwök:

En onyuthere i kom,
ëkwanö en nï kite atür pï
Típo Naleng,
emalaika önönö gïnï en,
étitö pïrë both Erok,
ebino eyeo en i lobo kïbëc,
éka dong etero en malö i
dheo.

4

Epwonye n'obedo etwodo

¹ Típo Naleng kobo atür nï
karë mörö i anyim jö mökô
bino lökérë gïnï ökô kï kom
yeegi, cë cakö gïnï lübö tipo na
reco më bwöl éka kï pwony na
yaa kï both cene.

² Pwony n'obedo köman yaa
kï both jö n'obedo etwodo, na
thama na tye i ïgi na nyutho
nïgï balgï odhil ökô na calö

gin n'ëwangö kï nywenyo na
lyeth.

³ Gin jükö jïi nï kür onyom
gïnï éka cükögï nï kür öcam gïnï
cem mökô n'Obanga oketho
ek jö na yee en éka kï jö na
ngeo köp adyer ögam gïnï kï
pwöc.

⁴ Jami kïbëc n'Obanga
oketho bëcö, éka ba tye mörö
na myero ëkwër ökô ka égamö
kï pwöc,

⁵ pïen nwongo ëlönyö kï köp
k'Obanga éka kï lëga.

⁶ Ka in ibino müö pwony ni
both utmego, in ibino bedo
atic ka Kiricito Yecu na bër,
n'ëpidhö kï köp më yee éka kï
pwony na bëcö na in ilübö.

⁷ Kwër köp mökô më mingo
na thërë ope na ba obedo
më lworo Obanga. Pwonyiri
keni më lworo Obanga.

⁸ Pïen pwony më ryëö ler
kom tye kï köny mökô, éntö
lworo Obanga tye kï köny i
yodhi kïbëc, pïen twëro kelo
kwö më karë ni éka kï karë na
tye ka bino anyim.

⁹ Man ènë köp më adyer na
myero jö kïbëc oye.

¹⁰ Manön ènë ömïö onu etio
rwök éka eyelere pïen eketho
gen onu i kom Obanga na
kwö, na ènë obedo Alar ka
jö kïbëc, éka rwök mërë pï jö
n'oye.

¹¹ Pwony cik ni gïnï éka ikob
nï jö kïbëc më tïmö gin na in
ikobo.

¹² Kür iye ngat mörö ocai
nï in pod itidï, éntö bed apor
both jö n'oye i twak, i kwö,
i mar, i yee éka bedo abonge
gin mörö na rac.

¹³ Mii karëni më kwanö Cöc na Leng i nyim lwak, i titö köp mérë éka më pwonyogï naka ka an adwogo.

¹⁴ Tii kï müc n'emii i karë n'edwarpiny ötwak éka edite ka jö n'oye Kiricito omii gum kï ketho cïng-gï i wii.

¹⁵ Keth köp ni i tic, keth cwinyi iie, ek jö kibec önen kite na in itye ka woth ködë anyim.

¹⁶ Gwokiri keni éka igwök pwonyni thon. Makgï na ték, piën ka itimö kömanön, in kikomi ibino lari kanya acel kï jö na winyo köpni.

5

Kite më tic both jö nökënë

¹ Kür itwak kï gero both adwong mörö n'otii, entö twak ködë na calö apapni. Myero imak awope na calö utmegoni,

² mon n'otii na calö ayani, éka kï mon na thïnö na calö amegeni, abonge thama mörö na rac.

³ Mii wörö both mon na cwögï öthöö, na mitö gïnï köny rwök.

⁴ Entö ka dhakö na cwörë öthöö na tye k'ethinö onyo k'ekwaë, myero gïn kono öcak pwonyo tic më dinigï kï gwökö pacögï nakun miö gïnï köny both jö n'onywölögï. Man enë gin na yomo cwiny Obanga.

⁵ Entö dhakö na cwörë öthöö n'odong kënë abonge ngat mörö na miö en köny, ketho gen mérë i kom Obanga éka mëderë më lëga both

Obanga kiceng éka kiwor pi köny.

⁶ Entö dhakö na cwörë öthöö na rangö yom cwiny më jami na bëcö kékën nwongo öthöö kadï bed pod kwö.

⁷ Mii cïk ni both jïi, ek obed gïnï abonge köp mörö n'ejükögi iie.

⁸ Ka cë dhanö mörö ba miö köny both wede mérë, éka rwök mérë pi jö më ödë, nwongo dong ökwérö yee mérë ökö, éka rac rwök na löö ngat na ba oyeo Obanga.

⁹ Myero kür écö nyïng dhakö mörö na cwörë öthöö na mwaka më dit mérë bara thuno pyer abicël, éka myero obed dhakö n'obedo kï cwörë acel kékën,

¹⁰ myero obed ngat na ngere pi tic mérë na bëcö, na calö gwökö éthinö, ngat na jölo wele, ngat na lwökö tyen jö k'Obanga, ngat na könyö jö na pëkö diögï, éka ngat na mire pi tic na bëcö i yodhi kibec.

¹¹ Entö pi mon na pod thïnö na cwögï öthöö, kür iketh nyïng-gï i kin jö nön. Ka miti më komgï ödiögï, miö kwérö gïnï ketho gen-gï i kom Kiricito ökö, cë cakö gïnï bedo kï miti më nyom.

¹² Pi manön miö kelo ngölö köp i komgï, piën nwongo ötürö gïnï cikëre na mëgi më acel.

¹³ Mëd i kom manön, lökëre gïnï dökö jö na komgï wac éka nwongo bedo gïnï ka woth awotha i öt kï öt. Gin ba obedo jö na komgï wac kékën,

ëntö dökö gïnï jö na twak atata, éka bedo gïnï jö na rïdérë i gin na ba obedo mëgi, bedo ka twakö gïnï köp na ba myero ötwak gïnï.

¹⁴ Pi manön ömïö akobo both mon na thïnö na cwögi öthöö ni myero önyömérë gïnï ek önywöl gïnï éthïnö, éka ölöö gïnï pecigi ek kür ömïi karë both lang onu më twakö gin mörö na rac i kom onu.

¹⁵ Piën jö mökö kï kin-gï dong ölokëre gïnï ökö më lübö kör Catan.

¹⁶ Ka cë dhakö mörö n'oye Kiricito tye kï mon thöö na én gwökögï, én myero ömëdérë më könögï ek kür oketh pëkõ i kom jö n'oye Kiricito, ek jö n'oye Kiricito obed gïnï ka könö mon na cwögi öthöö na mitö ekonygi.

¹⁷ Edite na löö jö n'oye Kiricito myero émilgï wörö rwök, pol mërë jö na ticgi obedo më titö köp k'Obanga éka pwony.

¹⁸ Piën Cöc na Leng kobo ni, "Kür itwe dhol thwön ka tye ka nyönö kal më apwoda," éka ni, "Atic myero écül öcara mërë."

¹⁹ Kür iye köp mörö më adoth i kom adit mörö thwara ka ecaden ariö onyo adek omoko gïnï kokogï i kome.

²⁰ Edite na tïmö bal myero ijükgï ökö i nyim jii, ek ömïi jö nökënë obed gïnï kï lworo.

²¹ An dong aciki, i nyim Obanga éka i nyim Kiricito Yecu k'emalaika n'eyérö, më

gwökö cïk ni gïnï abonge lengere, éka kür ibed ngat na lengere.

²² Kür ibunyiri më ketho cingi* i wi ngat mörö piöpiö, éka kür iribiri kï jö nökënë i kom balgï. Ëntö myero ibed na leng.

²³ Cakëre kobedini, kür imodh pii kékën, éntö cak madhö köngö ölöök na nönök më könö ii pi two na maki karë kï karë.

²⁴ Bal ka jö nökënë nen ökö kanya leng, na bara othuno anyim i kabedo më ngölö-köp; éntö bal ka jö nökënë lübö körgï.

²⁵ I yoo acël nön, tic na bëcö nen ökö kanya leng, éka ba tye mörö na twérö kanérë.

6

¹ Jö kibëc na tye gïnï i thë lög më opii, myero otii gïnï k'editegï na calö jö na myero ewörgï kï wörö n'opong, ek ngat mörö kür ötwak köp na rac i nyïng Obanga éka pwony onu.

² Jö na dong tye k'editegï n'oye myero kür ökwër gïnï nyutho wörö bothgï, piën gïn obedo utmego. Nakaka manön, gïn myero otii tic bothgï na löö, piën jö na nwongo könö kï i ticgi obedo gïnï jö n'oye éka jö na gïn marö. Man énë jami na in myero ipwony éka ikönygi i yodhi kibëc na in itwérö.

Marö lim

³ Ka ngat mörö pwonyo pwony na path nakun ba lübö

* ^{5:22} Ketho cingi Man obedo wiro ngat mörö më bedo atic k'Obanga.

köp adyer ka Rwoth onu Yecu Kiricito éka kï kite na myero jö n'oye ökwö ködë,

⁴ nwongo én kethere malö kënë k'awaka, éntö ba ngeo gin mörö kadï k'acël. Én nwongo opong kï par na reco më pyem kï dhaa i kom köp mökö, na kelo nyeko, pyem, ayeny kï par na reco na miö gen rwenyo ökö kï i kin dhanö,

⁵ éka miö jö na thamagi ba tio, n'ope gïni dong kï köp më adyer. Gin thamö gïni ni dini énë obedo yoo më nwongo lönyö.

⁶ Lönyö dit rwök i dini ka cë iyeng kï gin mörö kékën na in itye ködë.

⁷ Piëن onu ba ekelo gin mörö i lobo, éka onu ba ebino tero gin mörö kï i lobo.

⁸ Éntö ka onu etye kï cem kï ruk, jami ni bino römö onu.

⁹ Jö na mítö bedo élonyö dönyö gïni i atématéma cë podho gïni i bal, éka moko gïni i miti na pol më mingo na miö rwenyo gïni éka thöö gïni ökö.

¹⁰ Piëن marö lïm énë acaki më gin na reco kibëc. Man énë gin n'omii jö mökö yaa gïni ökö kï i yee, na tye gïni kï miti rwök i kom lïm, éka miö can na pol ata bino i komgi.

Lwëny na bér më yee

¹¹ Éntö in, dhanö k'Obanga, kwér jami ni kibëc, éka iketh cwinyi i kite n'atür, i lworo Obanga, i yee, i mar, i diö cwiny éka kï mwolo.

¹² Lwëny lwëny na bér më yee. Mak kwö na ba thum na ték na yam ecwodii ië i karë na

in ituco yeeni i nyim ecaden na pol.

¹³ An aciki i nyim Obanga na miö kwö both gin na kibëc, éka i nyim Kiricito Yecu, na én otuco yee mérë na bér i karë na én omiö caden mérë i nyim Pontio Pilato:

¹⁴ Gwök cik n'ëmiö bothi abonge bal mörö onyo köp mörö n'ejuki ië, naka ka Rwoth onu Yecu Kiricito bino nen,

¹⁵ n'Obanga bino kelo i karë mérë kikome—Obanga, n'ëpwöyö, én acël kékën énë Won Twér, Rwoth ka rwodhi,

¹⁶ na én Obanga acël kénë na ba thöö, na bedo i tar mörö na ngat mörö ba römö nyikö na cwök ködë, na ngat mörö pod bara önenö onyo twérö nénö. Wörö éka twér na ba jik obed bothe na twal. Amén.

¹⁷ Cik élonyö më karë ni, òwék gïni wakérë, éka kür oketh gïni gen-gï i kom lönyö, na gen mörö ope ië, éntö oketh gïni gen-gï i kom Obanga na miö onu jami kibëc na büp na yomo cwiny onu.

¹⁸ Kob nügi otii tic na bëcö, éka obed gïni jö n'ölony i tímö gin na bér. Po wigü më miö jamigü kï yom cwiny, éka önywak gïni gin na gïn tye ködë.

¹⁹ Ka ötimö gïni kömanön, nwongo ökanö gïni lönyö na bér pürgü kën-gï pi karë më anyim, ék ömak gïni kwö na énë kwö më adyer.

²⁰ In Timoteo, gwök gin n'ëmiö i cingi. Gwokiri kï kom köp mökö n'ëtwakö na ba obed më wörö Obanga, éka

kï kom pyem mökö na yaa
kï gin na gïn cwodo twodo
twodo nï ngec,

21 na jö mökö orwenyo
yeegi ökö pï yeo koth twak ni.
Kïca k'Obanga obed kodwu.

2 Timoteo

*Köp na tye i'buk ka Timoteo
më arïö*

Waraga ka Paulo më arïö both Timoteo makö thama mérë na thwönë both Timoteo, na calö awodhe na könyö ën. Wi köp na pïrë tek ënë më dangö köp kibëc. Paulo ömiö thama éka öcükö cwiny Timoteo më mëdëre më miö caden i kom Yecu Kiricito, më cung na tek i kom pwony më Emuth na Bér éka ki Cik na Côn, më tio tic mérë na calö apwony éka atit köp k'Obanga, i karë më can kibëc éka i karë na jii bino pyem ködë.

Paulo öcükö Timoteo më gwökëre ek kür ödöny i pyem më mingo na köny mérë ope, éntö balö jö na winyo köp mingo nonu.

Na lübëre ki köp ni kibëc, Paulo po wi Timoteo i kom apor më kwö mérë éka tyën köp—më yee mérë, diö cwiny, mar, dangö can i karë më ayela.

Moth n'öya ki both Paulo.

¹ Waraga ni öya ki both Paulo n'obedo akwëna ka Kiricito Yecu pi miti k'Obanga, na lübëre ki cikëre mérë më miö onu kwö na tye i Kiricito Yecu.

² Both Timoteo athina na an amarö:

Obanga Apap éka Kiricito Yecu Rwoth onu ömii bothi gum, kïca, éka kuc.

*Paulo öpwöyö Obanga pi
Timoteo*

³ An amiö pwöc both Obanga, na an atio bothe ki thama n'atir, kite na kwerena otio gini bothe. Kiceng éka kiwor an apo piri i lëgana.

⁴ Ka an apo i kom pii wangi, miö athamö më nënöni, ek ka twëre apong ki yom cwiny.

⁵ An apo i kom yeeni na twodo mörö ope iie, n'öcakö bedo both adhani Loi éka ayani Yuneki, éka an angeo ni yee nön tye bothi thon.

⁶ Pi tyën köp ni an apo wii më tic ki miç n'Obanga omii i karë na an aketho cinga i wii.

⁷ Pién Obanga ba ömiö onu cwiny më lworo, éntö cwiny na miö onu tekö, mar éka gwökëre kën jö.

⁸ Dong pi manön lewic kür ömakü më miö caden i kom Rwoth onu, onyo i koma na an abedo amabuc mérë. Ki tekö n'Obanga mii, yubiri më dangö can köda pi köp më Emuth na Bér.

⁹ Èn ölarö onu éka ocwodo onu më bedo jögë na leng-pathi pi gin mörö na onu etimö éntö pi tyën köp më yub mérë éka kïca. Kïca ni émiö both onu i Kiricito Yecu na bara ecweo lobo,

¹⁰ éntö kobedi dong enyutho ökö both onu i bino k'Alar onu Kiricito Yecu n'ökwanyö thöö ökö éka okelo kwö na bedo na twal n'onen kanya leng pi köp më Emuth na Bér.

¹¹ Obanga öyëra na calö akwëna éka apwony më titö Emuth na Bér ni.

¹² Man ënë gin n'ömiö an atye ka limö can kobedini.

Entö an lewic ba ömaka, piien an angeo ngat na yeena ocung i kome éka angeo ni en twérö gwökö na bér gin n'eketho i cinga naka i nänö nön.

¹³ Köp na in iwinyo ki botha, gwök na calö gin na pürgi ték më pwony, ki yee éka mar na tye i Kiricito Yecu.

¹⁴ Gwök gin na bér n'eketho i cingi pi tékö ka Típo Naleng na bedo ii onu.

¹⁵ In ingeo ni jö kibec na bedo gini i Acia öwëka gini ököt, éka Pugelo gin ki Kermogen tye gini i kin-gi.

¹⁶ An alégö ni Rwoth myero obed ki kica i kom pacö k'Oneciporo, piien en obedo ka kweo cwinya éka lewic ba obino ömakö en i koma i karë n'etwea i buc.

¹⁷ Entö i karë na en othuno i Roma, obedo ka rangöna rwök naka obino onwonga.

¹⁸ An alégö ni Rwoth myero ömii en onwong kica na yaa ki both Rwoth i nänö nön! In ingeo na bér rwök kit köny na pol na en ökönya kódë i Epeco.

2

Acikari na bér ka Yecu

¹ Timoteo, athina, cung na ték i kica n'emiö both onu i Kiricito Yecu.

² Gin na in iwinyo ki botha i nyim ecaden na pol, in thon ikob both jö na genere na römö pwonyo ki jö nökënë.

³ Dang gin na rac n'etimö i komi kanya acél kódwa, calö acikari na bér ka Kiricito Yecu.

⁴ Acikari mörö ope na tye i dhö tic na miö tic ki yokö

bodo wie, piien thama mëre tye ni myero eyom cwiny adit n'öcöö en i acikari.

⁵ Röm aröma, ka ngat na tye ka pyem i ngwëc, ba twérö löönö ngwëc ka ba ölübö cik më ngwëc.

⁶ Apur n'otio tic na ték enë myero öcak camö gin n'öcek ki i pwodho mëre.

⁷ Tham pi gin na an atye ka kobo. Rwoth bino miöni kite më niang i kom jami ni kibec.

⁸ Po i kom Yecu Kiricito, akwar Daudi n'Obanga ocero ki kin jö n'öthöö. Man enë köpna më Emuth na Bér,

⁹ na an atye ka lïmö can pïrë, nakun etwea ki nyör calö abal. Entö köp k'Obanga ba etweo.

¹⁰ Pi manön enë gin n'omiö atye ka lïmö can kibec pi jö n'eyerögë, ek gin thon onwong larë na tye i Kiricito Yecu, kanya acél ki dheo na ba thum.

¹¹ Man enë köp më adyer:
Ka onu ethöö kódë,
 onu thon ebino kwö
 kanya acél kódë;

¹² ka onu edangö can,
 onu thon ebino löc kanya
 acél kódë.
Ka onu ekwerö en,
 en thon bino kwérö onu,

¹³ ka onu ba egenere,
 en gire genere naka
 naka,
 pii en ba twérö kwérë
 kénë.

Atic n'Obanga pwöyö

¹⁴ Bed ka po wi jö k'Obanga i kom köp ni, éka icikgi dökë i nyim Obanga ek öwëk gini pyem i kom köp mökö; piien manön ba bino könyö ngat

mörö, entö balö jö kibec na winyo.

¹⁵ Täm kii tek me miri keni both Obanga na calö atic n'epwöyö, atic na lewic myero kür ömaki eka makö köp me adyer i yoo n'atir.

¹⁶ Kwér boko köp mökö na ba obedo me wörö Obanga, piien jö na dönyö iie bino rwenyo arwenya i kite me wörö Obanga.

¹⁷ Pwonygi bino keth calö bür na camö kom dhanö. Kumenayo gin ki Pileto tye ginii i kin jö nön,

¹⁸ n'ölökérë ginii ökö ki kom köp me adyer. Gin kobo ni cer ötimérë dong ökö, eka tye ka balö ginii yee ka jö mökö.

¹⁹ Entö acaki there n'Obanga oketho tye n'ocung na tek, na tye ki cöc i kome ni: "Rwoth ngeo jö n'obedo mögë," eka ni, "Dhanö acelacel na cwodo nyïng Rwoth myero ölokérë ökö ki i kom bal."

²⁰ I öt na thwonë, ba bedo iie jami me gol ki ryal kékëñ, entö bedo iie thon jami mökö n'eyübogi ki bao eka lobo; mökö eyübö pii tic na pire tek eka nökënë pii tic na pire ba tek.

²¹ Ka dhanö mörö ölönyérë nakun öwëkö kite mérë na reco ökö, en bino bedo gin me tic n'etio ködë i karë me dheo, kwö mérë bino bedo na leng, eka bino bedo dhanö na pire tek both Adwong nakun yübérë me tio tic mörö kékëñ na bér.

²² Pi manön, kwér miti me awobi ökö, entö iketh cwinyi i kite n'atir, yee, mar ki kuc,

kanya acel ki jö kibec na tye ka cwodo ginii Rwoth ki i cwinyi na leng.

²³ Kwér pyem me mingo ökö na bino pii kwia piny, piien in ingeo koth pyem na calö manön kelo dhaa.

²⁴ Atic ka Rwoth myero obed ngat na ba dhaa atata, entö myero obed ngat n'obedo akica both jö kibec, obed apwony na ryek na ngeo pwony, ngat na diö cwinye.

²⁵ Obed ngat na twero tiro jö na pyem ködë ki mwolo, ek karë nökënë Obanga twero miö jö nön cwiny me ngut ek öniang ginii na bér i kom köp adyer,

²⁶ cë miö ryekögi dwogo eka bino ginii bwöth ki kom pawaka ka Catan n'onwongo miögï tio gin na en mitö.

3

Kite ka dhanö i karë me ajiki

¹ Myero öniang unu ni i karë me ajiki, piny bino bedo na rac.

² Jii bino marö komgi kengi, nakun bedo jö na marö lim, jö na wakerë, jö na cao jii, jö na yanyo jii. Ba bino ginii winyo enyodogi, ba bino ginii miö pwöc mörö, bino bedo ginii jö na ba leng,

³ ba tye ginii ki mar, ba timö ginii kica both jii, obedo ginii jö na twakö köp me twodo i kom jö nökënë, obedo ginii jö na mitigi ba jükërë, jö na ger, jö na dag ginii gin na bér,

⁴ obedo ginii jö örörö, jö na tye atata na ba parö ginii piny,

jö na kethere gïnï malö kën-gï
ki wakërë, jö na marö kwö na
yot nakaka marö Obanga—

⁵ bino gïnï makö kite më
dini na nen ki yökö, éntö
kwërö gïnï tékö mérë ökö.
Pokiri ökö ki i kom jö na calö
manön.

⁶ Jö mököt tye i kin-gï na
dönyö gïnï i peci ka jö nökënë,
cë lõö gïnï thama ka mon
mököt na tye ki görü, na pëköt
më bal obuogï ökö, na mit-
igï tye na papath cë bedo ka
ywaögï tungi ki tungi,

⁷ nakun pwonyere gïnï
karë kibëc, éntö ba twërö gïnï
niang i kom köp adyer.

⁸ Jö nön röm aröma ki Yane
ëka Yambure na yam opyem
gïnï ki Muca. Gin thon tye ka
pyem ki köp adyer i kite acël
nön, ryëkögï dong öbal ökö,
ëka yeegï ba tye kakarë.

⁹ Éntö gin ba bino mëdérë
anyim piën mingogï nön bino
ngere ökö both lwak kibëc
calö më ka Yane ëka Yambure.

*Cik ka Paulo më ajiki both
Timoteo*

¹⁰ Éntö in, dong ingeo
pwonyna ökö kibëc, ki kite
na an abedo ka kwö ködë,
yübna kibëc inenö, yeena, diö
cwinya, mar na an atye ködë,
ki kite na an abedo ka dangö
ki can ködë,

¹¹ inenö thon kite na gin
obedo ka yelona ködë, ki
can na pol-dök ingeo gin
n'ötimérë i koma i Antiochia,
i Ikonio, ki Licitra, ayelayela
na pol na an anwongo. Éntö
Rwoth olara ökö ki ie kibëc.

¹² Adyer, jö kibëc na mitö
gïnï kwö i kite më lworo

Obanga i Kiricito Yecu ebino
yelogi,

¹³ nakun jö na reco ki jö
n'obedo gïnï etwodo bino gïnï
mëdérë ki bedo na rac rwök
na dong lõö ökö, nakun bwölö
gïnï jö nökënë ëka gin thon
ébwölögi.

¹⁴ Éntö na calö in, myero
imediri i gin na in ipwonyiri
ie ëka na in iyeo, nakun ingeo
jö na yam opwonyi gïnï,

¹⁵ ëka kite na in ingeo ki
Cöc na Leng ködë i karë më
thinoni na twërö miöni bedo
na ryëk i yoo më larë pi yee i
Kiricito Yecu.

¹⁶ Cöc na Leng kibëc écöö
pi tékö ka Tipo Naleng
k'Obanga. Könyö më pwony,
më coko, më tiro kite ka
dhanö, ëka më pwonyo
dhanö i yoo më kite atir,

¹⁷ ek dhanö k'Obanga obed
n'otengo, na nwongo öyübëre
i yoo kibëc më tio tic na bër
kibëc.

4

¹ Aciki i nyim Obanga ëka
i nyim Kiricito Yecu, na bino
ngölö köp ka jö na kwö ki jö
n'othöö, ëka ka bino dwogo
më lög na calö Rwoth, an
amiö cik ni bothi:

² Tit köp k'Obanga; bed ni
yubiri i karë na bër ëka i karë
na rac, tür jii, cokgï ëka icük
cwinyigï—nakun idio cwinyi
rwök ëka ki pwony na pürgi
ték.

³ Piën karë tye ka bino na
dhanö ba bino winyo gïnï
pwony më adyer. Nakaka
manön, gin bino rangö ep-
wonye na bino yomo cwinyigï

më kobo gin na ithgï mítö winyo.

⁴ Gin bino lökö ithgï ökö ki kom köp më adyer éka lökérë gïnï i köp mökö më ödödö.

⁵ Ëntö in, myero ibed ngat na gwökérë i karë kibëc, i dangö can, i diö cwinyi, tii tic më titö köp më Emuth na Bër, dök icob ticni kibëc na bër.

⁶ An dong écwök önyö remona calö gin më atyéra i wi keno tyér, éka karëna më wékö lobo ni dong cwök.

⁷ An dong alwényö lwény na bër, atyeko ngwëc, éka agwökö yee.

⁸ Kobedi dong ékanö nïna tok më kite atir, na Rwoth na ngölö köp atir bino miö botha i nïnö nön –éka pathi botha kékén, éntö both jö kibëc na cwinygi tye ka kürö pi dwogo méré.

Köp ka Paulo më ajiki

⁹ Tím kï ték më bino botha piiöpiö,

¹⁰ piien Dema dong öwëka ökö pi marö jami më lobo ni, éka öcidhö ökö yo Tecalonika. Krecen öcidhö yo Galatia, éka Tito öcidhö yo Dalmatia.

¹¹ Luka kënë énë tye kanya acél köda. Nwong kom Marako éka ibin ködë, piien én bër rwök éka könya i dhö ticina.

¹² An aoro Tukiko öcidhö yo Epeco.

¹³ Ka in ibino, kel nïna böngü na bor na yam awëkö i Teroa i pacö ka Karpo. Kel thon bukena nökënë na pïrgi ték n'eyübö kï pyen.

¹⁴ Alegijanda n'obedo athedh mola ötimö tïm na rac

rwök i kom, Rwoth bino cülö én i kom tïm mérë nön.

¹⁵ In thon myero igwokiri rwök ködë, piënen én obino opyem rwök i kom köp onu.

¹⁶ I pidona më acél, ngat mörö ope n'obino ocung pïra. Jö kibëc obino öwëka gïnï ökö. Pi manön Obanga kür öngöl köp i wigï.

¹⁷ Ëntö Rwoth ocung ka ngeta éka ömia tékö, ek an abed ka tuco köp mérë kakarë, ek Erok kibëc owiny gïnï. Éka Rwoth obino olara kï i dhö kibwor.

¹⁸ Rwoth bino laröna kï i kom gin na reco kibëc, éka bino kelona na bër i ker mérë më polo. Dheo obed bothe naka naka. Amén.

Moth më ajiki

¹⁹ Moth Piricila gin k'Akwila, kï jö më pacö ka Oneciporo.

²⁰ Eracito obedo i Korinti, éka awëkö Tropimo na two i Miletö.

²¹ Tím kï ték ibin na bara karë më ngicö öcakérë. Yubulo omothi, Puden gin kï Lino, Kalaudia, éka utmego kibëc.

²² Rwoth obed kodi. Kïca mérë obed kodwu kibëc.

Yakobo Köp na ut i waraga ni

Waraga na Yakobo öcöö obedo köp n'écökö kanya acël më pwonyere na myero eketh i tic, écöö both "jö k'Obanga kibec n'ökéth gini i wi lobo thükü." Acöc otio ki kwa cöc na papath n'ëkanö tyenë ökö më miö pwonyere na lübö ryékö n'eketho i tic éka ki kite n'Ekiricito myero obed gini ködë. Ki kom kite k'Ekiricito en otio ki wi köp na papath na calö lönyö éka can, atëmatëma, kwö na bér, apokapoka, yee éka ketho gin mörö i tic, kite më tic ki lëb, ryékö, dha, awaka éka mwolo, ngölö köp both jö nökënë, wakérë, diö cwiny, éka lëga.

Waraga ni twakö köp na pïrë ték i kom ketho gin mörö i tic na wotho kanya acël ki yee, i kite më tic më dini k'Ekiricito.

Moth n'öya ki both Yakobo

1 Waraga ni öya ki both Yakobo atic k'Obanga éka Rwoth Yecu Kiricito.

Both kaka apar wie arïö n'ökéth gini i wi lobo thükü.

Amothowu.

Yee éka dangö atëmatëma

2 Utmegona, bed unu ki yom cwiny na thwönë ka étémöwu i yodhi na papath,

3 piën ingeo unu ni témö yeewu miö idio unu cwinywu.

4 Wëk unu diö cwiny ocob tic mérë ék ibed unu jö n'otengo, na bal mörö ope i komwu éka dökü ibed unu na gin mörö thon ba orem ki bothwu.

5 Entö ka ngat mörö tye i kinwu na ryékö mérë nönök, myero en ökwa ki both Obanga na miö both jö kibec ki yom cwiny, nakun ba coko ngat mörö, éka ebino miö bothe.

6 Entö ka en lëgö, myero en oyee éka kür obed ka kalakala, piën ngat na tye ka kalakala röm ki pii më nam na tagere, na yamö cwarö.

7 Dhanö nön myero kür ötham ni en ebino nwongo gin mörö ki both Rwoth,

8 piën en obed dhanö na thama mérë arïö, na ba cung na ték i jami kibec na en tímö.

Can éka lönyö

9 Jö n'oye n'obedo écan myero öwakëre gini ka etingogü malö,

10 éka ngat n'obedo alönyö myero öwakëre ka édwökö piny, piën en bino rwenyo calö thur lum.

11 Ceng donyo ki lyetho mérë éka nero lum ökö, thure öny cë lengo mérë bal ökö. I kit yoo acël nön, ngat n'ölöny bino rwenyo ökö i dyere tic mérë më karë kibec.

Bwöl éka atëmatëma

12 Ngat na cung na ték i atëmatëma tye ki gum, piën ka en ölöö atëmatëma, en bino nwongo tok më kwö n'Obanga öcikëre më miö both jö na marö en.

¹³ Ka ēbwölö ngat mörö, én kür okob ni, “Obanga énë öbwöla.” Piën gin na rac ba twérö bwölö Obanga, éka én thon ba bwölö ngat mörö.

¹⁴ Éntö ngat acälacël miti mérë kénë énë bwölö én, ywaö én ökö, éka ömö cwinye.

¹⁵ Cé kinge ka miti dong Öyac, nywölö bal. Bal ka ödöngö n'otengo dong, nywölö thöö.

¹⁶ Utmegona më amara, kür iwék ēbwölwu.

¹⁷ Gin mörö na bér éka mëkibéc na bal mörö ope ië bino kí malö both Obanga Apap, na énë acwec më tar na ryëny, na ba lökérë calö tipo na wîrë.

¹⁸ Én öyérö më nywölö onu kí köp mérë n'adyer, ék onu ebed calö cem na tye i pwodho n'öcakö cëk kí kin jami kibéc n'ecweo.

Winyo éka tiino

¹⁹ Utmegona më amara, ngeeunu köp ni: Dhanö acälacël myero owiny köp piöpiö, éntö kür myero öbünyérë më twak, éka kür akëmö ömak én piöpiö.

²⁰ Piën akëmö ka dhanö ba cobo kit kwö n'atir n'Obanga mitö.

²¹ Pí manön, kwér unu gin na kibéc më lewig éka kí tím na reco na tye i kwöwu. Gam unu kí mwolo köp n'Obanga öpidhö i cwinywu na twérö laröwu.

²² Éntö bed unu jö na ketho gin n'ëtwakö i tic. Kür ibed unu jö na winyo awinya kékén nakun ibwölérë unu kenwu.

²³ Piën ka dhanö mörö obedo ngat na winyo köp éka ba ketho i tic, én bedo calö ngat na rïpö wangë kí i kiyo.

²⁴ Éntö ka otyeko dong rïpërë, cïdhö ökö éka cïcüth wie wil ökö i kite na én ebedo kóde.

²⁵ Éntö ngat na rïpö i cik na bal mörö ope ië na kelo kuc, éka ketho thama mérë ië, na wie ba wil i kom gin na én owinyo, éntö tio gin nön—én bino bedo kïgum i kom gin na én tio.

²⁶ Ka ngat mörö thamö ni én ebedo adini nakun ba gwökö lëbë, én nwongo tye ka bwölérë kénë kí i cwinye éka dini mérë köny mérë ope.

²⁷ Dini na leng i nyim Obanga Apap na gin mörö na rac ope ië énë: më könyö éthïnö kic éka mon thöö na tye i can, éka më gwökérë kén kür gin mörö më lobo obali.

2

Apokapoka na thérë ope

¹ Utmegona, na calö jö n'oye Rwothwa më dheo Yecu Kiricito, kür dökì inyuth unu apokapoka mörö.

² Cé ka dhanö mörö n'oruko agith më gol éka kí böng na bëcö obino i athukowu, éka dökì dhanö n'obedo acan n'oruko böng na reco obino,

³ un içakö unu thamö pi ngat n'oruko böng na bëcö nakun ikobo unu ni, “Adwong, bed i then kany,” éntö both acan ikobo unu ni, “Cung kunön, onyo bed pïny ka tyëna kany,”

⁴ manön nwongo ba dong iketho unu apokapoka ökö

5 kinwu nakun ibedo unu
ëngöl-köp kï thama na reco?

6 Winy unu, utmegona më
amara: Pathï Obanga ënë
öyérö écan i lobo ni më bedo
ëlönyö i yee éka më leeno ker
na én öcikö both jö na marö
én?

7 Entö un icaö écan. Pathï
ëlönyö énë büröwu? Pathï gïn
éne terowu i nyim okiko?

8 Pathï gïn énë jö na twakö
köp na reco i kom nyïng na
bér n'ëmïö bothwu?

9 Entö ka inyutho unu
apokapoka, nwongo itimö
unu bal éka ebino ngölö niwu
köp na calö jö n'ötürö cik.

10 Piën ngat na gwökö
cik kibëc ka opodho i acël
nwongo ötürö cik kibëc.

11 Piën ngat n'okobo ni,
"Kür idöny i elomi," énë thon
okobo ni, "Kür ineki." Cé ka
ba idönyö i elomi entö ineko
nek, nwongo ibedo ngat na
türö cik.

12 Twak na un itwakö éka tic
na un itio myero obed na calö
më ka jö n'ebino ngölö köp
nigü kï cik na kelo kuc.

13 Piën ngölö-köp abonge
küca bino tímëre both ngat
mörö kékëna ba obedo tímö
küca. Ngat na tímö küca ba bino
lworo ngölö-köp.

Yee abonge tic

14 Köny mëre ngö, utmeg-
ona, ka ngat mörö kobo ni eut

kï yee nakun ba ketho i tic?
Koth yee nön twëro larö én?

15 Ka omego onyo amego
mörö ope kï böngü éka cem
më nïnö kibëc,

16 cë ngat mörö kï kinwu
okobo nïnë ni, "Apë kï kuc;
komi obed na mömör éka cem
na bér," entö nwongo ba imïö
én gin mörö na mitëre pï kom,
cë manön könyö ngö?

17 Kömanön thon, yee kékëna,
ka ba eketho i tic, nwongo
dong öthöö.

18 Entö ngat mörö bino
kobo ni, "In iut kï yee; éka an
aut kï tic."

Nyuth nïna yeeni abonge
tic, éka An abino nyutho nini
yeena kï ngö na an atimö.

19 Un iyee ni Obanga tye
acël. Bér! Cene thon yee
kömanön—éka komgi myël kï
lworo.

20 In amingo, imitö ni
enyuth nini ni yee abonge tic
köny mëre ope?

21 Kwarö onu Abraam yam
ba ekwanö ni kite atir pï gin
na én ötimö i karë na én ömïö
wode Icaka më aryëda i wi
keno tyér?

22 Un inenö ni yee éka tic
mëre onwongo tio kanya
acël, éka yee mëre onwongo
ocobere pï gin na én ötimö.

23 Ömïö Cöc na Leng
ocobere na kobo ni, "Abraam
oyee Obanga, éka ömïö
ekwanö én ni kite atir," éka
döki ecwodo én ni okone
k'Obanga.

24 Un inenö ni ekwanö
dhanö ni kite atir pï tic na én
timö éka pathï pï yee kékëna.

²⁵ İ yoo acël nön, yam Raab n'obedo ölaya ba ēkwanö ni kite atir pi ngö na en ötimö i karë na en öjölö öröth piny öka ömioögï owok ki i yoo nökënë na path?

²⁶ Kite na calö kom abonge yweo nwongo dong öthöö, yee abonge tic thon nwongo öthöö.

3

Lëb

¹ Utmegona, myero jö na pol ki kinwu kür obed gini epwonye, piën ingeo unu ni wan epwonye ebino ngölö niwa köp na tük na lös jö nökënë.

² Adyer onu kibec etimö bal i yodhi na pol. Entö ka cë ngat mörö ba ötimö bal i ngö na en kobo, nwongo en obed dhanö na kite bér éka döki twerö gwökö kome kibec.

³ Onu eketho nywenyo i dhö angole ek ömii owiny onu, éka onu erömö miö angle cihö kanya onu emütö.

⁴ Onyo nén unu apor ki kom mel. Kadï bed ni döngö gini rwök na yamö ene kólögi, entö adwö mel twerö wîrö wie cihö kanya en mütö ki gin n'edwö ki mel na tidi mörö.

⁵ Kömanön thon, lëb obedo dul kom na tidi mörö, entö wakëre i kom jami na thwon rwök. Nén kite na mac na tidi mörö wangö ki thwon bunga ködë.

⁶ Lëb thon cal ki mac, obedo tükö na rac na balö kom dhanö. Lëb balö kwö ka dhanö kibec, ketho kwö ka dhanö kibec kanya rac, éka en

kikome mac më kapiny moko i kome.

⁷ Dhanö römö gwökö kwa leeni kibec, winy, leeni na wotho i ngöm ki korgi éka leeni na kwö i pii,

⁸ entö ngat mörö ope na römö gwökö lëb. Lëb rac éka ba jükëre, opong ki kwir na rac.

⁹ Ki lëb onu épakö Rwoth onu éka Apap, éka ki lëb onu elamö ki jö n'ecweogï i the cal k'Obanga.

¹⁰ Ki i dhö jö acël nön donyo ki ié gum éka alem. Utmegona, man myero kür obed kömanön.

¹¹ Pii na mit éka pii na wac römö möl ki i wang kulo acël?

¹² Utmegona, yath ölam twerö nyakö yaü, onyo yath ollok twerö nyakö ölam? Kömanön thon pii na wac ba römö molo ki i wang pii na mit.

Ryëkö n'oya ki malö

¹³ Nga na tye ki ryëkö éka na niang ki i kinwu? Ek en onyuth tic mérë më ryëkö ki mwolo pi kwö mérë na bér.

¹⁴ Entö ka itye unu ki nyeko na reco, éka woro i cwinywu, kür iwakëre unu ködë onyo ikwér unu köp n'atir.

¹⁵ Koth "ryëkö" nön ba obino piny ki i polo entö obedo më lobo, ba wörö Obanga éka obedo më ka cene.

¹⁶ Kanya nyeko éka woro ut ié, nwongo anyóbanyöba éka tím na reco kibec ut ié.

¹⁷ Entö ryëkö n'oya ki i polo n'ocakö bedo na leng, éka bedo më kuc, më mwolo,

gamö thama kibëc na bëcö, opong ki kïca, éka nyakö nyige na bëcö, ngat na ute ködë ba poko kin dhanö, bedo na cwinye atir.

¹⁸ Jö na kelo kuc cwöö gïnï kodhi më kuc éka kaö gïnï kac më kite atir.

4

Makö okone ki lobo

¹ Ngö na kelo dha éka lwëny i kinwu? Pathï miti na reco na un itye ködë i cwinywu énen tye ka lwëny i dul komwu?

² Un ïmitö gin mörö éntö ba inwongo unu. Un ibedo ki miti i kom jami ka jö nökënë éka ineko unu nek, éntö ba inwongo unu gin na un ïmitö. Idhaa éka ilwënyö unu. Ba inwongo gin ïmitö unu, piën un ba ikwaö ki both Obanga.

³ Ka ikwaö unu, ba inwongo unu, piën ikwaö unu ki thama na rac, ek inwong unu gin na un ïmitö më cobo mitiwu.

⁴ Un jö ni balö watwu k'Obanga, ba ingeo unu ni makö okone ki lobo miö dhanö dökö langö k'Obanga? Ngat mörö na yëro më bedo okone ki lobo bedo langö k'Obanga.

⁵ Onyo un ithamö ni Cöc na Leng na yam écöö obedo köp na thërë ope na kobo ni, "Típo na yam Obanga oketho i kom onu tye ki nyeko rwök?"

⁶ Éntö én miö both onu kïca. Manön éné ömioö Cöc na Leng kobo ni, "Obanga pyem ki jö na wakérë,

éntö miö kïca both jö na mwol."

⁷ Pi manön dong, mire unu kenwu më bedo i the lög k'Obanga. Kwér unu Catan, éka én bino rïngö ökö ki bothwu.

⁸ Nyingi unu na cwök both Obanga, éka én thon bino nyingo na cwök bothwu. Lwök unu cïngwu, un ébal, éka ilonyerë unu i cwinywu, un jö na thamawu tye ariö.

⁹ Bed unu ki cwer cwiny, kum unu, éka ikok unu. Nyéröwu myero ölökerë ödök kumo, éka yom cwinywu myero ölökerë ödök kumo.

¹⁰ Mwolere unu i nyim Rwoth, éka én bino tingowu malö.

Ngölö köp i kom omeru

¹¹ Utmegona, kür itwak unu köp mörö na rac i kom awodhi. Ngat na twakö köp na rac i kom ömin mëre, onyo ngölö köp i kom ömin mëre, nwongo twakö köp na rac i kom cik éka ngölö köp i kom cik. Éntö ka in ingölö köp ki cik, in ba ibedo ngat na cobo cik éntö idökö angöl-köp.

¹² Ngat na miö cik éka angöl-köp tye acël, na éné ngat na twëro larö éka ki neko. Éntö in-ibedo nga më ngölö köp i kom awodhi?

Kür iwakiri pi nïnö na diki

¹³ Winy unu, un jö na kobo ni, "Tin onyo diki wan ebino cïdhö i pacö ni onyo maca, wan ebino tyeko mwaka acël kunön, wan ebino cadhö jamiwa éka enwongo magoba."

¹⁴ Un ba ingeo ngö na bino tümrë diki. Kwöwu tye nüngö? Un īcal k'edou na nen pü karë mörö na nönök, éka kinge rwenyo ökö.

¹⁵ Nakaka manön, un onwongo myero ikob unu ni, "Ka Rwoth oye, onu ebino bedo na kwö, éka étimö man onyo maca."

¹⁶ Kite na calö, un iwkérë éka inyuthere unu. Koth wakérë ni kibëc obedo gin na rac.

¹⁷ Ngat mörö na ngeo gin na bér na en myero ötim, éka ba ötimö, nwongo en ötimö bal.

5

Köp n'ëcikö both élönyö

¹ Winy unu, un élönyö, kok unu éka ikok unu rwök, pü can na tye ka bino më podho i komwu.

² Lönyöwu dong ötöp ökö, éka nyenyé öcamö böngwu ökö.

³ Gol éka ryawlu nyali ömakö ökö. Nyali ene bino bedo caden i komwu, éka bino camö ringo komwu calö mac. Un ityeko kanö lönyö pü karë më ajiki.

⁴ Nén! Öcara k'etic n'otio gïnï i pwothiwu na un ikwérö cülö, tye ka kok i komwu. Koko k'ækac owinyere i ith Rwoth Won Twér.

⁵ Un ikwö i wi lobo ki jami na bëcö rwök éka ki yom cwiny. Un icwëe unu, éntö nïnö më nekowu dong örömö.

⁶ Un ïngölö köp éka ineko unu ngat na kite atir, n'onwongo ba ökwéröwu.

Dïö cwiny i karë më can

⁷ Utmegona, dii unu cwinywu naka i nïnö na Rwoth bino dwogo ködë. Nén unu kite n'apur kürö ki gin na bér na cék ki i ngöm, éka kite na en diö ki cwinye ködë naka köth më cwir ki oro cwee.

⁸ Un thon, dii cwinywu éka icung unu na ték, piën dwogo ka Rwoth onyingo na cwök.

⁹ Kür ïngüngüta unu i kinwu kenwu, utmegona, onyo ebino ngölö niwu köp. Nén, Angöl-köp ocung i dholokek.

¹⁰ Utmegona, na calö apor më dangö can éka diö cwiny, nén unu apor ki both ed-warpiny na yam ötwak gïnï ki nyïng Rwoth.

¹¹ Na calö ingeo unu, wan ecwodo jö na yam ödangö can ni jö na komgi gum. Un iwinyo kite na Job ödangö ki can éka inenö unu gin na Rwoth onwongo mitö. Rwoth openg ki tïmö gin na bér éka kïca.

¹² Na löö kibëc, utmegona, kür ikwong unu kwong—ki nyïng polo onyo ki nyïng lobo onyo ki nyïng gin mörö kékén. Mii unu "Eyo" na mewu obed eyo, éka "Pe" obed pe, onyo ebino ngölö niwu köp.

Lëga më yee

¹³ Ngat mörö ki kinwu tye ki can? En myero öleg both Obanga. Ngat mörö tye na cwinye yom? En myero ower wer më pakö Obanga.

¹⁴ Ngat mörö tye na kome lith? En myero ocwod edong ka jö n'oye Kiricito ek öleg gïnï pïrë éka ewir en ki möö i nyïng Rwoth.

¹⁵ Ëka lëga n'élégö kï yee bino miö atwo cang, éka Rwoth bino tingo én malö. Ka én onwongo ötämö bal, ebino tïmö nïnë kïca.

¹⁶ Pi manön ngat acälacël otuc bal mërë both awodhe, éka ngat acälacël ölég pi awodhe, ék icang unu. Lëga ka dhanö na kite atür ték éka tio rwök.

¹⁷ Eliya onwongo obedo dhanö kamë onu. Én ölégö Obanga na ték nï köth kür

ocwee, éka köth ba ocwee i wi lobo pi mwaka adek kï nucu.

¹⁸ Én döki ölégö, éka ömïö köth ocwee kï i polo, éka lobo öcëgö cem.

¹⁹ Utmegona, ka cë dhanö mörö kï kinwu öngël ökö kï i köp n'atir, ngat mörö nökënë myero odwongi én cen,

²⁰ po unu i köp ni: Ngat mörö na bino lökö abal kï i yoo mërë na rac bino larö én kï kom thöö éka ebino tïmö kïca nïnë.